









THEOLOGIA

S C O T I

A PROLIXITATE,

ET SUBTILITAS EJUS

AB OBSCURITATE

LIBERA ET VINDICATA:

PER V. P.

JOANNEM GABRIELEM

BOYVIN.

VIRÆUM MINORITAM,

TERTIA PARS.



THEOLOGIA SCOTI

A PROLIXITATE,
ET SUBTILITAS EJUS

AB OBSCURITATE
LIBERA ET VINDICATA:

SEU
OPUS THEOLOGICUM
STUDENTIBUS
SIC ATTEMPERATUM,

UT IN ILLO HABEANT AD MANUS
Theologiæ Scholasticæ integritatem brevem
& profunditatem planam.

Authore V. P. IOANNE GABRIELE BOYVIN
in Provinciâ Franco-Parisiâ strictioris
Observantiæ

Lectore Theologiæ jubilato.

Et apud FF. Minores Virienses emerito Professore
ex eâdem urbe oriundo.

IN QUATUOR PARTES DIVISA,
TERTIA PARS.

Quinta Editio correctior.



PARISIIS,
Apud EDMUNDUM COUTEROT, viâ
Jacobæâ, sub signo boni Pastoris.

MDC. LXXXII.

Cum Approbatione & Privilegio Regis.







ILLUSTRISSIMO
NOBILISSIMOQUE

DOMINO D.

CAROLO DE LONGAULNAY,
BARONI DE LA FERRIERE,
DOMINO DE SEPTUANS,
ET DES FRESNES,
INSIGNIS ECCLESIAE BAIOCENSIS,
CANONICO,

NECNON DECANO MERITISSIMO.

Sapientiae purioris Antistiti, scientiarum Ge-
nio, sacrorum Vindici, pauperum Aërario,
disciplinae Ecclesiasticae Ornamento,
vitiis acerrimo Domitori.

FR. JOANN. GABRIEL BOYVIN;
Tertiam Operis sui Theologia partem.

O. D. C.



SAPIENTIAE patrocinium sibi
exoptant omnes, tuum ambit illa,
VIR CLARISSIME, magna
utique cliens & te digna, morum
Theologia. Cui; cum ex ipsius legi-
bus, ac praeceptis factum, quoad ejus fieri posset,
& confirmatum patronum quarerem, te potior
â iij.

E P I T O L A.

*in omni genere virtutis occurrebat nemo ; inde
metire quantus sis. Neque tamen , ut verum
fatear , & assentandi vitium ab omni hoc opus-
culo deprecere , invitare me potuit ad illud tibi
offerendum , Longalnea gentis vestra splendor ,
tameſi longè latèſque diffuſus ; non gentilitiorum
Heroum numeroſa ſeries , qui totum olim hoc
Gallia regnum implevere fortitudinis bellica mo-
nimentis , atque etiam nunc admiratione ſui ,
animos poſteriorum ; non per varias , & eas il-
luſtres Rohannaæ Gueſclina aque ſtirpis affinita-
tes , ductus ſanguis tuus , ut jam inde ab illis
Bertrandis , Longalneo & Gueſclinao , ac multò
ante utrumquè , nullus in ampliſſimis Aremoni-
ca Normaniaque Provinciis , illuſtrioris nota &
celebritatis heros extiterit , quem non inter avos
tuos numeres ; non denique externa illa opum aut
amplitudinis ornamenta ; qua quanta ſint nemi-
nem ſanè latere arbitror. Quis enim in ſuperio-
rum temporum hitoriis ità peregrinus atque
hospes , qui non Bertrandi & Luca Longalneo-
rum res fortiter geſtas , ſi minùs , è ſcriptorum
monimentis , at certè auditione , aliqua cognove-
rit ? Teſtes Aquitania & Normania , quanta in
Navarros & Anglos Bertrando Gueſclinao ſu-
premo ſtabuli Regii Præſectò , eodemque conſobri-
no ſuo freti geſſerint. Meminere Hiſpania , quàm
ſibi poſterisque amplam gloriam , nulla re magis ,
quàm in debellandis Mauris atque Saracenis ſan-
cta Crucis hoſtibus , defendendaque ſedis Apoſtolica
dignitate pepererint. Summi cubicularii dignitas ,
Pontiumque Vbritiorum & Cruciatoni admini-
ſtratio , quibus donata à regibus , Ludovico XI.
& Carolo VIII. veſtra fuit familia , non obſcura*

EPISTOLA.


extant illius erga regnum meritorum monumenta. Neque unquam satis apud posteros Francisci & Hervei Longalaeorum fortitudo pradicabitur, quorum alter torquatus Eques in pralio Biroquensi, alter verò inferioris Normania, Gisortii, & Caletensis agri praefectus, delitia populi, amor nobilium, haereticorumque terror, in pugna Ibraensi octogenarius annis, sed meritis gravior inter primos fortiter dimicans, summo omnium, sed praecipue regis desiderio, gloriosè occubuit. Vnde tanta apud omnes vestri generis fuit existimatio, ut Mareschallus de sancto Gerentio, cuius nominis splendor per totam sese Europam diffuderat, mancam gloriam, irritosque labores suos existimaverit, nisi ipse & filius, vestra pro sapia, quam Heroum feminarium verè appellarim, illustri nuptiarum foedere jungeretur. Nec silentio obruendum crediderim quòd Illustrissimus Avus vester, apud Henricum IV. gratiosus, Quillebovii administrator, promisso Mareschalli baculo insignitus fuisset, ni mors praematura Principis debitos honores meritissimo subripuisset; quodque iussu regis Ludovici XIII. milites conscribenti, tantus nobilium concursus nomina dederit, ut jam non turmam, sed exercitum, imò totidem Duces, ipsumque Imperatorem verè credideris. Vnde factum est, ut Rupetlam adveniens, non solum totius exercitus Cardinalisque Richelii, verum etiam ipsiusmet Regis admirationem in se converterit, à quo, uti par erat, benigno vultu & colloquio exceptus, quantis potuit precibus contendit, ut solus cum suis arcem regias infestantem copias, haud dubiam pollicitus victoriam, oppugnaret. Fabiam gentem.

EPISTOLA.

sola sponte sua Romani populi bella gerentem nemo non credidisset ; jamque spretis circumstantibus unde quaque periculis , involaret in hostem , nî Regis imperium tanto viro tenentis iuhibisset ; tantus ardor animi , atque ita paranda majorum exemplo gloria avidus ; quid enim ille in confer-
tissimos hostium globos cunctaretur irrumpere , cujus triumphale nomen non unius alicujus familia , sed ipsiusmet victoria nomen esse videtur ? Omitto ista omnia , VIR ILLUSTRIS-
SIME , licet amplissima , & in vestram hereditario jure transmissa familiam ; si tamen citra invidia suspi-
cionem reticere fas est , quæ Clarissimus Comes , frater vester , hisce superioribus annis in Hungaria pro Christo dimicans strenuè gessit ? cujus spectata
virtus inter alia præclare facta in eo præcipuè eni-
tuit , quod quadraginta & amplius Christiani no-
minis hostes , uno pralio , propria manu , tot illustri-
bus avis dignus sanè nepos , occiderit . Omitto , in-
quam , ista omnia ; habes alia majora , quæ suspi-
cimus , quæ hoc lucubrationum mearum munuscu-
lum (si ita vocari debitum fas est) suo quasi jure
sibi vendicarint , & qui jam licet mecum reco-
gnoscas ; tuas , inquam , virtutes , quarum ubique
constantî & incredibili concordia , jampridem om-
nium in te oculos admirationemque convertisti . In
Deum ità pius , ut omnia quæ ejus gloriâ spectant ,
ardentissimè prosequaris ; ita liberalis in pauperes ,
neminem ut patiaris egenum ; Religiosis ordini-
bus ità addictus , ut nonnullorum etiam collapsam
disciplinam quod ante multi frustra tentarant ,
instauraveris ; ità demum rerum gerendarum &
diocesanos administranda peritus , illiusque pru-
dentiâ , quàm nostra hac Theologia docet , ita con-

EPISTOLA.

fultus, ut Illustrissimus Baiocensium Praesul, parat
tem oneris, & curarum suarum non exignam
nusquam tutius arbitretur quam in te posse deponi;
erga omnes beneficus, etiam in haeticos, quorum
conversioni sedulo in oculis celeberrima civitatis
allaboras; tibi uni parum aequus, qui nihil horum
to habere praemoestia suspiceris. Hac sunt, VIR
ILLUSTRIS, qua ego admirans, impulsus
sum, ut nobilem hanc & praecipuam totius Theolo-
giae partem, quam virtutum regnum merito dixe-
rim, tibi dedicarem; nulli iustius consecrari posse
ratus, quam ei qui virtutes illius omnes in se suis-
que moribus adeo feliciter expressisset, ut cujus
magister, jam ante exemplis esse coepisti, eam pa-
tronus deinceps tui etiam nominis autoritate tue-
vere, atque ita de nobis, ac toto Minorum Ordine
pergeres, quasi de tuis clientibus, tutor bene mere-
ri. Vale.




AUTHORI.

D*Vm vidit Divus Summam in tribus esse
libellis,*

*Tam claram Thomas, talia verba dedit :
Boyvinum certè breviato hausisse fatebor
Scripta sua è nitido, quo mea, fonte Deo.*

JOANNES LE MASSON,
Presbyter.



AUTHORI.

D*ivino afflatu scripta hæc illapsa putarim ,
Cum divinus ab his undique spiret odor ;
Authore ex uno si tam divina legantur ,
Divinum Authorem dicere quis renuet ?*

CHRIST. DE S. MARTIN JOVENNE
Cadomæus.



Approbatio.

NO-s subsignati Theologiæ Doctores & Professores , accurate legimus tertiam partem Theologiæ Scoti , à R. Patre JOANNE GABRIELE BOYVIN Lectore jubilato elaboratam ; in quâ , sicut & in aliis partibus omnia sunt fidei Orthodoxæ consona , & præli dignissima. Datum loco & tempore in primâ parte memoratis.

DE ROYSEY GOUPIL. NORMAND
DAVID. NEEL. SELLES.

I N D E X

DISPUTATIONUM , CAPITUM

ET Q U Æ S T I O N U M

TERTIÆ PARTIS.

TRACTATUS DE SACRAMENTIS.

DISPUTATIO I. DE SACRAMENTIS IN
GENERE. fol. 1.

CAPUT I. DE NATURA ET NUMERO
SACRAMENTORUM.

Q U Æ S T. I. *Quid sit Sacramentum?* 2

II. *Quot sint Sacramenta nova legis?* 5

III. *An Sacramenta sint equalia in dignitate?* 8

IV. *An Sacramenta consistant rebus tanquam materia, & verbis tanquam forma?* 10

V. *An materia & forma Sacramentorum sint determinata?* 13

VI. *Utrum nostra Sacramenta sint necessaria?* 15

VII. *An in statu innocentia fuerint Sacramenta?* 17

VII. *An fuerint Sacramenta in lege naturali?* 22.

IX. *An fuerint aliqua Sacramenta in lege scripta?* 24

I N D E X.

CAPUT II. DE CAUSA SACRAMENTORUM.

QUEST. I. *Q*uis sit Auctor Sacramentorum?

27

II. *Q*uis sit minister Sacramentorum? 30

III. *A*n requiratur intentio ministri? 32

IV. *Q*ualis debeat esse intentio ministri? 35

V. *A*n requiratur fides in ministro? 39

VI. *A*n probitas requiratur in ministro? 40

VII. *Q*uam dispositio requiratur in susci-
piente Sacramentum? 42

CAP. ULT. DE EFFECTU SACRAMENTORUM.

QUEST. I. *A*n Sacramenta conferant Gra- tiam habitualement? 44

II. *V*trum Sacramenta conferant habitus su-
pernaturales cum Gratia? 46

III. *A*n Sacramenta conferant Gratias actua-
les? 48

IV. *A*n Sacramenta conferant Gratiam de
opere operato? 50

V. *A*n Sacramenta legis antiquae contulerint
Gratiam ex opere operato? 53

VI. *A*n Circumcisio contulerit Gratiam ex
opere operato? 56

VII. *A*n Sacramenta conferant Gratiam vel
moraliter vel physicè? 59

VIII. *A*n Sacramenta imprimant caracterem?
65

INDEX.

DISP. II. DE SACRAMENTIS IN SPECIE.

CAPUT I. DE BAPTISMO.

QUÆST. I.	<i>Q</i> uis sit Baptismus? quando fuit institutus & quod simplex sit?	68
II.	Quanam sit materia Baptismi?	73
III.	Quanam sit forma Baptismi?	77
IV.	De ministro Baptismi?	84
V.	Quinam sint effectus Baptismi & quæ dispositio?	87
VI.	Quomodo Baptismus sit necessarius, & quæ sint adhibenda ceremonia?	91

CAPUT II. DE CONFIRMATIONE.

QUÆST. I.	<i>Q</i> uid sit Confirmatio?	102
II.	An Confirmatio sit Sacramentum?	103
III.	Quando instituta fuerit Confirmatio?	105
IV.	Quanam sit materia remota Confirmationis?	107
V.	Quanam sit materia proxima Confirmationis?	110
VI.	Quanam sit forma Confirmationis?	111
VII.	Quis sit minister huius Sacramenti?	113
VIII.	Qui possint Confirmari?	116
IX.	Quosnam effectus producat Confirmatio?	117
X.	Quid requiratur in Confirmando?	119
XI.	Quinam sint ritus huius Sacramenti?	120

I N D E X.

CAP. III. DE SACRAMENTO EUCHARISTIÆ.

<p>QUÆST. I. <i>Q</i>uid sit Eucharistia, quotuplex sit & quando instituta fuerit? 123</p> <p>II. <i>Ex quibus constet Sacramentum Eucharistia?</i> 126</p> <p>III. <i>Vtrum Sacramentum Eucharistia sit necessarium?</i> 128</p> <p>IV. <i>Quanam sit materia Eucharistia?</i> 131</p> <p>V. <i>Vtrum materia consecranda debeat esse præsens, sensibilis & determinata?</i> 135</p> <p>VI. <i>Vtrum necessario debeant simul consecrari panis & vinum?</i> 138</p> <p>VII. <i>An aqua admixta vino convertatur immediate in sanguinem?</i> 141</p> <p>VIII. <i>Quanam sit forma Eucharistia?</i> 142</p> <p>IX. <i>An corpus Christi sit in Eucharistia?</i> 147</p> <p>X. <i>An corpus Christi sit in Sacramento per impanationem, annihilationem, aut transubstantiationem?</i> 154</p> <p>XI. <i>Quæ sint in Eucharistia vi verborum, & quæ per concomitantiam?</i> 157</p> <p>XII. <i>An Christus sit in singulis partibus hostiæ ante divisionem?</i> 160</p> <p>XIII. <i>Vtrum corpus Christi habeat suam quantitatem in Eucharistia?</i> 161</p> <p>XIV. <i>Quanam prædicta verificentur de Christo in Eucharistia?</i> 163</p> <p>XV. <i>Vtrum corpus Christi dicatur agere, pati & moveri?</i> 165</p> <p>XVI. <i>An accidentia sint sine subjecto in Eucharistia?</i> 169</p>	<p>123</p> <p>126</p> <p>128</p> <p>131</p> <p>135</p> <p>138</p> <p>141</p> <p>142</p> <p>147</p> <p>154</p> <p>157</p> <p>160</p> <p>161</p> <p>163</p> <p>165</p> <p>169</p>
--	---

INDEX.

XVII. <i>Quamdiu maneat corpus Christi sub speciebus?</i>	170
XVIII. <i>Quomodo ex speciebus generetur aliquid?</i>	172
XIX. <i>Quosnam effectus producat Eucharistia?</i>	173
<i>XX. Quandonam Eucharistia producat suos effectus?</i>	176
<i>XXI. Quanam dispositio requiratur in suscipiente Eucharistiam?</i>	178
<i>XXII. Quis sit minister Eucharistia?</i>	180
<i>XXIII. An sumenda sit Eucharistia necessarium sub utraque specie?</i>	182

CAPUT IV. DE SACRIFICIO MISSÆ.

QUEST. I. <i>Q</i> uid sit sacrificium Missæ, & à quo fuerit institutum?	189
II. <i>Quid offertur in Missa, & à quo?</i>	191
III. <i>In qua actione consistat essentia hujus sacrificii?</i>	194
IV. <i>An sacrificium Missæ sit propitiatorium, & impetratorium?</i>	197
<i>V. Quid sit effectus sacrificii Missæ?</i>	198
<i>VI. An valor sacrificii Missæ sit finitus, vel infinitus?</i>	200
VII. <i>Pro quibus possit celebrari sacrificium Missæ?</i>	204
VIII. <i>De quibusdam circumstantiis ad Missæ requisitis?</i>	206

INDEX.

CAPUT V. DE PŒNITENTIA.

QUEST. I.	<i>Q</i> uid sit Pœnitentia, quando fuerit instituta, & an necessaria fuerit?	212
II.	<i>Q</i> uamnam sit materia Pœnitentia?	216
III.	<i>Q</i> uamnam sit forma Pœnitentia?	219
IV.	An per Pœnitentiam omnia peccata remittantur?	223
V.	An peccata possint remitti sine Pœnitentia?	225
VI.	An peccatum possit remitti sine infusione gratia?	227
VII.	An unum peccatum possit remitti sine alio?	230
VIII.	An peccatum tollatur per solam non imputationem?	231
IX.	An per Pœnitentiam remittantur peccata venialia?	233
X.	Utrum Sacramentalia possint peccata venialia remittere?	235
XI.	An remissa culpa tollatur reatus ad pœnam?	239
XII.	Utrum merita mortificata redeant per pœnitentiam?	242

CAPUT VI. DE PARTIBUS PŒNITENTIÆ.

QUEST. I.	<i>Q</i> uid sit Contritio propriè sumpta?	247
II.	Quid sit Attritio, & quomodo à Contritione differat?	252
III.	An Attritio sufficiat ad remissionem peccati?	253

INDEX.

IV. <i>An Contritio sit necessaria?</i>	259
V. <i>Qualis debeat esse Contritio?</i>	263

CAPUT VII. DE CONFESSIOE.

QUEST. I. <i>Quo iure necessaria sit Confessio?</i>	264
II. <i>Ad quid obliget praeceptum Confessionis?</i>	268
III. <i>Quo tempore obliget praeceptum Confessionis?</i>	270
IV. <i>Quanam sint conditiones Confessionis?</i>	277
V. <i>An Confessio debeat esse integra?</i>	281
VI. <i>In quibus casibus possit non esse integra Confessio?</i>	286
VII. <i>An solus Sacerdos sit minister Confessionis?</i>	290
VIII. <i>An omnis Sacerdos sit minister Confessionis?</i>	292
IX. <i>An quilibet Sacerdos possit absolvere à venialibus peccatis?</i>	295
X. <i>An quilibet Sacerdos possit absolvere in articulo mortis?</i>	296
XI. <i>Quis sit minister ordinarius Confessionis?</i>	298
XII. <i>Vtrum quis possit dare delegatam Iurisdictionem?</i>	299
XIII. <i>An habens potestatem audiendi Confessiones à Papà vel Episcopo, possit illas audire sine licentia Episcopi, aut Parochi?</i>	300
XIV. <i>Quis sit minister vagorum & itinerantium?</i>	305
XV. <i>Quanam conditiones requirantur in Con-</i>	

INDEX.

- fessario?* 306
XVI. *Quid dicendum sit de casibus reservatis?*
 308
XVII. *Quo jure & in quibus servari debeat sigillum Confessionis?* 1312

CAP. VIII. DE SATISFACTIONE.

- QUÆST. UNICA.** *Quid sit dicendum de Satisfactione?* 315

CAPUT IX. DE INDULGENTIIS.

- QUÆST. I.** *Quid sint Indulgentia, & in quo consistant?* 319
II. *Quotuplex sit Indulgentia, & quomodo Indulgentia ad tempus intelligi debeant?* 323
III. *Quid sit Iubilæus?* 325
IV. *Quis possit Indulgentias concedere?* 328
V. *Quanam requirantur ut quis possit Indulgentias consequi?* 331

CAPUT. X. DE EXTREMA-UNCTIONE.

- QUÆST. UNICA.** *Quid sit Extrema-Vnctio? An sit Sacramentum? A quo instituta? quæ sint materia, forma, minister, subjectum & fructus ejus?* 337.

INDEX.

CAPUT XI. DE ORDINE

- QUEST. I. *Q*uid sit Ordo, & quando fuerit institutus? 343
- II. Quot sint Ordines, & qui sint maiores vel minores? 346
- III. An quilibet Ordo sit Sacramentum? 359
- IV. Quenam sit materia & forma Sacramenti Ordinis? 363
- V. Quis sit minister Ordinis, & qui sint Ordinandi? ibid.
- VI. Quinam sint effectus Ordinis? ubi de gratia, caractere & cœlibatu. 370

CAP. ULT. DE SACRAMENTO MATRIMONII.

- QUEST. I. *Q*uid sit Matrimonium, & quando fuerit institutum? 373
- II. Virum Matrimonium sit, & fuerit in præcepto? 375
- III. An Matrimonium sit Sacramentum? 376
- IV. Quid sint materia, forma, & minister hujus Sacramenti? 378
- V. Qualis requiratur consensus ad Matrimonium? 379
- VI. An Matrimonium possit contrahi per procuratores? 381
- VII. An Matrimonium clandestinum sit invalidum? 384
- VIII. Quales debeant esse Parochus & Testes? 385
- IX. An Matrimonium sit indissolubile? 388

I N D E X.

X. <i>An Matrimonium sit necessarium unius cum una?</i>	391
XI. <i>Quanam sint bona Matrimonii?</i>	393
XII. <i>Quanam sint impedimenta Matrimonii?</i>	396
XIII. <i>Quid sit dicendum de Sponsalibus?</i>	412

DE ACTIBUS HUMANIS COMPENDIOSA TRACTATIO.

TRACTATUS DE LEGIBUS ET POENIS ECCLESIAST. CONTRA INFRACTORES LEGUM, SEU DE CENSURIS.

DISPUTATIO I. DE LEGIBUS.

QUEST. I. <i>Quid sit Lex?</i>	443
II. <i>Quotuplex sit Lex?</i>	446
III. <i>De materia, proprietatibus, fine & effectibus?</i>	448
IV. <i>Quis Leges condere valeat?</i>	451
V. <i>Qui Legibus subjici possint?</i>	455

DISPUT. II. DE QUALIBET LEGE IN PARTICULARI.

QUEST. I. <i>DE Lege naturali.</i>	463
II. <i>De Lege divina.</i>	468
III. <i>De Lege humana, ubi de jure Canonico & Civili, de tribunalium divisione & jurisdictione qualibet in hocce regno usitata.</i>	484

INDEX.

IV. *Utrum lex humana obliget in conscientia?*

458

V. *An leges humana obligent cum periculo vitæ?*

506

QUÆRES I. *An aliquando liceat legem interpretari?*

110

2. *In quibus esset obligatio legis.*

513

DISPUT. III. DE CENSURIS.

QUÆST. I. *DE Censuris in genere.*

529

QUÆRES I. *Quid sit Censura secundum nomen?*

ibid.

2. *An sit in Ecclesia potestas ferendi Censuram?*

ibid.

3. *Quid sit Censura?*

530

4. *Quotuplex sit Censura?*

532

5. *Quis possit ferre Censuras?*

533

6. *Quis possit Censuris ligari?*

535

7. *Quanam sit materia ob quam Censura possit ferri?*

537

8. *Quanam forma observari debeat, dum Censura fertur?*

540

9. *Quanam rationes impediunt validitatem Censure?*

542

10. *An ignorantia excuset, ne aliquis Censuram contrahat?*

543

11. *Utrum impotentia, metus & consensus partium impediunt Censuras?*

546

QUÆST. II. *De Excommunicatione?*

548

QUÆRES I. *Quid sit Excommunicatio?*

ibid.

2. *Quotuplex sit Excommunicatio?*

546

3. *An sit in Ecclesia excommunicandi potestas, quis possit excommunicationem ferre, quis*

INDEX.

- excommunicari queat, & quid in Conciliis &
jure intelligatur nomine Anathematis? 550
4. Quotuplex sit Excommunicatio major? 551
5. Quosnam effectus producat Excommunicatio?
553
6. An Excommunicatio major communione fi-
delium privet? ibid.
7. An Excommunicatus privetur suffragiis Ec-
clesiæ? 557
8. An Excommunicatus privetur receptione
Sacramentorum? 558
9. Vtrum Excommunicato prohibeatur admi-
nistratio Sacramentorum? 560
10. Vtrum Excommunicatus privetur divinis
officiis? 562
11. An Excommunicatio privet sepultura Ec-
clesiasticâ? 564
12. An Excommunicati jurisdictione priventur?
566
13. Vtrum Excommunicatio privet beneficiis &
eorum usu? ibid.
14. Quid sit Excommunicatio minor, & quos
effectus producat? 569
15. Quid dicendum sit de præcipuis Excommu-
nicationibus majoribus, & primò de excom-
municatione qua contrahitur ob percussione[m]
Clerici? 570
16. Quid dicendum sit de Excommunicatione,
qua contrahitur ex omiſſa revelatione in Mo-
nitoriis? 573
17. Qui sint casus in quibus aliquis dispensari
potest à revelatione? 576
18. Quis possit ab Excommunicatione absolue-
re? 583

INDEX.

QUÆST. III. <i>De Suspensione.</i>	591
QUÆST. IV. <i>De Interdicto,</i>	592
QUÆST. V. <i>Quid sit Irregularitas?</i>	593
QUÆRES 1. <i>Quid sit Irregularitas procedens ex defectu Sacramenti?</i>	594
2. <i>Quando contrahitur Irregularitas ex defectu corporis?</i>	595
3. <i>In quibus casibus contrahatur irregularitas defectu animæ?</i>	596
4. <i>Quid sit Irregularitas ex defectu homicidii?</i> ibid.	
5. <i>Quid sit Irregularitas ex delicto?</i>	604

FINIS.


TRACTATUS



TRACTATUS DE SACRAMENTIS.



UM Deus suam gratiam, maximè habitualem, Sacramentis alligaverit, tanquam certis quibusdam canalibus, per quos in animam transfunditur supernaturalis illa qualitas; ideò congruum mihi visum est, ut postquam de Gratia egimus, subjungatur Tractatus de Sacramentis, in duas Disputationes dividendus, quarum prior erit de illis in genere, posterior de iisdem in specie.



DISPUTATIO PRIMA.

De Sacramentis in genere.

IN hac Disputatione tria maximè nobis examinanda sunt; scilicet natura & multiplicitas Sacramentorum, deinde ipsorum causa, denique eorum effectus.

Tom. III.

A

CAPUT PRIMUM.

De naturâ & numero Sacramentorum.

QUESTIO PRIMA.

Quid sit Sacramentum?

SA C R A M E N T I *vocabulum diversimodè usurpatur; v. g. pro Myſterio, vel pro ſecreto; ſed propriè & ſecundùm noſtrum propoſitum ſumitur pro Signo rei ſacræ; quam definitionem affert D. Auguſtinus: illa tamen deſcriptio non eſt accurata; in ſacris enim Scripturis, multa ſunt ſigna rei ſacræ, quibus tamen ratio ſacramenti non competit propriè, v. g. Tranſitus maris rubri ſignificabat gratiam per poenitentiam conferendam, Manna gratiam per Euchariftiam communicandam, Serpens æneus gratiam per Chriſtum in cruce pendentem nobis dandam; hæc autem omnia non ſunt propriè ſacramenta: & ſic Auguſt. deſcriptio minus correctæ eſt; quam ſi ſalvare velimus, ob reverentiam tanti Doctõris, addendum eſt, Signum efficax rei ſacræ, id eſt, gratiæ: ad ſacramenti enim rationem, non ſufficit quòd gratiam ſignificet, ut Manna, Serpens æneus, & Tranſitus maris rubri ſignificabant; ſed requiritur inſuper, quòd ipſamet gratiam producant & effundant. Hæc omnia explicabit

DE SACRAMENTIS. 3

CONCLUSIO.

SACRAMENTUM est Signum sensibile & Externum, divinitus institutum, gratiam Dei efficaciter significans. Dicitur primò, *Signum sensibile*, seu *externum*; quia instituta sunt Sacramenta sub rebus sensibilibus, ut sunt aqua in Baptismo, oleum in Confirmatione, Extrema-unctione, & Ordine; panis in Eucharistiâ, verba absolutionis in Pœnitentiâ, & nuptus externus partium in Matrimonio. Ratio autem cur Sacramenta sunt sensibilia, est quia Ecclesia est sensibilis, & proinde sensibiles debet habere ceremonias. Dicitur secundo, *divinitus institutum*; quia solus Christus Deus & homo instituit Sacramenta. Dicitur tertio, *gratiam significans*; quia omnia Sacramenta gratiam nobis collatam significant: alia gratiam substantialem & subsistentem significant, scilicet Eucharistia, quæ significat Christum quem continet, qui quidem Christus vocatur gratia subsistens & substantialis, in quantum est principium omnis gratiæ; alia verò significant gratiam inhærentem & habitualementem; quæ inhæret animabus Fidelium qui Sacramenta recipiunt. Subjungitur tandem, *efficaciter*; quia est hæc differentia inter Sacramenta novæ legis & Sacramenta veteris, quòd Sacramenta veteris legis significabant tantum gratiam, non verò conferebant; nostra verò illam significant & conferunt. Porro, quando diximus Sacramentum esse signum, hoc intelligitur multis modis; scilicet, quòd sit signum rememorativum Passionis Christi, demonstrativum gratiæ præsentis, & prognosticum gloriæ futuræ.

A ij

4 DE SACRAMENTIS.

O B J E C T. Si Sacramentum esset Signum gratiæ quam confert, non posset recipi Sacramentum, nisi simul reciperetur gratia: sed aliquando recipitur Sacramentum, & non gratia, ut patet in indignè communicantibus, qui corpus Christi reverà sumunt, & nullam accipiunt gratiam. Resp. Sacramenta esse reverà effectiva & productiva gratiæ, dummodò non ponatur obex, ut faciunt illi qui communicant indignè; hoc tamen non impedit efficaciam Sacramentorum, quia si aliquando illam non conferant, hoc provenit, non ex defectu Sacramenti, sed ex defectu recipientis, qui interponit obicem gratiæ. Exemplificari potest de sole, qui habet virtutem illuminativam omnium corporum; si quis tamen clauderet oculos, non illuminaretur; sed talis defectus procederet, non ex parte solis, qui non minùs diceretur illuminativus, sed ex parte illius qui oculos clauderet. Nec quis dicat, aquam benedictam conferre gratiam, quoniam tollit peccata venialia; hoc enim falsum est: nam licet tollat peccata venialia, saltem remote; non tamen gratiam confert, quia peccata venialia illam non tollunt. Nec etiam quis objiciat, Sacramentum non posse definiri, quia est ens per accidens, compositum ex rebus & verbis: licet enim Sacramenta sint entia per accidens in genere naturæ, tamen sunt unum per se in genere moris; ex institutione enim Christi forma Sacramentorum habet necessariam habitudinem ad Sacramentorum materiam.

QUESTIO II.

Quot sint Sacramenta novæ legis?

CONTROVERTUNTUR inter se Catholici & Hæretici super numerum Sacramentorum novæ legis ; hæretici enim communiter duo tantum volunt , Baptismum & Panem , seu Cœnam , quam nos Eucharistiam vocamus ; Catholici verò septem assignant , quæ sunt Baptismus , Confirmatio , Eucharistia , Pœnitentia , Extrema-unctio , Ordo & Matrimonium.

CONCLUSIO.

SEPTEM sunt legis novæ Sacramenta suprâ enumerata ; qui quidem numerus , licet non habeatur expresse ex sacra Scriptura , colligitur tamen ex traditione Ecclesiæ & Conciliis , maxime Florentino & Tridentino , quod ultimum sess. 7. de Sacramentis in genere can. 1. habet , *Si quis dixerit , Sacramenta novæ legis esse plura aut pauciora , quàm septem , Anathema sit.* Porro , quia talis numerus est contingens , quandoquidem Christus plura aut pauciora , instituere potuit , ideò non possunt assignari rationes necessariæ , quæ probent talem numerum ; sed tantum afferuntur rationes convenientiæ , quæ suadent illum esse ita congruum , ut non debuerit esse major vel minor.

Prima ratio convenientiæ petitur ex proportionem & comparationem vitæ spiritualis cum corporali ; homo enim potest concipi duplici-

6 DE SACRAMENTIS.

ter, vel in ordine ad se, vel in ordine ad rempublicam; cujus est membrum: si in ordine ad se, indiget generatione, per quam existere incipit, & huic respondet Baptismus, quo spiritualiter nascimur. Secundò, indiget augmentatione, cui respondet Confirmatio, quâ, veluti infirmi & modò geniti infantes, in gratiâ accrescimus, roburque accipimus ad protestandam fidem. Tertiò, indiget nutritione, cui respondet Eucharistia, quâ tanquam spirituali cibo reficimur. Quartò, indiget medicinâ, quâ recuperatur pristina sanitas, & huic respondet Pœnitentia. Quintò, eget remedio contra reliquias morbi, ad refocillationem virium debilitatarum, & huic respondet Extrema-unctio. Si autem consideretur, ut est membrum reipublicæ, respublica indiget potestate & magistratibus ad regendum alios, & huic respondet Ordo, ad populi Christiani gubernationem & functiones Ecclesiasticas obeundas. Septimò tandem, eadem respublica indiget propagatione individuorum, quâ conservetur, & huic respondet Matrimonium, ad procreandam sobolem, quæ in Dei cultu instruatur.

Secunda ratio convenientiæ desumitur ex Doctore seraphico D. Bonaventurâ, & hæc est; Deus per Sacramenta voluit tollere tum culpam, tum pœnam; est autem triplex culpa, & quadruplex pœna: ergo debent esse septem Sacramenta. Probat minor; Culpa vel est originalis, contra quam instituitur Baptismus; vel mortalis, contra quam datur Pœnitentia; vel venialis, quam tollit Extrema-unctio. Pœna etiam peccati est quadruplex; prima est igno-

DE SACRAMENTIS. 7

rantia, contra quam est Ordo, in quo traditur clavis scientiæ & potestas discernendi inter lepram & lepram; secunda est infirmitas naturæ, contra quam est Confirmatio, quæ novas vires addit ad protestationem fidei; tertia est malitia, contra quam Eucharistia instituitur; quarta tandem est concupiscentia, contra quam est Matrimonium.

O b j e c t. Hic septenarius Sacramentorum numerus in Scripturâ non reperitur: ergo fingitur gratis. Respondendum est sicut antea, talem non assignari numerum, quasi habeatur expressè in Scripturis; sed quia habetur ex traditione Apostolicâ, quæ non est minoris auctoritatis: Habetur etiam ex Conciliis, maxime ex præcatis; si enim requireretur expressa Scriptura, nec Baptismus, nec Cœna deberent teneri ab adversariis. Quod si aliquando Paulus & D. Augustinus loquantur tantum de duobus Sacramentis; hoc non est, excludendo alia, sed tantum, quia illa sunt præcipua. Si etiam ex latere Christi morientis fluxerint tantum aqua & sanguis, quæ sunt symbola Baptismi & Eucharistiæ; non minus per tales liquores figurata fuerunt cætera, quæ in illis duobus virtualiter continentur; Baptismus enim est janua, & Eucharistia finis omnium Sacramentorum.



A iii)

Q U Æ S T I O I I I .

An Sacramenta sint equalia in dignitate?

SCRIBENS Lutherus ad Pragenſes, de inſtituendis miniſtris, aſſerit unum Sacramentum dignius altero eſſe non poſſe; quia, inquit, omnia Sacramenta conſtant verbo Dei, quod æqualis dignitatis eſt in omnibus. Hæreticus tamen ille damnatus fuit in Concilio Tridentino, ſeſſionis 7. can. 3. *Si quis dixerit, ſeptem Sacramenta ita eſſe inter ſe paria, ut nulla ratione aliud ſit alio dignius, Anathema ſit.*

C O N C L U S I O .

EUCHARISTIA, absolute loquendo, eſt nobilior aliis; cætera verò excedunt & exceduntur.

Probatur prima pars; Primò, quia Eucharistia continet gratiam ſubſtantialem, nempe Chriſtum, alia tantùm gratiam accidentalem. Secundò, quia Eucharistia nunquam caret ſuo ſignificato; ſemper enim continet corpus & ſanguinem Chriſti; alia autem carent aliquando, (gratiâ ſcilicet) ob ſuſcipientis indiſpoſitionem. Tertiò, quia Eucharistia conſiſtit in eſſe permanenti; poſt prolationem enim verborum, Sacramentum Eucharistiæ remanet, quamdiù remanet Hoſtia incorrupta; alia autem Sacramenta conſiſtunt in actione tranſeunte; poſt prolationem enim verborum, non ampliùs exiſtunt. Quartò, quia qui conficit Sacramentum Eucharistiæ, poteſt illud recipere;

DE SACRAMENTIS. 9

nullus autem se baptizare, nec confirmare, nec absolvere, nec ungere, nec ordinare potest; licet partes quæ faciunt Matrimonium, illud recipiant. Quintò, quia Eucharistia habet rationem tum Sacramenti, tum Sacrificii, ut aliquando dicemus. Sextò, quia Eucharistia est finis aliorum Sacramentorum; alia enim Sacramenta ad istud ordinantur, v. g. Ordo ad ejus consecrationem, Baptismus ad ejus receptionem, Confirmatio ad ejus publicam frequentationem, Pœnitentia ad dignam perceptionem, Extrema-unctio ad digniorem, Matrimonium ad ejus significationem: Matrimonium enim significat conjunctionem Christi cum Ecclesiâ, & talem conjunctionem realem Eucharistia efficit.

Probatur secunda pars; quòd cætera Sacramenta sese invicem excedant & excedantur; & hoc patet inductione. Baptismus primò excedit alia Sacramenta quantum ad remissionem peccati, remittit enim tum peccatum originale, tum actuale, & insuper tollit pœnas peccati. Secundò, Confirmatio excedit, quoad gratiam actualem, quam fortiùs confert, quàm alia Sacramenta, ad protestandam fidem; Apostoli enim ante receptionem Confirmationis, etiam si baptizati fuissent & recepissent Eucharistiam, timidi erant; post Confirmationem verò intrepidi prædicabant Evangelium. Tertiò, Pœnitentia excedit alia Sacramenta à Baptismo, necessitate; quia præter Baptismum nullum Sacramentum ita necessarium est, sicut Pœnitentia; excedit etiam Baptismum in multiplicitate, quia iterari potest Pœnitentia, non Baptis-

A v

10 DE SACRAMENTIS.

mus. Quartò, Extrema-unctio excedit Pœnitentiam in perfectione, quia illam præsupponit, & tollit peccati reliquias. Quintò, Ordo excelsit in dignitate sui ministri, quia alia Sacramenta possunt conferri à non Episcopis, etiam Confirmatio ex dispensatione summi Pontificis, quæ à simplici Sacerdote conferri potest; non sic autem Ordo, maximè Presbyteratus; deinde, Ordo habet potestatem suprâ corpus Christi reale, quandoquidem illud consecrare potest; alia autem Sacramenta habent tantum auctoritatem suprâ corpus Christi mysticum, nempe super Fideles. Matrimonium tandem excedit alia in significatione, quia significat unionem Verbi cum naturâ humanâ; unde vocatur ab Apostolo *magnum Sacramentum*.

Q U Æ S T I O I V.

Utrum Sacramenta constent rebus tanquam materiâ, & verbis tanquam formâ?

REs & verba non sumuntur semper formaliter, sed aliquando analogicè; pro eo scilicet, quod rebus aut verbis respondet; sic in Matrimonio nutus partium contrahentium tenet locum Verborum, & in Pœnitentiâ actiones sensibiles pœnitentis, ut Confessio, Contritio, &c. tenent vicem æi; super hæc enim Sacerdos absolutionem, quæ est forma Sacramenti Pœnitentiæ, applicat: Quærimus ergo hîc, utrum Sacramenta constent rebus & verbis, siue formaliter, siue analogicè spectatis.

CONCLUSIO.

SACRAMENTA verbis & rebus constant, tanquam materiâ & formâ. Sic Concilium Florentinum in doctrinâ de Sacramentis in genere, ubi ait, omnia Sacramenta constare rebus, tanquam materiâ, verbis tanquam formâ, & intentione ministri conferentis Sacramentum & intenditis facere quod facit Ecclesia: res autem quâ Sacramentum constat, vocatur elementum ab Augustino, dicente, *Accedit verbum ad elementum, & fit Sacramentum.*

Probatur conclusio inductione. In Baptismo v. g. aqua est res; in Confirmatione, impositio manuum; in Eucharistiâ, panis & vinum; in Pœnitentia, actus sensibiles pœnitentis; in Extrema-unctione, unctio facta cum oleo; in Ordine, impositio manuum & porrectio vasorum; in Matrimonio tandem, traditio corporum explicata per verba: & sic omnia Sacramenta constant rebus tanquam materia, & verbis tanquam forma, quæ proferuntur à ministro in omnibus Sacramentis, excepto Matrimonio, ubi verba vel nutus partium contrahentium sunt forma.

O b j e c t. Una & eadem res non potest habere plures formas; sed significatio gratiæ est forma cujuscunque Sacramenti, forma enim signi est significatio, Sacramenta autem sunt signa, ut diximus: ergo significatio est eorum forma: ergo Sacramenta non constant verbis tanquam forma. Resp. Sacramentum posse sumi materialiter, vel formaliter; materialiter est aliquod ens morale constans rebus & verbis,

formaliter verò sumitur pro signo gratiæ: quo posito, distinguo minorem; significatio est forma Sacramenti formaliter sumpti, & ut signum est, concedo: materialiter considerati, nego. Si quis dicat, Materia est permanens; actus autem pœnitentis non sunt permanentes: ergo non sunt materia pœnitentiæ: Resp. majorem esse veram in naturalibus, non verò in moralibus, ubi sufficit quòd materia sit res sensibilibis, ad quam forma subsequatur.

O.B.J.E.C. Ut materia & forma component essentiam alicujus entis, debent adhiberi & esse simul; sed verba & res aliquando non existunt simul quando efficitur Sacramentum; aliqui enim infundunt aquam super baptisatum paulo ante, vel post prolationem verborum: ergo illa Sacramenta non constant rebus tanquam materiâ & formâ. Resp. quòd ad componenda entia naturalia requiratur unio naturalis & mathematica inter materiam & formam, ad componenda autem entia moralia, qualia sunt Sacramenta, sufficit unio moralis quæ modò major esse debet, modò minor, pro diversitate Sacramentorum: minor v.g. requiritur unio in Matrimonio, cùm possit contrahi per litteras inter absentes, licet hoc prohibeatur usu Ecclesiæ; in Eucharistia requiritur unio major, quia pronomen demonstrativum *hoc*, denotat rem ita debere esse præsentem, ut possit quasi digito demonstrari; non tanta requiritur in Baptismo, qui potest fieri per asperisionem, & asperisio in distantem; minor adhuc requiritur in pœnitentiâ, potest enim sacerdos audire hodie peccata, & cras absolvere.

QUESTIO V.

An materia & forma Sacramentorum sint determinata?

LUTHERUS negative respondet, & cum eo plurimi hæretici, qui irrident eos, qui in collatione Sacramentorum certis & determinatis utuntur verbis; quia, inquit, Sacramenta instituta sunt ad excitandam & alendam fidem in mente recipientium; unde, modò excitetur fides Christi non curant de verbis quibus ipsa excitetur. Quoad Calvinum autem, asserit pertinaciter, quòd in necessitate, v. g. deficiente aquâ, possit fieri Baptismus in lacte, vino, cervisiâ, aut quocumque alio liquore, quo posset fieri balneum ad abluendum baptizandum infantem. Hos hæresiarchas refutabit

CONCLUSIO.

MATERIA & forma Sacramentorum ita determinatæ sunt, ut in ipsis nulla essentialis fieri possit mutatio. Habetur enim Deuteron. 12. quòd in ceremoniis veteris Testamenti nulla licebat fieri mutatio, juxta hæc verba, *Quòd præcipio tibi; facies; nec addes quidquam, aut minues*; à fortiori in novo Testamento hæc determinatio requiritur, quoniam Sacramenta novæ legis sunt majoris momenti quàm veteris.

Probatur conclusio; Sacramenta sunt causæ instrumentales gratiæ conferendæ, quæ institutæ & determinatæ fuerunt à Christo,

qui est causa principalis : ergo debent conferri per ea verba , & per easdem res quas instituit Christus ; causa enim principalis determinat instrumentalem ; unde si assumerentur alia instrumenta , non haberent vim conferendi gratiam. Hoc confirmatur à Conc. Flor. & Trident. cap. de Sacramentis. Non debet ergo mutari materia aut forma , neque substantialiter , neque accidentaliter ; si enim fieret mutatio essentialis , invalidum esset Sacramentum ; si verò esset mutatio accidentalis , minister Sacramentorum , qui talem faceret mutationem , peccaret. Superest sciendum , quænam mutatio sit essentialis & quænam accidentalis ; ad quod Resp. quod mutatio essentialis in materia , est illa quæ talis est , ut juxta communem usum loquendi & judicium hominum discrepet à materia usitata , & non amplius vocetur ejus nomine : Mutatio autem essentialis in verbis , est quando non manet idem sensus verborum. Ratione primi , non potest v.g. Baptismus fieri in lixivio consummato , nec in cervisia , aut aut jure nimis alteratis ; secus autem , si parva fieret mutatio. Ratione secundi , invalidus esset Baptismus collatus in his verbis , *In te ego Baptiso nomine* , &c. variaretur enim pro tunc sensus verborum ; qui autem diceret , *te ego Baptiso* , aut omitteret pronomen , *Ego* , valeret Baptismus quia esset tantum mutatio accidentalis.

Objic. Zachariam summum Pontificem qui approbavit formam baptisandi , qua usus fuit quidam aliàs ignarus linguæ latinæ , qui sub his verbis baptisavit ; dicendo , *Ego te Bap-*

DE SACRAMENTIS 15

tiso in nomine Patria, Filia & Spiritus sancta; quæ voces includunt mutationem essentialem, quandoquidem sunt alterius significationis à verbis Sacramenti. Respondet Doctor Angelicus & nos cum illo; ubi corruptio fit ex ignorantia, vel lapsu linguæ, retinendo intentionem Ecclesiæ, ubi etiam corruptio non fit in principio aut medio dictionis, pro tunc validum esse Sacramentum; quando verò fit in principio, vel medio, esse invalidum: quia finis & terminatio non est ita essentialis, ac principium.

QUESTIO IV.

Verum nostra Sacramenta sint necessaria?

ALiquid potest esse necessarium in Morali Christiana duplici necessitate; quarum prima vocatur necessitas medii, secunda est necessitas præcepti. Necessitas medii est ea qua aliquid est ita necessarium, ut sine ipso finis haberi non possit, etiam ablata ratione præcepti. Necessitas præcepti est ea qua aliquid necessarium est ex sola ratione præcipientis. Necessitas medii in se duplex est, scilicet intrinseca & extrinseca; intrinseca petitur ex conditione extremorum: sic v. g. ut ignis calefaciat, necessarium est, quòd habeat calorem, extrinseca autem oritur, non ex natura rei, sed ex institutione divina.

CONCLUSIO PRIMA.

SACRAMENTA non sunt necessaria necessitate intrinseca, sed necessitate extrinseca, orta videlicet ex institutione Dei. Primum patet, quia nulla est ratio intrinseca & essentialis cur aqua baptismi habeat potestatem abluendi peccatum originale, vel Pœnitentia peccatum actuale, vel alia Sacramenta virtutem habeant gratiam conferendi: imò Deus qui est liber *ad extra*, loco horum Sacramentorum potuit alia instituere; & etiam sine Sacramentis potuit conferre gratiam: ergo non sunt necessaria necessitate intrinseca. Veritas secundi habetur ex Conc. Trid. Can. 4. sess. 7. contra Zuinglianos, ubi sic habetur; *Si quis dixerit, Sacramenta nova legis non esse necessaria, sed superflua; & sine eorum voto, per solam fidem, homines posse gratiam justificationis adipisci, Anathema sit.* Si autem non sint necessaria intrinsece, remanet quòd saltem extrinsece necessaria sint.

CONCLUSIO SECUNDA.

DUPLICI necessitate extrinseca Sacramenta videntur esse necessaria; Baptismus enim, Pœnitentia & Ordo necessaria sunt necessitate medii, vel in re vel in voto; Baptismus enim necessarius est omnibus sine exceptione, quia omnes in Adam peccaverunt, demptâ Virgine Mariâ: Pœnitentia est necessaria illis qui peccaverunt actualiter: Ordo autem est necessarius necessitate medii, non omnibus, sed pro omnibus; quia omnes indigent ministris ordinatis ab Ecclesiâ, qui possint absolvere reos. Quoad

alia autem sacramenta, sunt tantum necessaria necessitate præcepti, ut determinavit Conc. Flor. in decreto unionis; nam sine Eucharistiâ, Extrema-unctione & Confirmatione, aliquis saluus evadere potest.

OBJEC. Quod est necessarium necessitate præcepti, est etiam necessarium necessitate medii; quia ex institutione Dei & Christi observatio mandatorum est ita necessaria, ut sine ipsâ beatitudo obtineri non possit. Resp. necessitatem præcepti reverà includere necessitatem medii, quando datur facultas & locus observandi præceptum, concedo: absolutè & quando non datur locus, nego. Sic v. g. si quis habeat locum sumendi Eucharistiam, debet reverà sumere tempore Paschali; necessitas tamen dispensat de observantiâ talis præcepti: quod non videtur idem in Sacramentis quæ sunt necessaria necessitate medii, ubi necessitas non excusat, quin infans moribundus baptisetur.

QUESTIO VII.

An in statu Innocentiâ fuerint Sacramenta?

TRIPLEX est naturæ humanæ status: primus est naturæ perfectissimæ, in beatitudine scilicet existentis: de quo non est controversia, an in illo Sacramento reperiantur: secundus est naturæ integræ, quatenus consideratur in innocentia: tertius est naturæ corruptæ per peccatum. Hic tertius ulterius po-

18 DE SACRAMENTIS.

test dividi in tres alios; nam alius est status hominis lapsi sub lege naturæ, qui duravit ab Adamo ad Moïsen; alius est sub lege scriptâ, in quâ mandata legis data fuerunt Moïsi, & toti populo Iudaïco in monte Sinaï, & duravit à Moïse ad Christum, tertius est sub lege gratiæ, à Christo scilicet ad finem mundi perseveraturus. Hæc tempora vocantur ab August. ante legem, sub lege, & sub gratiâ; & communiter appellantur lex Naturæ, lex Mosaïca, & lex Gratiæ. De triplici illo statu loquendum est in hac quæstione, & duabus sequentibus.

CONCLUSIO PRIMA.

IN statu innocentix nulla de facto extiterunt Sacramenta. Rationes hujus veritatis sunt; prima, quia Sacramenta sunt medicinæ quædam spirituales, vel quædam media supernaturalia, quæ gratiam per modum medicinæ conferunt; sed ante peccatum non erat morbus: ergo talis status non indiguit medicinâ, nec proinde Sacramentis. Secunda ratio est, quia Sacramenta debent lege stabili durare & non ad breve tempus, exiguo verò tempore duravit status innocentix: ergo non fuit conveniens ut Deus, qui talem brevitatem temporis prævidebat, institueret sacramenta pro tam exiguo durationis intervallo. Tertia ratio est, quia Sacramenta pertinent ad constitutionem Ecclesiæ, sunt enim publici & solennes ritus religionis; in illo autem statu innocentix non erat Ecclesia perfectè composita, erant enim tantum dux personæ, & ad

congregationem propriè dictam tres ad minùs requiruntur. Quarta tandem ratio est, quia non habemus ex scripturâ, aut traditione, aut Patribus, vel Conciliis, quòd ullum pro tunc fuerit Sacramentum.

Objc. Matrimonium, quod est Sacramentum, fuisse in lege Innocentiæ. Resp. pro tunc Matrimonium fuisse tantùm in officium naturæ, non in signum collationis gratiæ; & sic non fuit Sacramentum. Quòd si ab aliquibus Sacramentum dicatur; hoc est, quia fuit signum futuræ Incarnationis, non verò quòd fuerit signum efficax gratiæ; vel fuit signum unionis Christi cum Ecclesiâ; unde Paulus vocans Matrimonium *magnum Sacramentum*; subjungit *in Christo & Ecclesia*.

Objc. ex August. Lignum vitæ erat Sacramentum; sed lignum vitæ fuit in statu Innocentiæ: ergo, &c. Resp. vocari ab Aug. Sacramentum, latè, non propriè; latè, quatenus aliquid reconditum significabat, nempe virtutem conservandi corpora, reparando scilicet humidum radicale dissipatum per actiones caloris nativi.

CONCLUSIO SECUNDA.

SI longius durasset ille status, non constat satis, an fuissent in illo Sacramenta, potuissent tamen institui; imò, probabile est, quòd futura fuissent. Hæc conclusio tres partes habet.

Probatur prima pars, quia diximus antea, quòd institutio Sacramentorum fuit libera: ergo pendet ex solâ divinâ voluntate quæ potuit illa instituere, vel non; divina autem voluntas non innotescit, nisi per revelationem; at

nulla habetur revelatio, an Deus instituisset Sacramenta, si status innocentiae perseverasset; ergo jure dicimus, hoc nobis non constare.

Probatur secunda pars quia Deus, si status innocentiae durasset, potuisset instituere Sacramenta in remedium peccatorum, si postea peccassent filii Adæ; non fuissent enim impeccabiles; potuisset etiam instituere illa ad conferendam augmentationem gratiæ, vel ad Dei cultum, vel ad gratiarum actiones; quia homines pro tunc fuissent viatores: ergo potuissent mereri augmentationem gratiæ per frequentationem talium Sacramentorum.

Probatur tertia pars, quod scilicet probabiliter fuissent aliqua Sacramenta, & præsertim Eucharistia, Ordo, Matrimonium & Pœnitentia, Eucharistia fuisset ob tanti Sacramenti excellentiam, & peculiarem unionem cum Christo, qui venisset ut glorificator: Ordo extitisset, quo deputati fuissent aliqui ad offerenda Deo Sacrificia in protestationem sui summi domini, & in gratiarum actionem beneficiorum in tali statu recipiendorum; si enim in lege Naturæ & Mosaica fuit Sacerdotium, in lege Innocentiæ debuisset Sacerdotium esse perfectius, & proinde Sacramentum. Probabile est tertio, fuisse futurum Matrimonium, ad gratiam conferendam conjugibus, quâ excitarentur ad mutuum amorem. Probabile est denique, futuram fuisse Pœnitentiam: licet enim omnes fuissent nati in justitia originali, non fuissent tamen confirmati in gratia; imò potuissent ab illa recedere; Deus autem non reliquisset eos sine

remedio sicut nec nos reliquit : ergo credibile est, quod pro tunc instituisset Pœnitentiam : quibus autem ritibus & ceremoniis conferenda & recipienda fuissent illa Sacramenta, non constat.

Objic. in secundam & tertiam partem : Sacramenta sunt tanquam medicinæ contra morbum lethalem peccati : sed in statu innocentie non fuisset morbus peccati : ergo nec debuisset parari medicina. Resp. primò, quòd si Sacramenta dicantur medicinæ peccati : hoc est, prout sunt instituta, in lege scilicet corruptâ, in quâ, cum peccata vigeant, debent Sacramenta dari, tanquam medicinæ ; in illo autem statu innocentie non fuissent medicinæ, sed quædam instrumenta quibus gratia habita augetetur. Resp. secundò, quòd sit duplex medicina, præservativa, scilicet, & sanativa : si autem homines perseverassent longiùs in statu innocentie, pro tunc Sacramenta tenuissent locum medicinæ præservativæ ; augendo enim gratiam in quolibet homine, quo major fuisset gratia hominis, eo firmitus adhæsisset Deo, & consequenter difficiliùs in peccatum incidisset. Resp. tertio, quòd etiam pro tunc Sacramenta potuissent tenere locum medicinæ sanativæ ; ut quantum, ut diximus, descendentes ad Adamo, non erant perfectiores Patre, & sic potuissent peccare ; si autem peccassent, pro tunc Sacramentum fuisset illis in medicinam, nedum præservativam, sed etiam sanativam & curativam.



QUESTIO VIII.

An fuerint aliqua Sacramenta in lege natura?

LEx, quæ antecessit legem scriptam, non ideo dicitur lex naturæ, quia pro tunc vigebat tantum cognitio naturalis Dei, & sola præcepta naturalia existebant, vel quod pro tunc homines solis naturæ viribus possent consequi salutem; sed dicitur lex naturæ, in quantum distinguitur à lege scriptâ; tunc enim nulla erat lex scripta, nisi interius in mente hominum, & si fuerint aliqua præcepta positiva, ut de fabricanda arca, respectu Noëmi, de sacrificando in pane & vino respectu Melchisedech, & de Circumcisione respectu Abraham pro se & sua familia; talia præcepta non habebant vim & rationem legis propriè, quia non erant publica, nec data omnibus, sed privatis quibusdam personis & familiis. In ea lege, quæ vocatur lex naturæ, fides Christi mediatoris venturi debuit esse in quolibet, vel explicita vel implicita; debuit esse explicita in capitibus familiarum, qua scilicet crederent, Deum in carne venturum; debuit verò esse implicita in aliis, qui tenebantur credere in communi, Deum convenienti modo reconciliaturum sibi humanum genus. Illa autem fides ortum potuit habere ab Adamo, cui Deus indicavit, ipsum posterisque posse liberare suos parvulos à peccato originali per fidem in Christum venturum, applicatam ipsis parvulis à parentibus. An autem

illa fides debuerit exprimi aliquo actu expresse
& signo externo, quod habeat rationem Sacra-
menti, hoc quæritur.

CONCLUSIO.

IN lege naturæ fuit aliquod Sacramentum pro
parvulis. Sic. Aug. lib. 5. contra Julianum
cap. 9. *Non est credendum ante datam Circumcisi-
onem, famulos Dei quandoquidem his inerat me-
diatoris fides in carne venturi, nullo Sacramento
opitulatos fuisse parvulis suis; quamvis quid illud
esset, scriptura voluerit nos latere necessaria ali-
qua ex causis.* Ex quo passu Aug. nedum, patet
in lege naturæ fuisse aliquod remedium pro pec-
cato originali, quod omnes ultrò fatentur; sed
illud constituisse in aliquo signo externo, con-
tra illos qui dicunt, quòd solus actus internus
fidei applicatus parvulis sufficeret; si hoc enim
esset, nulla esset causa, cur istud remedium in-
ternum non posset applicari parvulis post ipso-
rum animationem, & antequam egrederentur ex
utero materno. Quinam autem esset ille actus
externus, quo scilicet parentes liberabant suos
parvulos à peccato originali; an scilicet esset ora-
tio, vel oblatio, vel aliquid simile, non constat,
ut dicit Aug. loco citato; sed constat tantum,
quod ille actus deberet fieri in protestationem,
Christi venturi: Unde Doctores dicunt, quòd
liberum erat parentibus uti eo ritu quo vel-
lent, & quo movebantur communiter à Spiri-
tu sancto; modò, ut diximus, esset professio
exterior fidei in Christum venturum, sive ex-
plicita, sive implicita. Tale autem remedium,

quod vigeat in lege naturæ, perseveravit in lege scripta pro fœminis, quibus non poterat aptari Circumcisio.

QUESTIO ULTIMA.

An fuerint aliqua Sacramenta in lege scripta?

PER veterem & scriptam legem intelligimus tempus à Moïse ad Christum; licet ali ponant illud ab Abraham, in quantum iste Patriarcha habuit præceptum Circumcisionis pro sua familia; propriè tamen status legis scriptæ est à tempore quo Deus dedit legem Moïsi in monte Sinai; illa verò lex erat tantum respectu populi Judaïci, non pro Gentilibus, pro quibus vigeat lex naturæ, quæ pro illis perseveravit usque ad Christum: Quod autem in tali lege scripta Sacramenta extiterint, asseverabit,

CONCLUSIO.


IN lege scripta fuit Circumcisio, tanquam Sacramentum institutum ad remedium peccati originalis, & alia Sacramenta quæ legalem conferebant sanctificationem, & veram gratiam significabant dandam per nostra Sacramenta.

Probatur prima pars ex Genes. 17. *Masculus, cuius præputii caro non circumcisa fuerit, delebitur anima illius de populo suo* Ratio nostra convenientiæ est, quòd sicut in lege naturæ erat aliquod remedium pro peccato originali, quod consistebat in aliquo signo externo,
non

non tamen determinato & expresse ex institutione Dei ; fuit *conversionis*, ut in lege scriptâ, quæ erat perfectior , determinatum fuerit à Deo : quod quidem signum externum , quod habebat rationem Sacramenti , aliud non fuit quàm Circumcisio , quæ applicata parvulis tolleret peccatum originale , & consequenter conferret gratiam , quæ omnia faciunt verum Sacramentum , ad quod tantum tria requiruntur ; nempe promissio Dei de conferendâ gratiâ , signum externum & sensibile , & tandem quod à Deo præcipiatur.

Probatur secunda pars ; quodd scilicet præter Circumcisionem fuerint alia Sacramenta quæ sanctificationem legalem conferebant , & veram significabant gratiam per nostra Sacramenta conferendam : in veteri enim lege qui tetigerant cadaver , qui erant sanguiniflui , & similes , censebantur veluti polluti , & à communicatione aliorum separati ; per sacrificia verò reddebantur habiles ad frequentandum cum aliis , & veluti sancti & immaculati efficiebantur (sanctitate scilicet legali) per quædam sacrificia , quæ proinde erant Sacramenta , saltem imperfecta. Deinde , talia Sacramenta erant veluti figura nostrorum , ut patet ; nam Circumcisio figurabat Baptismum , Panes propositionis , Agnus Paschalis , & Manna significabant Eucharistiam ; Consecrationes Pontificum & Levitarum erant figura Ordinis ; Purificationes figurabant Pœnitentiam ; Matrimonium tandem legis veteris , quod in statu innocentiae erat in officium naturæ , & in legibus non scriptâ & scriptâ in remedium concupis-

centiæ, figurabat Matrimonium legis novæ, quod est, nedum in officium naturæ & in remedium concupiscentiæ, sed in Sacramentum verè & propriè sumptum. Quoad Extremam-unctionem, non habebat suam figuram in lege veteri, sicut nec Confirmatio; quia Extrema-unctio est quædam præparatio immediata ad gloriam & ingressum Cœli, quod nondum erat apertum: Confirmatio verò est Sacramentum plenitudinis & perfectionis gratiæ, quod quidem tempus perfectionis non erat in veteri Testamento, sed reservabatur ad nostrum.



CAPUT SECUNDUM.

De causa Sacramentorum.

QUADRUPLEX est genus causarum ex Philosophis; alia enim est materialis, ex qua res fit; alia formalis, quæ dat esse completum rei; alia finalis, propter quam res est; & efficiens, à quâ res accipit esse. Non loquimur de causâ materiali Sacramentorum; diximus enim res sumptas vel formaliter, vel analogicè, esse ipsorum materiam; diximus etiam verba esse formam ipsorum; sanctificatio pariter hominis est causa finalis cui instituta fuerunt Sacramenta: ergo tantum nobis remanet loquendum de causâ efficiente, à quâ Sacramenta fiunt; & hoc discutietur in præsentî capite.

QUÆSTIO PRIMA.

Quis sit Author Sacramentorum ?

IN sequenti quæstione dicturi sumus de causâ ministeriali Sacramentorum, à quo scilicet ministrari debeant : nunc prius agemus de causâ principali illorum ; quæ quidem causa principalis duplex est : una quæ vocatur principalis simpliciter, alia verò quæ vocatur causa principalis meritoria. Causa principalis simpliciter est ea quæ propria autoritate facit, ut Sacramenta habeant efficaciam conferendi gratiam infallibiliter, causa verò principalis meritoria, est ea quæ meruit ut gratia conferretur per talia signa exteriora.

C O N C L U S I O.

SA CRAMENTORUM causa principalis est solus Deus ; causa autem principalis meritoria est Christus. Probatur prima pars ; Ille est causa principalis Sacramentorum, qui solus, & propria autoritate habet virtutem conferendi gratiam mediante applicatione aliqujus signi externi, quod vocatur Sacramentum ; sed gratia à solo Deo dependet, & solus Deus habet virtutem alligandi communicationem gratiæ illis signis quæ vocamus Sacramenta : ergo solus Deus est causa principalis simpliciter Sacramentorum ; & hoc est quod omnes dicunt, solum Deum esse causam gratiæ.

Probatur secunda pars ex Conc. Trid. Sess.

B ij

28 DE SACRAMENTIS.

7. Can. 10. *Si quis dixerit, omnia & singula Sacramenta nova legis non fuisse à Domino nostro Jesu Christo instituta; Anathema sit.* Ratio hujus est, quia Sacramenta sunt quædam partes pertinentes ad legem Evangelicam; sed lex Evangelica est à Christo: ergo & Sacramenta ab eo debuerunt esse. Fuerunt inquam ab illo, tanquam à causâ meritoriâ, in quantum per suam Passionem meruit, ut Deus suam gratiam alligaret his signis quæ ipsemet Christus elegit.

O B J E C T. Causa principalis Sacramentorum est Deus: ergo Christus non potest dici etiam causa principalis. Resp. esse causam simul principalem, seu primam; & etiam minùs principalem, seu secundam; sed hoc, diverso respectu: respectu enim Dei, Christus est veluti causa secunda & minùs principalis Sacramentorum; respectu verò ministrorum, qui conficiunt & applicant illa Sacramenta, est causa principalis: non quidem efficiens, quasi ipsemet Christus gratiam producat & conferat; sed est causa meritoria, in quantum principaliter meruit à Deo, quòd Sacramenta gratiam conferrent. Et hoc est quod Doctores dicunt communiter, triplicem esse causam Sacramentorum: quarum prima vocatur authoritativa, & hæc competit soli Deo; secunda vocatur excellentiæ, quæ propria est Christo, in quantum est instrumentum conjunctum cum divinitate; ubi nos, qui aliquando sumus instrumenta meritoria gratiæ, non habemus potestatem excellentiæ, quia non sumus uniti hypostaticè cum Deo; tertia

tandem dicitur ministerialis causa Sacramentorum, quia competit illis qui Sacramenta ministrant.

O B j e c. Confirmationem fuisse institutam in Concilio Meldensi secundum Alexandrum Alensem, & Extremam unctionem ortam esse à Divo Jacobo, ut vult Magister sententiarum: ergo Christus non fuit causa omnium Sacramentorum. Resp. illos fuisse locutos tantum de promulgatione horum Sacramentorum, non verò de illorum institutione; contrarium enim habetur in Concil. Trid. loco citato. Dices, Aliqua Sacramenta fuerunt instituta ante passionem Christi: ergo Christus per passionem suam non fuit causa meritoria Sacramentorum. Resp. quòd talia Sacramenta habuerunt suam efficaciam à passione Christi; non præsenti, nec præteritâ, sed futurâ. Instabis: Quando effectus est in actu, causa debet esse in actu, sed Sacramenta erant in actu instituta quanto nondum erat passio Christi: ergo passio futura non sufficebat. Resp. quando instituta fuerunt Sacramenta, passionem fuisse in actu, sed distinguo; fuit in actu respectu acceptationis Dei, quia etiam antequam Christus pateretur, acceptavit illius mortem, tanquam meritoriam omnium gratiarum quas Deus contulit intuitu ejus, etiam in ipsâ creatione mundi; non tamen Passio Christi erat in actu proprio & formali, quando Sacramenta instituta sunt.

QUESTIO III.

Quis sit minister Sacramentorum?

CALVINUS putat, tum bonos tum malos Angelos incorporibus assumptis posse ministrare Sacramenta: Lutherus vult quidem, solos homines hoc posse facere, sed credit omnes posse Sacramenta ministrare, dummodo sint baptisati; omnes enim Christianos dicit esse Sacerdotes; & fundatur dictis Petri, vocantis eos qui sunt Christiani, *Regale Sacerdotium*, non advertens, quòd Petrus loquatur de Sacerdotio spirituali, quo Christiani offerunt Deo hostias spirituales, nempe affectiones cordis.

CONCLUSIO.

SOLI homines sunt ministri Sacramentorum; non tamen omnes. Primum est contra Calvinum, secundum contra Lutherum.

Probatur prima pars: illi enim soli sunt ministri Sacramentorum, quos Deus destinavit ad tale ministerium; sed hi fuerunt soli homines quibus dixit pro Baptismo conferendo, Matth. 28. *Euntes, docete omnes gentes, baptisantes eos in nomine Patris, &c.* Pro Sacramento Eucharistiæ, Lucæ 22. *Hoc facite in meam commemorationem.* Pro Pœnitentiâ Joan. 29. *Quorum remisistis peccata, remittuntur eis.* Pro Extrema unctione, Jacobi 5. *Infirmatur quis ex vobis? inducat Presbyteros.*

CONFIRMATUR; sicut ad consecrationem Sa-

cramenti requiritur verum & naturale elementum, v. g. vera & naturalis aqua, verus panis & verum oleum; sic etiam requiritur verum & naturale verbum: sed competit solis hominibus loqui propriè, loqui enim est actio vitalis quæ est à principio conjuncto, non vero à principio separato, ut sunt Angeli, vel demones respectu corporum assumptorum: ergo ad solos homines spectat, non verò ad Angelos confectio & administratio Sacramentorum.

Probaturs secunda pars: illi qui non habent intentionem conficiendi & ministrandi Sacramenta, non possunt illa ministrare, aut conficere; sed amentes, fatui & furiosi, qui non habent rationem, intentionem habere non possunt; quia intentio est actus rationis: ergo non sunt ministri Sacramentorum; & sic tale ministerium non competit omnibus hominibus. Deinde, illi qui non habent characterem ordinis, non possunt esse ministri Confirmationis, Eucharistiæ, Absolutionis, Ordinis, & Extremæ-unctionis: sic Concil. Trid. Sess. 7. Can. 18.

OBJEC. in primam partem, Patres qui asserunt Angelos posse conficere Sacramentum baptismi: ergo non solis hominibus competit ministrare Sacramenta. Resp. Angelos, tum bonos, tum malos, posse reverà de potentia Dei absolutâ baptizare, & alia Sacramenta conficere; hoc tamen non sit de potentiâ ordinariâ: unde mens Canonistarum est, quod si Angelus bonus videretur in corpore assumpto aliquem baptisasse, credendum esset quod

Baptismus esset validus, & quod Deus dispensasset in tali occasione, Angelo scilicet proferente voces perceptas ab hominibus & nostris similes: si verò dæmon in carne assumpta videretur baptizare, invalidus censeretur Baptismus; non est enim credibile, Deum talem potentiam dedisse diabolo, qui tantum nostram perditionem intendit; unde verisimilius esset, quod pro tunc dæmon sic baptizare simulans, vellet in perditionem tradere infantem sic baptisatum.

Objic. in secundam partem; Omnes homines sunt fratres Christi per Incarnationem; sed inter fratres omnia sunt communia: ergo si Christus, qui est frater Christianorum, Sacramenta ministrare potuit & ea conficere; idem possunt facere Christiani, qui sunt Christi fratres. Resp. Christianos esse fratres Christi adoptivos, concedo; mediante gratiâ quam illis meruit Christus: naturales, nego: quando autem dicitur, inter fratres omnia sunt communia; distinguo etiam, inter fratres naturales; concedo: inter fratres adoptivos, nego.

QUESTIO IV.

An requiratur intentio ministri?

IN TENTIO ministri triplex esse potest; prima est materialis, qua minister intendit proferre verba & facere externam actionem: secunda est formalis implicita, faciendi in con-

DE SACRAMENTIS. 35

fuso quod facit Ecclesia; tertia tandem est formalis explicita, conferendi effectum Sacramenti. Lutherus, qui vult Sacramenta esse tantum ad excitandam fidem in mente astantium, vel recipientium, dicit primam intentionem sufficere, quia potest excitare fidem; nos verò aliter sentimus.

CONCLUSIO.

LICET non requiratur intentio formalis explicita, requiritur tamen implicita. Non requiritur inquam, quod minister intendat actu baptizare, vel conferre gratiam, aut delere peccatum originale; requiritur tamen quod intendat facere quod facit Ecclesia, quod fecit Christus, quod faciunt alii Sacerdotes; vel saltem intendat fungi suo officio; hæc enim omnia æquipollent intentioni actuali, & illam includunt.

Probatur hæc conclusio ex Conc. Florent. in decreto unionis Sess. 7. de Sacramentis in genere Can. 11. *Si quis dixerit, in ministro, dum Sacramentum conficit; non requiri intentionem faciendi quod facit Ecclesia. Anathema sit.* Sic etiam Concil. Trident. Sess. 14. Can. 6. *Si Sacerdoti desit animus verè absolvendi, nihil fit.* Ratio est, quia absolutio non est nudum ministerium, sed actus judicialis, quo sententia profertur: ergo debet proferri cum intentione. Deinde, si intentio materialis sufficeret, & non requireretur formalis, saltem implicita, lector mensæ, qui inter legendum recitaret hæc verba, *Hoc est corpus meum*, consecraret panem oppositum, quod falsum est.

OBJIC. quod Patriarcha Alexandrinus

approbaverit Baptismum Gregorii Nazianzeni qui adhuc puer alios pueros baptisavit ludendo : ergo non est necessaria formalis intentio. Resp. hoc approbatum fuisse quia inrerogatus Gregorius confessus est se intendisse facere quod intendebat Patriarcha Alexandrinus, licet joco ; unde dicendum est , quod qui haberet tantum intentionem jocandi , non baptisaret ; qui haberet verò intentionem jocandi & baptisandi , vel faciendi quod facit Ecclesia , Christiana , vere baptisaret.

O B J E C. secundò quòd famulus qui transigit contractum pro domino , non indigeat intentione ; si enim v g. det equum vice domini sui , sufficit quòd illum porrigat , licet non intendat dare : ergo à pari dicendum est de ministro , qui vice Christi gratiam confert per Sacramenta. Resp. distinguendo antecedens ; si famulus ille habeat tantum rationem nuntij , concedo : si habeat potestatem à domino tractandi negotium , pro sua voluntate , nego : sed Sacerdotes habet talem potestatem , ut patet ex dictis Christi , *Quorum remisseritis peccata , remittuntur eis* ; ergo indigent intentione ; Sacerdotes enim vocantur à Paulo Dispensatores Misteriorum Dei , dispensatio autem fit cum intentione.

O B J E C. tertio , nullum ergo esse certum , an sit baptisatus , nec-nè ; quia potest semper dubitare de intentione ministri. Resp. nullum esse certum certitudine fidei ; tamen est certus certitudine morali : non debet enim credere de proximo , quod voluerit perpetrare sacrilegium , non intendendo effectum Sacra-

menti conferre. Nec quis dicat, ergo Baptismus Hæreticorum periculosus est; quia non intendunt facere quod facit Ecclesia Romana, sed quod facit Genevensis. Respondeo enim, quod intendere facere quod facit Ecclesia Genevensis, hoc est intendere virtualiter. quod fecit Christus, & quod jussit facere.

QUESTIO V.

Qualis debeat esse intentio ministri?

QUIA intentio ministri debet esse formalis, sive sit implicita, sive explicita; potest ulterius quæri, an illa intentio formalis debeat esse actualis, vel virtualis, vel habitualis: sed ante responsionem, sciendum est, quod intentio actualis est, quando minister actu conficiens Sacramentum intendit facere quod fecit Christus, vel Ecclesia: Intentio virtualis est, quando propter distractionem minister non intendit actu facere quod fecit Christus, sed antea intendit; nec illa intentio, quam vocamus actualem, fuit interrupta per contrarium actum: Habitualis tandem est quædam promptitudo, qua Sacerdos v. g. est expeditus ad baptifandum; quæ quidem promptitudo oriri potest ex habitu infuso vel acquisito.

CONCLUSIO.

IN TENTIO habitualis non sufficit; actualis non requiritur absolutè, sed virtualis dumtaxat necessaria est. Primum patet, quia talis

habitus qui est v. g. in Sacerdote ad consecrandum, & in Episcopo ad confirmandum, non est deliberatus; imò potest esse in dormiente & in hominibus mente captis; unde patet talem intentionem non sufficere. Quod si D. Thomas videatur hoc asseverare; hoc est, quia confundit intentionem virtuales cum habituali. Secundum manifestum est, quia intentio actualis non est in potestate nostra semper; non possumus enim quin aliquando distrahamur, & nimis durum esset hoc exigere à ministro; tamen cavendum est, ut quisque hanc intentionem habeat. Tertium ergo liquet ex duobus primis; cum enim intentio ministri necessaria sit, ut probavit præcedens conclusio per Concilia; intentio verò habitualis non sufficiat; nec actualis absolute exigatur: ergo concludendum est, quod minister saltem virtuales debeat habere: ad intentionem autem virtuales requiritur, quod paulò antea fuerit actualis; & non sufficit, quod v. g. suscipiendo Sacerdotium, quis habeat intentionem semper consecrandi.

Obj. c. Sacramenta non habent vim operativam à ministro, sed à solo Christo: ergo nullomodo intentio ministri requiritur. Resp. non esse nobis questionem de effectu Sacramentorum; gratia enim quæ est effectus Sacramenti, nullomodo dependet à ministro nec ab intentione ministri; sed loquimur de esse & confectione Sacramentorum quæ dependent à ministri intentione; unde v. g. si homo intenderet aliquem baptizare, & non intenderet illi conferre gratiam; gratia ipsa non suspen-

deretur ob defectum intentionis; quia ut optimè dicit responsio, vis operativa Sacramento-
rum à solo Christo dependet: hoc non impedit
tamen, quin dicamus quod si minister non in-
tenderet Sacramentum facere, reverà nec Sa-
cramentum faceret, nec produceret gratiam.

O B J E C T. secundò, Intentio virtualis non
sufficit; quia intentio virtualis nihil aliud est,
quàm actus præteritus; sed quod est præteri-
tum, non potest producere gratiam præsentem:
ergo ad effectum Sacramenti virtualis intentio
non sufficit. **Resp.** negando antecedens; ad
probationem distingo minorem; quod est
præteritum non potest influere in præsens, nec
producere gratiam præsentem physice, con-
cedo: effectus enim physicus in actu exigit
causam physicam in actu; moraliter, nego.
Habemus exemplum de passione Christi, quæ
antequam existeret, fuit principium gratia-
rum quæ communicatæ fuerunt in veteri Testa-
mento, & nunc etiam, ubi jam peracta est,
est adhuc fons & origo omnium gratiarum no-
bis collatarum. Nil ergo mirum, si dicamus
intentionem virtuales influere in gratiam sal-
tem moraliter; nam ex vi primæ intentionis
quæ actualis fuit, incipit homo applicare se
ad Sacramentum, vel ad præparationem Sa-
cramenti.



QUESTIO IV.

An requiratur Fides in ministro?

MULTI hoc olim putaverunt, inter quos videtur fuisse Cyprianus, & illi qui hanc tenebant opinionem, rebaptisabant eos qui antea baptisati fuerant ab hæreticis. In hoc errore fuerunt Donatistæ; contra quos Augustinus septem libros ex professo scripsit, & ipsemet Augustinus Cyprianum excusat, dicens quòd tempore Cypriani nondum erat Concilium plerarium per quod rei veritas haberetur.

CONCLUSIO.

NON requiritur Fides ad valorem Sacramenti. Hæc propositio est de fide, saltem post tempus Cypriani, quippe quæ fuit definita in Concilio Carthaginensi Provinciali, Canone 1. post mortem Cypriani ejusdem urbis antea Episcopi; in Arelatenſi primo & secundo; in Laodicæno Can. 8. in Nicæno primo Can. 17. ubi jubet, hæreticos Paulianistas ad Ecclesiam redeuntes rebaptisari, quia peccabant in forma Baptismi; alios verò hæreticos debitam materiam & formam adhibentes, minimè: sic etiam Concilium Tridentinum Sess. 7. Can. 4. de Baptismo. Hæc quaestio intelligitur de solo Baptismo, non verò de aliis Sacramentis, quia supponunt Baptismum; hæretici tamen, si antequam à nobis recedant sint Presbyteri, possunt absolutionem conferre; & si sint Episcopi, possunt or-

dinare; talis enim potestas pertinet ad spirituales characterem qui est indelebilis; unde cum fiunt hæretici, amittunt solam licentiam non verò potestatem: quod intelligitur tamen de potestate ordinis, non jurisdictionis; licet enim possint consecrare v. g. non possunt tamen excommunicare. Porro, idem dicendum est de paganis respectu Baptismi, ac de hæreticis, quòd scilicet baptizare possint.

O B J E C T. Baptismus confertur in nomine Trinitatis; ergo non potest conferri ab illis qui fide Trinitatis carent. Negatur consequentia: non baptisant enim autoritate propriâ, sed Christi, qui sic disposuit, ut infidelis possit ministrare Baptismum. Nec dicas, extra Ecclesiam non est salus: ergo nec potest recipere infans salutem per baptismum à pagano collatum. Distinguitur enim: extra Ecclesiam non est salus: formaliter, concedo: ministerialiter, nego: licet ergo pagani non pertineant ad Ecclesiam quoad fidem; pertinent tamen quoad ministerium. Si quis dicat, caput naturale non influit mediantibus venis aridis: ergo nec mysticum mediantibus infidelibus: negabitur consequentia; primum enim procedit ex defectu virtutis capitis naturalis, quod cum sit finitum in sua efficacia, non potest per tales venas influere; Christus autem est infinitæ virtutis, unde sicut potest sine ministris justificare, potest etiam per ministros infideles.

QUESTIO VII.

An probitas requiratur in Ministro?

HOc potest duplicem sensum pati; primò an probitas requiratur in Ministro, ut validum sit Sacramentum; secundò, ut licitum sit. Valenses, seu Pauperes de Lugduno, & Donatistarum plurimi, primum asseveraverunt.

CONCLUSIO.

AD valorem Sacramenti non requiritur probitas Ministri; qui ministrat tamen Sacramentum ex officio, peccat, si sit in peccato morali; si autem ministret per accidens, non peccat: sic omnes Canonistæ.

Probatur prima pars, quia Minister agit authoritate, non propriâ, sed sibi concessâ à Deo, quam Deus non aufert propter peccatum. Si impius Judas baptisabat validè, ait Augustinus. Deinde, potestas conficiendi Sacramentum non est gratia sanctificans, sed grâtiâ data: ergo compossibilis est cum peccato. Tandem, quia potestas conficiendi Sacramentum non datur communiter in utilitatem ministri: ergo nec debet auferri per peccatum ministri. Porro, sicut propter peccatum non aufertur potestas jurisdictionis; secundum dictum Petri 1. 2. *Subditi estote dominis, non tantum bonis, sed & dyabolis*; ergo nec aufertur potestas Ordinis.

Probantur aliæ partes, quòd scilicet primò

DE SACRAMENTIS. 41

ministrans ex officio peccet, si sit in peccato mortali, dum ministrat; quia si in veteri lege ad ministranda legalia, quæ erant Sacramenta imperfecta requirebatur sanctitas legalis, ut habetur Levit. 23. *Sanctifierunt Deo suo, qui incensum & panes Deo suo offerunt*: ergo à fortiori in lege gratiæ ministri ex officio peccant, si in peccato ministrent. Hinc tenentur ministri, si non confiteri, habere contritionem, saltem existimatam. Ratio quare ministrans per accidens, & non ex officio, non peccet, ut v. g. Laïcus, vel Ecclesiasticus non pastor, qui requiritur baptizare infantem moribundum, est quia sanctitas non alligatur puro ministerio, sed ministranti ex officio.

Objec. in primam partem: Nemo dat quod non habet. Ecclesiast. 14. *Ab immundo quis mundabitur? & postea, Qui baptisatur à mortuo, quid proficit lavatio ejus?* Cum ergo minister improbus non habeat gratiam, non potest illam conferre per Sacramenta. Resp. quòd mali ministri habeant gratiam ministerialiter, non vò formaliter, & quod non possint mundare propriâ virtute, bene autem virtute Christi. Quod si Ecclesiast. 34. habeatur, quod baptisimus à mortuo non proficiat, idest, qui lavatur à mortuo, hoc est à tactu mortui, & iterum tangit illum; talis lavatio non prodest; hoc est in textu. Quod si dicatur communiter quod arbor mala non possit bonos fructus facere: tanquam causa principalis concedo: tanquam ministerialis, nego. Si etiam Malachias asserat, Deum maledicere benedictionibus peccatorum; loquitur de actionibus quæ vim

42 DE SACRAMENTIS.

habebant ex opere operantis; tales enim non recipit Deus à peccatore. Si aliquod Concilium dicat, Baptismum infirmorum non sanare: loquitur de Baptismo Arianorum, qui baptisabant in nomine Patris majoris, Filii minoris, & Spiritus sancti.

QUÆSTIO ULTIMA.

Quanam dispositio requiratur in suscipiente Sacramentum?

Sicut in ministro aliquid requiritur, ut validè conferat Sacramenta, aliquid etiam ut licitè conferat; sic etiam aliud requiritur in suscipiente Sacramentum ut validè Baptismum suscipiat, & aliud ut meritoriè.

CONCLUSIO ULTIMA.


UT validum sit Sacramentum, requiritur in adultis voluntas suscipiendi; ut verò Sacramentum conferat gratiam, aliquando requiritur sanctitas in suscipiente, aliquando non. Primum patet ex Innocentio 3. cap. *maiores*, de Baptismo; ubi ait, *Qui nunquam consentit, nec rem, nec caracterem Sacramenti suscipit.* Illa autem intentio sufficit quæ est virtualis; si enim aliquis hodie petat Baptismum, & postea cadat in dementiam, potest baptisari; non verò, si nunquam intentionem habuerit; pro pueris autem qui intentione carent, sufficit intentio Christi & Ecclesiæ.

Probatur secundum; ut enim quis recipiat gratiam, seu augmentum gratiæ, quod con-

DE SACRAMENTIS. 43

fertur per Confirmationem, Eucharistiam, Extremam-unctionem, Ordinem & Matrimonium, debet in gratiâ præexistere; unde hæc Sacramenta vocantur Sacramenta vivorum, quia dantur illis qui habent jam vitam spiritualem.

Probatur tertium, respectu Pœnitentiæ & Baptismi; si enim requireretur gratia in illo qui baptisatur, vel qui absolvitur; talia Sacramenta non tollerent peccatum, quod tamen falsum est; quia Baptismus tollit peccatum originale, & Pœnitentia peccatum actuale; & hæc duo Sacramenta dicuntur ob hoc, Sacramenta mortuorum; quia sunt pro illis qui vitæ spirituali carent.



CAPUT ULTIMUM.

De effectu Sacramentorum.

QUANDOQUIDEM ad causam sequitur effectus; ideo, postquam egimus de causâ Sacramentorum, nunc ad ipsorum effectum transeundum est. Effectus autem Sacramentorum sunt duo, quorum unus est gratia, sive habitualis, sive actualis; alius verò est character, qui si non per omnia Sacramenta conferatur, per tria tamen communicari solet, nimirum per Baptismum, Confirmationem & Ordinem; de his omnibus dicetur suo loco in præsentî capite.

QUÆSTIO PRIMA.

*An Sacramenta conferant gratiam
habitualement?*

HÆRETICI hujus temporis volunt Sacramenta non producere gratiam efficienter, sed tantum objective, in ratione scilicet signi, excitando in nobis fidem passionis Christi, & mediante fide gratiam, sicut imagines rerum sacrarum solent in nobis excitare devotionem: sed si hoc verum esset, non deberent necessariò Sacramenta accipi à quolibet; sufficeret enim, si viderentur illi qui talia Sacramenta conferunt; nam per hoc fides æqualiter in illis excitari posset, ac si actualiter ea reciperent: Nos autem qui dicimus quòd Sacramenta conferant gratiam efficienter, non ut causa principalis, quia solus Deus illam sic confert; nec ut causa principalis meritoria, quia solus Christus est talis causa, sed ut causa instrumentalis, aliter habemus concludere.

CONCLUSIO.

SACRAMENTA gratiam habitualement conferunt, & per gratiam habitualement intelligimus aliquam qualitatem inhxerentem animæ & divinitus infusam, quâ homo justificatur, unde vocatur gratia justificans; qua etiam san-

DE SACRAMENTIS. 45

ificatur, unde vocatur sanctificans; vel gratus Deo efficitur, unde vocatur tandem gratum faciens. Hæc conclusio habetur ex Conciliis Florentino, Arausicano, & Trid. quod quidem ultimum sess. 7. de Sacramentis can. 6. habet; *Si quis dixerit, Sacramenta nova legis non continere gratiam quam significant, aut gratiam ipsam, sublato obice, non conferre, Anathema sit.*

Confirmatur nostra conclusio ex Scripturâ, quæ ostendit, loquendo de quolibet Sacramento, omnia gratiam conferre: de Baptismo enim habetur Act. 2. *Baptizetur unusquisque vestrum in remissionem peccatorum*; non tollitur verò peccatum, nisi per gratiam habitualementem: De Confirmatione habetur, Act. 8. quod per manuum impositionem dabatur Spiritus sanctus. De Eucharistiâ habetur Joann. 6 *Qui manducat meam carnem, habet vitam æternam.* De Poenitentiâ fertur Joann. 10. *Quorum remisistis peccata, remittuntur eis.* De Matrimonio habetur ad Ephes. 5. *Quod sit magnum Sacramentum*: non esset autem magnum inter sacramenta, si non conferret gratiam, sicut alia conferunt. De Ordine tandem habetur 1. ad Timoth. 1. *Vt resuscites gratiam qua in te est per manuum impositionem.* De Extremâ-unctione, Jacobi 5. *Infirmatur quis in vobis? inducat Presbyteros Ecclesiæ.*



 QUESTIO II.

Utrum Sacramenta conferant habitus supernaturales cum gratia?

IN homine iusto, præter gratiam habituales, reperiuntur habitus supernaturales, ut Fides Spes, Charitas, Temperantia, Justitia, Fortitudo, Prudentia; qui faciunt hominem ad bene agendum, & bene utendum creaturis. Hic ergo quæritur, utrum Sacramenta infundant hos supernaturales habitus cum gratiâ habituali.

CONCLUSIO.

SA CRAMENTA cum gratiâ habituali conferunt gratiam donorum & virtutum; idest, habitus supernaturales, tum Theologicos, ut sunt Fides, Spes & Charitas; tum Cardinales, ut sunt Justitia, Temperantia, Fortitudo & Prudentia; tum Morales ut sunt Humilitas, &c. Sic Conc. Trid. sess. 6. cap. 6. Cujus ratio est, quia sicut in vitâ corporali Deus conferendo animam, quæ est principium vitæ, potentias superaddit ut anima producat actiones vitales; sic etiam Deus dans gratiam, dat etiam habitus supernaturales, quibus homo possit in genere gratiæ actiones vitales producere; & hoc fit tum respectu adultorum, tum respectu infantium.

O B. I C. Omnia Sacramenta non conferunt gratiam, sed tantum duo, nimirum Baptismus & Pœnitentia; alia enim quæ di-

DE SACRAMENTIS. 49

cūntur Sacramenta vivorum, illam præsupponunt: ergo male dicitur in præcedenti conclusione, quòd Sacramenta conferant gratiam habitualement; & minus rectè in istà, quòd conferant cum gratiâ habituali habitus supernaturales; quia tales habitus non infunduntur nisi cum gratia: cū ergo in Sacramentis vivorum gratia non infundatur, propterea non infunduntur in illis habitus supernaturales. Resp. quòd quando diximus in præsentī conclusione Sacramenta conferre gratiam; hoc est, vel in se, vel in augmento; idest, vel producunt gratiam ut sic, vel producunt augmentationem gratiæ: sic etiam, quando dicimus in præsentī conclusione, quòd Sacramenta conferunt habitus supernaturales, hoc est, vel in se, vel in augmento; v. g. ille qui recipiens Eucharistiam habet gratiam, habet etiam Fidem, Spem & Charitatem, & alios habitus supernaturales; augentur tamen, sicut & gratia, & per sumptionem Eucharistiæ.

O B J E C. secundò, habitus dantur propter actus; sed infantes non sunt capaces actuum supernaturalium: ergo nec illis infunduntur habitus supernaturales. Pro adultis etiam videtur, quòd habeant æqualem difficultatem operandi post Baptismum, ac ante; quòd est signum, ipsos per Baptismum non recepisse habitus supernaturales, quibus promptiores fierent ad bene agendum. Resp. tales habitus infundi infantibus, ut illis possint bene uti, cū adoleverint. Quoad adultos verò, si sentiant difficultatem bene agendi post Baptismum; hoc non provenit ex defectu habituum;

sed ob inordinatos concupiscentiæ, motus, quæ per Baptismum non tollitur.

Q U Æ S T I O I I I .

An Sacramenta conferant gratias actuales?

EX dictis & ex dicendis in hâc quæstione, patet triplicem esse gratiam: prima vocatur gratia habitualis, & est ea, ut diximus, quâ homo gratus est Deo; alia est gratia virtutum coinfularum cum gratiâ habituali, quæ datur ut homo justus faciliùs prorumpat in actus supernaturales, v. g. Fidei, Temperantiæ, aut Humilitatis: alia tandem est gratia actualis, quâ excitatur homo ad hoc, ut operetur benè. De duabus primis egimus; superest ergo loquendum de tertiâ.

C O N C L U S I O .

PRÆTER gratiam habitualem, quam Sacramenta conferunt, præter etiam habitus supernaturales, qui coinfunduntur cum gratiâ habituali, Sacramenta conferunt gratias speciales, quæ Sacramentales dicuntur, & quæ sunt auxilia quædam actualia ad rectè fungendum muneribus, ad quæ destinamur per ipsa Sacramenta: & sic Sacramenta habent duos effectus; unum communem, nempe gratiam sanctificantem & habitualement, quæ ab omnibus Sacramentis confertur, sive in se, sive in augmento; & alium particularem, nempe gratiam actualem, quæ Sacramentalis vocatur, & quæ est necessaria ad ritè obeunda munera, quibus

quibus per Sacramenta destinamur. Baptismus v. g. nedum confert gratiam habitualement quâ regeneramur, sed & gratiam actualem, siue excitantem, siue adjuvantem, ut dignè suscipiamus alia, Sacramenta cum opus fuerit. Confirmatio non solum confert augmentum gratiæ habitualis, sed etiam auxilium actuale, ad profitendam publicè fidem, cum opus fuerit. Poenitentia præter gratiam habitualement quam infundit ad tollendum peccatum actuale, confert pro occasione gratias actuales ad vitanda peccata; Eucharistia dat gratiam actualem ad nutriendam & exercendam charitatem; Extrema-unctio dat gratias actuales necessarias ad vincendas tentationes, quæ in articulo mortis oriri solent. Ordo nedum dat gratiam habitualement Ordinato, sed & specialement, & actualem quâ ritè exerceat actus sui Ordinis. Matrimonium tandem præter gratiam habitualement quam auget in contrahentibus, dat illis specialia auxilia ad onera conjugii faciliùs toleranda. Ex quâ inductione patet, quòd singula Sacramenta gratiam habitualement habeant pro effectu communi; & Sacramentalem pro effectu singulari. Superest tantum quòd notetur, gratiam habitualement conferri, cum applicatur Sacramentum; gratiam verò Sacramentalem, quæ actualis est, dari tantum quando occasio se præbet vel malum vitandi vel, bonum faciendi, vel munus suum obeundi.

Q U Æ 10 I V.

An Sacramenta conferant gratiam ex opere operato ?

THEOLOGI dicunt duplicem esse modum quo gratia ordinariè obtinetur , ex opere operantis , & ex opere operato. Sacramentum autem conferre gratiam ex opere operantis , est illam causare intuitu boni operis interni conjuncti cum receptione Sacramenti , cui debetur gratia . v. g. intuitu Fidei , Devotionis aut Charitatis suscipientis Sacramentum : Sacramentum verò conferre gratiam ex opere operato , est eam causare in virtute ipsius operis externi quod Deus instituit , & non intuitu meriti vel dispositionis illius qui Sacramentum recipit : unde licet fides & devotio requirantur in suscipiente , nullam tamen efficaciam habent circa gratiam , sed sunt tantum dispositiones præviæ , quæ requiruntur , non ex parte agentis , sed ex parte subjecti ; non requiruntur , inquam , ut agens possit agere , sed ut subjectum possit recipere formam ; v. g. ignis ex suâ ratione propriâ , & si sic fari liceat , ex opere operato est calefactivus ; ut tamen calefaciat actu , requiritur expulsio humiditatis ; talis autem expulsio requiritur tanquam dispositio prævia ex parte subjecti , non verò ex parte agentis.

C O N C L U S I O .

SA CRAMENTA novæ legis causant gratiam ex opere operato , non ex opere operantis ,

DE SACRAMENTIS. 51

nisi tantum dispositivè ; sic Conc. Trid. sess. 7. can. 8. *Si quis dixerit ; nova legis Sacramenta ex opere operato non conferre gratiam , Anathema sit* ; sic antea Conc. Araul. 1. can. 11. sic etiam Carth. 4. can. 7. Idem sentiunt communiter Doctores Catholici : Augustinus præ cæteris , qui lib. 4. contra Cresconium cap. 61. ait ; *Non horum meritis à quibus ministratur Sacramentum , nec horum quibus ministratur , constat Baptismus , sed propriâ constat sanctitate & virtute , propter enim à quo institutus est* ; hoc est ergo , quasi Augustinus diceret , Sacramenta non conferre gratiam ex meritis illius qui ministrat , nec illius qui suscipit , sed suâ propriâ virtute : ergo ex opere operato.

Confirmatur ratione ; quia si vetera Sacramenta conferebant gratiam legalem ex opere operato quam significabant primatiò : ergo nostra causant gratiam habitualement ex opere operato ; alias non essent nobiliora veteribus , quæ gratiam habitualement & sanctificantem causabant ex opere operantis. Secundò , Sacramenta nostra se habent ut medicinæ quædam supernaturales à Christo institutæ , quibus curatur anima à morbis spiritualibus ; sed medicinæ non habent quoddam sanent à bonitate medici , nec ægroti , sed à seipsis & ex virtute ipsius medicinæ : ergo Sacramenta virtute propriâ & ex opere operato habent virtutem producendi gratiam. Tandem ex ipsismet hæreticis , Baptismus prodest tum infantibus , tum amentibus , in quibus non est opus operans ; opus enim operans est opus aliquod meritorium , cujus non sunt capaces illi qui non habent usum rationis : ergo

52 DE SACRAMENTIS.

inferendum est, quod Baptismus gratiam conferat ex se, seu ex opere operato.

Quòd si Sacramenta causent gratiam ex opere operantis; hoc est tantum dispositivè, ut scilicet tollatur obex, qui impedit introductionem formæ ex parte subjecti, ut diximus de expulsiōe humiditatis in ligno, quæ est requisita dispositio ex parte subjecti, ad hoc ut recipiat calorem; non verò requiritur ex parte ignis, qui semper ex suâ virtute propriâ est calefactivus. Sic ergo ut Baptismus v. g. conferat gratiam adulto, requiritur intentio in ipso, & aliquis dolor de peccatis suis; sed hoc est ex parte subjecti, non verò ex parte causæ: Quòd si dolor requiratur in adulto, talis dolor non pertinet ad Pœnitentiam ut est Sacramentum, sed ad Pœnitentiam quæ est virtus; quid sit autem Pœnitentia virtus, & Pœnitentia Sacramentum, dicetur agendo de Sacramento Pœnitentiæ. Quod si quærat, cur debeat præexistere dolor de peccatis antea commissis in adulto baptizando; est quia justum videtur, quòd ille qui voluntariè à Deo aversus est per peccatum, voluntariè ad Deum revertatur per resipiscentiam, seu dolorem de peccato, & ille dolor in adultis supponit fidem & spem, non quidem infusam, quia per Baptismum datur, sed acquisitam: Pro parvulis autem non sic dicendum est; quia cum alienâ voluntate peccaverint, per solum Baptismum sine proprio actu sanctificantur.

OBJEC. D. Petrus cap. 3. 1. Epist. dicit, Baptismum esse similem Arcæ Noë, quæ nihil produxit conservando ipsum Noë. Resp. talem

similitudinem non esse omnimodam ; sed in hoc tantum stare quod sicut nullus eorum qui fuerunt in Arca , periit per aquas diluvii , sic nullus eorum qui baptisati fuerunt , peribit per peccatum originale. Quod si Marc. 16. habeatur , *Qui crediderit & baptisatus fuerit , salvus erit ;* ex hoc non est inferendum , Baptismum non justificare , sed solam fidem : imò , ex hoc potest tantum inferri quod fides requiratur in adulto baptisando , non tanquam aliquid complens efficacitatem Baptismi , quia pro tunc non conferret gratiam ex opere operato ; sed tanquam aliquid removens impedimentum à subiecto ; & sic fides non justificat , ut volunt hæretici ; sed est conditio sine qua esset obex insuscipiente : unde , si dicatur quod *Iustus ex fide vivit* ; hoc est , non fide solâ , sed fide quæ est à Sacramentis , vel quæ præsupponit Sacramenta. Si etiam Petrus loco præcitato dicat , quod ablutio non solvat , sed bonæ conscientiæ interrogatio ; loquitur de adultis , ubi ablutio sine intentione , sine fide acquisitâ , & sine dolore de peccato non producit gratiam ; licet producat characterem & rem Sacramenti ; non verò effectum ejus primarium.

Q U Æ S T I O V.

An Sacramenta legis antiquæ contulerint gratiam ex opere operato ?

NON dubitatur , quin illa Sacramenta sanctam legalem ex opere operato con-

tulerint, in veteri enim lege contrahebatur immunditia per partum, per tactum mortui, & per alios modos, ita quòd qui contraxerant talem immunditiam, erant aliquo modo irregulares; & ob hoc arcebantur ab ingressu templi, & convictu cum aliis fidelibus; Sacramenta autem tollebant talem immunditiam ex opere operato, quatenus talem virtutem habebant ex institutione divinâ; & talis emundatio dicebatur collatio sanctitatis legalis. Quoad gratiam justificantem, constat eam Sacramenta veteris legis aliquando contulisse, non ex opere operato, sed ex opere operantis; hoc est in virtute amoris Dei, vel contritionis eorum qui talia Sacramenta recipiebant; an autem gratiam contulerint ex opere operato, hoc querimus. Sed notandum est, quòd sermo noster sit de Sacramentis purè Mosaïcis, & quæ præcisè ad veterem legem pertinebant; unde non loquimur de Circumcisione quæ instituta erat in lege naturæ, tempore scilicet Abraham; de illa enim dicetur in quæstione sequenti.

CONCLUSIO.

LEGIS antiquæ Sacramenta non conferebant gratiam ex opere operato; primò, quia Paulus vocat Sacramenta vetera, *Elementa vacua, egena, & infirma*; unde ad Galatas 3. dicebat; *In lege nemo justificatur apud Deum*; unde etiam Joann. 1. ait quòd, *Lex per Moysen data est, gratia verò per Iesum Christum*. Secundò, quia potissima ratio distinctionis per quam lex nostra differt à Mosaïcâ, est quia nostra habet vim justificandi, unde aprè vocatur lex gratiæ; vetus autem non sic; per legem

enim nemo justificabatur, nisi ex opere operantis. Tertiò, quia ut Sacramentum ex se & ex opere operato conferat gratiam, debet habere annexam Dei promissionem; talis autem promissio non habetur neque ex Scripturâ, neque ex traditione, neque ex Conciliis aut Patribus; imò Paulus loquens de Christo, dicit, *Melius sortitus est ministerium, quando & melioris testamenti mediator est, quod in melioribus promissionibus sancitum est*; Et postea explicans tales promissiones, addit ipse, *Propitius ero iniquitatibus eorum*; quod reverà non promisit Testamentum vetus.

O B J E. Vetera Sacramenta promittebant remissionem peccatorum, Levitici 4. 5. & 6. sed non possunt remitti peccata, saltem mortalia, sine infusione gratiæ: ergo gratiam ipsam promittebant: ergo conferebant ex se & ex opere operato. Resp. quòd duo sint in peccato; scilicet macula peccati quam contrahit anima per actum peccaminosum, & quæ in ipsâ remanet post actum peccati; & est poena peccati; eo enim instanti quo quis in peccatum incidit, poenam peccati meretur: Sacramenta autem vetera promittebant remissionem peccati, quantum ad poenam temporalem, concedo: quantum ad culpam & poenam gehennæ, nego. Quod patet per hoc, quòd sacrificia veteris legis remittebant tantum aliqua peccata in particulari; si verò remisissent culpam peccati, omnia simul remisissent, non remittitur enim unum sine alio. Quòd si quis dicat, immolationem arietis omnia peccata remisisse; hoc verum est de omnibus peccatis commissis

In ablatione rei alienæ, non verò de omnibus peccatis simpliciter.

Q U Æ S T I O VI.

An Circumcisio contulerit gratiam ex opere operato?

CIRCUMSISITIO præcipuum erat legis antiquæ Sacramentum, constans amputatione præputii ex institutione divinâ. Data fuit à Deo ad designandam familiam Abrahæ & discernendos Judæos ab aliis gentibus, ex quâ familiâ oriundus erat Christus. Data etiam fuit ad deletionem peccati originalis. In ea Circumcisione plura sunt notatu digna; primò minister, de quo tenent communiter Doctores, quemlibet, etiam foeminam, in necessariis saltem, potuisse circumcidere. Secundò instrumentum, quod erat culter lapideus, ut habetur Exodi 4. & Josué 5. Tertiò tempus, quod erat octavus dies à nativitate, juxta illud Levitici, *Die octavo circumcidetur puer*; & hoc tempus non poterat anticipari; unde imminente periculo, si infantes essent moribundi ante octavum diem, utebantur parentes remedio legis naturæ sicut utebantur pro foeminis; quòd si postea convaluissent parvuli, debebant circumcidi, non quidem in deletionem peccati, quia jam sublatum erat; sed in observationem præcepti, & ut infantes in populo Dei annumerarentur. Licet tamen Circumcisio non posset anticipari, poterat tamen differri occurrenti

DE SACRAMENTIS. 37

bus legitimis causis, v. g. morbo, aut alio mortis periculo: Sic pueri Hebræorum in deserto nati, ob iter continuum, & novas quotidie castrametationes, manserunt incircumcisi spatio quadraginta annorum, quibus fuerunt in deserto; sic Josué 5. & pro tunc probabile est, quòd usi fuerint remedio legis naturæ contra originale peccatum. Ubi sciendum, quòd si octavus dies in Sabbatum incideret, in eo non minùs fiebat Circumcisio. Quartum tandem quod est notatu dignum in Circumcisione, erat nominis impositio; Deus enim Circumcisionem instituens, mutavit nomen Abram in Abraham, & Sarai in Sara; hinc Iudæi soliti erant dare nomina pueris in Circumcisione

CONCLUSIO.

CIRCUMCISIO conferebat gratiam ex opere operato. Sic Scotus in 4. dist. 1. quæst. 6. Sic etiam Augustinus lib. 1. de nuptiis & concupiscentiâ; *Ex quo inquit, instituta est Circumcisio in populo Dei in purgationem hujus peccati veteris, valebat magnis & parvulis, sicut Baptismus cœpit valere ex quo institutus est: ergo sicut Baptismus confert gratiam ex opere operato, sic & Circumcisio. Idem etiam habet libri 4. de Baptismo cap. 24. Præceptum est Abraha, ut circumcideret parvulos, quia ipsum Sacramentum multum per se valet; quæ particula, per se denotat collationem gratiæ ex opere operato.*

Probatur ratione nostra conclusio; quia, si Circumcisio conferret gratiam tantum ex opere operantis: vel esset respectu operis operantis.

C v.

eorum qui Circumcisionem recipiebant; vel respectu operis operantis ministri: sed hoc non potest dici respectu operantis ministri; Circumcisio enim erat valida, etiamsi per infideles & Samaritanos conferretur, ut notat Augustinus lib. 1. contra Cresconium: Non producebat etiam gratiam ex opere operantis recipientium, quia erant communiter parvuli qui non poterant mereri nec demereri: ergo nec producere opus operans, cujus intuitu receiverent gratiam; unde superest quod asseramus circumcisionem produxisse gratiam ex opere operato.

Objic. Circumcisio ex Apostolo non est reputata Abrahæ in justitiam: ergo non contulit illi gratiam. Resp. Circumcisionem dupliciter spectari posse; Primò, ut est quædam externa ceremonia, quâ fiebat scissio præputii, & tunc non erat destinata ad conferendam justitiam, sed distinguebat tantum posteros Abrahæ, scilicet Judæos, à Gentilibus: Secundò, sumitur quatenus illa ceremonia conjungebatur cum protestatione fidei in Christum venturum, & tunc delebat peccatum originale, & gratiam conferebat ex opere operato. In primâ acceptione intelligendi sunt Patres dicentes Circumcisionem nihil profuisse, & esse tantum infirmum & egenum elementum.

Objic. secundò: Infantes post Circumcisionem decedentes cælum non ingrediebantur, quod signum est non contulisse gratiam. Resp. quod si non intrarent cælum, non erat ex defectu Circumcisionis, sed quia nondum pretium solutum erat; & ob hoc non poterat

cælum aperiri. Si dicas, ergo Circumcisio non differt à Baptismo. Resp. ideò differre, quia majorem confert Baptismus gratiam: sic intellige Patres dicentes eam non conferre gratiam; idest comparatè ad Baptismum, quatenus non tantam conferebat gratiam, quantam Baptismus confert. Si inferatur, ergo lex vetus non differt à novâ, si Sacramenta veteris legis conferebant gratiam ex opere operato; Resp. differre in Sacramentis purè Mosaicis; Circumcisio autem pertinet tum ad legem naturæ, quoniam data est tempore Abrahæ, tum ad legem scriptam, quia in ea perseveravit. Porro, idem dicendum est de remedio legis naturæ ac de Circumcisione, quòd scilicet tale remedium gratiam contulerit ex opere operato.

QUESTIO VII.

An Sacramenta conferant gratiam vel moraliter, vel physicè?

DIvvs Thomas Sacramenta vocat causas instrumentales physicas gratiæ, in quantum vult ipsa gratiam physicè producere per modum instrumenti physici: antequam vero detur nostra opinio, sciendum est, quòd Sacramenta possint intelligi quadrupliciter conferre gratiam. Primò ad modum causæ sine quâ non, itaut dicantur signa externa, quibus positis, Deus dicatur conferre gratiam, sicut v. g. sigillum repræsentatum elemosynatio esset signum ad recipiendam elemosynam. Sc-

DE SACRAMENTIS.

CONCLUSIO.

SACRAMENTA non producunt gratiam ut causæ physicae, sed ut causæ morales; quatenus impetrant à Deo gratiam, quam ipsemet Deus statuit dare infallibiliter, quotiescumque hæ actiones religiosæ exercerentur.

Probaturs conclusio; primò, quia ex D. Thoma 1. parte quæst. 45. art. 5. creatura non potest creare, neque principaliter, neque instrumentaliter, saltem physice; quia creare est potentia infinitæ; sed Sacramenta sunt creaturæ: ergo non possunt producere gratiam, ut causæ physicae; quoniam gratia habet esse per creationem. Secundò, quia causæ physicae non producunt gratiam; nisi quando actu existunt; sed Sacramenta conferunt gratiam aliquando pro eo tempore quo non amplius existunt; Augustinus enim & D. Thomas q. 69. art. 10. aiunt, si quis hodie fictè reciperet Baptismum, idest, non attritus, nec volens atteri, reciperet rem & characterem Baptismi; & si cras deponeret fictionem, idest, attereretur, reciperet cras gratiam virtute Baptismi hodie suscepti. Tertiò, quia Sacramenta non sunt nobilioris conditionis quàm Christus; sed Christus non causavit gratiam per veram & physicam efficientiam, sed tantum per influxum moralem, in quantum meruit à Patre, ut daret gratias hominibus intuitu suæ mortis: ergo nil mirum est, si dicamus Sacramenta conferre tantum gratiam moraliter. Hujus sententiæ sunt Hieronymus in cap. 4. Esayæ, Aug. in Ep. 13. & Bernardus qui serm. de Coena Domini habet: *Sicut investitur Canonicus per*

DE SACRAMENTIS. 63

respectu agentium creatorum, non verò respectu Dei; causa enim moralis aliter operatur respectu creaturæ, & respectu Dei; respectu enim Dei est tantum causa actus externi, non verò interni, quia increatus est; respectu verò creaturæ, causa moralis quæ movet, est causa, tum actus interni, quo voluntas se determinat ad volendum; tum actus externi, quo causa principalis aliquid operatur.

O B J E C T. Si Sacramenta producunt tantum moraliter gratiam; est potius Deus qui ad præsentiam Sacramentorum gratiam producit, quam ipsa Sacramenta: & sic nostra Sacramenta sunt tantum signa vacua, quæ nullam habent excellentiam supra Sacramenta legis Mosaicæ. Resp. negando consequentiam, quia Sacramenta nostra reverà sunt plena gratiæ, quatenus illam impetrant, sicut v. g. Passio Christi dicitur propriè causa gratiæ, quia per Passionem Christus nobis gratias meruit: non est ergo par ratio de denario plumbeo, quo exhibito datur merces; quia talis denarius non est impetratorius, nullum enim habet meritum: Sacramenta autem sunt meritoria & impetratoria, quia continent ipsum Christum vel realiter, ut in Eucharistia; vel virtualiter, ut in aliis Sacramentis, quæ fundantur in virtute sanguinis Christi, ut constat ex 6. ad Rom. *Quicumque baptisati sumus in Christo Iesu, in morte ipsius baptisati sumus.*

O B J E C T. Si Sacramenta non producunt gratiam physicè, sed potius Deus ad receptionem Sacramenti: ergo, sacerdos non potest dicere, Ego te absolvo, sed potius Deus est qui te

24 DE SACRAMENTIS.

absolvit ad præsentiam sacerdotis & Sacramenti. Resp. negando consequentiam, quia minister non profert verba absolutionis tantum concionatoriè & declaratoriè; sed ea profert efficaciter & juridicè per potestatem sibi traditam, licet non physicè attingat effectum: quia tamen necessitat Deum conferre gratiam ex pacto, debet dicere, Ego te absolvo; sicut is qui cogit custodem carceris ad aperiendam januam, dicitur incarceratum liberare; sicut etiam rex dicitur reum absolvere, qui jubet eum absolvi.

OBJIC. ultimò, Si Sacramenta conferrent gratiam tantum moraliter, talis modus producendi gratiam esset similis illi modo quo maleficus arte dæmonis operatur maleficia; non sunt enim verba quæ efficiunt maleficium, sed ipse dæmon ad prolationem verborum. Resp. quòd per exempla turpia non debeant explicari mysteria divina: est tamen aliqua similitudo, ex qua colligitur iniquitas & superbia dæmonis; videns enim diabolus Deum instituisse aliqua signa quibus pollicitus est gratiam ad sanctificationem animarum; sic etiam dæmon, ad instar Dei, voluit instituere signa sensibilia, quibus promisit assistere suis magis ad maleficia facienda in ruinam animarum: hoc autem agit dæmon, ut sicut Deus per Sacramenta honoratur, ita & ipse diabolus colatur per maleficia; licet tamen inter utrumque modum producendi sit aliqua similitudo, est tamen disparitas; quia signa diaboli non sunt signa infallibilia, sunt enim aliquando falsa & illusoria. Adde quòd illa signa diaboli

non sunt impetratoria, sicut Sacramenta, quæ infallibiliter gratiam impetrant, ratione contenti, scilicet Christi; quem continent vel realiter, vel virtualiter, ut diximus in secunda objectione.

QUESTIO ULTIMA.

An Sacramenta imprimant characterem?


POST QUAM egimus de gratia, quæ est primarius Sacramentorum effectus, de caractere superest agendum qui est secundarius effectus aliquorum. Character autem græcè idem est ac signum latinè, quo una res distinguitur ab alia. Definitur autem character, signum spirituale indelebile, quo Fideles Christo consignantur, & ad ipsius cultum destinantur; qui enim tali caractere sunt insigniti, sunt quasi ipsius gregis, & ab aliis distinguuntur.

CONCLUSIO.

NON omnia Sacramenta conferunt characterem, sed tria tantum Baptismus, nempe, Confirmatio, & Ordo; sic Concil. Trid. sess. 2. can. 9 de Sacramentis in genere. Quia Christianus tripliciter distinguitur ab alio; primò, ut Christianus simpliciter à non Christiano, & hoc habet per characterem Baptismi; secundò, ut fortis miles ab infirmo, quod habetur per Confirmationem; tertio, ut perfectus à non perfecto, & tales designantur per characterem Ordinis. Ratione talis characteris, qui est indelebilis, & nullo peccato obliterari

potest, Sacramenta quæ conferunt tales caracteres, non possunt iterari. Quia etiam tales caracteres sunt indelebiles, non solum manent in hac vitâ, sed perseverant in animabus beatorum & damnatorum; in illis ad majorem ornatum & splendorem, in his verò ad majorem ignominiam. Quoad effectus caracteris, tres sunt quos producit in animâ; primò enim per caracterem confertur quædam potestas spiritualis ad ea peragenda quæ spectant ad cultum divinum; quæ quidem potestas vel est passiva ut in Baptismo, quo homo redditur idoneus ad alia Sacramenta licitè vel validè suscipienda; vel est activa, ut in Ordine, quo homo fit idoneus ad sacramenta aliis ministranda, & in Confirmatione, quâ est idoneus ad fidem profitendam. Secundò, caracter configurat hominem Christo, à quo, tanquam à summo sacerdote, derivatur omnis potestas spiritualis; & sic, qui aliquo Sacramentali caractere insigniti sunt, efficiuntur Christo similiores quam alii. Tertiò, tandem caracter discernit eos, qui ipsum receperunt ab aliis; unde per totam æternitatem distinguetur Baptisatus à non Baptisato, Confirmatus à non Confirmato, & Ordinatus à non Ordinato.





DISPUTATIO SECUNDA.

De Sacramentis in specie.

AD disputationem de Sacramentis in communi, ordo doctrinæ postulat, ut adiangamus examinationem eorum, quæ dici possunt de sacramentis sigillatim sumptis,



CAPUT PRIMUM.

De Baptismo.

AGENTES de multiplicitate Sacramentorum, probavimus ea esse septem numero, & talem numerum collegimus ex comparatione hominis naturaliter sumpti ad comparationem Christiani; ubi facientes analogiam vitæ corporalis ad spiritualem; diximus quòd sicut in homine generatio est primum quod considerari debet, sic etiam in vita spirituali Baptismus, qui generationi correspondet, est primum Sacramentorum, cujus naturam explicare debemus. Ut omnia, quæ de hoc Sacramento scitu sunt necessaria, innotescant; septem quæstiones proponemus; quarum prima erit de naturâ, institutione, & multiplicitate Baptismi; secunda de materiâ tum remo-

tâ, tum proxima ejus; tertia erit de formâ; quarta de ministro; quinta de effectu & dispositione ad illum; sexta de suscipientibus; septima denique de ritu & de ceremoniis illius.

Q U A S T I O P R I M A.

*Quid sit Baptismus? Quando fuit institutus?
& quotuplex sit.*

NON loquimur hic de baptismo Joannis, qui habebat tantum vim justificandi ex opere operantis, quatenus scilicet ex signo humilitatis junctæ cum quadam peccatorum confessione generali, seu in communi factâ, poterat excitare contritionem, & sic justificare, & erat tantum præparatio ad Baptismum Christi; unde ipsemet Joannes dicebat, *Ego vos baptizo in aquâ, ille vos baptisabit in spiritu.* & ipse Joannes baptisans baptisabat in nomine venturi, idest Christi: sermo ergo noster est tantum de Baptismo Christi.

C O N C L U S I O P R I M A.

BAPTISMUS, qui secundum ethymologiam nominis, nihil aliud est, quam ablutio; siue tollat tantum maculas corporis, siue abluat etiam animam, in quantum est Sacramentum, potest definiri physicè, & metaphysicè: physicè, est ablutio corporis sub præscriptâ verborum formâ; metaphysicè verò, est primum legis novæ Sacramentum, divinitus à Christo institutum, ad significandam &

DE SACRAMENTIS. 89

conferendam gratiam originalem. Hoc ex se satis constat; notandum tamen est quòd gratia illa, quæ est effectus Baptismi, vocatur improprie originalis; quia per gratiam originalem intelligitur ea, quæ habetur in ipsâmet conceptione, quam nullus hominum, demptâ Virgine Maria, habuit, sed vocatur originalis improprie, quia tenet locum gratiæ illius, quam habuissimus ab origine, si Adamus non peccasset.

CONCLUSIO SECUNDA.

BAPTISMUS secundum communio-
rem sententiam fuit institutus, non quando Christus post resurrectionem dixit Apostolis, *Ite, predicate Evangelium omni creatura, baptisantes eos, &c.* sed quando Christus baptisatus fuit à Joanne in Jordane; tunc enim indicata fuit materia baptismi, nempe aqua; quæ per Christi baptismum fuit tactu ejus mundata, ut esset materia hujusce Sacramenti. Forma etiam, quæ est invocatio Trinitatis, fuit indicata, quia persona Patris innotuit per hanc vocem dicentem, *Hic est filius meus*; persona Filii designata fuit per eadem verba, quæ significabant illum qui baptisabatur, esse Filium Dei; tandem personam Spiritus sancti designavit species columbæ. Licet autem Baptismus fuerit eo tempore institutus, præceptum tamen Baptismi fuit tantum generale, quando Christus post Resurrectionem dixit, *Ite, predicate baptisantes.* Dixi, quòd præceptum fuerit tantum generale post mortem Christi; sed hoc non impedit quin esset præceptum aliquod speciale baptisandi,

70 DE SACRAMENTIS.

datum Apostolis ante Passionem; Augustinus enim Epist. 108. dicit, quòd Judas proditor baptisaverit; & Joannis 3. habetur, quòd Christus demorabatur in Judæâ cum discipulis, ubi & baptisabat, idest, per Apostolos; non quidem baptismo Joannis; qui enim tali Baptismo baptisabantur, recipiebant iterum Baptismum Christi, Act. 19. quod confirmat reverà Baptismum institutum fuisse ante mortem Christi.

OBJEC. Forma Baptismi data tantum fuit, quando Christus dixit, *Euntes predicare Baptisantes*. Resp. pro tunc reverà datam fuisse ritu solenni & publico; sed hoc non impedit quin antea data fuerit Apostolis, saltem ritu privato. Quòd si Joannes cap. 7. dicat, *Spiritus sanctus nondum erat datus, quia Christus nondum erat glorificatus*: Verum est, quòd Spiritus sanctus nondum erat datus visibiliter, nisi in die Pentecostes; hoc non impedit tamen, quin ante mortem ipsam Christi, Spiritus sanctus, seu gratia ejus fuerit data invisibiliter per Baptismum. Nec quis etiam instet, dicens, Sacramenta habere tantum vim à Passione Christi; hoc enim verum est de Passione Christi vel inchoata, vel consummatâ; inchoata autem fuit, quando in conceptione suâ mortem accepit pro salute hominum.

CONCLUSIO TERTIA.

BAPTISMUS strictè sumptus est unicus; late autem usurpatus, triplex dici potest, nimirum Baptismus fluminis, flaminis, & sanguinis. Primum patet ex 4. ad Ephes. ubi ha-

betur; quòd sit *unus Deus, una fides, & unum baptisma*. Quòd tamen baptismus triplex sit, quando late scilicet sumitur, patet ex sacrâ Scripturâ: Marci enim 10. mors Christi appellatur Baptismus: nam dixit Christus, *Potestis bibere calicem, quem ego bibiturus sum; aut baptismo, quo ego baptisor, baptisari?* Unde Doctores vocant martyrium, Baptismum sanguinis, Quoad pœnitentiam perfectam, vocatur etiam Baptismus; Marci enim 1. & Lucæ 3. *Erat Ioannes prædicans baptismum pœnitentia;* & sic adest alius Baptismus, nempe flaminis, quo scilicet gratia Spiritus sancti, qui vocatur flamen, confertur. Intuper est tertius Baptismus, qui dicitur fluminis; & est ille de quo loquimur in præsentî Disputatione. Baptismus Sanguinis iterari potest, si scilicet Martyr in vitam rediret, Baptismus Flaminis reiteratur ordinariè, sed nunquam Baptismus Fluminis. Baptismus Fluminis confert gratiam ex opere operato, quia Sacramentum est: Baptismus Flaminis confert gratiam ex opere operantis: Baptismus sanguinis confert gratiam ex opere operato; non quidem vi Sacramenti, quia non est Sacramentum; sed ex privilegio speciali, cuius meminit Matth. cap. 10. *Qui perdidit animam suam propter me, inveniet eam.* Baptismus Fluminis habet rationem Sacramenti, Baptismus tamen Sanguinis aut Flaminis non sunt propriè Sacramenta, licet conferant effectum Sacramenti, nempe gratiam. Ratio autem quare hi Baptismi non sunt Sacramenta, est, quia Sacramenta constant verbis & signis sensibilibus, sed in Martyrio non sunt verba,

72 DE SACRAMENTIS.

& in Pœnitentiâ non est signum sensibile , quia potest consistere in dolore interno. Quoad effectus tamen , habent eosdem quos Baptismus habet , quia Pœnitentia & Martyrium delent peccata , tum originale , tum actuale , tollunt etiam pœnam peccati , ut patet de Latrone cum Christo moriente , qui ita intensum elicit actum contritionis , ut reverà dispensatus fuerit ab omni pœna Purgatorii ; ipso enim die quo mortuus est , fuit cum Christo in Paradiso : Martyrium etiam habet eundem effectum ; Ecclesia enim nunquam orat pro martyre ; imò , inquit Augustinus , qui pro martyre orat , injuriam facit martyri. Porro , per martyrium intelligitur actus religionis imperatus à charitate & elicitus à fortitudine , quo aliquis mortem patitur ob honestam causam , qualis est conservatio fidei , religionis , castitatis , immunitatis Ecclesiæ , vel ob aliam virtutem. Per Baptismum autem Fluminis non intelligitur quælibet conversio , sed perfecta , quæ includit contritionem veram & charitatem cum desiderio Baptismi ; votum enim Baptismi Fluminis requiritur , vel implicite , vel explicite , tum in pœnitentia , tum in martyrio : Imò martyrium ipsum , ut gratiam conferat , exigit actum attritionis , seu displicentiam de peccato ; & pro tunc martyr mediante martyrio , de attrito fit contritus : quod intelligitur tamen de adultis ; Innocentes enim ab Herode mactati , ut sancti reputantur ab Ecclesia , licet dolorem de peccato , nec voluntatem Martyrii habuerint. Tandem , quia diximus votum Baptismi esse necessarium ; idèd si quis posset baptisari , & ex negligentia sua
non

non baptisaretur, non haberet gratiam per Pœnitentiam aut Martyrium, nisi ipsum in fine pœniteret de suâ negligentia.

QUESTIO II.

Quanam sit materia Baptismi?

HERMIANI & Celeucitæ excludabant aquam à materia Sacramenti, quia affirmabant Joannem baptisasse in aqua, & Christum baptisatum in Spiritu sancto & igne; sed non attendebant sensum Scripturæ, quæ innuere volebat, Joannem baptisasse in sola aqua, & non in spiritu & gratia; Christum verò baptisatum in aqua & Spiritu. Jacobitæ loco aquæ utebantur ferro candenti, quod imprimebant fronti, quia inquiebant, Joannes promisit quòd Christus esset baptisatus in Spiritu S. & in igne. Quod non debet tamen intelligi de igne elementari, sed de igne spirituali, nempe de Spiritu sancto, qui in die Pentecostes descendit super Apostolos in forma ignis. Lutherus tandem, qui aliquando interrogatus, utrùm in necessitate Baptismus posset fieri in vino, vel lacte, respondit hoc esse dimittendum iusto Dei iudicio; postea tamen asseveravit omnem liquorem, ex quo balneum fieri potest, posse esse materiam Baptismi. Quæ sit mens nostra, tum de materia proxima, tum de remota, aperiet.

MATERIA remota Baptismi est aqua naturalis. Sic Concilium Tridentinum conformaliter Joannis 3. *Nisi quis renatus fuerit ex aqua, & Aët. 2. Ecce aqua, quis prohibet me baptisari?* Convenienter autem aqua est assumpta ad Baptismum, quia cum Baptismus sit necessarius singulis, bonitas divina illum conferri voluit in re communissimâ. Deinde est quædam convenientia inter aquam & Baptismum; sicut enim aqua extinguit ignem & lavat sordes corporis, sit Baptismus extinguit peccatum, & maculam animæ abluit. Illa autem aqua, quæ est materia Baptismi, debet esse pura & elementaris; & sic excluduntur aquæ distillatæ; saliva, sudor, lachrymæ, & urina. Debet etiam esse usualis; & sic nix, grandæ, & glacies non possunt esse materia Baptismi, nisi resolvantur in aquam, ad minus dum proferuntur verba, Debet etiam esse simplex, & sic aqua ita permixta cum alio corpore, ut perdat denominationem aquæ, est inepta; sic non potest fieri Baptismus ubi caro & succus admixtus ita densarent aquam, ut non amplius esset aqua, sicut nec in luto. Quoad lixivium, transit communiter pro materiâ dubiâ, sicut sal etiam resolutum. Quoad cervisiâ verò, secundum communem usum transit in tertiam entitatem, & sic non est materia propria Baptismi; potest verò Baptismus fieri in aquâ calidâ, salsâ, lutosâ & transeunte per meatus sulphureos. Quod si Papa Stephanus dicatur approbasse Baptismum factum in vino ex necessitate, hoc fecit ut persona particularis;

quod tamen multi de eo non credunt.

CONCLUSIO SECUNDA.

MATERIA proxima Baptismi est ablutio, & sic aqua debet lavare aliquo modo & abluere; illa autem ablutio consistit in contactu physico; unde si parvulus inclusus in corio, utero, vel secundinis, abluatur secundum id tantum in quo inclusus est, non erit baptisatus; sicut nec ille cujus vestes tantum abluerentur: si verò aqua caderet super capillos tantum, hoc sufficeret ad Baptismum. Contactus etiam aquæ debet esse successivus; & sic puer inclusus in dolio aquæ etiam si proferrentur verba, non esset baptisatus. Quoad partes quæ debent abluī, dicendum est, nec totum corpus debere necessariò abluī, nec minimam partem sufficere extra necessitatem; licet enim ablueretur digitus, non propter hoc ablutus diceretur homo; sed debet communiter fieri ablutio in capite, ubi vigent tum interiores, tum exteriores sensus. Si puer emittat tantum pedem vel manum ex utero matris, potest in eâ parte baptisari; quia anima, ad cuius salutem Baptismus instituitur, viget in illâ; si tamen vivusegrediatur, debet iterari Baptismus sub conditione. Quoad quantitatem aquæ, dico illam sufficere, quæ potest contingere corpus, & successivè fluere per partem corporis sufficientem; siue fluat proprio pondere, siue per actionem externam; unde judicatum est, Baptismum fuisse validum factum à muliere, quæ digito tantum madefacto, impressit signum crucis super frontem pueri moribundi.

CONCLUSIO TERTIA.

TRIPLEX est ablutio, nimirum per immersionem, per infusionem, & per asperisionem; & altera quæque harum sufficit, sive fiat semel, ad significandam unitatem essentiae, sive fiat ter, ad denotandam personarum Trinitatem. Si Divus Thomas dicat, non valere Baptismum, nisi post tertiam immersionem; hoc est, quia non perficitur communiter prolatio Verborum, nisi cum tertia ablutione. Si Ecclesia dederit præceptum de tribus ablutionibus; hoc est præceptum decentiae & congruitatis, non verò necessitatis. Quòd ablutio facta per infusionem sufficiat, patet ex primitiva Ecclesia; & ex præsentis usu Ecclesiae Græcæ, quæ per trinam immersionem baptizat. Quòd denique sufficiat aspersio copiosa, constat, quia fertur beatum Laurentium sola aspersione baptisasse hominem paulò ante mortem. Divus Thomas etiam existimat sic baptisasse Apostolos, quando erat multitudo copiosa baptisandorum, ut in Actibus; ubi tria hominum millia in uno die sunt baptisata: sed notandum quòd copiosa debet esse aspersio, & sic minima gutta non sufficeret.

CONCLUSIO QUARTA.

IMMERSIO sine emersione sufficit; quando enim baptisans immergit puerum in flumen, etiam si è manibus cadens parvulus non emergat, in tali actione est vera & propria ablutio: ergo validus est Baptismus, dummodo habeatur intentio, & proferantur verba: Imò, si aliquis carens aqua projiceret infantem in puteum, modo proferret verba, dum

DE SACRAMENTIS. 77

illum tangit aqua, vel paulò ante, vel paulò post, & modo hoc fiat ante mortem pueri, valet Baptismus. Nec quis dicat, quòd non sit ablutio, sed projectio ordinata communiter ad suffocationem; quia præcedit aliquo tempore ablutio, & suffocatio sequens non tollit rationem abluionis. Nec obstat, quòd minister non tangat baptisatum; tangit enim mediata, in quantum projiciendo est causa cur abluatur, sicut aspergens est vera causa ut aqua tangat baptisatum: in illo tamen casu quo deesset aqua, non est projiciendus puer in puteum; esset enim peccatum mortale, & incurreretur irregularitas, & suæ salutis magis consulendum est, quàm alienæ: Unde in hoc casu idem esset, ac si deesset aqua: imò quia hæc opinio est in praxi dubia, & multi Doctores tenent, puerum sic projectum non baptisari, si postea emergeret puer, deberet iterari Baptismus sub conditione.

QUESTIO III.

Quanam sit forma Baptismi?

MULTI in forma Baptismi erraverunt. Gnostici, teste Irenæo, baptisabant in nomine ignoti Patris, in veritate matris omnium, & in nomine Jesu descendantis. Paulianistæ non baptisabant in nomine Patris, & Filii, & Spiritus sancti, ut testatur Innocentius primus Epistolâ 22. cap. 5. Unde Concilium Nicænum jubet ipsos rebaptisari. Aliqui Aria-

D iij

norum baptisabant in nomine Patris per Fi-
 lium in Spiritu sancto ; unde Nicephorus lib.
 11. cap. 35. refert quemdam Deuterium Aria-
 num Episcopum voluisse sic baptizare, & subito
 evanuisse aquam. Alii alio modo baptisabant,
 non servatâ formâ præscriptâ, ut in nomine
 Patris majoris, Filii minoris ; & Spiritûs
 sancti. Alii tandem baptisabant ritu Catholi-
 co : Unde in Concilio primò Arelatenfî can. 8.
 jubetur interrogari Arianos sub quâ formâ
 baptisati sint. Eunomiani baptisabant in mor-
 tem Domini. Græci, qui baptisabant sub hâc
 formâ, *Baptisetur talis servus Christi in nomine*
Patris, & Filii, & Spiritus sancti, validè qui-
 dem baptisabant, quia utebantur tali modo,
 ut vitarent occasionem schismatis orti inter
 primos Christianos, quorum alii dicebant, *Ego*
sum Pauli, ego Cepha, quia baptisati erant vel
 à Paulo, vel à Cephâ, ut habetur 1. Corinth.
 3. sed errabant in hoc, quòd auderent rebap-
 tizare illos qui erant baptisati more latino, &
 hic error damnatus fuit in Concil. Later. sub
 Innocentio III. Lutherus tandem baptisabat
 sub nostro ritu ; at volebat hoc non esse ne-
 cessarium ad substantiam Baptismi, sed dice-
 bat esse validum, dummodo esset datus in no-
 mine non hominis, sed Domini ; imò, vole-
 bat Baptismum quocumque nomine datum va-
 lere, dummodo suscipiens illum reciperet in
 nomine Domini. Superest nobis explicare men-
 tem Catholicam, quod fiet in conclusionibus
 sequentibus.

CONCLUSIO PRIMA.

FORMA Baptismi est hæc, *Ego te baptizo in nomine Patris, & Filii, & Spiritus sancti*; sic Concilia Florentinum & Tridentinum, hoc etiam habetur ex Scriptura, Christo scilicet dicente Apostolis, *Eunte, docete omnes gentes, baptisantes eos in nomine Patris, & Filii, & Spiritus sancti*; ex hoc tamen textu non ita clarè extrahitur forma Baptismi, ut non recurrendum sit ad traditionem & declarationem Ecclesiæ; quia licet Evangelium præcipiat baptizare in nomine Patris, & Filii & Spiritus sancti non jubet tamen dicere, *Ego te baptizo in nomine Patris, &c.* sicut ex eo quòd Christus præcepit prædicare vel dare eleemosynam; non temur dicere, ego vos doceo, nec ego vobis eleemosynam do in nomine Christi; sed sufficit, quòd illam demus ob Christum; sic etiam quando Christus jubet baptizare in nomine, &c. satisfat præcepto, quando aliquis infundit aquam ob nomen Patris, & Fili, & Spiritus sancti, & non est necessarium, quòd hoc exprimatur, dummodo habeat in mente. Forma ergo Baptismi habetur tum ex sacra Scriptura, quæ docet Baptismum debere fieri in nomine Patris, & Filii, & Spiritus sancti; tum ex traditione Ecclesiæ, quæ declarat quòd debeamus dicere expresse & vocaliter, *Ego te baptizo.*

CONCLUSIO SECUNDA.

IN forma Baptismi debet necessariò exprimi actio baptisantis, non verò necessariò exprimitur persona ministri. Prima pars hujus conclusionis patet ex Concilio Florentino cap.

80 DE SACRAMENTIS.

1. de Bap. ubi habetur, *si quis puerum ter in aquam immerferit in nomine Patris, & Filii, & Spiritus sancti, & non dixerit, ego te baptiso, puer non est baptisatus.* Illa autem actio potest exprimi verbo activo; dicendo, *Ego te baptiso*; vel verbo passivo, ut, *baptisaris à me in nomine Patris, &c.* vel imperativo, ut, *baptisetur servus Christi*, sicut aiunt Græci; vel *baptiseris à me*; imò, sufficit, ut quis utatur nomine synonymo, dicendo, *Ego te lavo, abluo, intinguo, mergo, mundo, &c.* hoc tamen non licet. Valet etiam si repetatur ter, *baptiso*, dicendo nimirum, *Ego te baptiso in nomine Patris, ego te baptiso in nomine Filii, ego te baptiso in nomine Spiritus sancti*, modò eodem tempore morali proferantur verba. Secunda pars conclusionis patet ex forma Græcorum, quæ suppressit expressionem personæ ministri; ministri enim apud Græcos non dicunt, *Ego te baptiso*, sed *baptisetur servus Christi*, ubi talis forma ministrum suppressit; & ipsa est legitima, ut docet Concilium Florentinum. Quòd etiam apud Latinos pronomen, ego, possit omitti, patet; quia intelligitur sub verbo, *baptiso*; ob præceptum tamen Ecclesiæ omitendum non est; & qui scienter omitteret, peccaret.

CONCLUSIO TERTIA.

PERSONA baptisanda debet necessariò exprimi; sicut enim materia proxima seu ablutio debet versari circa determinatam personam quæ abluatur, sic & verba debent talem personam exprimere. Persona autem baptisanda potest exprimi vel per pronomen, *te*, aut

DE SACRAMENTIS. 81

vos, dignitatis causa, modo baptifans velit semper significare singularem personam; hoc tamen faciens peccaret, non verò si essent plures personæ quæ baptifarentur; pro tunc enim minister posset dicere, *Ego baptiso vos*, idest, *te & te*; & hoc etiam non debet fieri nisi in necessitate; licet enim teneret Baptismus, peccaret tamen baptifans in plurali. Potest etiam exprimi persona baptifanda per verbum passivum secundæ personæ; ut, *baptiseris à me*, aut, per nomen proprium; dicendo, *Ego baptiso Petrum*, aut per appellativum, *Ego baptiso tuam dominationem*; in Ecclesia etiam Græca exprimi debet persona baptifanda, saltem sub his verbis, *Baptifetur hic servus Christi*, &c. non tollitur autem Baptismus, si sit error in nomine, aut persona: ut si quis diceret, *baptiso te Petre*, cùm sit Ioannes, aut crederet baptifare puerum, & baptifaret puellam, valeret Sacramentum, nisi restringeret suam intentionem ad talem personam; tamen qui sic ageret, graviter peccaret.

CONCLUSIO QUARTA.

NECCESSARIA est expressa invocatio Trinitatis ex Matth. ult. *Baptifantes eos in nomine Patris, & Filii, &c.* ibi tamen recurrendum est ad traditionem, quæ hoc declaravit, ut diximus in conclusione prima. Si quæ- ratur ratio à priori, quare talis expressio fieri debeat, petitur ex sola institutione Christi; ratio verò à posteriori est, quia Baptismus est Sacramentum fidei, quo per fidem iungimur Ecclesiæ, unde necessarium est in illo profiteri Mysterium Trinitatis quod est primum; ex

82. DE SACRAMENTIS.

quo patet, Baptismum collatum in nomine Christi esse invalidum: sic Pelagius, Zacharias, & alii Pontifices; unde in can. 49. Apost. improbat^{ur} baptismus datus in morte Christi, cuius ratio redditur, quòd Christus non dixerit, in mea morte baptisate eos; sed, *euntes, docete omnes gentes, baptisantes eos in nomine Patris, &c.* ubi expresse Apostoli damnant Baptismum datum in nomine solius Christi, sive in morte Christi, hæc enim sunt unum & idem. Non est ergo verisimile, quòd Apostoli baptisaverint in nomine Christi: unde quando Act. 8. dicitur, quòd baptisabant in nomine Christi; hoc est, in fide & autoritate Christi à quo habebant potentiam baptisandi. Quòd si etiam Nicolaus primus dicat, Baptismum valere in nomine Christi; hoc non est, quasi excluderentur aliæ personæ; sed quia nominabant Christum loco Filii, dicentes scilicet, *Ego te baptiso in nomine Patris, & Christi, & Spiritus sancti*, ut majori scilicet honore Christus haberetur.

CONCLUSIO ULTIMA.

IN VOCATIO trium personarum Trinitatis debet esse expressa; unde qui diceret, *Ego te baptiso in nomine Deitatis*, vel *Trinitatis*, vel *trium personarum*, non baptisaret; quia non servaret formam præscriptam à Christo, qui voluit tres personas exprimi. Si fieret autem Baptismus *in nomine Genitoris, Geniti & procedentis ab utroque*, negant veteres esse validum; ut D. Thomas, Bonaventura, Scotus, &c. quia, inquit, Baptismus debet dari cum expressione personarum sub nominibus, quæ

DE SACRAMENTIS. 33

figificent proprietates personales, quæ sunt Pater, Filius, & Spiritus sanctus; non verò quæ figificent proprietates notionales, ut sunt genitor, genitus, & procedens: contrarium tamen tenent alii, unde Baptismus deberet iterari in hoc casu, saltem sub conditione, quoniam ad significationem Trinitatis debet fieri Baptismus cum invocatione trium personarum, & ad denotandam Essentiæ unitatem, debet dari in nomine, & non in nominibus, pro tunc enim non valeret; nam ita necessaria est professio unitatis Essentiæ, quàm Trinitatis personarum; per nomen autem intelligitur essentia & natura. Quod si dicatur, *in nomine Patris, & in nomine Fili, & in nomine Spiritus sancti*; Baptismus est validus, quia est tantum reperitio, non multiplicatio aut diversitas essentiæ; an autem valeat, dicendo, *Ego te baptizo in nomine Patris, Filii, Spiritus sancti*; negant aliqui, quia inquit, sublata conjunctione, videntur confundi personæ & distinguui solis nominibus, quod esset Sabellianum: alii contrarium sentiunt, & sic in hoc dubio deberet iterari Baptismus sub conditione. Porro, *Amen*, non est de essentia Baptismi, sed tantum præceptum Ecclesiæ; unde peccaret qui hanc omitteret particulam.



QUÆSTIO IV.

De Ministro Baptismi ?

ALIAS dubitatum fuit an Baptismus esset validè collatus à non baptisato ; unde Augustinus in hac difficultate dubius hæret, dicens, se non audere super id determinare quidquam, lib. scilicet 2. contra Epistolam Parmeniani cap. 13. sed hoc determinavit Concilium Florentinum, ut Augustinus cupiebat ; scilicet licere in casu necessitatis, sive laïco, sive viro, sive foeminæ, sive Christiano, sive pagano, baptisare, modo adsint materia, forma & intentio. Quæ sit mens nostra super diversitatem ministrorum, aperietur ; si priùs notaverimus, nullum posse se baptisare Baptismo Fluminis, licet possit se baptisare Baptismo Flaminis, eliciendo scilicet actum contritionis perfectæ cum voto Baptismi Fluminis.

CONCLUSIO PRIMA.

QUILIBET homo, dummodo possit loqui & abluere, sive sit homo, sive mulier, sive Catholicus, sive hæreticus, sive fidelis, sive infidelis & paganus, potest esse minister Baptismi. Sic Concilium Florentinum decreto de Armenis, ubi dicitur, *in causa necessitatis non solum Sacerdos, vel Diaconus, sed etiam Laicus & mulier, imò & paganus & hæreticus baptisare potest, modo Ecclesiæ formam servet, & facere intendat quod illa facit.* De hac re jam nulla superest difficultas inter Catholicos, licet fue-

rit maxima tempore Cypriani & Augustini, ut diximus. Hæc conclusio intelligi debet conformiter Concilio citato, in necessitate; extra enim necessitatem licet validus esset Baptismus, tamen committeretur peccatum, si aliquis non Pastor, non Sacerdos, non fidelis baptisaret. Sacerdos, qui extra necessitatem sine solemnitate baptisaret, peccaret mortaliter, sicut & ille qui baptisaret in domo privatâ, nisi filium principis. Porro, ratio conclusionis nostræ petitur ex institutione Christi, quæ nobis innotescit ex traditione Apostolicâ. Ratio verò congruentiæ desumitur ex hoc, quod sicut hoc Sacramentum est omnibus necessarium, idè Christus congruenter voluit ipsum instituere in materiâ communi & à ministro communissimo, Yaltem in necessitate. Nec ejusdem rationis est Pœnitentia, quia pendet à jurisdictione. Si quis autem quærat, quinam ordo debeat servari inter hos ministros necessitatis; responderetur, quod cæteris paribus, Sacerdoti debeat cedere Diaconus, isti Subdiaconus, Laïcus Clerico, Infidelis Fideli, & Fœmina viro; omnes enim isti ministri, sunt ministri necessitatis; ubi autem est vir, non est necessaria mulier. Dixi, cæteris paribus, nam si Sacerdos non posset ritè Baptismum ministrare, aut non vellet, nisi daretur pecunia; quilibet alius baptisare posset, servato semper ordine.

CONCLUSIO SECUNDA.

SOLUS Sacerdos, isque Parochus, est minister ex officio; quatenus enim Presbyter, habet potestatem ordinis ex jure divino; & quæ

86 DE SACRAMENTIS.

tenuſ Parochuſ habet poteſtatem juridiſtioneſ in ſuoa ſubditoa , ex conceſſione Epiſcopi , unde in Canone *interdicimua* , prohibetur diſtinctiſſimè , nè Sacerdoa extra caſum neceſſitatis baptiſcet non ſibi ſubditum. Licet autem ſoluſ Sacerdoa ſit miniſter in officio ; Diaconuſ tamen eſt capax huiuſ miniſterii ex conceſſione , vel juiſſu Sacerdotia , ut patet ex Pontificali Romano dicente , *Diaconum debere baptiſare* , ex commiſſione ſcilicet , & abſente Preſbytero ; non verò ex officio , ut determinavit in jure Canonico Clemena Romano lib. 2. Conſtit. Apoſtolic. 46. Ratione talia commiſſionia olim Diaconi baptiſabant cum ſolemnitate , ob penuriam Sacerdotum ; Subdiaconi autem & alii clerici non poſſunt baptiſare extra neceſſitatem , niſi ex commiſſione ſummi Pontificia. Quòd ſi quia quærat utrùm miniſtri unita requiratur in Baptiſmo ; reſpondebitur affirmativè , unde ſi unua ablueret & alter proferret verba Baptiſmi , non eſſet Baptiſmuſ : ille enim qui non ablueret , & diceret , *Ego te baptiſo* , mentiretur , plurea tamen poſſunt unua baptiſare , quatenua ſcilicet quilibet infunderet aquam & proferret verba ; & pro tunc , ſi ſimul infunderent & verba proferrent , omnea baptiſarent ; ſi verò unua priuſ alio aquam infunderet & verba proferret , ille ſoluſ baptiſaret. In prima ſuppoſitione erit tantum unicuſ Sacramento ; pro tunc enim illi duo miniſtri haberentur ut unicuſ moraliter , forma Baptiſmi ut unica , & ablutio una tantum.

QUÆSTIO V.

Quinam sint effectus Baptismi & qua dispositio?

HÆRETICI hujus temporis docent, peccata per Baptismum non tolli, sed tantum regi, aut non imputari; & fundantur in dicto Davidis: *Beatus vir cui non imputavit Dominus peccatum, & cujus tecta sunt peccata*; sed hic error repugnat Paulo ad Ephes. 5. dicenti, *Christus dilexit Ecclesiam, mundans eam lavacro aqua*; adversatur etiam toti Ecclesie dicenti, *Confiteor unum Baptisma in remissionem peccatorum*, & Concilio Tridentino sess. 5. can. 5. Ad solutionem ergo Psalmistæ, dicendum est; peccata regi & non imputari, quia auferuntur ita planè, ut videri & imputari non possint.

CONCLUSIO PRIMA.

BAPTISMUS vere & proprie tollit omne peccatum, omnem poenam peccatis debitam, gratiam habitalem confert, & cum ea habitus supernaturales coinfusos & gratiam Sacramentalem.

Primæ partes habentur in Concilio Florent. in decreto de Armenis, ubi dicit, *Hujus Sacramenti effectus est remissio omnis culpa originalis & actualis & omnis poena qua pro ipsa culpa debetur.* Quòd Baptismus tollat culpam originalem, constat apud omnes; quia ad hoc est institutus. Quòd tollat omne peccatum tum actuale, tum morale, tum veniale, patet; quia per Baptismum datur gratia sanctificans, cujus effectus

88 DE SACRAMENTIS:

est delere peccatum. Quòd tandem remittat omnem pœnam peccati, petitur ex Conc. Trid. sess. 14. cap. 8. & ex communi traditione Ecclesiæ, quæ nunquam baptisatis imponit pœnam satisfactoriam. Ubi notandum tandem, quòd licet Baptismus tollat pœnam inflictam à Deo, non tamen ab homine; unde puniuntur illi post Baptismum, qui ante Baptismum fuerunt homicidæ; sicut enim homines scandalisati sunt per culpam publicam, sic debent reparari per pœnam publicam; in foro tamen interiori possunt iudices parcere, in favorem Baptismi.

QUOD alias partes, probatæ sunt in primis quæstionibus capituli ultimi, de Sacramentis in genere, ubi probavimus Sacramenta conferre primò gratiam habitualement, secundò habitus supernaturales cōnsumos, seu gratiam virtutum, & tandem gratias Sacramentales; sed his addimus aliqua, quòd scilicet Baptismus pro secundariis effectibus conferat primò Characterem: secundò apertionem januæ cælestis, quia confert gratiam, & gratia tollit peccatum, remouetque omnia impedimenta ad ingressum cæli: tertio confert conjunctionem hominis cum Christo, Baptismus enim confert fidem, & per fidem homo est membrum corporis Ecclesiæ cujus caput est Christus: quarto tandem Baptismus facit hominem subditum jurisdictioni Ecclesiæ: quilibet enim per Baptismum fit membrum Ecclesiæ, & membrum subditur voluntati capituli.

CONCLUSIO SECUNDA.

IN parvulis nulla requiritur dispositio personalis, quia non sunt illius capaces; unde super fidem alienam, nempe patrinorum, baptisantur: in adultis verò requiritur aliquid ex parte intellectus, & aliquid ex parte voluntatis; fides nimirum in intellectu, *sine fide enim impossibile est placere Deo*, quæ quidem fides non est habitualis; habitus enim fidei datur per Baptismum, sed est actualis procedens ex speciali & supernaturali auxilio Dei. Ex parte voluntatis aliud requiritur; sed distinguendum est inter illos qui baptisantur cum solo peccato originali, & alios qui baptisantur habentes tum peccatum originale, tum peccatum actuale; si enim baptisandi adulti habeant tantum peccatum originale sufficit voluntas recipiendi Baptismum cum proposito servandi legem Christi, & hoc requiritur, quia Deus non justificat adultum, nisi consentientem & volentem observare ea, ad quæ destinatur per Baptismum. Si verò adultus cum peccato originali habet peccatum actuale, requiritur detestatio peccati, & conversio ad Deum; non remittitur enim peccatum actuale, nisi retractetur à peccante: sicut ergo peccatum consistit in aversione Dei & conversione ad creaturam, seu ad actum peccati; sic non potest remitti, nisi peccator per Pœnitentiam præcedentem Baptismum, se convertat ad Deum, & se avertat à peccato; unde Act. 1. habetur, *Pœnitentiam agite, & baptisetur unusquisque vestrum*; unde etiam Concilium Tridentinum sess. 6. cap. 5. & 6. docet ad justifi-

cationem, quæ fit in adultis per Baptismum in re vel in voto, requiri detestationem peccatorum & conversionem ad Deum; illa autem detestatio, si habeatur per attritionem supernaturalem, sufficit.

O b j e c. in primam conclusionem D. Paulus vocat concupiscentiam peccatum; sed baptismus non tollit concupiscentiam, etiam in his qui habent omnes dispositiones requisitas ad baptismum. Resp. Paulum appellare concupiscentiam peccatum per metonymiam, quia scilicet est causa peccati, nos enim allicit ad peccandum; non debet autem vocari propriè peccatum, sed potiùs pœna peccati.

Instabis, ergo saltem falsum est quòd dicimus, baptismum tollere omnem pœnam peccati, quandoquidem non tollit concupiscentiam, nec malitiam, nec ignorantiam, nec infirmitatem, quæ sunt peccati pœnæ. Resp. duplicem esse pœnam peccati, prima dicitur pœna directâ peccati, quæ est damnatio, vel aliquod opus satisfactorium, quod de lege communi debemus elicere, quando culpa peccati deleta est; secunda dicitur pœna indirectâ peccati, quæ consistit in quibusdam inordinatis motibus, qui in nobis insurgere solent, quia per peccatum perdidimus iustitiam originalem, quæ nos liberasset à talibus motibus. A pœnâ directâ nos liberat Baptismus, non verò liberat à pœnis indirectis, quæ à Theologis communiter potiùs vocantur pœnalitates peccati, quàm pœnæ.

CONCLUSIO TERTIA.

ILLI qui fictè Baptismum recipit, non recipit effectus Baptismi, sublata tamen fictione; effectus Baptismi redit, fictio autem non intelligitur de simulatione quam aliquis adhibet, cum sine ullâ voluntate Baptismum, recipit, quia pro tunc non est Sacramentum; sed ille intelligitur fictè Baptismum recipere, qui habens voluntatem recipiendi Baptismum, retinet affectionem ad peccatum mortale, nec vult elicere actum contritionis, aut saltem attritionis. Primum patet ex jam dictis in conclusione præcedenti; ubi asseruimus, detestationem peccati requiri saltem in adultis, ut possint gratiam Baptismatis recipere. Quoad secundum, petitur ex Augustino, & post eum ex omnibus Theologis docentibus, recedente fictione per detestationem peccati redire effectum Baptismi, seu gratiam habitualement, quæ antea data fuisset, si non fuisset apposta fictio. Exemplificatur, aliquis adultus vult hodie Baptismum recipere; non vult tamen deferere suum peccatum mortale, ipsum detestando; fictè recipit baptismum, & tantum accipit rem, non verò effectum ejus, scilicet gratiam; crastinâ verò die deponit suam fictionem, idest, atteritur vel conteritur de peccatis suis, & pro tunc gratia, quam receperat in acceptione baptismi, redit. Ratio hujus est, quia solus Baptismus potest remittere peccatum originale: debet ergo ablatâ fictione, Baptismus suum habere effectum, vel iterari; secundum non potest fieri: ergo primum debet admitti; & sic recedente fictione, redit

92 DE SACRAMENTIS,

gratia delens tum peccatum originale, tum peccatum actuale. Hæc est, inquam, mens Augustini lib. 1. contra Donatistas cap. 12. Ubi notandum, quod recedente fictione, omnia peccata, tum originale, tum mortale, tum veniale, ante Baptismum commissa remittantur, & poena etiam ipsorum, & hoc per solam attritionem, quia illa sufficit cum Baptismo. Quoad peccata verò mortalia post Baptismum & in illo Baptismo commissa, non tolluntur nisi per contritionem, quia talia peccata non habent favorem Baptismi, qui datus est ante illa. Dicendum ergo est, quod ille qui fictè Baptismum recipit, committat sacrilegium, & illud sacrilegium non potest tolli, nisi tollatur fictio per contritionem. Sciendum etiam est, quod sublatâ fictione per contritionem, non tollitur poena peccatis post Baptismum commissis debita, sed tantum de æterna fit temporalis, ut in poenitentia. Porro, non est idem dicendum de Confirmatione, ac de Baptismo; licet enim Confirmatio non possit iterari, si quis Confirmationem fictè recipiat, recipit quidem characterem, non verò gratiam; recedente tamen fictione, non recipitur gratia habitualis, licet possit recipi gratia quædam actualis ad fidem profitendam. Ratio autem est, quia non sunt multiplicanda entia sine necessitate; cum autem augmentum gratiæ habitualis possit accipi cum attritione junctâ Eucharistiæ, non est dicendum quod debeat redire Confirmationis effectus.

QUÆSTIO VI.

Quomodo Baptismus sit necessarius & qui sint baptisandi?

REVOCANDUM est in mentem, quòd duplex sit necessitas, nempe medii & præcepti, de quibus antea. Sciendum est etiam quod Anabaptistæ dicant non licere tradere Baptismum, nisi adultis, qui illum per se expetunt. Hæc hæresis orta est an. D. 1528. & author illius fuit quidam Balasar Pacimontanus, qui postea crematus fuit Viennæ. Eandem hæresim susceperunt paulò post ministri Transsylvani: contrarium docet Ecclesiæ traditio, ut dicit

CONCLUSIO PRIMA.

BAPTISMUS est necessarius tum necessitate medii, quod colligitur ex Joan. 3. *Nisi quis renatus fuerit ex aqua & Spiritu sancto, non intrabit in regnum celorum*: tum necessitate præcepti, quod desumitur ex eodem loco; quod enim est necessarium necessitate medii, est etiam necessarium necessitate præcepti; illud autem præceptum obligat etiam justos, unde Apostoli & B. Virgo debuerunt baptisari; non quidem necessitate medii, quia jam antea erant justi, sed necessitate præcepti. Hoc præceptum obligat etiam infideles, Christus enim habet potestatem excellentiæ super omnes; non obligat autem parvulos ante usum rationis; non sunt enim capaces præcepti, sed obligat pænen-

tes in casu saltem necessitatis baptizare pueros ; imò , Concilium Provinciale Rothomagi celebratum constituit sub excommunicatione parentibus , ut infans baptisetur ante nonum diem. Quoad tempus autem quo præceptum Baptismi obligavit, fuit illud (saltem quoad omnes) quo Evangelium fuit sufficienter promulgatum ; in die autem Pentecostes videtur facta fuisse sollemnis promulgatio Evangelii , postquam enim Petrus confutavit Judæos , qui credebant Apostolos madere musto , compunctione tacti Judæi scire voluerunt , quomodo salvari possent , hinc cœpit occasionem Petrus promulgandi Evangelium , Baptismum , & alia præcepta legis novæ ; & in hoc sermone tria milia Judæorum sunt conversa & baptisata ; quia autem in illo confesso fuerunt populi ex omni gente & regione populorum , ut habetur Act. 1. sic fuit promulgatum Evangelium , saltem in universum ; hoc tamen non prohibet , quin respectu alicujus provinciæ vel civitatis , promulgatio talis fuerit insufficiens ; unde postea , *In omnem terram exiit sonus eorum* , & Evangelii & Apostolorum clamor , ad ampliorem legis novæ publicationem.

CONCLUSIO SECUNDA.

INFANTES legitimè baptisari possunt, quid-
 Iquid dicant Anabaptistæ contra traditionem
 Ecclesiæ ; Origenes enim lib. 5. in cap. 6. ad
 Rom. ait. *Ecclesia ab Apostolis traditionem accepit, etiam parvulis dare Baptismum.* Ratio conclusionis est , quia infantes sunt capaces gratiæ
 & gloriæ : ergo potest illis conferri Baptismus,

qui est medium ad utramque ; sunt inquam , capaces gratiæ , ut patet ex Joanne Baptista & Jeremia , qui sanctificati fuerunt in utero materno ; sunt etiam capaces gloriæ , ut liquet ex Innocentibus. Deinde , Christus dixit , *Sinite parvulos venire ad me , talium enim est regnum cælorum* ; non possunt autem venire ad Christum , nec possidere regnum cælorum , nisi tracti sint per Baptismum : ergo sunt capaces Baptismi. Tertiò , veritas nostræ conclusionis probatur ex praxi Ecclesiæ , quæ semper sollicita est baptizare tum parvulos , tum adultos. Quartò , infantes legis gratiæ non sunt deterioris conditionis , quàm infantes legis scriptæ , qui octavo die circumcidebantur. Quintò tandem , Act. 16. baptisata est Lydia & domus ejus , custos carceris & domus ejus ; & 1. Cor. 1. baptisata est Stephana & domus ejus ; non est autem credibile , quòd in tribus integris familiis non essent aliqui parvuli.

O b j e c. fides necessaria est ad receptionem baptismi ; infantes autem non sunt capaces fidei : ergo nec baptismi. Resp. necessaria est fides propria in adultis ; aliena in infantibus , & hæc est fides vel parentum , vel Ecclesiæ ; fides autem alia idèd sufficit in baptismo , quia baptismus tollit peccatum commissum per voluntatem alienam. Super hanc difficultatem dicit optimè Aug. serm. 10. de verbis Apost. *Accommodat mater Ecclesia aliorum pedes , ut veniant ; aliorum cor , ut credant ; aliorum linguam ut confiteantur.* Si Christus mittens Apostolos , ad baptisandum dixit ; *Euntes docete , baptisantes eos , &c. docentes servare omnia quacum-*

que præcepti vobis; ibi Christus ponit ordinem quem servare debebant Apostoli respectu Gentilium adulatorum. Si dicant Anabaptistæ. hoc non haberi ex Scripturâ; Resp. haberi ex traditione Apostolica, quæ non est minoris auctoritatis. Si insistent, ergo Eucharistia est infantibus necessaria: Negatur, quia Eucharistia non est necessaria necessitate medii, sed tantum præcepti; præceptum autem non obligat usu rationis carentes.

CONCLUSIO TERTIA.

BAPTISMUS collatus filiis hæreticorum, Judæorum & paganorum est validus; non semper tamen licet omnes istos baptizare; licet, inquam, ut filii hæreticorum & paganorum, qui fidem aliàs receperunt & ab ea recesserunt, baptisentur, invitis parentibus, quia Ecclesia habet jus cogendi parentes ad servandam fidem, & illos afficiendi poenâ mortis, si sint pertinaces: ergo multò magis poterit illos privare potestate quam habent in filios, & sic baptizare illos, invitis parentibus, & illos retinere.

Filii in fidelium non baptifatorum, etiamsi subditi sint Ecclesiæ quoad bonum temporale, non possunt licitè baptisari, quia post baptismum vel relinquerentur curæ parentum, & tunc esset evidens periculum subversionis quod cederet in injuriam baptismi & fidei; vel subtraherentur parentibus, quod non debet fieri: licet enim in hoc casu Ecclesia haberet dominium in bona infidelium, non tamen haberet dominium super personas; & sic non posset privare parentes jure naturali quod habent

in

in filios. Quòd si Deus velit ut omnes baptisentur, hoc non vult nisi servatâ justitiâ.

Filii infidelium possunt baptisari, invitis parentibus, si sint adulti & petant baptismum; quia jus habent petendi quod sibi necessarium est: imò, si sint etiam parvuli, possunt baptisari invitis parentibus, dummodo sint in articulo mortis; quia pro tunc non est subversionis periculum. Quòd si infideles sint servi principum Christianorum, eorum filii possunt baptisari, invitis parentibus; pro tunc enim tales infideles possunt vendi & privari bonis à domino: ergo ipsemet dominus potest illorum filios substrahere & baptisare, invitis parentibus; non verò debet filios baptisatos reddere parentibus non baptisatis, nè sit subversionis periculum. Non est eadem ratio de subditis qui non sunt servi

Filius natus ex uno parente fideli & alio infideli, baptisari potest; imò, etiamsi uterque sit infidelis, modò unus consentiat, licet dissentiat alter, potest baptisari; quia fides est favorabilis. Filius etiam natus ex utroque parente infideli; si postea unus parens convertatur, & alter in infidelitate maneat, potest baptisari; nam proles sequitur innocentem.

Infantes existentes in utero materno non possunt solo signo crucis impresso super uterum maternum cum fide parentum & invocatione Trinitatis baptisari; Pius enim V. hanc opinionem, quæ erat Caletani, condemnavit: si tamen posset infundi aqua super pueri membra, ille baptisaretur; ut quis enim renascatur per baptismum, sufficit quòd præcedat illa na-

tivitas, quâ quis de non homine fit homo.

Nullo modo licet matrem occidere, etiam si sit ad hoc parata, ut baptiseretur puer, qui alio modo non potest baptisari; licet ante partum morte naturali deberent mori & mater & infans: quia sicut homicidium prohibetur, & est intrinsecè malum, sic etiam interdicitur acceleratio mortis. Nec est dicendum quòd ista mater cesserit jus suum; quia nullum habemus jus supra vitam, nec mortem; si tamen mulier illa propter crimen aliquod perpetratum damnata esset ad mortem, posset accelerari mors ipsius, ut infans baptisaretur; in tali enim suppositione hæc mulier per crimen proprium amisit dominium quod habere poterat supra vitam.

QUESTIO ULTIMA.

*Quanam sint ceremonia in Sacramento
Baptismi adhibenda?*

DE Baptismi ceremoniis consulendum est quodlibet Rituale, ubi docentur tum illæ quæ præcedunt, tum ex quæ comitantur, tum deniquæ illæ quæ subsequuntur in administratione solemni hujus Sacramenti. Dixi, solemni, quando enim privatim confertur baptismus, tales ceremoniæ non sunt necessariae, nec de præcepto: cùm ergo illi Ritus possunt haberi ex rituali, illas prætermittere possumus; nè tamen aliquid non dictum remaneat, pauca dicemus de illis.

CONCLUSIO.

CEREMONIÆ quæ baptismum antecedunt, sunt hæc præsertim. Primò, præparatur aqua, & consecratur fons baptismalis destinatus ad collationem baptismi; quod fit in vigiliis Paschæ & Pentecostes. Secundò, afferuntur infantes ad Ecclesiam, qui hærent in introitu ejus, tanquam indigni accessu Ecclesiæ, quia sunt adhuc in potestate dæmonis. Tertiò, Sacerdos triplicem facit insufflationem & varios exorcismos, ut expellatur dæmon; postea signum crucis in fronte & aliis partibus baptisandi efformatur, ut impetus diaboliceffent, & in eundem finem sit impositio manûs à Sacerdote, & plures proferuntur orationes. Quartò, imponit in os baptisandi salem priùs à se benedictum, ad gratiam baptismi significandam, qua homo liberatur à peccati putredine, & speciali prudentiâ datur, cujus sal est symbolum. Quintò, minister tingit suâ salivâ aures baptisandi, ut aperiantur ad audiendos Christi sermones; & nares ejus, ut hauriant bonum odorem virtutis ac pietatis. Sextò, ad interrogationes Sacerdotis sequuntur abrenuntiationes baptisandi, quibus renuntiat diabolo, sive per se, sive per paternos. Septimò, in scapulis & in pectore ungitur, quasi athleta Christi, luctaturus contra dæmonem, cui paulò antea renuntiavit. Octavò, post illam unctionem baptisandus interrogatur super articulos fidei, & publicam professionem illius emittit. Nondè tandem, elicit liberum & publicum consensum quo significat se velle baptisari.

Quoad conditiones quæ baptismum comitantur, paucæ sunt numero; infunditur enim tantum aqua cum debita prolatione verborum, vel mergitur baptisandus, vel tandem aspergitur copiosè, secundum consuetudinem Ecclesiæ, vel temporis.

Quantum verò ad ceremonias subsequentes baptismum, hæ sunt. Primò, Baptisatus ungitur sacro Chrismate in vertice capitis; quod quidem Chrisma debet esse recens; consecratum scilicet eodem anno, in die cœnæ Domini, & hoc ab Episcopo; unde derogatum est consuetudini Ecclesiæ, quæ in primis sæculis volebat ut unctiones Chrismatis fierent à solis Episcopis; sed postea concessum fuit ut unctio baptismalis posset fieri à simplici sacerdote, ut constat ex Conciliis Carthagin. & Tolet. hæc autem unctio denotat baptisatum in vertice unctum, ab eo die esse conjunctum Christo tanquam capiti. Secundo, Baptisatus induitur veste candidâ, in signum innocentiae restitutæ. Tertiò, traditur baptisato cereus accensus, ad denotandum ipsum esse translatum à postetate tenebrarum in sanctorum lucem & in fervorem charitatis, quam per baptismum accepit. Quartò, requiruntur sponsores, seu patrini, vel patres iustitiae, qui baptisandum levant de fonte, & nomen imponant; in quibus patrinis plures conditiones requiruntur; debent enim esse baptisati; sic Concilium Moguntinum, non debent esse hæretici; sic Concilium Tridentinum; non sunt enim apti ad instruendum in fide, quod tamen patrinis incumbit; non debent esse Monachi,

Moniales, aut Religiosi, sic Concilium Coloniense parte ult. cap. 16. Ratio in promptu datur, quia illorum est colere solitudinem; & sic non possunt curam aliorum suscipere: Non debent patrini esse pater aut mater carnalis, nisi in necessitate, ex tali enim officio conjux conjugis esset cognatus, nec maneret liber usus matrimonii inter illos, nisi post dispensationem saltem Episcopi; tandem sponsores debent scire rudimenta fidei, ut levatos possint docere. Illi sponsores requiruntur nedum pro parvulis, sed etiam pro adultis; hi enim sunt neophyti in fide, & quasi modogeniti infantes; unde Tertullianus notat etiam adultis dari olim lac & mel. Porro, ex baptismo resurgit quædam cognatio, spiritualis videlicet, inter suscipientes & susceptum, & patrem & matrem baptisati. Quod si Pater baptisaret in necessitate filium, non contraheret cum uxore cognationem; secus, si extra necessitatem. Olim erat cognatio inter virum & foeminam, qui simul suscipiebant infantem levandum, erat etiam inter ministrum & ipsos suscipientes; sed hoc ablatum est per Concilium Tridentinum, de reformatione Matrimonii.



unctio Chrismatis facta in fronte Confirmandi cum signo crucis, sub præscripta verborum formâ; metaphysicè verò, est Sacramentum novæ legis, institutum à Christo, ad conferendum Christianis novum robur & augmentum gratiæ ad fidem suam profitendam constanter & contra adversarios audacter defendendam. Hæc omnia patent ex se, vel saltem patebunt ex dicendis.

QUESTIO. II.

An Confirmatio sit Sacramentum?

Hoc negant Lutherani & Calvinistæ, affirmant verò Catholici: illi quidem putant, Confirmationem esse tantum ceremoniam institutam ab Ecclesiâ, in quâ examinantur baptisati de fide, & ratificant baptismum, absque eo quod talis ceremonia habeat rationem Sacramenti; nos verò Confirmationem tanquam Sacramentum accipimus.

CONCLUSIO.

CONFIRMATIO est verè & propriè Sacramentum. Sic Concilium Tridentinum sess. 6. can. 1. de Confirmatione; *Si quis dixerit, Confirmationem baptisatorum non esse verum & proprium Sacramentum, Anathema sit.* Licet autem hæc veritas non habeatur expressè in Scripturâ, colligitur tamen ex traditione antiquissimâ Ecclesiæ; Dionis. enim Apostolorum contemporaneus lib. 2. de cœlesti Hierarchiâ cap. 4. postquam loquutus est de Eucharistiâ,

E iiiij

ait, *Est illi finitimum Sacramentum, quod præceptores nostri Sacramentum unguenti nominant: & sic erat ante illum.* Augustinus etiam ait, *Sacramentum Chrismatis est sacrosanctum in genere signorum visibilibus, ut baptisumus; unde Tertullianus loquens de illo, dicit; Caro ungitur, ut anima consecratur,*

CONFIRMATUR ratione: Ad rationem Sacramenti tria tantum requiruntur, scilicet promissio gratiæ, signum visibile, & præceptum quo jubeatur tale signum ministrari; hæc autem sunt in Confirmatione. Primò habet promissionem gratiæ, Act. 1. *Accipietis virtutem Spiritus sancti supervenientis in vos, & eritis mihi testes usque ad ultimum terra: & sic promittitur Apostolis per Confirmationem amplior gratiâ, quâ essent fortes in confessione fidei.* Secundò, Confirmatio habet signum sensibile, quod est impositio manuum, Act. 8. *Oraverunt pro ipsis, ut acciperent Spiritum sanctum: & paulò post, Tunc imponebant manus super illos, & accipiebant Spiritum sanctum.* Quod si in die Pentecostes Apostoli non receperint Spiritum sanctum per impositionem manuum; hoc factum est ex speciali privilegio, sic enim dabatur cæteris. Quod tertio Confirmatio habuerit præceptum, patet ex executione mandati; si enim Apostoli suâ sponte, & sine Christi institutione & præcepto adhibuissent talem impositionem manuum, non infallibiliter descendisset Spiritus sanctus; descendebat tamen quotiescumque manus imponebant.

O B J E C. Si manuum impositio erat signum

sensibile quò gratia Confirmationis conferebatur, non potuit illa manuum impositio mutari; materia enim Sacramenti mutari non potest substantialiter; videtur autem mutata illa impositio in unctionem; per unctionem enim Chrismatis tribuitur Confirmatio. Resp. nos uti eadem materia, qua usi fuerunt Apostoli, & Apostoli eadem materia usos fuisse, qua nos actu utimur; quando enim Apostoli Confirmationem conferebant, non faciebant impositionem manuum sine unctione & consignatione crucis, aliàs D. Augustinus non vocaret Confirmationem Sacramentum Chrismatis, nec D. Dionysius Sacramentum unguenti; quando etiam in præsentì tribuitur Confirmatio, non fit unctio sine impositione manuum. Quòd si Augustinus dicat, manuum impositionem non esse ut baptismum, quasi non posset repeti, quia, inquit, nihil est aliud quam oratio super hominem; ibi Augustinus non loquitur de Confirmatione, sed de quadam impositione manuum, quâ suo tempore exterius reconciliabantur hæretici Ecclesiæ.

QUESTIO III.

Quando instituta fuerit Confirmatio?

EX antecedenti conclusione patet, Confirmationem esse Sacramentum; patet etiam ex dictis omnia Sacramenta esse instituta à Christo, conformiter Concilio Trid. Sess. 7. can. 10. ubi habetur, *Si quis dixerit omnia &*

singula Sacramenta nova legis non fuisse à Domine nostro Iesu Christo instituta ; Anathema sit : ergo colligitur ex his , Christum instituisse Confirmationem ; sed quo tempore instituta fuerit , quæritur.

CONCLUSIO.

CHRISTUS Sacramentum Confirmationis instituit in nocte cœnæ , secundum probabiliorem sententiam ; omnes enim Theologi dicunt ; quod in tali nocte ; in sermone habito ad discipulos , novum Testamentum instituerit ; & sic verisimile est , quod materiam & formam & præceptum hujus Sacramenti protunc assignaverit. Fundatur autem hæc opinio in traditione Apostolicâ , ut habet Fabianus Papa Epist. 2 ad Orientales cap. 1. quæ scripta est ante mille quadringentos annos , in qua sic habet, *In illa die Dominus Iesus postquam cenavit cum discipulis suis, & lavit pedes eorum, Chrismâ consicere docuit, sicut à sanctis Apostolis prædecessores nostri acceperunt, nobisque reliquerunt.* Ob hanc causam quotannis Ecclesia novum Chrismâ consecrat feriâ quinta in cœna Domini.

O B J E C T. Hoc Sacramentum non fuit in usu, nisi post descensum Spiritus sancti in die Pentecostes, neque à Christo, neque ab Apostolis : ergo signum est non fuisse antea institutum. Resp. negando consequentiam ; & ratio cur non fuit in usu ante Pentecostem, est quia in hoc Sacramento datur plenitudo Spiritus sancti, quam dari non expediebat, donec Iesus esset glorificatus, secundum illud Joannis 7. *Nondum erat Spiritus datus, quia Iesus nondum erat glorificatus.*

QUESTIO IV.

Quanam sit materia remota Confirmationis?

C A I E T A N U S, Soto & Navarrus putant, solum oleum olivarum esse materiam remotam hujus Sacramenti, credentes quod si cum oleo admisceatur Balsamum, hoc est tantum ex præcepto Ecclesiæ D. Thomas & alii sentiunt Chrisma confectum ex Oleo & Balsamo esse materiam essentialem.

CONCLUSIO.

M A T E R I A remota essentialis hujus Sacramenti est Chrisma confectum ex Oleo & Balsamo. Sic Concilium Florentinum decreto de Armenis sic loquens; *Secundum Sacramentum est Confirmatio, cujus materia est Chrisma confectum ex Oleo, quod nitorem significat conscientia; & Balsamo quod odorem significat bonam famam.* Quod autem Concilium loquatur de materia essentiali patet; quia ibidem recensens in particulari materias Sacramentorum, in omnibus aliis nihil ponit, quod non sit materia essentialis cujuslibet: ergo à pari in isto, ubi dicit Chrisma confectum ex Balsamo esse materiam Confirmationis, loquitur de materia essentiali. Si dicant adversarii, admixtionem Olei esse in Confirmatione, sicut est admixtio aquæ in Eucharistia, quæ est tantum de præcepto; hoc negatur, & colligitur ex Concilio Florentino; quando enim loquitur de materia calicis, non dicit esse quid mix-

tum ex vino & aqua, sed esse vinum simpliciter: quandoquidem ergo, loquens de materia Confirmationis, dicit esse Chrisma confectum ex Oleo & Balsamo, non putat admixtionem Balsami esse tantum ex præcepto; aliàs mentionem non fecisset talis unctiois, sicut nec in Eucharistia commemorat mixtionem aquæ.

OBJEC. Innocentius tertius, aliàs consultus, an unctus solo oleo deberet iterum confirmari, respondit, nihil iterandum esse, sed quod omissum est cautè supplendum: ergo Confirmatio erat valida sine mixtione Balsami. Resp. negando consequentiam, hoc enim confirmat nostram conclusionem; quia si mixtio Balsami sit tantum necessaria ex præcepto, sicut aqua in calice, sequeretur non esse postea supplendum necessario Balsamum: si quis enim oblitus fuisset admiscere aquam vino, nullus diceret quòd talis mixtio debeat suppleri post consecrationem; cum ergo Innocentius determinaverit supplendum esse cautè Balsamum? per hoc voluit quòd Balsamum esset necessarium ad validitatem Confirmationis. Difficultas ergo tota superest, quòd dixerit nihil esse iterandum; sed loquitur tantum de iteratione ceremoniarum, quæ non debent iterari, sed tantum unctio cum Oleo & Balsamo.

OBJEC. Balsamum esse rarissimum: ergo non congruit divinæ bonitati, quòd assignaverit pro materiâ Sacramenti aliquid quod vix reperiri potest. Resp. hanc rationem fore validam, si Confirmatio esset absolute necessaria, tanquam medium ad salutem, Deinde, ex

ipsis adversariis constat, quòd admixtio Balsami sit necessaria ex præcepto, & consequenter sub pœnâ peccati mortalis: ergo pari jure posset dici, quòd non congruat divinæ bonitati aliquid præcepisse sub peccato mortali, quod sine difficultate non potest obtineri. Tandem dicendum est, quòd hæc ratio non obstat; quia modicum Balsami requiritur: unde Fabianus Papa reprehendit Episcopos Orientales, quòd defectu Balsami renovarent tantum Chrisma singulis trienniis, quasi esset excusatio ficta; ad essentiam enim Chrismatis non requiritur, ut singulæ partes ejus contineant formaliter aliquid Balsami, sed sufficit quòd toti mixto saltem insit tantum Balsami, ut omnes Chrismatis partes alterentur recipiendo in se ejus odorem.

QUESTIO V.

Quanam sit materia proxima Confirmationis?

MATERIA remota, ut diximus, est Chrisma, quod debet esse consecratum ab Episcopo, sicut voluit traditio Ecclesiastica, & Concilium Romanum, sub Sylvestro primo, statuens nullum Presbyterum posse Chrisma conficere, non quidem inducendo novam prohibitionem; sed declarando quæ jure divino erant prohibita, Ratio quare Chrisma debet esse consecratum, est, quia materia externa Sacramentorum, quâ Christus usus fuit, consecrata est antequam ad usum Sacramenti

applicetur; ideò nec Aqua in Baptismo, nec Panis in Eucharistiâ consecranda sunt, quia talia consecravit Christus usu suo; in Ordine autem, materia, quæ sunt vasa sacra, consecratur, & Oleum in Sacramento Extremæ-unctionis: in Pœnitentiâ verò & Matrimonio materia non consecratur, quia non est quid extrinsecum, sed sunt ipsi Pœnitentes aut Contrahentes. An autem potestas consecrandi Chrisma possit delegari simplici Sacerdoti ex dispensatione, aliqui credunt, alii probabilius negant; Concilium enim Florentinum postquam docuit Ministrum hujus Sacramenti esse Episcopum, docet simplicem Sacerdotem ex concessione posse illud ministrare, sed cum Chrismate per Episcopum benedicto. Ex quo patet, Ecclesiam nunquam dispensasse, quod posset simplex Sacerdos Chrisma consecrare. Ex his ergo habetur, Chrisma compositum ex Balsamo & Oleo, & benedictum ab Episcopo, esse materiam remotam essentialem hujus Sacramenti; unde superest tantum quòd assignetur materia proxima ejus.

CONCLUSIO.

MATERIA proxima hujus Sacramenti est unctio seu applicatio Chrismatis in fronte Baptisati: debet, inquam, illa unctio fieri in fronte, & in formâ crucis, & hoc ex necessitate Sacramenti, quod probatur ex communi usu & praxi Ecclesiæ; quæ verè confirmatum non censet illum, qui non fuerit taliter unctus Chrismate. Ratio quam allegat Concilium Florentinum; est, quia hoc Sacramentum datur ad fidem Christi audacter & sine verecundiâ

DE SACRAMENTIS. 171

proſtitendam; frons autem eſt veluti ſedes ve-
recundiæ: ergo illa pars debet conſignari, &
in ea fieri unctio cum ſigno crucis, ut ſcilicet
confirmatus ſine metu fidem ſeu crucem Chri-
ſti fateatur, quæ eſt Judæis ſcandalum, genti-
bus autem ſtultitia.

O b j e c t. Apoſtoli confirmabant primos
Chriſtianos per impoſitionem manuum, ut ha-
betur pluribus in locis ſacræ Scripturæ: ergo
non ungebant; & proinde unctio Chriſmatis
non eſt materia proxima hujus Sacramenti.
Reſp. Apoſtolos dupliciter manus impoſuiſſe;
primò, quando dabatur Spiritus ſanctus viſibi-
liter cum dono linguarum, & hoc faciebant
per ſolam manuum impoſitionem, quod non
habebat rationem Sacramenti; non enim erat
ceremonia permanens; & hanc poteſtatem
dandi Spiritum ſanctum viſibiliter, voluit eme-
re Simon Magus. Secundò Apoſtoli manus im-
ponebant, quando volebant conferre Sacra-
mentum Confirmationis; & pro tunc cum im-
poſitione manuum ungebant frontem reci-
pientium, ut habetur ex traditione Apoſtolicâ
& ex antiquis Patribus, qui vocabant hoc Sa-
cramentum, Sacramentum unguenti, & Sacra-
mentum Chriſmatis.

Q U Æ S T I O VI.

Quanam ſit forma Confirmationis?

EX antecedentibus liquet de neceſſitate Sa-
cramenti hujus eſſe, quòd adſit Chriſma

confectum ex Oleo & Balsamo, quod quidem debeat necessariò eàdem necessitate Sacramenti esse consecratum ab Episcopo; ita quòd benedictio Episcopi non sit minus de essentiâ Sacramenti, quàm Balsamum cum Oleo: Quænam autem forma debeat coniungi cum illâ unctione quæ sit ex Chrismate, asseret

CONCLUSIO.

FORMA Sacramenti Confirmationis sunt hæc verba, *Consigno te signo Crucis, & confirmo te Chrismate salutis, in nomine Patris, & Filii, & Spiritus sancti.* Hoc patet ex Concilio Florentino in decreto unionis, ex Pontificali Romano, & ex praxi Ecclesiæ. Quòd autem hæc forma legitima sit, patet, quia ibi significatur causa principalis, scilicet Trinitas, cùm dicitur, *in nomine Patris, & Filii, & Spiritus sancti.* Secundò, indicatur causa ministerialis, nimirum ille qui confert, per hæc verba, *consigno, & confirmo.* Tertiò, denotatur persona quæ confirmatur, per pronomen, *te.* Quartò tandem innotescit effectus duplex huius Sacramenti, quorum unus est facere aliquem Christi militem, ipsum insigniendo crucis signo, unde dicitur, *consigno te signo crucis*: alius verò est dare robur ad sustinendos impetus adversariorum, confirmando scilicet; unde additur, *confirmo te Chrismate salutis.* Porriò, hæc verba sunt de essentiâ Sacramenti; unde qui diceret tantùm *signo te*, non addendo, *signo crucis*, aut *confirmo te*, non specificando *Chrismate salutis*: aut qui diceret tantùm *signo te signo crucis*, tacendo, & *confirmo te Chrismate salutis*, aut vice versâ, non faceret Sacramentum. Non esset etiam validum,

si supprimerentur verba, *in nomine Patris, & Filii, & Spiritus sancti.*

QUESTIO VII.

Quis sit Minister hujus Sacramenti?

VUICLIEFFUS impropere Ecclesiæ Romanæ, quæ vult solum Episcopum esse ministrum ordinarium hujus Sacramenti arguens Romanos, quod sint in errore Donatistarum, qui dicebant valorem Sacramenti pendere à dignitate Ministri: sed maximè fallitur; Donatistæ enim idèò damnati sunt, quod dicerent valorem Sacramenti procedere à bonitate Ministri, & Sacramenta non validè conferri ab improbis; quod nos ipsi damnamus, licet asseramus Ministrum hujusce Sacramenti debere esse ad Episcopatus dignitatem evectum.

CONCLUSIO PRIMA.

SOLUS Episcopus est ordinarius Minister hujus Sacramenti. Sic Concilium Florentinum in decreto de Armenis, & Tridentinum Sessionis 7. can. 3. de Confirmatione, ubi dicitur; *Si quis dixerit, sancta Confirmationis ordinarium Ministrum non esse solum Episcopum, sed quemvis simplicem Sacerdotem, Anathema sit.* Jus etiam Canonicum capite manus, de consecratione, distinct. 5. hoc habet, *Manus quoque impositionis Sacramentum ab aliis perfici non potest, quam à summis Sacerdotibus; nec tempore Apostolorum ab aliis quàm ab ipsis Apostolis legitur*

aut scribitur peractum est. Ratio congruentiæ , est D. Bonaventuræ , quia Episcopus in Ecclesia est veluti dux in exercitu : sicut ergo ducis est consignare suos milites , sic etiam ad Episcopum pertinet consignare Christianos , quia per Confirmationem sunt veluti milites Christi.

Objic. Actuum 9. Ananias qui erat tantum Sacerdos (ut ait Augustinus) imposuit manus super Paulum , ergo hoc non spectat tantum ad Episcopos. Respondeo , Ananiam imposuisse manus super Paulum , non ut ipsum confirmaret , quia nondum Paulus erat baptisatus ; sed ut illi visum restitueret , & sic pertinet tantum ad Episcopum confirmare : hoc autem facere potest , modò sit consecratus , etiamsi sit excommunicatus , suspensus & hæreticus ; character enim Episcopalis semper remanet , & administratio Confirmationis est actus solius Ordinis Episcopalis,

CONCLUSIO SECUNDA.

QUILIBET Sacerdos potest ex commissione Summi Pontificis hoc Sacramentum conferre. Nec est quòd Soto imputet Soto hoc negasse ; iste enim in 4. dist. 7. q. 1. in solutione dubii tertii dicit , quod Minister est Episcopus vel alius cui committi poterit : quando desunt autem Episcopi , constat ; quia Gregorius Magnus hoc concessit Presbyteris Sardinæ. Gregorius etiam 13. refertur dispensasse cum Sacerdote in Indiâ : Concil. denique Florent. in decreto Eugenii dicit , aliquando per dispensationem Apostolicæ Sedis id concessum fuisse ; propter hoc tamen non mutatur essentia hujus Sacramenti , quia essentia-

lis Minister illius, non est solus Episcopus, nisi ordinarius, sed hic & ille Sacerdos habens dispensationem summi Pontificis, qui solus dispensare potest in favorem Presbyteri solius, non alterius qui sit ipsi inferior.

O B J E C. De commissione Episcopi confirmare possunt simplices Sacerdotes ex Conciliis Tolet. & Arausic. & ex Innocentio Papâ, dicentibus, quod nemo audeat Chrismate præsentente Episcopo, nisi ab eo illi fuerit præceptum. Respondeo hæc Concilia & ipsum Innocentium non loqui de Chrismatione Confirmationis; sed Concil. Arausican. loquitur de unctione, quâ ungebantur hæretici, dum convertebantur ad Ecclesiam, quos in istis locis ungebant, ut supplerent ceremonias quas hæretici omiserant in Baptismo. Concil. Tolet. loquitur de unctione quæ fit in baptismo in vertice baptisandorum; alias enim non licebat simplici Sacerdoti ungere baptisandum Chrismate, imò nec baptizare, nisi absente Episcopo, ut habet D. Leo Epist. 8. in fine ubi scribit, *Id neque coram Episcopo licet Presbyteris, in baptisterium introire, nec præsentente Antistite, infantem tingere, aut signare.* Quoad Innocentium tandem, loquitur de unctione, quâ ungi solebant Energumeni, ut ab illis depelleretur dæmon.



 QUESTIO VII.

Qui possint confirmari?

NON quæritur hic, quinam debeant accipere hoc Sacramentum, nullus enim ad hoc tenetur, cum non sit necessarium necessitate medii; aliàs Ecclesia curaret, ut qui moriuntur, illud reciperent: non est etiam necessarium necessitate præcepti, nisi pro Ordinandis, nullum enim extat præceptum nec divinum, nec Ecclesiasticum quoad omnes, sed solum pro illis qui saltem tonsuram clericalem recipere cupiunt; ut habetur ex Concil. Trid. sess. 23. cap. 4. de Reformatione. Quod si Scotus videatur dicere, hoc Sacramentum esse necessarium sub peccato mortali; hoc debet intelligi, quod si omitteretur ex contemptu, reverà esset peccatum mortale; imò sentiunt communiter Doctores, quod in casu necessitatis recipienda sit confirmatio, quando v. g. aliquis versatur inter hæreticos; indiget enim virtute quâdam speciali ad protestandam & defendendam fidem, & hoc robur per Confirmationem accipitur: remanet ergo tantum, ut videamus quinam possint confirmari.

CONCLUSIO.

LICET Confirmatio possit dari omnibus baptisatis, tum infantibus, tum adultis; convenientius tamen est, ipsam differre ad rationis ætatem, sic Catech. Rom. dicens, post Baptismum Sacramentum Confirmationis posse

DE SACRAMENTIS. 119

ministrari ; sed minùs tamen expeditè hoc fieri, antequam pueri usum rationis habuerint : unde alii asserunt expectandum esse duodecimum annum , meliùs tamen alii septimum. Ex dictis potest colligi, amentes perpetuos posse confirmari : si enim infantes ante usum rationis possint recipere hoc Sacramentum ; ergo & amentes perpetui qui sunt veluti infantes : quoad illos qui aliquando rationis usum habuerunt, & in amentiam sunt lapsi postea , si non constet illos in ultimo actu sanitatis fuisse in peccato mortali, possunt confirmari , etiamsi antea non expetierint hoc Sacramentum.

QUESTIO IX.

Quosnam effectus producat Confirmatio ?

HOC jam censetur explicatum ex his quæ diximus agendo de Sacramentis in genere , ubi asseruimus quodlibet Sacramentum producere gratiam habitualem , sive in entitata , sive augmento , & gratiam Sacramentalem , quæ actualis est : insuper etiam asseruimus Baptismum, Confirmationem & Ordinem conferre caracterem in suscipientibus : Quia tamen hîc explicare tenemur quæ pertinent ad Confirmationem, nobis explicandum incumbit qui sint ipsius effectus.

CONCLUSIO.

CONFIRMATIO confert caracterem, augmentum gratiæ habitualis, & gratiam sacramentalem. Primum patet ex jam dictis de

Sacramentis in genere : dicam tantum hunc characterem consignare Christianum in militem Christi, & illum deputare partim ad agendum, scilicet ad profitendam fidem; partim ad patiendum, nimirum ad receptionem consuræ clericalis & sacrorum Ordinum : hic autem character distinguitur realiter à caractere baptismi, quia sunt duo Sacramenta distincta, quæ debent habere consequenter effectus distinctos. Secundum patet ex se, quia omnia Sacramenta conferunt gratiam suo modo : Sacramenta scilicet mortuorum conferunt gratiam in se; Sacramenta autem vivorum conferunt gratiam in augmento ordinariè & per se, licet per accidens aliquando possint causare gratiam in se, v. g. quando quis habens solam attritionem, putat se esse debitè absolutum, licet non sit reverà, defectu intentionis Ministri, & postea ut talis accedit ad Eucharistiam, vel ad Confirmationem, mediante uno horum Sacramentorum, recipit gratiam habitualement in se consideratam, non verò augmentum gratiæ, quia illam antea non habebat. Tertium tandem evidensest; quia cum quodlibet Sacramentum habeat finem specialem, confert gratiam specialem suo fini accommodatam; & ea quæ confertur per Confirmationem, est protectio Spiritus sancti, quæ aliquis conservat fidem Catholicam & illam intrepidus protestatur publicè.



Q U Æ S T I O X.

Quid requiratur in Confirmando?

QUONIAM diximus duos esse præcipuos effectus Confirmationis, nimirum caracterem, & gratiam; nunc loquendum venit de dispositionibus quæ requiruntur, ut uterque effectus producat in illo, qui Confirmationem suscipit.

C O N C L U S I O.

UT caracter recipiatur sufficit voluntas recipiendi Sacramentum; ut verò Confirmandus recipiat augmentum gratiæ habituales, exigitur ut præexistat in gratiâ. Ratio primi est, quia caracter est compatibilis cum peccato; & sic ad recipiendum caracterem Confirmationis, non requiritur gratia præexistens; sed sufficit voluntas recipiendi illum: sicut, ut baptisatus recipiat caracterem baptismi, sufficit quòd voluntatem habeat recipiendi baptismum: hoc etiam debet intelligi tantum de adultis; quandoquidem enim diximus, Confirmationem posse conferri infantibus, qui propriâ intentione carent: in illis ergo non requiritur propria voluntas, sed aliena saltem sufficit siue sit Ecclesiæ, siue sit parentum, aut aliorum qui puerum confirmandum exponunt. Quoad secundum, evidens est; quia Sacramenta vivorum gratiam præsupponunt, & illam augent: ergo requiritur ut ille qui confirmandus est, jam in gratiâ existat, ut possit recipe-

re augmentum ejus: augmentum enim alicujus qualitatis præsupponit illam qualitatem jam existentem in suo esse. Quoniam ergo ad recipiendam Confirmationem requiritur gratia, idè ille qui confirmandus est, si peccaverit post Baptismum, indiget contritione, aut saltem attritione cum confessione, aliàs poneret obicem; non requiritur autem confessio per se, quia nullum extat præceptum; nisi quando confirmandus est conscius peccati; unde qui sine confessione susciperet hoc Sacramentum, putans se esse contritum, cum sit attritus tantum, reciperet gratiam per Confirmationem; quia quodlibet Sacramentum habet vim facienti ex attrito contritum.

QUÆSTIO ULTIMA.

Quinam sint ritus hujus Sacramenti?

SA C R A M E N T U M hoc cum possit tantum conferri à Ministro solemni, elevato scilicet ad dignitatem Episcopalem, non potest etiam dari vel saltem non debet, nisi cum certis quibusdam ceremoniis, quarum aliæ præcedunt, aliæ concomitantur, aliæ denique subsequuntur illius administrationem.

CONCLUSIO.

RI T U S antecedentes collationem Confirmationis sunt hi. Conficitur Chrisma, ad cujus consecrationem Episcopus primò benedicit oleum & balsamum: Secundò idem Episcopus halat super os ampullæ continentis oleum,
 &

& post eum duodecim Sacerdotes, ad denotandam Spiritûs sancti plenitudinem olim datam per insufflationem, Joan. 20. ubi Christus insufflavir, & dixit Apostolis, *Accipite Spiritum sanctum*. Tertiò miscetur balsamum cum oleo, Quartò Episcopus Chrisma confectum salutat, sine mitrâ dicens ter, *Ave sanctum Chrisma*, submissâ voce in primis, deinde paulò altiori. Quintò hoc fit quotannis feriâ quintâ in coenâ Domini.

Quoad ceremonias comitantes collationem Confirmationis; primò destinatur tempus, quod communiter erat in vigilia Pentecostes, quia eo tempore Apostoli roborati sunt, & nunc est quodlibet aliud; quolibet enim tempore confirmare solent Episcopi, nimirum temporibus suæ visitationis. Secundò debet fieri in loco honesto, licet extra Ecclesiam. Tertiò Episcopus debet esse in Pontificalibus. Quartò debet esse aliquis qui confirmandum offerat. Quintò ex decentiâ tam Confirmans, quàm confirmatus debent esse jejuni ob reverentiam Sacramenti. Dixi, ex decentiâ non ex præcepto; mos enim invaluit, ut post prandium confirmet Episcopi.

Quoad sequentes ceremonias. Primò, frons confirmati ligatur vittâ, nè Chrisma aliis rebus adhæreat, velut significetur, gratiam Confirmationis esse conservandam. Secundò, Episcopus levi alapâ confirmatum percutit, ut Confirmatus reminiscatur se hoc Sacramentum recepisse, nè scilicet iteretur Confirmatio quæ est Sacramentum irreiterabile; quandoquidem confert indelebilem characterem: percutitur

QUESTIO PRIMA.

Quid sit Eucharistia, quotuplex, & quando instituta fuerit?

Sicut natura Dei uno & eodem nomine explicari non potest, sic & mysteria divina pluribus nominibus indigent, ut perfectè concipiantur: unde Eucharistia, quæ est mysteriorum nostræ religionis præstantissimum, pluribus insignitur. Dicitur primò Eucharistia, idest gratiarum actio, vel bona gratia; quia Christus hoc Sacramentum instituendo gratias egit; vel quia nos illud recipiendo, gratias agere debemus; vel tandem quia continet Christum gratiarum omnium fontem. Dicitur secundò Synaxis, idest collectio, & latine communio vocatur; non quòd sit necessarium Eucharistiam pluribus simul administrare, ut volunt hæretici, sed quia unit homines Christo, tanquam capiti, & inter se illos conjungit, ut membra cum membris. Tertiò dicitur Viaticum, quia est viatorum cibus & præsertim infirmorum, qui illo roborantur ex hac vitâ ad Dei tribunal progredientes. Quartò dicitur Sacrificium & Hostia, quia non solum habet rationem Sacramenti, sed & Sacrificii, ut dicetur suo loco.

CONCLUSIO PRIMA.

EUCHARISTIA est Sacramentum quod sub speciebus panis & vini continet corpus & sanguinem Christi ad conservationem vitæ

124 DE SACRAMENTIS.

spiritualis. Dicitur Primò *Sacramentum*, & hoc constat tum apud Catholicos, tum apud Hæreticos. Dicitur secundò, *sub speciebus panis & vini*, ad explicandam materiam, quæ est panis & vinum; ponendo etiam, *sub speciebus*, innotescit vis consecrationis, per quam definit esse panis, & succedit corpus Christi. Additur terriò, quòd Eucharistia *conjunctivè contineat corpus & sanguinem Christi*, ut explicetur natura integra hujus Sacramenti quoad significationem; significat enim refectionem quæ integratur ex potu & cibo, licet quantum ad substantiam, Sacramentum integrum sit sub una tantum specie. Subjungitur tandem, *ad conservationem vite spiritualis*; & in hoc denotatur effectus & finis hujusce Sacramenti.

CONCLUSIO SECUNDA.

SACRAMENTUM Eucharistiæ non est unum, si sumatur materialiter; sed est unum, si formaliter accipiatur. Ratio primi est, quia ibi sunt plura Sacramenta materialiter, ubi sunt plures res sensibiles, quarum una potest significare & conferre gratiam sine alia; sed in Eucharistia sunt plures materiæ, scilicet panis & vinum; sunt plures formæ etiam, scilicet *Hoc est corpus meum, hic est calix sanguinis mei*, & quodlibet horum potest conferre gratiam sine alio, ut patet ex laïcis qui recipiunt tantum unam speciem: ergo sunt plura Sacramenta materialiter. Ratio secundi est, quia Eucharistia significat refectionem spiritualem animæ; sed resectio perfectius denotatur in speciebus panis & vini simul, quàm in specie solius panis, vel solius vini, licet Christianus

æquè reficiatur ex sumptione unius speciei tantum, quàm duarum, quoniam quælibet carnem & sanguinem Christi continet: ergo Eucharistia formaliter sumpta est tantum unicum Sacramentum, quoniam significat unicam refectionem.

CONCLUSIO TERTIA.

EUCHARISTIA-Sacramentum fuit institutum in nocte cœnæ, post comestionem scilicet Agni Paschalis. Hoc est conforme D. Paulo qui ad Corinth. scribens narrat quòd Christus *in quâ nocte tradebatur, accepit panem, & gratias agens benedixit ac fregit, deditque discipulis suis dicens, Accipite & manducate, hoc est corpus meum.* Ratio convenientiæ hujus est, quia testamenta solent confirmari imminente morte: cum ergo Christus per suam passionem nobis legare voluerit gloriam cœlestem, tanquam hæreditatem; voluit paulò ante mortem nobis dare suum corpus & sanguinem, tanquam pignus vitæ æternæ. Errant ergo qui dicunt Christum nobis suo testamento reliquisse Corpus; sed dicendum est quòd nobis legaverit gloriam æternam, faciendo nos suos heredes & coheredes Christi, in cujus gloriæ pignus & assecurationem nobis reliquit corpus & sanguinem suum, tanquam viaticum aliquod, quo perduceremur ad illam hereditatem capeSSendam. Quoad ordinem autem quem tenuit Christus in institutione hujus Sacramenti, hunc affert Maldonatus. Primò facta fuit cœna legalis consistens in comestione Agni Paschalis; secundò facta est cœna communis; tertio lotio pedum; quartò institutio Eucharistiæ; quinto

QUESTIO II.

Ex quibus constat Sacramentum Eucharistiæ?

NON loquimur hîc de Sacramento Eucharistiæ in fieri, quia constat ipsum, sicut alia Sacramenta fieri per materiam, quæ est panis & vinum; per formam, quæ consistit in verbis, & per ministrum, qui est Sacerdos; sed loquimur de Eucharistiâ in facto esse, & ut est quid permanens; & de ipsâ sic sumptâ quærimus quænam sint ea ex quibus constat.

CONCLUSIO.

SACRAMENTUM Eucharistiæ, tanquam totum aliquod morale, constituitur ex corpore & sanguine Christi, & speciebus; seu, ut dicit Scotus, ex corpore & sanguine Christi, quatenus dicunt relationem ad species: non consistit enim hoc Sacramentum in materia & formâ, scilicet in pane & verbis, quia Eucharistia tamdiu est Sacramentum, quamdiu corpus & sanguis Christi in eâ permanent, panis autem & verba non remanent, quando adsunt corpus & sanguis Christi: ergo Eucharistia in facto esse non constituitur ex illis: Non constat etiam hoc Sacramentum ex solo corpore & sanguine, quia ad Sacramentum requiritur signum visibile: Denique solæ species non faciunt etiam Sacramentum, quia ad ra-

tionem Sacramenti requiritur, quòd sit signum visibile rem invisibilem continens : ergo remanet, ut constituatur ex utroque, nimirum ex speciebus, quæ sunt signa visibilia, & ex corpore & sanguine Christi, quæ sunt res sacra.

O b j e c t. Eucharistia ex Tertulliano est figura corporis Christi ; sed figura involuit absentiam rei figuratæ : ergo hoc Sacramentum non constat corpore Christi. **R**espondeo, Tertullianum velle corpus Christi in Eucharistia esse figuram corporis Christi extensam in arâ crucis, unde Eucharistia vocatur memoriale Passionis Christi : Non ergo est figura corporis Christi simpliciter, nisi sit figura plena significato, non verò vacua ; sicut Verbum dicitur figura substantiæ Patris ; figura inquam plena, est enim eadem Patris substantia. Nec quis dicat, nihil esse simul Sacramentum, & rem Sacramenti, proindeque corpus Christi non esse Sacramentum, quoniam est res Sacramenti, quia producit per verba. **R**esp. enim Sacramentum Eucharistiæ habere hoc speciale, quòd sit simul tum Sacramentum, tum res Sacramenti : corpus, inquam, Christi est res Sacramenti, quia producit per verba sacramentalia, & est Sacramentum, quia cum speciebus producit gratiam.



QUESTIO III.

*Virum Sacramentum Eucharistia sit
necessarium?*

QUIA multoties locuti fuimus de necessitate tum medii, tum præcepti, tædiosum esset, hîc rursus explicare quid sit utraque necessitas, sed videndum tantum est, quâ necessitate Eucharistia sit necessaria.

CONCLUSIO PRIMA.

EUCHARISTIA non est necessaria absolute necessitate medii, est tamen medium ita utile, ut dicatur quasi moraliter necessarium.

Probatur primum, quia Eucharistia non est medium institutum ad justificationem; sive remissionem peccati mortalis; imò receptio Eucharistiæ præsupponit justificationem ut licitè fiat; & sic non est necessaria, nec in re, nec in voto, quia votum de aliquâ re faciendâ non est necessarium, nisi ipsa res sit necessaria: unde cum susceptio Eucharistiæ non sit necessaria, consequenter votum ejus non erit necessarium. Quod si dicatur aliquando necessaria necessitate medii; hoc est secundariò, ratione scilicet præcepti adjuncti, observatio enim mandatorum Dei & Ecclesiæ est medium necessarium ad salutem, conformiter responsioni Christi, *si vis ad vitam ingredi, serva mandata.*

Probatur secundum, certum enim est ex

Concil. Trid. sess. 6. Canone 22. nos non posse diu in gratia perseverare, sine specialibus auxiliis Dei, ad quæ obtinenda Sacramentum hoc est efficacissimum. Deinde, Eucharistia est præcipuus animæ cibus, & non potest diu vita persistere nisi mediante cibo: ergo est medium ita utile, ut sit quasi moraliter necessarium.

OBJEC. Pœnitentia, Baptismus & Eucharistia sunt ejusdem necessitatis, ut patet ex Script. quæ iisdem verbis hæc Sacramenta præcipit: de Baptismo enim dicit, *Nisi quis renatus fuerit, &c.* de Pœnitentia ait, *Nisi pœnitentiam egeritis, &c.* & de Eucharistia, *Nisi manducaveritis, &c.* ergo sicut Baptismus & Pœnitentia sunt necessaria necessitate medii, sic & Eucharistia. Resp. negando consequentiam; quia necessitas Sacramentorum non pendet tantum ex modo loquendi Scripturæ, sed ex ipsorum natura & institutione; unde cum Baptismus & Pœnitentia sint instituta ad infusionem gratiæ quæ absolutè necessaria est, idè sunt necessaria necessitate medii; quia verò Eucharistia destinatur tantum ad augmentum gratiæ, non est necessaria medii necessitate.

Instabis, Eucharistia est instituta ut cibus animæ; sed necessarius est absolutè cibus pro vitâ corporali: ergo & Eucharistia pro vitâ spirituali. Respondeo, cibum animæ non esse ita necessarium, ac cibum corporis; quia cibus animæ potest suppleri per actus animis, & per bona opera. Quod si aliqui Patres legantur communicasse infantes: ex hoc non potest in-

ferri Eucharistiæ necessitas absoluta, sed hoc tantum fiebat, quia erat usus huiusce temporis, & hoc ratione præcepti.

CONCLUSIO SECUNDA.

Hoc Sacramentum est necessarium necessitate præcepti, tum divini, tum Ecclesiastici.

Quoad præceptum divinum, habetur Joann. 6. *Nisi manducaveritis carnem filii hominis, non habebitis vitam in vobis.* Quoad tempus autem quo obligat hoc præceptum; hoc est quando Eucharistia judicatur necessaria ad conservandam vitam spiritualement gratiæ contra tentationes: hæc enim est differentia inter præcepta affirmativa & negativa, quod prima obligent tantum, quando urget necessitas finis propter quem sunt instituta; secunda verò obligent semper & pro semper: præceptum ergo Eucharistiæ obligat primò in articulo mortis, tunc enim tentationes solent esse graviores; secundò in reliquâ vitâ, quoties opus est remedio ad perseverandum in gratiâ, ut in gravioribus tentationibus; tertio, quando quis prudenter putat se non amplius habere occasionem communicandi in totâ vitâ; tunc enim debet se præmunire contra tentationes futuras.

Quoad præceptum Ecclesiasticum, semper extitit in Ecclesiâ. Initio nascentis Ecclesiæ omnes qui intererant sacrificio missæ, tenebantur communicare: cum ille fervor charitatis minueretur, Fabianus Papa iussit ter communicare quolibet anno, in Nativitate Domini scilicet, in Paschate & Pentecoste; ubi Soter Papa adjecit feriam quintam in coenâ Domi-

DE SACRAMENTIS. 137

nî : nunc statutum est, ut omnes saltem in Paschate communicent. Quòd si propter rationabilem causam non possint sumere Eucharistiam in Paschate, controvertuntur authores, an teneantur communicare in primâ occasione ; negant enim Soto, Antoninus & Sylvester, putantes hoc manere liberum ; quia, inquiunt, communio Paschalis est præceptum affirmativum, quod obligat tantum pro tempore præscripto ; melius tamen alii affirmant.

Q U Æ S T I O IV.

Quanam sit materia Eucharistia?

CUM locuti fuerimus de materiâ proxima, internâ & parmanenti Eucharistiæ, quæ consistit in speciebus sub quibus continentur corpus & sanguis Christi ; nunc agendum est de materiâ remotâ externâ & transeunte, quæ desinit esse per verba consecratoria, & ex qua fit hoc Sacramentum.

CONCLUSIO PRIMA.

MATERIA Eucharistiæ sunt panis & vinum. Matth. enim 26. Marci 14. Lucæ 22. & ad Corinth. 2. legimus Christum accepisse panem in confectione hujus Sacramenti, & calicem in quo erat vinum ; ut patet ex verbis sequentibus, *Non bibam amodò de hoc ganimine vitis* ; & jussit facere quod fecit, dicens, *Hoc facite* : ergo tenere debemus materiam hujus Sacramenti esse panem & vinum.

F vj

& hoc est conforme tum Conciliis, tum Patri-
bus, quos superfluum esset recensere. Nulla da-
ri potest ratio convincens de hac veritate, quia
Christus in quacunque alia materia potuit in-
stituere Eucharistiam, saltem manducabili &
potabili; sed potest assignari ratio congruen-
tiæ, quia scilicet sicut panis & vinum sunt con-
grua corporis alimenta, sic Eucharistia sub spe-
ciebus panis & vini congruum est alimentum
animæ. Quodd si canones permittant afferri
uyas, oleum & incensum; hoc est tanquam
oblationes & ceremonias ad honorem Dei &
Sanctorum, & etiam in Sacerdotum alimenta.

C O N C L U S I O S E C U N D A.

PANIS, quæ est materia hujus Sacramenti,
debet esse triticeus. Sic Concilium Flor. &
Catechismus Concil. Trid. ubi habetur, tradi-
tionem Ecclesiæ esse, ut in pane triticeo con-
secratio fiat; unde non sufficit ut fiat in hordeo,
avena, milio, frumento nigro; sed requiritur,
quodd secundum judicium peritorum habeat ve-
ram rationem tritici, siue ita vocetur, siue non;
& quando dubium erit an sit verè triticum, nec-
nè, materia erit dubia, & in ea non debet con-
fici Sacramentum, maximè cum Eucharistia
non sit absolutè necessaria. Quoad felicam seu
secalam, aliqui putant esse materiam propriam
Eucharistiæ, dicentes non differre specie à tri-
tico, sed esse triticum inferius: melius tamen
dicendum est, esse materiam dubiam, in qua non
licet fieri consecrationem sine peccato mortali.
Porro, panis ille triticeus debet macerari ex
aquâ purâ & elementari, & concoqui ad ignem,
massa enim cruda farinæ aquâ subacta non est.

cibus usualis. Tandem panis ille igne coctus non debet iterum oleo vel butyro esse frixus, quia non esset panis usualis, sed potius placenta, aut aliquid simile.

CONCLUSIO TERTIA.

PANIS ille triticeus potest esse vel azymus vel fermentatus: quod habeat enim fermentum, hoc est accidentale pani, & sine fermento, vel cum fermento, non est minus panis: ergo erit semper materia propria Eucharistiæ. Hoc confirmat Concil. Florent. in decreto unionis, ubi Eugenius 4. præcepit tam Græcis, quàm Latinis, ut in hac parte usum suæ Ecclesiæ retineant, quod habetur in praxi: Græci enim fermentato pane utuntur, & Latini azymo. Licet autem in utroque consecratio fieri possit, panis tamen azymus magis accedit ad consecrationem quam fecit Christus, qui usus fuit pane azymo; erat enim primus dies azymorum, scilicet 14. Lunæ Martii, & tunc non licebat uti pane fermentato secundum dictum Exodi 2. *Et edent carnes nocte illa, & azymos panes*: Hoc non impedit tamen, quin Ecclesiæ cuilibet liceat uti consuetudine suâ; imò Græci non debent uti pane azymo, nec Latini fermentato.

CONCLUSIO QUARTA.

VINUM cujuscunque speciei est materia apta hujus Sacramenti, dummodo sit vinum usuale & potabile, non potest ergo fieri consecratio in uvis non expressis, quia non sunt vinum, nec dicuntur bibi: non potest etiam fieri in liquore deprompto ex uvis agrestibus & aliis non maturis, quia ex illis non fit vinum potabi-

- le, sed Omphacium: non potest etiam fieri consecratio in liquore expresso ex uvis siccis, si possit aliquis exprimi; quia pro tunc sunt corruptæ, & talis liquor non esset vinum: non potest etiam fieri consequenter in aceto, non est enim ampliùs vinum, sed vinum corruptum; potest tamen fieri in musto, idest, in vino recenter ex uva expresso, licet non debeat fieri, nisi sit depuratum & coctum: potest etiam fieri in vino congelato, quia species congelatæ possunt retinere liquorem qui ante congelationem consecratur: ergo & ipsum sanguinem recipere possunt; & proinde in iis fieri consecratio; quia sunt actu vinum & de facili potabile; non sic in Baptismo, quia ad Baptismum actualis ablutio requiritur.

CONCLUSIO QUINTA.

PARUM aquæ debet admisceri vino, non quidem de necessitate Sacramenti, sed ex præcepto Ecclesiæ. Sic Conc. Trid. in Catechismo cap. de Eucharistia. Ecclesia autem hoc præcipiens secuta est exemplum Christi, qui consecravit in vino aqua diluto, ut habet Concil. Carthag. can. 24. ut etiam ait Clemens Rom. lib. 8. Constitutionum Apostolicarum cap. 12. Si tamen hoc fecit Christus, non iussit ut fieret à nobis, ut patet ex Conc. Trid. sess. 22. cap. 1. dicente præceptum fuisse ab Ecclesia Sacerdotibus, ut aquam vino miscerent; & sic talis mixtio non est de necessitate Sacramenti, nec præcepti divini, sed Ecclesiastici, quod ortum habuit ab Apostolis, ut scilicet repræsentetur sanguis & aqua à latere Christi fluentes, & unio Ecclesiæ cum Christo, per aquas enim populi significantur.

QUÆSTIO V.

*Virum materia consecranda debeat esse præsens,
sensibilis & determinata?*

IX dictis in præcedenti quæstione constat, panem triticeum esse materiam Eucharistiæ, nec refert an sit fermentatus aut azymus quoad valorem Sacramenti; licet esset peccatum non servare morem suæ Ecclesiæ: quamquam verum sit dicere, quod Græcus apud Latinos existens possit in azymo celebrare, secundum hoc dictum: *Cum fueris Roma, Romano vivito more*. Constat etiam vinum esse materiam, etiamsi fuerit miraculosè productum: ut vinum nuptiarum Canæ in Galilæa; non tamen vinum nimis coctum erit materia propria, quia mutavit speciem vini. Quoad quantitatem panis & vini consecrandi, neminem latet, quamlibet magnam quantitatem panis & vini posse consecrari; quia non est repugnantia ex parte materiæ, cum sit apta ad consecrari, sicut & quilibet minima pars: non est etiam repugnantia ex parte formæ, quia verba consecrationis possunt proferri super quamlibet quantitatem: nec denique repugnat ex parte Ministri, cum possit habere intentionem consecrandi quamlibet quantitatem. Hoc tamen licitè fieri non potest; qui enim in tanta quantitate consecraret, quæ non posset in tempore opportuno sumi, graviter peccaret, faceret enim injuriam tanto Sacramento, cum species possent corrumpi,

& Sacramentum definere sine usu, qui est secundarius finis Eucharistiæ; ubi productio corporis Christi est finis primarius. An autem fieri possit talis consecratio in minimâ parte panis aut vini, resolveret

CONCLUSIO PRIMA.

QUÆCUMQUE pars quantumvis parva panis, potest esse materia consecrationis, modo sit sensibilis. Ratio primi est, quia quælibet parva quantitas est panis, & panis est materia apta. Ratio secundi est, quia si tam exigua esset, ut non posset videri aut tangi, non posset designari à Sacerdote, & sic non posset digere, *Hoc est corpus meum*. Deinde, ex definitione Sacramenti. Sacramentum debet esse signum sensibile: ergo & materia ejus sensibilis; si tamen minima pars manet unita toti, etiamsi esset ita exigua, ut non posset tangi & videri, sub ea posset recipi & conservari corpus Christi, quia illa esset semper sensibilis, si non respectu sui, saltem respectu totius. Sic etiam dicendum est de minimâ guttulâ vini: Non verò idem est sentiendum de minimâ gutta aquæ respectu Baptismi, quia Baptismus consistit in ablutione, quæ non potest fieri ex una gutta, nisi motu violento, ut diximus. Porro, quando dixi, materiam debere videri aut tangi, sufficit ad hoc, quod ex sua natura sit sensibilis, ut patet quando Sacerdos plures hostias consecrat, quarum aliæ sub aliis delitescunt; ut patet etiam quando calix est coopertus pala aut patena, & quando cæcus consecrat, ut aliquis fecit in Concilio Tridentino ex dispensatione summi Pontificis; in his enim occasionibus

materia semper est moraliter sensibilis, & moralia moraliter sunt accipienda.

CONCLUSIO SECUNDA.

MATERIA consecranda debet esse moraliter præsens, ita quòd designari ac demonstrari possit per particulam, *Hoc*: quanta autem debeat esse illa moralis propinquitas, attendendum est iudicium prudentum; hoc tamen est certum apud omnes, quod debeat esse in conspectu Ministri; Unde Sacerdos non potest consecrare quæ sunt à tergo, nisi habeat illa præ manibus, & illud æquivalet conspectui; potestque illa materia designari per pronomen, *Hoc*: Certum est etiam vinum, in dolio præsenti inclusum posse consecrari, dicitur enim de illo ut continetur in dolio, vel amphora, *hoc vinum est bonum*; sicut & de pecunia inclusa in crumena, *hac pecunia est mea*: Certum est tertio, non requiri tactum; sufficit enim præsentia materiæ ad horum verborum veritatem, *Hoc est corpus meum*: Certum est quarto, non posse consecrari hostiam post parietem existentem, nec in tabernaculo, quia non videtur humano modo præsens: Certum est quinto, hostias contentas in cibario appposito super altari posse consecrari: Certum est denique; non fieri consecrationem, si materia nondum est præsens, quando verba inchoantur; quia non demonstratur per pronomen, *Hoc*.

CONCLUSIO TERTIA.

MATERIA debet esse determinata; quia intentio requiritur in ministro; & non est intentio sine cognitione, nec cognitio sine determinatione; nisi ergo determinetur mate-

sia in particulari, non fiet consecratio. Unde certum est primò, quòd ille qui ex decem hostiis vellet tantum quatuor consecrare, non determinando quas vellet, nullam consecraret. Certum est secundò, quòd qui vellet unam partem vini aut panis consecrare, non determinando qualem partem, non consecraret, benè autem si determinaret illam aut illam partem; licet difficile esset partem consecratam à non consecrata discernere, graviter tamen peccaret. Certum est tertio quòd qui tres hostias teneret, putans esse tantum unam, quia simul junctæ sunt, omnes consecraret; præsumitur enim ex virtuali intentione, quam habet consecrandi quod tenet; deinde habent rationem unius: si haberet tamen intentionem explicitam consecrandi tantum hostiam quam videt, aliæ duæ non essent consecratæ. Certum est tandem, quòd si Sacerdos multas ad altare tulerit hostias cum animo illas consecrandi, & dum consecrat, intendit consecrare eam quam habet præ manibus, non cogitando de aliis, omnes consecrat propter virtualem intentionem actu contrario non revocatam.

QUESTIO IV.

*Utrum necessariò debeant simul consecrari
panis & vinum?*

HÆc quæstio non intelligitur de necessitate Sacramenti; si quis enim tantum pa-

nem consecraret aut vinum, esset verum & perfectum Sacramentum, quia contineret corpus Christi & ipsius sanguinem: esset inquam, perfectum in primaria significatione, quia Christum præsentem significaret; non in secundaria, quoniam significat secundariò refectionem quæ in corporalibus fieri solet ex potu & cibo: loquimur ergo de necessitate præcepti.

CONCLUSIO.

DE præcepto, tum divino, tum etiam Ecclesiastico, debent consecrari simul panis & vinum. Primum conceditur ab omnibus, excepto Navarro & certis quibusdam. Et ratio nostra est, quia de jure divino debet fieri sacrificium quotiescumque fit consecratio, ut patet ex his verbis, *Hoc facite in meam commemorationem*, ubi Christus ostendit sacerdotem debere consecrare offerendo & consecrando, secundum Conc. Trid. sess. 22. cap. 1. sed sacrificium non esset perfectum sine consecratione utriusque, ad sacrificium enim requiritur mactatio hostiæ, unde sicut Christus mactatus fuit in morte, & ipsius sanguis à corpore separatus; ita in sacrificio Missæ fieri debet eadem separatio: unde vi verborum solum corpus est sub specie panis, & solus sanguis sub specie vini, licet per concomitantiam corpus & sanguis sint sub utraque specie: ergo non potest fieri consecratio ex solo pane. Secundum verò habetur ex jure Canonico cap. *Comperimus* de Consecratione dist. 2. ubi habetur quòd conficiens sub una tantum specie, committit sacrilegium grave; non est autem peccatum nisi per violationem præcepti: ergo

consecratio in pane & vino est necessaria necessitate præcepti Ecclesiastici.

O B J E C T. Si Sacerdos non posset consecrare unam tantum speciem, non posset etiam communicare in unicâ specie, sed potest hoc sicut & Laïcus: ergo & illud. Respondeo concedendo sequelam majoris, quia sacrificium non perficitur solâ oblatione, sed & consumptione; unde ut perfectum sit sacrificium, debet sumere utramque speciem: ad minorem verò dico, quòd Sacerdos non celebrans possit communicare sub una specie sicut Laïcus, & pro tunc Eucharistia est tantum Sacramentum, non verò sacrificium. Unde ex dictis patet, quòd Sacerdos habens tantum panem & non vinum, non debeat consecrare panem ad communicandum infirmum; tale enim præceptum tantum obligat, quando est commoditas sine aliquo peccato Si quis dicat, Christum consecrasse sub sola specie panis in Castello Emmaüs: Respondendum est, quòd hoc potuit facere ex potestate excellentiæ, quæ non competit alteri à Christo. An autem summus Pontifex possit in hoc casu dispensare; alii hoc probabile tenent, sed melius alii negant.



QUESTIO VII.

An aqua admixta vino convertatur immediatè in sanguinem?

DIXIMUS quòd ex præcepto debeat admisceri aqua cum sanguine, saltem necessitate præcepti, an autem illa aqua convertatur in sanguinem immediatè, vel primò in vinum & postea in sanguinem: aliqui primum tenuerunt, dicentes, quòd si aqua admixta sit vino in tantâ quantitate, ut non sit conversa in vinum ante verba consecrationis, transsubstantietur immediatè in sanguinem per ipsa verba: alii contrarium probabilius tenent.

CONCLUSIO.

AQUA non convertitur immediatè in sanguinem, quia materia hujus Sacramenti non est aqua, sed vinum, ut diximus; & sic aqua non est consecrabilis: unde debet infundi in calicem in quantitate ita modica, ut facilè ante consecrationem in vinum mutari possit; quod si non mutetur, ut potest accidere propter vini tenuitatem & nimiam aquam, pro tunc remanet aqua pura in calice. Ubi notandum est quòd licet aqua non convertatur in vinum ante consecrationem; possit tamen converti in illud post illam, quia species consecratae vini in quibus admixta est aqua, possunt tam diu remanere sine consumptione, quòd ipsa aqua per virtutem specierum vini

destinat esse aqua & fiat vinum, quoniam in illis speciebus consecratis remanet virtus ad generandum vinum, ac si substantia vini adesset, Deo scilicet supplente aliquid ex parte specierum, sicut supplet reverà, quando ex speciebus corruptis vini acetum generatur, & ex speciebus panis generantur vermes: & sic non est dicendum, quòd post consecrationem aqua, quæ non potuit antea converti in vinum, postea convertatur in sanguinem Christi; quia verba consecratoria jam prolata sunt, & nil manet quod possit illam aquam transsubstantiare in sanguinem.

O B J E C T. Si aqua quæ ante consecrationem non mutatur in vinum, remaneret aqua, totum illud quod est in calice, non posset adorari. **R E S P O N D E O,** quòd adoratur tantum illud quod est consecratum; unde nec musca adoraretur si incidisset in calicem. Si dicas, ergo si remaneret aqua, Sacerdos hauriens sanguinem cum illa aqua, non esset jejunus, & ideo non posset celebrare alias Missas in Nativitate Domini; **R E S P O N D E B I T U R,** præsumi semper jejunum, quia aqua præsumitur conversa in vinum ante consecrationem.

Q U Æ S T I O V I I I.

Quanam sit forma Eucharistia?

LUTHERANI & Calvinistæ putarunt recitandam esse historiam Eucharisticæ institu-

tionis, quæ sic incipit, *Ego enim accepi à Domino quod & tradidi vobis, &c.* Differunt tamen Calvinistæ in eo quodd proferunt ea verba per modum concionis & instructionis, ut audientes habeant in memoria id quod fecit Christus; Lutherani verò proferunt per modum consecrationis, quia efficiunt id quod significant.

CONCLUSIO PRIMA.

FORMA consecrationis panis sunt hæc verba: *Hoc est corpus meum.* Quoad particulam, enim, est tantum ex institutione Petri, volentis conjungere hæc verba cum præcedentibus. Ratio est, quia talibus verbis usus est Christus, & per illa consecravit. Deinde, illa verba sunt forma Eucharistiæ, quæ faciunt corpus Christi præsens in illâ: verba autem allata hoc faciunt, significant enim corpus Christi ibi esse præsens, & verba consecratoria faciunt id quod significant. Quoad ista verba antecedentia, *Qui pridie quam pateretur*, non sunt verba Christi, sed Apostolorum, quæ enuntiant quomodo & quando consecraverit Christus. Quoad ista, *Accipite & manducate*, non sunt de essentiâ formæ, quia omittuntur à Lucâ; qui tamen ea omitteret, peccaret graviter.

O B J E C T. Si hæc verba, *Hoc est corpus meum*, efficiunt corpus Christi præsens; vel hoc efficiunt ut sunt vera, vel ut sunt falsa; non ut sunt falsa; aliàs corpus Christi non esset præsens; non etiam ut sunt vera, quia sequeretur corpus Christi esse præsens antequam proferrentur verba: propositio enim vera, est ea quæ enuntiat objectum esse tale quale enuntiatur. Respondeo, hanc propositionem operari suum

effectum in quantum est vera, non quidem veritate antecedente verborum prolationem, sed veritate concomitante & immediatè sequente talem prolationem: est enim hæc differentia inter propositionem speculativam & practicam, quòd prima supponat objectum esse tale antequam enuntietur, secunda verò faciat objectum tale: illa autem propositio, *Hoc est corpus meum*, est effectiva, non speculativa tantum. Ex dictis patet, verba præallata requiri necessariò, & non debere in illis fieri mutationem substantialem; unde nil fit dicendo, *Hoc est corpus Christi*, quia illa verba non proferuntur in persona Christi, quod requiritur. Nihil fit etiam dicendo, *Accipite hoc corpus meum*, quia hæc verba non denotant productionem corporis Christi; supponitur enim antea productum esse. Nil fit etiam dicendo, *Hoc sit corpus meum*, non denotatur enim productio. Nec valet dicendo, *Hic panis est corpus meum*, vel *hoc sit corpus meum*, vel *conficio corpus meum*; mutatur enim sensus formæ, quæ debet exprimi in facto esse, ut fecit Christus. Isti autem modi loquendi essent validi, *Hic cibus est corpus meum*, *istud est corpus meum*, *hic est corpus meum*; *hic est corpus meus*, *hic est corpus meus*: modo *Hic* non sumatur adverbialiter, sed loco pronominis, modò etiam istæ pronuntiationes incongruæ fiant solùm ex imperitia, & non ex prava intentione ministri.

CONCLUSIO SECUNDA.

HÆc sola verba, *Hic est calix sanguinis mei*, vel *hic est sanguis meus*, sunt forma respectu vini; sic Scotus contra D. Thomam & alios,

aliquos, qui dicunt verba sequentia usque ad ista, *Hæc quotiescumque feceritis*, esse de essentia Sacramenti. Ratio nostra est, quia per verba sola præallata redditur sanguis præsens; verba enim consecrationis faciunt id quod significant; sed hæc verba, *Hic est calix sanguinis mei*, significant sanguinem Christi esse præsentem: ergo in illis consistit præcisè forma: quia tamen supra hoc est dissensio inter Theologos, idèd quando quis consecrat, non debet habere intentionem cum solis primis verbis, vel cum omnibus necessariò, ne se exponat periculo: sed debet intendere consecrationem facere cum illis verbis quæ instituit Christus, sive sint sola prima, sive sint etiam sequentia. Nec dicat D. Thomas, hæc verba sequentia, *Novi & æterni testamenti*, esse determinationes prædicati, ac proinde essentielles: licet enim per illas determinationes specificetur quòd sanguis qui est in calice, sit idem ac ille qui effusus est; hoc tamen non est essenziale ad Eucharistiam, & sic cum solis primis potest fieri consecratio. Quòd si, dum proferuntur hæc omnia verba, teneatur calix præ manibus, hoc non importat, quòd sint de essentiâ Sacramenti; aliàs particula, *enim*, esset etiam de essentiâ; sed hoc fit ad majorem explicationem formæ præcedentis. Adde quòd in Ecclesia Græca fuerunt viri pietate insignes, qui talia verba sequentia omiserunt.

Ex dictis constat quòd si quis diceret, *Hic calix est novum testamentum in meo sanguine*, ut Lucas & Paulus dixerunt, fieret consecratio; non enim mutatur sensus substantialis, sed

idem est, ac si diceretur, *Hic est calix Christi quo novum testamentum sancitum est*; qui tamen sic ageret, graviter peccaret contra ulum Ecclesiæ & determinaciones Conciliorum. Porro, quando dicitur, *Hic est calix meus*; hoc est per metonymiam, ubi sumitur continens pro contento, ita ut sit sensus: *sanguis meus est in calice*.

CONCLUSIO TERTIA.

VERBA quæ proferet Sacerdos, proferuntur in persona Christi, non tantum recitative, sed effective, & per pronomina *Hoc* & *Hic*, non significantur, nec panis, nec vinum, nec corpus, nec sanguis, nec species, sed significatur confusè contentum sub speciebus. Ratio primi est, quia si Sacerdos verba proferret in nomine suo, corpus Christi non esset, sed corpus Sacerdotis dicentis, *Hoc est corpus meum*. Ratio secundi est, quia si verba proferrentur tantum recitative, non efficerent Corpus Christi esse sub speciebus panis, & sanguinem sub speciebus vini: ergo proferuntur, nedum significative, sed insuper effective: significative quidem, ut innueretur quid fecit Christus; effective verò, faciendo scilicet quod Christus ipse fecit & transubstantiando panem & vinum in corpus & sanguinem Christi. Ut autem hæc verba verè significant, sufficit quòd in fine prolationis verborum, corpus & sanguis adsint. Quoad alias partes conclusionis; per *hoc*, non intelligitur panis, quia panis non est Corpus Christi; non intelligitur etiam Corpus Christi, quia hoc faceret hunc sensum, *Hoc corpus meum est corpus meum*; non etiam intelligitur species, quia non est verum dicere quòd species sint cor-

pus Christi; remanet ergo quòd pronomen, *Hoc*, designetur quod est confusè contentum sub speciebus; ita ut sit sensus. *quod continetur sub speciebus, est corpus meum*, seu *hoc corpus est corpus meum*, sicut quando dicitur, *hic homo est Petrus*; & tunc non est propositio identica, quia procedit de magis confuso ad minus confusum. Notandum tamen est, quòd si particula, *Hoc*, supponat pro contento sub speciebus, vel pro corpore indeterminato, illud intelligendum est non pro eo tempore quo ipsa particula profertur, sed pro eo tempore quo omnia verba proferuntur; unde quando pronomen, *Hoc*, profertur est particula vaga; quæ habet significationem suspensam, donec deferminetur à prædicato, nempe *corpus meum*, & protunc vera esse incipit hæc propositio, *hoc corpus est corpus meum*; hæc est enim natura propositionum effectivarum.

QUESTIO IX.

An corpus Christi sit in Eucharistia.

CAPHARNAITÆ concipere non valentes hanc veritatem, dixerunt de Christo promittente se daturum suam carnem manducandam & suum sanguinem potandum, *quomodo potest hic nobis suam carnem dare ad manducandum*; multi hæretici post illos insurrexerunt in Ecclesiam, præsertim Berengarius Archidiaconus Andegavenfis, & nostro penè sæculo Calvinus & Lutherus, cum hoc diferimine;

quòd Calvinus credat , Christum esse in Eucharistia figuratum , & Lutherus impanarum ; idest , primus asseruit nos habere tantum figuram corporis Christi in Sacramento , non verò realitatem ; secundus autem , qui tenet corpus Christi esse realiter in Eucharistia , credit substantiam panis remanere cum substantiâ corporis Christi : uterque Hæresiarcha refutatur in præsentî quæstione & in sequenti.

CONCLUSIO.

CORPUS Christi verè & realiter est in Eucharistia. Joan. 6. *Panis quem ego dabo, caro mea est ; ibidem, nisi manducaveritis carnem filii hominis, non habebitis vitam in vobis : non potest autem manducari, nisi sit præsens in Sacramento.* Rursus ibidem , *caro mea verè est cibus ;* idem habent verba institutionis Eucharistiæ 1. ad Corinth. 11. *Accipite & manducate, hoc est corpus meum.* Nec hoc explicent adversarii de figurâ corporis Christi ; Primò, quia Calvinus dicit scripturam esse ita intelligibilem , ut explicari non debeat ; cùm ergo Christus dicat , *Hoc est corpus meum* , quomodo hoc explicat Calvinus de figura ? Secundò, quia Christus hoc dixit cùm esse moriturus : ergo debebat perspicuè loqui , & non uti figuris , ut ipse promisit Joan. 12. *Venit hora cùm jam non in proverbiiis loquar vobis.* Tertiò , quia Eucharistiæ institutio erat testamentum Christi , vel saltem confirmatio testamenti illius , ut habetur Lucæ 22. *Hic calix novum testamentum est in meo sanguine* , sed testamentum debet fieri verbis perspicuis , & clausulæ ejus debent sumi ad litteram , ut habet Paulus ad Galatas dicens , *Neme*

superordinet testamento hominis; id est, glossam imponat; maxima ergo temeritas est Calvino, dum præsumat explicare testamentum Christi. Quarto, quia si testator legasset alicui amico suam domum, nonne esset ridiculum, si executor testamenti prætenderet testatorem voluisse tantum legare figuram suæ domus? Quinto, quia si Eucharistia esset tantum figura corporis Christi; nihil haberet Eucharistia supra manna, quod fuit certè figura corporis Christi. Sexto, quia si Christus voluisset tantum loqui de figura corporis sui, videns Capharnaïtas sese scandalizare ex suis dictis, debuisset, ad tollendum scandalum, explicare suam mentem, & dicere se datum non corpus suum realiter, sed figuram corporis sui: & per talem explicationem, Capharnaï æ rediissent ad Christum, à quo per prima verba recesserant; attamen ex Scriptura patet, quod Christus non explicuerit suum dictum, imò illud per iuramentum confirmaverit, subjungens, *Amen, amen dico vobis, nisi manducaveritis carnem filii hominis, non habebitis vitam in vobis.* Septimò, quia non est recurrendum ad figuras; ubi nulla est repugnantia; non autem repugnat quòd Christus dederit realiter suum corpus. Octavò, quia leges à prudentibus & sapientibus latae debent ferri per verba clara, nè quis ex verborum ambiguitate legem violet; Christus autem Sacramentum instituens, legem tulit, dicens Apostolis, *hoc facite.* Nonò, quia rex verax & probus qui seriò promississet pecuniam & daret tantum figuram ejus, illuderet: sed Christus, qui est rex regum & veritas ipsamet, seriò

promisit caenam suam, Joann. 6. *Panis quem ego dabo, caro mea est*: ergo si daret solum panem, qui esset figura carnis suæ, illuderet Ecclesiæ. Decimò, quia Christus egisset indignè cum Ecclesiâ, quam vocat suam sponsam, si reliquisset illam in errore per spatium quindecim sæculorum & ultra, usque scilicet ad tempus Calvini, & hoc ex occasione suorum verborum, quæ Ecclesia Romana nude & literaliter & sine ulla explicatione voluit credere, tanquam sponsa fidelissima verbis sui sponsi. Undecimò, quia in nostra mente Catholica fuerunt Patres cujuscumque sæculi, quos recensere prolixius esset, & eò inutilius quòd de facili videri possunt apud Bellarminum tomo 2. fol. 40. Duodecimò tandem, quia veritas nostræ fidei habetur ex liturgiis cujuscumque Ecclesiæ, ut videre est apud eundem Bellarminum præcitatum.

OBJEC. I. ex Matth. 4. *Si quis vobis dixerit, ecce hic est Christus, aut illic, nolite credere*: ergo non sunt credendi illi, qui dicunt Christum esse in Sacramento. Resp. Matthæum loqui de Pseudochristis, idest, de perversis hominibus, qui se dicunt Christum; non de Christo in Eucharistia. Dices, ergo sensus nostri falluntur, si non sit panis, sed Christus. Resp. non falli, quia vident accidentia panis; sed falleretur intellectus, si non obstante dicto Christi, crederet sub accidentibus panis non esse corpus ejus. Dices, *quod intrat in os, in ventrem vadit, & in secessum emittitur*, quod non est dicendum de corpore Christi. Respondeo, Corpus Christi non ejici, quia desinit esse eo instanti quo spe-

cies corruptæ sunt, sed ejicitur id in quod conversæ sunt species post sui corruptionem. Dices: indignum est, Christi corpus manibus impuri hominis tractari? Respondeo dignum esse charitate illius.

OBJ 1 c. 2 hæc verba, *Hoc est corpus meum*, debere intelligi per fidem, & non realiter carnem Christi manducari, Joann. enim 6 habetur, *Caro non prodest quidquam? spiritus est qui vivificat: verba, quæ ego loquor vobis, spiritus & vita sunt.* Respondet Chrysostomus Homil. 26. in Joann. hoc non dici de ipsâ carne Christi; aliàs non profuisset in morte, sed de his qui carnaliter accipiunt; quasi sit sensus, cognitio carnalis & habita per sensus, nil prodest ad hoc mysterium capiendum, sed fides requiritur; quando etiam dicit Christus, *Verba quæ ego loquor vobis, spiritus & vita sunt:* si per hoc intendisset demonstrare, corpus suum esse in pane per solam fidem, aut figuram; per hanc explanationem placasset animos discipulorum, quod tamen non fecit; quia abierunt; sed hoc dixit, ut refelleret Capharnaïtas, qui putabant, Christum carnem suam daturum modo cruento & sensibili, sicut carnem communem.

OBJ 1 c. 3. Christum in institutione Eucharistiæ loquutum fuisse per figuras, quia quando loquitur de sanguine, loquitur de calice, accipiens continens pro contento: ergo etiam in pane usus fuit figura. Respondeo, quod sit reverâ usus figurâ respectu calicis, sed illa figura omnibus constat, & est modus loquendi usitatus apud homines, qui tradentes lagenam plenam vino, dicunt: accipe vinum. Dices ex

1. ad Corinth. 10. *Patres nostri*, inquit Paulus, *eandem escam manducaverunt*, sed Judæi habuerunt tantum figuram corporis Christi: ergo & nos habemus tantum figuram. Respondeo, manducaverunt eandem escam inter se, concedo: ac nos, nego. *Aliud est enim*, inquit Augustinus, *Pascha quod celebrat Judæus in ovis, aliud quod sumimus in corpore & sanguine*.

OBJEC. 4. Verbum, *est*, sumitur in Scriptura pro significat, ut Genes. 41. *Septem spicae sunt septem anni*; Lucæ 3. *Semen est verbum Dei*. id est, significat, sicut quando Christus dicit, *Ego sum ostium, vitis, pastor*. Respondeo reverentia, quod particula, *est*, aliquando idem sit ac significat, non quod Christus in allatis exemplis significet ostium vel vitem, quia figuratum est nobilius figurâ, sed quia ostium est figura Christi; aliquando tamen non sumitur *est*, pro significat, ut quando Pater dixit, *hic est Filius meus dilectus*; sic etiam in consecratione, hoc verbum substantivum sumitur propriè secundum Concilia, & Patres cujuscumque sæculi. Porro hæc particula, *est*, sumitur pro significat in parabolis, & Parabolæ scripturæ dignoscuntur per applicationem factam in antecedentibus vel subsequenter verbis; nulla autem sunt verba antecedentia vel subsequenter, quæ indicent Christum loqui parabolice, quando dixit; *Accipite & manducate*.

OBJEC. 5. Christus porrigens calicem dedit tantum vinum potandum: ergo dedit tantum panem manducandum. Antecedens pater ex verbis Christi dicentis, *Non bibam amodo de hoc genimine vitis*: ergo erat vinum. Respondeo

1. Christum accepisse duabus vicibus calicem, secundum dictum Lucæ cap. 22. Primò, accepit calicem in cœnâ communi, & pro tunc dixit, *non bibam amodò*, &c. secundò, accepit calicem quem consecravit, & pro tunc non protulit illa verba. Quod si ex Matthæo, Christus dixerit hæc verba, dum protulit calicem quem prætendimus consecratum; hoc est quia iste Evangelista non exprimit diffusè ea quæ fecit Christus. Respondeo secundò; vocare potuit Christus suum sanguinem, genimen vitis seu vinum. Primò, quia ex vino factus est. Secundò, quia accidentia vini in illo remanserunt. Quod si Christus dixerit Lucæ 22. *Hoc facite in meam commemorationem*, hoc non debet intelligi quasi Eucharistia sit memoria Christi absentis, sed quia est repetitio ejusdem sacrificii incruenti quod fecit Christus.

OBJ. 6. ex Tertull. lib. 1. contra Marcionem. *Christum representare in pane corpus suum*, & alibi, *nobis dedisse figuram Corporis sui*, & alios Patres idem sentientes. Resp. Christum representare corpus, id est, præsens exhibere, sicut dicitur quòd Pater in Thabor filium representaverit; quòd si vocent figuram corporis; hoc est, figuram plenam figurato; nam aliquando stat veritas cum figurâ, ut ad Hebræos 1. *Christus dicitur figura substantia Patris*, licet Christus esset ipsamet substantia Patris. Si dicat Aug. tract. 25. in Joann. *Quid paras dentes & ventrem i crede & manducaſti*; Respondendum est, quòd Augustinus per primam partem suæ propositionis, voluerit refutare cruentam manducationem Capharnaïtarum, docens cor-

pus Christi non atteri dentibus: Per secundam verò insinuavit, fidem esse necessariam ad effectum hujus Sacramenti. Quod autem Augustinus, super quem male interpretatum fundantur hæretici, non excludat realitatem, patet, in Psalmum enim 98. habet, *Christus ipsam carnem manducandam nobis ad salutem dedit.* Et concione 1. super Psal. 33. *Ferebatur, inquit, manibus suis, quando ait: Accipite, hoc est corpus meum;* quòd si autem Patres obscurè locuti fuerunt in hac materia, hoc consultò fecerunt, ne proderent arcana nostræ religionis infidelibus, qui ad eorum cognitionem non erant idonei; unde Theodorerus dialogo 1. dicit, non esse consentaneum loqui apertè, nam hic fortè sunt aliqui infideles qui forsitan illos vocassent infanticidas & idololatrias, colentes Bacchum & sanguinem.

QUESTIO X.

An corpus Christi sit in Sacramento per impanationem, annihilationem, aut transubstantiationem?

LUTHERUS primum asseruit, ut diximus, Durandus putavit formam substantialem panis conversam esse in formam substantialem corporis Christi, remansisse tamen materiam, sicut in conversionibus communibus fit. Alii tenuerunt, non remanere materiam aut formam panis, sed totum panem annihilari, & postea produci totum corpus Christi, ita quod essent

duæ actiones. Alii tandem transsubstantiationem admittunt, dicentes panem non annihilari, sed totum converti in corpus Christi: hoc aperietur in sequentibus conclusionibus.

CONCLUSIO PRIMA.

CORPUS Christi non est in Eucharistia per impanationem, quia nec totus panis remanet, ut vult Lutherus, nec materia prima panis, ut vult Durandus. Ratio nostra contra primum petitur ex verbis Christi dicentis, *Hoc est corpus meum*; si enim ibi esset panis, falsò diceret, *Hoc est corpus meum*; panis enim non est corpus Christi, nec corpus Christi est panis; deinde si esset substantia panis in Eucharistia; homo post sumptionem non esset jejunus. Ratio contra Durandum sumitur ex Concilio Tridentino sessionis 13. can. 2. ubi habetur, *Si quis dixerit in Sacramento Eucharistia substantiam panis & vini remanere, negaveritque mirabilem illam conversionem totius substantia panis & vini in corpus & sanguinem Christi remanentibus dumtaxat speciebus panis & vini, Anathema sit.* Quoniam ergo species panis & vini remanent, nec panis nec materia ejus supersunt. Quòd si Eucharistia dicatur panis apud Paulum, *Quotiescumque manducabitis panem hunc, &c.* Dicitur primò panis transitive idest, id quod antea erat panis. Secundò dicitur panis extrinsecè, quia remanent accidentia panis. Tertiò dicitur panis analogicè, quia sicut panis nutrit corpus, sic Eucharistia nutrit animam. Quòd si Gelasius Papa dicat manere naturam panis, idest, proprietates, quæ vocantur natura, sicut illi qui agunt de proprietatibus plantarum, dicuntur

agere de plantarum natura. Si Chrysostomus dicat, in hac conversione sunt quæ erant; hoc est, quoad speciem externam, non quoad substantiam. Si Durandus dicat, in omni mutatione manere subiectum commune; idest, materiam; hoc verum est in mutatione naturali. Si dicat Damascenus lib. 4. de fide cap. 4. mutari panem in carnem, sicut in nutritione hominis, ubi remanet materia; hoc dicit analogice, ut ostendat esse mutationem realem, non tamen est omnimoda similitudo, ibi enim est transformatio, & hîc est transsubstantiatio.

CONCLUSIO SECUNDA.

CORPUS Christi non est in Eucharistia per annihilationem panis, sed per transsubstantiationem. Ratio primi est, quia essent duæ actiones, per quarum primam annihilaretur panis, & per secundam produceretur corpus, communiter tamen assignant Catholici unam tantum, quam transsubstantiationem vocamus. Deinde, terminus ad quem annihilationis est purum nihil, & in consecratione terminus ad quem, est corpus Christi in quod panis convertitur. Tandem, si panis non mutaretur totaliter in corpus Christi, non esset vera transsubstantiatio. Non tamen negamus, quin in transsubstantiatione virtualiter includatur desinitio unius, nempe panis, & positio alterius, nempe corporis Christi; sed quia productio corporis Christi fit ex pane, ideò non est propriè creatio, quæ debet ex nihilo fieri; & quia etiam destructio panis non terminatur ad purum nihil, sed ad corpus Christi, ideò non est formalis annihilatio. Ratio secundi sumitur ex

dictis, quia si corpus Christi non sit in Eucharistia per impanationem, nec per annihilationem & creationem, superest illud ibi esse per transubstantiationem, ut habet Concilium Tridentinum, sess. 13. can. 2. Sic & antiqui patres docentes, substantiam panis & vini converti in corpus & sanguinem Christi, remanentibus solis speciebus. Quod si illi Patres non usantur explicitè hoc nomine transubstantiationis, utuntur tamen significatione nominis, dicentes, solas species panis & vini remanere; si enim solæ species remaneant, nihil remanet de substantia panis, quando autem tota substantia unius in totam substantiam alterius mutatur, hæc conversio jure vocatur transubstantiatio.

Q U A S T I O X I.

Quæ sint in Eucharistia vi verborum, & quæ per concomitantiam?

DE fide est, Christum esse in Sacramento Eucharistiæ, & consequenter sunt in eo corpus ejus, anima, sanguis, & divinitas; postquam enim resurrexit, jam non moritur: cum sit ergo vivus in Eucharistia, debet habere animam, sanguinem & corpus; corpus autem, sanguis, & anima, non sunt sine divinitate, quod semel enim assumpsit Verbum divinum, nunquam dimisit: sed quærimus, quænam sint præcisè tum sub specie panis, tum sub specie vini, vi verborum, & quæ per concomitantiam.

CONCLUSIO.

SUB specie panis vi verborum est solum corpus Christi, & sub specie vini solus sanguis; per concomitantiam verò sub specie panis est sanguis, & sub specie vini est corpus, & sub utraque specie est anima & divinitas. Sic Concilium Trid. sess. 13. cap. 3. *Statim inquit, post consecrationem Domini nostri corpus, ejusque sanguinem, sub panis & vini specie, unà cum ipsius anima & divinitate existere, docet fides Catholica, sed corpus sub specie panis, & sanguinem sub specie vini ex vi verborum: ipsum autem corpus sub specie vini, & sanguinem sub specie panis, animamque sub utraque, ut naturalis illius connexionis & concomitantia, quâ partes Christi Domini, qui jam resurrexit non amplius moriturus, inter se copulantur: divinitatem porro, propter admirabilem illam ejus cum corpore & anima unionem hypostaticam.* Posita hac determinatione, nulla requiritur ratio probativa nostræ conclusionis, quia Catholici non possunt repugnare Concilio, & hæretici non disputant de hac veritate, non credentes ipsum Christum esse præsentem in Eucharistia; posset tamen hæc assignari ratio, quòd scilicet verba ex propria sua virtute faciunt tantum id quod significant; sed verba quæ proferuntur super panem, significant tantum præsentiam corporis Christi, & verba prolata super vinum, denotant tantum præsentiam sanguinis: ergo hoc tantum efficiunt, & sic ex vi verborum est solum corpus sub specie panis, & solus sanguis sub specie vini; unde si Apostoli consecrassent in triduo, sanguis & anima Christi, non fuissent sub hostia, licet fuisset

divinitas quæ non dimisit corpus in sepulchro, nec animam in lyngo. Deinde, si ex vi verborum sanguis esset cum corpore, Christus non esset in Sacramento ut immolatus; ideo enim in Eucharistia est sacrificium, quia mysticè separantur corpus & sanguis Christi, vi verborum scilicet; talis tamen separatio, quæ fit vi verborum, non impedit quin hæc omnia sint simul, corpus, sanguis, anima & divinitas, quia est idem Christus in Sacramento ac in cœlo.

OBJ. Anima est forma corporis: ergo si corpus sit sub specie panis vi verborum, anima etiam erit. Respondeo, animam non esse formam corporis, sed esse formam hominis; sine anima enim corpus habet formam corporeitatis, quæ ponitur revera in Sacramento vi verborum cum organis; suis corporalibus; unde corpus Christi in Eucharistia est organicum, non tamen Christus est organicè in Sacramento: est inquam organicum, quia habet omnia organa quæ habet in cœlo; non est tamen organicè, quia non potest uti organis suis; non est enim extensum extrinsecè. Dices, Sanguis requiritur ad rationem corporis: ergo vi verborum, ubi est corpus, ibi est sanguis. Respondeo, distinguendo; est de ratione corporis vivi, conc. immolati, neg. In Sacramento autem est ut immolatum, unde nec sanguis est illi; necessarius, nec alii humores. Dices, ergo corpus Christi est bis in Eucharistia scilicet vi verborum sub specie panis, & per concomitantiam sub specie vini. Respondeo esse bis, sed diverso modo.

QUÆSTIO XII.

*An Christus sit in singulis partibus hostiæ ante
divisionem?*

CONSTAT, Christum esse sub singulis partibus hostiæ post divisionem ejus : quantumcumque enim dividatur hostia, modò partes sint sensibiles, manet semper Christi corpus totum sub qualibet : an autem sit etiam in illis partibus singulis ante divisionem, quæritur.

CONCLUSIO.

CORPUS Christi est totum sub qualibet parte ante divisionem, quia si esset una pars corporis in una parte hostiæ & alia pars in altera parte, frangeretur corpus ad fractionem hostiæ. Deinde ex hoc sequeretur, quòd esset commensurativè in hostia, quia una pars responderet uni parti hostiæ, & altera alteri, & tunc esset major in magna hostia, & minor in parva. Tandem, corpus Christi est totum in qualibet parte hostiæ post divisionem : ergo & ante ; quia non possunt esse plures præsentia corporis Christi, nisi sint plures prolationes verborum super plures materias ; nec est eadem ratio de specie reflectente in speculo, quæ est tota in toto & tota in qualibet parte post divisionem, non ante ; quia multiplicatio faciei procedit ex reflectione specierum in corpore lucido, unde quia ante divisionem erat tantum unum corpus lucidum continuum, erat tantum una reflexio ; postquam autem separatum est.

speculum, corpus tot producit reflexiones, quot sunt corpora lucida: in proposito autem nulla est productio de novo, quando hostia est divisa in partes: quoniam ergo videtur quòd corpus Christi sit totum sub qualibet parte post divisionem hostiæ, debuit esse totum sub qualibet parte ante divisionem, aliàs essent plures præsentialitates corporis Christi, novæ sine nova prolatione verborum.

O B J E C T. Si corpus Christi ante divisionem hostiæ, sit in qualibet parte totum: ergo est multoties in hostia. Respondeo, negando consequentiam, quia numerus non resultat nisi post divisionem; non enim anima est pluries in corpore, licet sit tota in toto & tota in qualibet parte: dicendum ergo est sic de Christo, quòd sit tantum semel in hostia; est enim in Eucharistia ad modum substantiæ spiritualis, quoniam denudatur omni quantitate externa.

Q U A E S T I O X I I I.

Utrum corpus Christi habeat suam quantitatem in Eucharistia?

CORPUS Christi non existit sub Sacramento circumscriptivè; quia præsentia circumscriptiva est quando una pars loci respondet uni parti loci, & alia alteri; licet possit dici esse circumscriptivè, ratione specierum quæ sunt in loco circumscriptivè. Non est etiam definitivè in Eucharistia, quia quod est definitivè in uno loco, non est in alio; sed di-

citur esse sacramentaliter, id est modo quodam admirabili & ineffabili per modum substantiæ spiritualis, quoniam est totum sub tota hostia, & totum sub qualibet parte; ita tamen ut sit actualiter in pluribus aliis locis eodem modo; An habeat autem quantitatem in Eucharistia, antequam solvatur, sciendum est esse duplicem quantitatem; internam nimirum & externam; prima distinguit partes à partibus in ordine ad se, easque ordinat, ita ut non confundantur; secunda verò extendit substantiam & ejus partes in ordine ad locum, ita ut una pars respondeat uni parti loci, & alia alteri.

CONCLUSIO.

CHRIStus non habet in Sacramento quantitatem externam, bene autem internam; non enim est extensum corpus Christi in ordine ad locum, quasi una pars ipsius corporis correspondeat uni parti hostiæ, aliàs non esset totum sub qualibet parte, ut diximus, & sic non habet quantitatem externam: habet tamen internam, in quantum corpus Christi est animatum & organicum & proinde in certa quantitate, saltem intrinseca, in quantum partes ejus non confunduntur, sed distinguuntur; caput enim non est humerus, nec humeri brachia, sicut nec brachia pedes; licet ubi sit unum, ibi sit aliud: Alii hanc veritatem explicant, dicentes, Christum habere quantitatem in Eucharistia, non modum quantitativum, intelligentes per quantitatem, extensionem partium in ordine ad se; & per modum quantitativum, extensionem in ordine ad locum.

O B. J. C. Si Christus habet aliquam quan-

ritatem, erunt duæ quantitates simul, quia species sub quibus est corpus Christi, habent suam propriam quantitatem. Respondeo duas quantitates posse simul esse, quando una est interna, & alia externa, ut in proposito: & exemplum habetur de hac penetratione dimensionum, seu quantitatum, quando corpus Christi exivit de sepulchro; erat enim quantitas lapidis penetrati cum quantitate corporis Christi penetrantis.

QUESTIO XIV.

Quanam prædicata verificentur de Christo in Eucharistia?

QUÆDAM sunt prædicata quæ concernunt motum & existentiam, ut esse sursum, deorsum, in sacrario, &c. Alia sunt prædicata, quæ sunt propria & absoluta specierum, ut esse albas, rotundas, &c. Alia tandem quæ ostendunt actionem & passionem, ut v. g. generare vermes, & lacerari. Quanam debeant dici de Christo vel de corpore Christi, assignabit

CONCLUSIO.

IN prædicatis quæ concernunt existentiam & motum specierum, quæ dicuntur de speciebus, dicuntur de corpore Christi; & sic, sicut species dicuntur esse in sacrario, sursum, deorsum, deferri ad infirmum, ore sumi, trahi ad stomachum, hæc omnia dicuntur de

Christo & de corpore ejus : quia moto continente, movetur contentum , moto dolio movetur vinum. Prædicata quæ sunt propria & absoluta speciebus , licet competant illis , non tamen affirmantur de corpore Christi; unde quoniam albedo , rotunditas , sapor sunt veluti qualitates absolutæ specierum , quæ conveniunt illis, ideò dicuntur albæ , rotundæ , & sapidæ ; non tamen conveniunt corpori Christi , quod non debet vocari , nec rotundum , nec album , nec sapidum. Prædicata quæ important actionem aut passionem , conveniunt speciebus , non corpori Christi ; & sic licet species dicantur generare vermes , & atteri dentibus & lacerari , hoc non debet dici de corpore Christi. Ad tales enim actiones & passionem requiritur extensio localis , quam non habet corpus Christi : potest tamen improprie & per denominationem extrinsecam dici quod corpus Christi frangatur ; sic in sacrificio Missæ celebrato ritu D. Ambrosii , Sacerdos dicit ad Christum , *Corpus tuum frangitur !* *ô Christe !* Si quis quærat rationem , quare species possunt dici rotundæ , & non corpus Christi ; est , quia istæ locutiones & ista prædicata non supponunt pro contento sub speciebus , sed tantum pro ipsa quantitate panis, quæ est subjectum accidentium ,



QUÆSTIO XV.

*Virum corpus Christi dicatur agere, pati,
& moveri?*

OMNIS actio vel est sensitiva, ut est visio, auditio, &c. vel spiritalis, ut intellectio & volitio. Quærimus, utrum tales actiones possit elicere Christus; & insuper, utrum possit esse subjectum aliquarum actionum nostrarum: v. g. videri, aut tangi, & consequenter pati. Quærimus denique, an corpus Christi possit de loco in locum moveri.

CONCLUSIO PRIMA.

ACTIONES intellectivas potest elicere Christus, ut est in Sacramento; non verò sensitivas, nisi de potentia Dei absoluta. Ratio primi est, quia anima Christi intelligit sicut Angelus, independenter à sensibus; talis enim dependentia tollitur in beatis; unde licet Christus in Eucharistia sit modo inextenso, potest elicere actiones vitales spirituales. Ratio secundi est, quia sensus externi agunt per species, quæ sunt materiales & quantæ, & sic debent recipi in organo quanto & divisibili, sicut autem corpus Christi non est extensum in Eucharistia, sic per organa habet extensa: ergo nec videre, nec audire potest, ut est in Sacramento; licet Christus in Sacramento videat per operationem quam habet in cœlo, quoniam est unum & idem corpus numero in cœlo ac in Sacramento; & hoc est quod dicunt com-

muniter authores, Christum operari per concomitantiam in Sacramento. Ratio tertii est, quia nulla est contradictio, quin per absolutam Dei potentiam possit Deus imprimere species objectorum spoliatas sua quantitate externa in organa inextensa Christi.

CONCLUSIO SECUNDA.

CORPUS Christi, ut est in Sacramento, non potest alterari ab agentibus naturalibus, nec videri ab oculo corporeo, nec intelligi cognitione naturali. Primum dicitur, quia alteratio requirit contactum corporeum & quantitativum; sed corpus Christi non potest tangi per modum quantitativum, quandoquidem est inextensum: ergo nec alterari. Secundum asseritur propter eandem rationem, quia oculus corporeus tendit tantum in res quæ divisibili modo existunt. Tertium tandem affirmatur eodem argumento, quia cognitio naturalis ortum habet à sensibus: si ergo corpus Christi non potest percipi sensu corporeo, nec consequenter poterit cognosci naturaliter. Super visionem Christi in Eucharistia, D. Thomas asserit, quando apparet visibiliter, miraculosè tamen, figura Christi, Christum non videri in se, nec ejus sanguinem aut carnem, sed tantum colorem & figuram ipsum referentem, & quod pro tunc non sunt consumendæ species illæ, sed servandæ in loco decenti, & novus panis iterum consecrandus est, ut perficiatur sacrificium.

CORPUS Christi movetur quidem ad motum specierum, non tamen à Sacerdote, quasi Sacerdos movens species, moveat & corpus; sed movetur à Deo, qui statuit, quòd quotiescumque moverentur species, ipse moveret corpus; & hoc per idem miraculum continuarum, quo univit corpus Christi cum speciebus ex suâ solâ voluntate; sic Scotus, cujus ratio hæc est: Quando aliqua duo conjunguntur tantùm contingenter per voluntatem superioris, si unum illorum sit proportionatum volenti, & aliud improporcionatum, movens movendo proportionatum, non propter hoc movet aliud per accidens, sed est ipsum superius, quod univit cum alio quod etiam movet aliud, scilicet improporcionatum, ad motum proportionati; sed corpus Christi unitur contingenter cum speciebus per voluntatem Dei tanquam superioris, & corpus illud est improporcionatum illi qui movet species, quandoquidem est inextensum: ergo quando sacerdos movet species; non est ipse qui movet corpus, sed est Deus qui movet illud. Exemplificat Scotus de Angelo, qui vult se unire lapidi per voluntatem, qui fert illud lapidem, non fert Angelum, sed est ipse Angelus qui se movet ad motum lapidis.

O B J E C T. Moto aliquo, movetur per accidens quod est in illo: ergo Sacerdos movens species movet per accidens corpus Christi. Antecedens est verum, quando contentum est in continente, vel ut forma, vel ut pars, vel est

necessariò conjunctum illi, aut contingenter per voluntatem alterius, non verò per suam propriam voluntatem: Christus autem est conjunctus speciebus per voluntatem suam, & Dei concurrentis cum illo; unde si moveatur, non movetur per accidens à sacerdote.

Dices, homo in navi est conjunctus navi per voluntatem, attamen navis movet illum per accidens: ergo, &c. Respondeo, hoc esse verum, quia virtus fluctuum maris movens navim, posset hominem seorsim movere, & sic movet hominem per accidens; sacerdos verò non posset seorsim movere corpus Christi, quia est inextensum: deinde corpus Christi non est sub speciebus tanquam in continente; est enim æqualiter in superficie specierum ac in profunditate, & hoc solvit utramque objectionem.

Dices, Movetur anima ad motum corporis, licet si improporcionata moventi. Respondeo, hoc fieri quia facit unum per se cum illo; corpus autem & species non faciunt unum physicum, sed tantum unum morale: unde non debet unquam dici quòd corpus moveatur à Sacerdote, quia motio corporis fit per membra organica quæ habent extensionem.



Q U A S T I O X V I .

An accidentia sint sine subjecto in Eucharistia?

DUPLEX est subjectum accidentium, mediatum scilicet & immediatum: Mediatum est substantia cui inhæret tota collectio accidentium; substantia enim dicitur, & à subsistendo per se, & à sustentando accidentia. Immediatum verò est quantitas, cui insunt alia accidentia; calor enim, sapor, odor, & rotunditas insunt quantitati.

C O N C L U S I O .

ACCIDENTIA in Eucharistiâ sunt sine subjecto mediato, non verò omnia sunt sine immediato. Primum patet; quia nulla substantia ibi est subjectum accidentium; non remanet enim substantia panis in qua sint; nec etiam corpus Christi est subjectum illorum, quoniam non est modo divisibili & quantitati in Eucharistiâ: ergo accidentia non habent subjectum mediatum: Secundum dicitur, quia omnia accidentia inhærent quantitati, tanquam subjecto immediato, & ipsa quantitas est sine ullo subjecto.

OBJEC. Non possunt accidentia esse sine substantiâ: ergo non sunt sine subjecto in Eucharistiâ. Nego antecedens; quia accidentia habent aliquam entitatem absolutam distinctam ab entitate substantiæ, quam Deus potest conservare sine entitate subjecti, & de facto conservat, non eodem concursu quo conservabat

illa accidentia in subiecto, quia illud est naturale; sed alio quod est supernaturale & omnino miraculosum: & ex his patet inhærentiam saltem actualem non esse de essentia accidentis.

QUESTIO XVII.

Quamdiu maneat corpus Christi sub speciebus?

INCIPIT reverà esse sub illis eo instanti quo completur prolatio verborum, quia tunc est sub speciebus, quando verba significant ibi esse corpus Christi, quoniam verba efficiunt id quod significant: quærimus autem quamdiu duret in illis.

CONCLUSIO.

TAM DIU conservatur corpus Christi sub speciebus, quamdiu conservaretur substantia panis, si ibi adesset; quia Christus ex institutione Sacramenti succedit in locum panis: sicut ergo per quamlibet alterationem specierum non desinit corpus, nisi per eam tantum, per quam desineret panis; non etiam desinit eo ipso quo in os recipitur, aut in ventrem trajicitur, quia non ita statim desineret substantia panis; desinit autem, quando ex ipsis speciebus generantur vermes. Quod si una pars specierum corrumpatur quibus vermes succedant, & alia pars specierum remaneat; desinit corpus Christi sub illis accidentibus, non verò sub istis quæ remanserunt. Quid autem fiat si vinum consecratum misceatur cum

non consecrato? Respondent Doctores, quòd si misceatur cum vino ejusdem speciei, tandiu remaneat sanguis, quamdiu remanet illud vinum, ita quòd, si una gutta consecrati misceatur cum magna quantitate non consecrati, manebit sanguis Christi sub accidentibus illius guttæ; quia si in illa gutta esset substantia vini, non destrueretur illa gutta per magnam quantitatem ejusdem vini, quoniam corruptio fit tantum à contrario. Unde major pars Doctorum dicit, quòd illa quantitas vini, cui admixta est gutta consecrata, debeat conservari ad pios usus, ob reverentiam debitam speciebus consecratis; licet aliqui dicant posse administrari laïcis, quia illa gutta habetur pro amissâ, cum ignoretur quænam illa sit. Quòd si illa gutta vini consecrati misceatur cum alio vino alterius speciei, verbi gratia cum vino albo, quòd à multis censetur esse diversum specie à rubeo, dicunt quòd desineret esse sanguis Christi eo instanti quo desinerent esse species vini rubei, & ex illis fieret vinum album. Porro, an in illo casu debeat dici, quòd sanguis Christi admisceatur cum vino: respondetur negativè; quia licet species vini consecrati misceantur cum vino non consecrato, substantia tamen sanguinis non miscetur, quia ea tantum misceri dicuntur, quorum extremitates conjunguntur; conjunctio autem fit tantum inter res quæ habent extensionem localem: cum ergo sanguis sit inextensus, non potest dici quòd misceatur cum vino.

 QUÆSTIO XVIII.

Quomodo ex Speciebus generetur aliquid ?

SPECIES Sacramentales possunt nutrire , ut docet experientia : ex illis ergo potest produci sanguis , cum nutritio nihil sit aliud quàm conversio alimenti in sanguinem , & sanguinis in substantiam aliti : ex speciebus etiam alteratis & corruptis generantur vermes ; & sic quærimus , quomodo hoc possit fieri , quia omnis generatio præsupponit materiam in qua forma substantialis rei genitæ recipiatur , ibi autem nulla est materia.

CONCLUSIO.

QUANDO ex speciebus producitur substantia , hoc fit ab agente supernaturali , scilicet à Deo , qui eodem instanti quo species ita sunt alteratæ , ut non posset naturaliter sub eis conservari panis substantia , si esset ; & consequenter quo desinit esse corpus Christi , ibi creat materiam , eique unit quantitatem panis & vini , & alias qualitates quæ inhærent illi pro eo instanti quo materia illa jam est ultimò disposita ad susceptionem illius formæ substantialis , quam Deus producit , & quam produxisset panis corruptus , si priùs fuisset. An autem creetur eadem materia panis quæ antea fuit deperdita in consecratione , an alia de novo producat ? utrumque potest fieri.

Quæres , quænam sit unio inter species sacramentales , & ipsum Christum. Respondeo ;

non uniri unione substantiali, quia hæc reperitur tantum inter substantias, & hinc uniuntur accidentia: Non uniuntur etiam unione accidentali, quia accidentia panis non afficiunt corpus Christi: Non uniuntur unione sustentantis ad sustentatum, quia non corpus Christi, sed Deus sustentat illa accidentia: sed uniuntur tantum unione extrinsecâ procedente ex divina voluntate, quæ ordinavit ut esset corpus Christi, ubi essent species sacramentales.

QUESTIO XIX.

Quosnam effectus producat Eucharistia?

FORMA Sacramenti Eucharistiæ producit præsentiam corporis Christi; verba enim prolata à Sacerdote faciunt Christum præsentem in altari; sed non loquimur de eo effectu formæ; bene autem de effectu producto per species consecratas. Prænotandum tamen est, Christum in Eucharistia tribus modis posse sumi: Primò; sacramentaliter tantum, seu materialiter, ut quando quis peccati conscius Eucharistiam sumit: Secundò, spiritualiter tantum, quomodo dicuntur sumere Christum illi, qui per affectum Christo uniuntur, & actu ipsum suscipere cupiunt: Terriò, sumitur materialiter simul & spiritualiter, quando quis cum dispositione præviâ recipit Sacramentum, & rem seu effectum Sacramenti. Hinc ergo loquimur de effectu, qui producitur per Eucharistiam tertio modo susceptam.

EUCHARISTIA non confert per se primam gratiam, potest tamen conferre per accidens; sed per se confert augmentum gratiæ. Tres sunt partes, quarum probatur prima, quia sumptio Eucharistiæ supponit hominem in gratia, unde vocatur sacramentum vivorum: deinde est cibus & alimentum animæ, cibus verò non dat vitam, sed illam conservat & fortiter reddit; & hoc quadrat divo Paulo dicenti primæ ad Corinth. 11. *Probet autem seipsum homo, &c.* idest tollat peccatum, nè sit reus corporis & sanguinis Domini: si ergo tollat peccatum, antè sumptionem Eucharistiæ, gratia præcedit: ergo illam non confert per se. Secunda pars est omnium Doctorum existimantium, quòd ille qui bona fide se existimat contritum, & est tantum attritus, vi Sacramenti Eucharistiæ remittatur illi peccatum; quia Sacramenta conferunt gratiam ex opere operato, ergo illam producant, ubi non ponitur obex, sed qui credit se esse contritum, vel attritum, & bene absolutum, & tamen non est contritus, nec bene absolutus, defectu jurisdictionis & intentionis ministri, non ponit obicem: ergo illi confertur prima gratia, & tollitur ab eo peccatum mortale, per receptionem Eucharistiæ, per quam fit de attrito contritus. Quoad tertiam partem, constat; quia Eucharistia sumitur per modum cibi, juxta Joannem dicentem, *Caro mea verè est cibus, &c.* cibus autem conservat vitam corporalem & corroborat: ergo & Eucharistia vitam spiritualem gratiæ. Sic Concilium Tridentinum

& omnes Doctores , asserentes Sacramenta mortuorum conferre gratiam ipsam. Quòd si Eucharistia dicatur delere peccata , ut habetur in consecratione calicis , *effundetur in remissionem peccatorum* : hoc intelligitur de cruentâ effusione sanguinis Christi.

CONCLUSIO SECUNDA.

EUCHARISTIA delet peccata venialia , aliquam pœnam peccati tollit & gratiam Sacramentalem seu actualem confert. Sunt adhuc tres partes. Ratio primæ est , quia Eucharistia excitat nos ad actus Charitatis , & per tales actus Charitatis delentur peccata venialia ; & sic illa tollit , mediatè saltem : Aliqui insuper Theologi addunt quòd tollat peccata venialia immediatè ex opere operato. Pro secundâ parte , diximus quòd tollat aliquam pœnam peccati , quod potest intelligi dupliciter : Si enim Eucharistia sumatur pro sacrificio expiatorio , tollit ex opere operato pœnam debitam peccatis , & tantam tollit , quantam vult Deus , vel Ecclesia quæ applicat sacrificium ; si verò sumatur ut Sacramentum , non aufert pœnam ex opere operato , sed ex opere operantis , juxta valorem actuum amoris & charitatis quos in nobis excitat ; non remittit tamen totam aliquando , aliàs non esset injungenda pœnitentia illis qui recipiunt Eucharistiam , sicut nec injungitur adultis baptisatis ; nec etiam concedendæ essent indulgentiæ , ad relaxandas pœnas illorum qui communicant. Tandem pro tertia parte diximus quòd Eucharistia conferat gratiam Sacramentalem ; hoc est enim commune omnibus Sacramentis , &

H iiii

conforme Concilio Tridentino , dicenti *ea conferre auxilia ad vitanda peccata & tentationes superandas.*

Q U Æ S T I O X X .

Quandonam Eucharistia producat suos effectus.

EX dictis patet , quòd Eucharistia plurimos effectus conferat ; in quo autem tempore conferuntur ? an illo in quo hostia ab ore trajicitur in stomachum ? an in illo quo species manent in stomacho ? an denique post consummationem specierum ?

C O N C L U S I O .

EUCHARISTIA confert effectum , non quando recipitur in ore , sed quando trajicitur in stomachum ; facta enim est promissio gratiæ , manducantibus , *Nisi manducaveritis carnem filii hominis , non habebitis vitam in vobis.* Manducatio autem non sit quando recipitur , vel retinetur alimentum in ore , nec quando alimentum est concoctum & digestum , sed quando defertur cibis in stomachum , ergo gratia communicatur in manducatione ; in manducatione inquam primâ , quando scilicet prima pars hostiæ ; vel una species deglutita est ; in eâ enim totus Christus residet. Ex quibus sequitur , quòd qui tam diu retinent hostiam in ore , ut corrumpantur species antequam deglutiantur , non recipiant fructum Eucharistiæ ; nam gratia datur man-

ducanti Sacramentum; non manducatur autem Sacramentum, quando non trajiciuntur species in stomachum: ergo gratia non confertur. Quamdiu species manent in stomacho, non confertur major gratia ex opere operato, etiamsi crescat dispositio & fervor subjecti; gratia enim confertur ex opere operato manducanti: potest tamen conferri ex opere operantis, in quantum per illud opus elicited in gratia meretur augmentum gratia. An autem qui sumpsit Eucharistiam in peccato, & conteritur antequam species sint digesta in stomacho, recipiat gratiam virtute Sacramenti; videtur quod non, quia per solam manducationem confertur. An tandem qui manducando aliquam partem hostia est in peccato, & antequam alias partes, vel aliam speciem degluciat, producit actum contritionis, recipiat gratiam ex vi Sacramenti, controvertitur inter Doctores; negat enim Bonacina, quia totus, inquit, effectus Sacramenti producit per sumptionem primae partis: alii contrarium tenent, & in majori numero, sicut & conferri majorem gratiam, quando post sumptionem unius speciei magis disponitur subjectum, ante sumptionem alterius: sic Caecitanus, Suares, Soto, Reginaldus & ceteri.



 QUESTIO XXI.

Quanam dispositio requiritur in suspiciente ?

AD hoc ut suscipiatur effectus hujus Sacramenti tres in communi dispositiones requiruntur ; prima ut suscipiens sit baptisatus , quia Baptismus est janua Sacramentorum ; secunda ut habeat intentionem recipiendi illud ; tertia ut non sit conscius peccati mortalis , hoc enim Sacramentum vocatur Sacramentum vivorum.

CONCLUSIO.

NON sufficit contritio de peccato antequam aliquis sumat Eucharistiam , sed debet ex præcepto Ecclesiæ præmittere confessionem , si adsit copia Confessarii ; & hoc est conforme Concil. Trident. sess. 13. cap. 7. imò docent Patres apud Suarem , hoc præceptum esse divinum , latum scilicet à Christo , dicente apud D. Paulum , *Probet autem seipsum homo*. Quòd si copia Confessarii desit , debet præmitti contritionis actus cum proposito confitendi in primâ occasione , & ille qui communicat tantum cum attritione cognitâ , peccat mortaliter ; ponit enim obicem gratiæ conferendæ per Eucharistiam : qui verò Eucharistiam sumit cum contritione tantum existimatâ , vel cum attritione quam ex ignorantia invincibili sufficere putat , recipit effectum Sa-

cramenti, quia bona fides excusat à peccato, & sic non ponit obicem; quia autem cum illâ contritione vera vel existimata, debet includi votum de confessione faciendâ in primâ occasione, reverà debet illud votum impleri; hoc enim habet expressè Concilium Trident. dicens, *Quòd si sacerdos absque praviâ confessione, necessitate urgente, celebraverit; quamprimum confiteatur.* Porro, qui sumit Eucharistiam, debet esse jejunos, nedum jejunio Ecclesiastico, quod consistit in unica comestione; sed & naturali, consistente in abstinentiâ à quocumque cibo à media nocte: Ratio hujus est, quia corpus & sanguis Christi debent esse primus fidelium cibus, idèò nullus cibus ante eum debet sumi, neque per modum alimenti, neque medicamenti. Quomodo autem frangatur jejunium, vel non frangatur, docetur potius ex usu, quàm ex scientiâ. Illud autem præceptum est Ecclesiasticum, non Divinum; ut patet ex Christo qui communicavit post coenam, & ex primitivâ Ecclesiâ, ubi aliquando sumpta fuit Eucharistia feria 5. in Coena Domini post coenam; ad repræsentationem Coenæ Dominicæ, quod postea tamen revocatum est in Concilio Toletano. Quia antea diximus, neminem peccati mortalis conscium posse sumere Eucharistiam; ideo deneganda est Communio peccatori publico eam petenti.

QUESTIO XXII.

Quis sit minister Eucharistiæ?

IN aliis Sacramentis confectio & administratio Sacramenti ad eundem pertinent; qui conficit enim Sacramentum, dicitur minister ejus: respectu autem Eucharistiæ alius potest esse minister conficiens, alius distribuens.

CONCLUSIO PRIMA.

SOLUS Sacerdos potest conficere Eucharistiam, solis enim Sacerdotibus dixit Christus, *Hoc facite*, per quod declarati sunt Sacerdotes; unde Angelus non potest conficere, nisi ex speciali dispensatione divina: sicut autem solus Sacerdos potest conficere Eucharistiam, sic etiam omnis potest, siue sit excommunicatus, degradatus, & hæreticus; habet enim semper ordinem Sacerdotalem, & consequenter potestatem supra corpus Christi reale, quam accipit in susceptione Ordinis. Quod si jus canonicum dicat consecrationes hæreticorum esse irritas: idest, quod prohibeatur ab illis recipere Eucharistiam: deinde sunt irritæ, quando pravam habent intentionem. Quia autem diximus, quod quilibet Sacerdos possit Eucharistiam conficere; hoc Sacramentum potest confici à pluribus simul, si eodem instanti verba proferant: si autem non proferant simul; qui primus profert, conficit Sacramentum. Qui autem profert verba cum alio Sacerdote, v. g. Ordinarij cum Episcopo, isti debent

habere intentionem consecrandi, non absolutam, sed conditionatam; supposito scilicet, quod simul cum Episcopo verba proferant, quia si haberent absolutam intentionem consecrandi, & Episcopus primò absolveret verba; tunc Ordinati proferrent verba super materiam consecratam, quod est sacrilegium: si verò priùs absolverent verba, Episcopus non consecraret, & sic non sacrificaret; licet Caëtanus alio modo respondeat, quòd Ordinati non proferant verba formaliter cum intentione consecrandi; sed tantùm materialiter, ut instruantur quòd potestatem hoc faciendi receperint.

CONCLUSIO SECUNDA.

SOLUS Sacerdos est ordinarius minister Circa distributionem hujus Sacramenti; ut autem possit licirè ministrare illud, debet habere jurisdictionem. Primum patet ex communi lege Ecclesiæ, quæ statuit ut solus Sacerdos ministret Eucharistiam: potest tamen hæc distributio committi Diacono in necessitate, unde reverà Diaconi antiquitùs ministrabant, quod non est nunc in usu, ob copiam Sacerdotum: an autem hoc licitum sit aliis à Diacono, aliqui credunt laicum in mortis articulo in necessitate expositum, posse à se ipso sumere Eucharistiam, aut alteri ministrare, sicut fertur factum fuisse à reginâ Scotiæ, quæ proxima martyrio sese communicavit, & factum fuit in primitivâ Ecclesiâ, ubi Eucharistia dabatur laicis in sudario, sumenda scilicet, dum proximum esset martyrium. Hoc posse adhuc fieri, maximè quando judicatur

182 DE SACRAMENTIS:

Eucharistia multum necessaria tenetur à pluribus doctoribus; sed alii & probabilius & in majori numero contrarium tenent; sic inter alios sentit Bonacina. An autem Sacerdos non sacrificando, possit se communicare extra diem Veneris sanctam, in qua est speciale privilegium; hoc illi conceditur; sicut & Diacono in extremâ necessitate, ubi deessent Sacerdos & Diaconus. Secundum constat etiam ex vocabulo Pastoris, qui tali nomine insignitur, quia ipsi incumbit pascendi officium; & sic ille qui ministrat hoc Sacramentum, debet esse Pastor & habere jurisdictionem ordinariam, qualem habent Episcopi, parochi & alii quibus animarum cura incumbit ex officio, vel saltem ab illis licentia debet concedi: unde peccant qui sine privilegio administrant Eucharistiam non subditis, & hoc mortaliter; nisi credatur fore ut Pastor hoc sciens approbaturus sit & daturus licentiam.

 QUÆSTIO ULTIMA.

An sumenda sit necessariò Eucharistia sub utraque specie?

HÆc difficultas præcisè oritur pro laïcis, nullus enim dubitat, quin Sacerdos sacrificando debeat illam sub utraque specie sumere: pro laïcis ergo nos continuò objurgant hæretici, dicentes, quòd contra institutionem Christi faciamus, dividentes Eucharistiam & unâ parte fraudantes laïcos: ut autem justi-

ficetur Ecclesiæ Catholicæ usus, erit

CONCLUSIO.

NON est necessarium ut sub utraque specie recipiatur Eucharistia; Concilium enim Trident, sess. 21. cap. 1. prohibet talem administrationem laïcis sub excommunicationis pœna. Prima ratio est, quia Joann. 6. habetur, *Si quis manducaverit ex hoc pane, vivet in æternum.* Et ibidem, *Hic est panis qui de cœlo descendit, ut si quis ex ipso manducaverit, non moriatur;* ubi Scriptura tribuit omnem vim sanctificandi & justificandi, Eucharistiæ sumptæ sub specie unicâ; quod non faceret, si altera species esset necessaria ad salutem. Secunda ratio petitur ex Lucæ 24. ubi sub una specie Christus dedit Eucharistiam discipulis Emmaüs, per panem enim quem benedixit, fregit & illis porrexit, intelligunt August. Hieronymus, Theophylactus, Chrysostomus & alii, panem Eucharisticum: & non possunt respondere hæretici, quòd licet Scriptura loquatur tantùm de pane, hoc non impediatur quin calicem porrexerit, statim atque enim panem dedit, evanuit ab oculis eorum. Quòd si respectu aliorum non liceat consecrare sub unâ specie tantùm, hoc licet tamen Christo, qui est supra legem. Tertia ratio sumitur ex Actuum 2. ubi Apostoli erant perseverantes in communicatione fractionis panis: quòd autem Lucas hic locutus fuerit de Eucharistia, fatentur Lutherus sermone de Eucharistiâ, Calvinus cap. 17. institutionum ss. 35. sicut & Plessæus libri primi de Eucharistiâ capite primo. Nec dicant hæretici, per fractionem panis intelligi etiam benedictionem calicis,

quia Apostoli non potuissent consecrare sub unâ specie : talis enim responsio gratis fingitur, & ejus ratio nulla est, quia ibi non loquitur Lucas de Apostolis consecrantibus, sed de recentibus conversis, quibus frangebatur panis, licet Apostoli consecrassent antea sub utraque specie, ut fit communiter. Quarta ratio habetur ex primitivâ Ecclesiâ, ubi non erat licita congregatio Christianorum, & dabatur Eucharistia laïcis sub solâ specie panis, ut ferrent illam in proprias domos & ibi sumerent, vel in necessitate, vel ex pietate : viris quidem in concava manu, & mulieribus in linteo : sic Tertullianus libri 2. ad uxorem capite 5. Clemens Alexandrinus l. 1. Stromatum ; Cyprianus sermone de lapsis : Basilius in Epistolâ ad Cæsariam Patritiam ; Hieronymus in Epistolâ contra Jovinianum ; Augustinus sermone 152. Quinta ratio hauritur ex S. Leone qui sermone 4. de Quadragesimâ loquens de Manichæis, asserit eos qui Romæ habitabant & sumebant communionem cum Catholicis, nunquam sumere calicem, quia erant in hoc errore quod crederent vinum esse fel draconis ; hoc autem non fecissent publicè, nisi licitum fuisset communicare sub unâ specie, vel sub utraque simul. Sexta tandem ratio potest repeti ex motivis, quæ impulerunt Ecclesiam Catholicam, ut alteram speciem removeret; hæc autem fuerunt : primò, quia non minùs sub unâ specie totus Christus continetur cum sanguine ; secundò, quia non minor gratia datur sub unâ quàm sub duabus, quoniam gratia non datur per species, sed per contentum sub

illis; tertio, quia sunt multi abstemii à vino; quarto, quia vinum multis in locis deest in tantâ quantitate; ut tot homines communicare possent; quinto, quia esset periculum effusionis.

O B J E C. 1. Joannis 6. habetur, *Nisi manducaveritis carnem filii hominis, & biberitis ejus sanguinem; non habebitis vitam in vobis*; ergo ut gratia concedatur, debet quilibet Christianus sumere sanguinem sub specie vini. Resp. non ibi esse præceptum de sumptione specierum; sed tantum præcipitur ut quis manducet corpus & bibat sanguinem; utrumque autem fit sumendo solam speciem panis, quia tunc sanguis dicitur bibi quoad substantiam, quoniam sumitur res potabilis, licet non dicatur propriè bibi quoad modum. Quod si Matth. 26. dixerit Christus, *Bibite ex hoc omnes*; hoc dictum fuit Apostolis solis, addit enim Marcus, *& biberunt ex eo omnes*. Quod si dixerit Christus, *Quod vobis dico, omnibus dico*; ibi loquitur Christus de vigiliâ, dixit enim, *vigilate & orate, &c.* & illic subjungit, *quod vobis dico, omnibus dico*.

O B J E C. 2. Debemus sumere Eucharistiam, sicut illam instituit Christus: sed Christus instituit illam sub utraque specie: ergo, &c. Resp. neg. maj. aliud enim est institutio Eucharistiæ facta à Christo, aliud est præceptum ejus; si enim deberemus nos conformare absolute Christo, deberemus sumere Eucharistiam post coenam. Nec instare debent hæretici, quod hoc jussit Christus dicens, *hoc facite*, idest, *distribuite sub utraque specie, sicut ego*; hoc enim est falsum, quia dixit tantum, *hoc facite*, post

porrectionem corporis; ad calicem autem dixit, *hoc facite quotiescumque bibetis in meam commemorationem*, ad ostendendum quòd posset fieri receptio Eucharistiæ, & non bibi species vini. Dices, Ergo frustra instituit Christus sub utraque specie: Negatur, instituit enim Eucharistiam, non tantum ut Sacramentum, sed & ut sacrificium, ad quod requiritur consecratio & sumptio utriusque speciei.

Obj. c. 3. D. Leonem exprobrantem Manichæis, qui nolebant sumere speciem vini: sed ad hoc jam respondimus quòd scilicet crederent Manichæi, vinum esse fel draconis: non ergo illos objurgat quòd noluerint recipere speciem vini, sed quòd noluerint ob superstitionem & errorem. Sic etiam intelligendus est Gelasius Papa. Quòd si dicat Cyprianus sermone de Cœna Domini, *lex esum sanguinis prohibet, Evangelium præcepit ut bibatur*: intelligitur de bibitione secundum substantiam non de bibitione secundum modum. Si quis dicat, perfectior est Eucharistia sub utraque specie, quàm sub unâ: Respondemus ut aliàs, esse perfectiorem in significatione secundariâ, quia Eucharistia significat perfectam refectionem, quæ sicut in corporalibus fit ex pane & vino; in spiritualibus etiam debet fieri ex corpore & sanguine Christi.





CAPUT QUARTUM.

De Sacrificio Missæ.

ANTEQUAM descendamus ad explicationem Sacrificii Missæ, præsciendum est quid & quotuplex sit Sacrificium in se: sic autem definitur: Est oblatio rei sensibilis, à legitimo ministro, soli Deo facta, per realem immutationem hostiæ, ad testandum illius summum dominium. *Oblatio* tenet locum generis: ponitur postea, *rei sensibilis*; & sic oblatio interna, qua quis se & sua offert, non est sacrificium. Dicitur à *legitimo ministro*; idest à Sacerdote, qui solus offerre potest; licet Agnus Paschalis in veteri lege fuerit immolatus à quolibet Patrefamilias, erat enim institutum ante legem Mosaicam, & sic servabatur ordo legis naturæ, ubi Patresfamilias erant Sacerdotes; licet alii speciali Dei instinctu sacrificaverint, ut Abel, Abraham & Melchisedech. Uicitur, *soli Deo facta*; quia Sacrificium pertinet ad cultum Patriæ; qui soli Deo debetur. Additur, *per realem immutationem hostiæ*; occidebantur enim animalia, carnes eorum cremabantur, & aliæ hostiæ immutabantur, ut oleum & sanguis, quæ fundebantur super altare, sic etiam de cæteris. Quod si dicatur, Christum non se occidisse; non minus tamen à seipso Sacerdote sacrificatus est, quia se occidit moraliter, tradendo se voluntariè Judæis: licet autem Martyres se tra-

dant, non se tamen sacrificant propriè, quia non sunt Sacerdotes veri, & non moriuntur ad testandum summum Dei dominium, sed ad testandam suam fidem.

Sacrificium dividitur tripliciter. Primò ratione materiæ, secundò ratione formæ, tertio ratione finis. Ratione materiæ dividitur Sacrificium in victimam, immolationem & libamen; in Victima offerebantur animalia: per immolationem res inanimatæ solidæ offerebantur, ut panis, simila, thus, manipulus spicarum virentium, & triticum; quæ omnia levabat sacerdos & immutabat diversimodè; scindendo panem in frusta, cremando similam, vel in sartagine aut clibano, urendo sal & triticum, denique & adolendo thus: in libamine tandem offerebantur res inanimatæ liquidæ, sicuti sunt vinum, sanguis, oleum & aqua, quæ omnia effundebantur super altare.

Dividitur Sacrificium ratione Formæ, in holocaustum, hostiam pro peccato, & hostiam pacificam. Quando Sacrificium erat holocaustum, tota res consumebatur sine reservatione: quando erat hostia pro peccato (scilicet externo) una pars erat in alimentum Sacerdotis, & aliæ erant consumptæ: quoad hostiam pacificam, dividebatur in tres partes, quarum una consumebatur, altera erat pro Sacerdote, & alia pro offerentibus: si hostia offerebatur in gratiarum actionem, partes reservatæ debebant comedi eodem die; si verò erat pro beneficio accipiendo, poterant reservari insequentem, & non ulterius.

Dividitur tandem Sacrificium, ratione finis,

in Latreuticum, Eucharisticum, Impetratorium & Propitiatorium. Primum erat solum ad Deum colendum, secundum ad gratias agendum; tertium ad accipiendum beneficium aliquod; quartum ad obtinendam relaxationem poenarum peccatis debitaram.

Q U E S T I O P R I M A.

Quid sit Sacrificium Missæ, & à quo institutum fuerit?

ALIA erat Missa Catechumenorum, quæ durabat usque ad offertorium, ubi tunc recedebant; alia fidelium, quæ erat ab offertorio ad finem, quo dimittebantur, dum diceret Sacerdos, *Ite Missa est*; alia est tandem Missa, quæ utramque complectitur: dicendum nobis est quid ea sit.

C O N C L U S I O P R I M A.

MISSA secundum nomen, venit à verbo Hebraïco, quod significat oblationem; vel à verbo Latino, mitto, quia per consecrationem nobis veluti mittitur Christus à Deo, & per oblationem & sumptionem remittitur à nobis Deo. Missa verò secundum rem est actio sacra, qua conficitur Christi corpus, Deo offertur, & à sacerdote sumitur. Quòd autem Missa sit Sacrificium, patet; quia in ea reperiuntur omnia, quæ requiruntur ad Sacrificium: scilicet primò Sacerdos qui offert, nempe Christus, qui est principalis offerens; secundò hostia seu Christus sub specie panis & vini;

tertio Deus qui offertur; quartò Ecclesia pro qua offertur; quintò altare in quo offertur; & sextò, actio Sacrificantis: Eucharistia ergo est simul Sacramentum, quatenus sub signo visibili, nempe sub speciebus; continet rem invisibilem, scilicet Christum, & gratiam quam confert; & Sacrificium etiam, quatenus offertur Deo Christus in illâ existens.

O B J E C T. Christus non mactatur in Missâ: ergo Missa non est Sacrificium. Respondeo, Christum non mactari realiter & actu, quia Christus est impassibilis; mactatur tamen mysticè, in quantum vi verborum consecrationis; corpus à sanguine separatur; unde Christus est in altari ut immolatus, licet per naturalem consecutionem & per concomitantiam, vivus & totus reperiatur sub qualibet specie. Nec dicant adversarii, nos non indigere alio Sacrificio à Sacrificio Crucis quod infinitum est: responderetur enim, quòd sit unum & idem Sacrificium; & sic non indigemus alio Sacrificio, sed tantum repetitione ejus, ut Sacrificium Crucis, quod infinitum est, nobis applicetur, vel illis pro quibus offertur Missa.

C O N C L U S I O S E C U N D A.

SACRIFICIUM Missæ, quantum ad substantiam, fuit institutum à Christo in ultimâ coenâ, ubi consecravit panem in corpus, & vinum in sanguinem, in quo consistit præcisa ratio Sacrificii, ut dicemus; & sic sacrificavit & tulit legem de illo Sacrificio, ut duraret in perpetuum, dicens Apostolis, *Hoc facite, &c.* Ratio congruentiæ, cur Christus instituerit hoc Sacrificium, est, quia ad novæ legis authorem

pertinebat instituere substantialia legis, cujusmodi est Sacrificium. Quoad ceremonias quæ adjungi solent Sacrificio Missæ, institutæ sunt & compositæ ab Ecclesiâ. Si quis dubitaret, an Christus sacrificaverit, posset convinci ex Concil. Trid. sess. 21. cap. 1. & ex D. Paulo ad Hebr. 7. ubi Christus vocatur *Sacerdos secundum ordinem Melchisedech*: sicut ergo Melchisedech sacrificavit in pane & vino, sic Christus debuit sacrificare sub speciebus panis & vini. Si etiam quis dubitet, an Apostoli Missam celebraverint, respondebitur affirmativè ex Actuum 13. ubi enim Latinè habetur, *ministrantibus illis*, textus Græcus habet *λεειτουργοις* ἱεροῦ τοῦ Κόειν idest, *ipsis celebrantibus Missam Domino*, Liturgia enim & Missa idem sunt. Deinde ad Corinth. 10. scribit Paulus, *Calix benedictionis cui benedicimus, nonne communicatio sanguinis Christi est; & panis quem frangimus, nonne participatio corporis Domini est?* hoc autem est celebrare Missam.

QUESTIO II.

Quid offeratur in Missa, & à quo?

IN omnî sacrificio requiritur Hostia quædam quæ offeratur Deo ad protestandum ipsius summum dominium, & exigitur Minister quidam offerens illam hostiam: cum ergo Missa sit sacrificium, ut diximus, dicendum est quid in illâ offeratur, & à quo.

CONCLUSIO.

IN sacrificio Missæ offertur Christus , seu corpus & sanguis ejus , quatenus sunt sub speciebus , & hoc offertur à Christo tanquam ab offerente principali , & à Sacerdote tanquam ab offerente minus principali ; licet insuper Ecclesia & Fideles suo modo offerant.

Probatur prima pars ex Patribus , qui communiter docent , Christum in hoc Sacramento immolari : ergo ipse est hostia quæ offertur. Idem habetur in Concil. Trid. sess. 22. cap. 1. Et ratio est , quia sacrificium Crucis & Missæ non differunt nisi accidentaliter ; in quantum scilicet actiones sacrificandi sunt diversæ , & per unam Christus passibilis immolatur , per aliam Christus impassibilis : sicut ergo Christus fuit hostia immolata in cruce , sic etiam immolatur & offertur in Eucharistiâ , vel ejus corpus & sanguis , ut subsunt speciebus ; non enim immolatur Christus , ut est in cœlo , quia debet fieri immutatio hostiæ ; & Christus , ut est in cœlo , non immutatur : ergo immutatur & immolatur ut est sub speciebus panis & vini , quia vi verborum sanguis est separatus à corpore.

Secunda pars tres alias habet , quarum prima habetur ex Concil. Later. Christum esse in hoc mysterio Sacerdotem & hostiam , & sic Christus est offerens : est autem offerens principalis , non quia illud instituit , aut fundatur in ejus meritis ; sed quia ministri offerunt illud in personâ Christi , & illud consecrant : si enim proferrent hæc verba. *Hoc est corpus meum* nomine proprio , facerent panem corpus suum ,

suum, & non corpus Christi; & sic Sacerdos se gerit in hoc ministerio ut legatus, qui representat personam principis, nempe Christi; & hoc sufficit ut Christus sit principalis offerens: qui enim dat eleemosinam per famulum, est principalis donans; unde sicut donatio principis est grata illi cui fit, licet famulus sit iniquus; sic hoc Sacrificium est Deo gratum, licet Ministrer sit immundus; quia principalis offerens mundus est, & Sacrificium mundum. Alii addunt, Christum esse principalem offerentem, quia prævidens omnia Sacrificia particularia quæ offerenda essent, illa obtulit Patri, & nunc quotidie offert. Quoad secundam partem, est conformis Concil. Nicæno & rationi, quia sacrificium & sacerdotium sunt connexa: unde solus Sacerdos propriè offerre potest sacrificium. Quilibet autem potest offerre, sive sit excommunicatus, sive degradatus, sive hæreticus; hoc enim pendet ab Ordine. Quòd si Gratianus dicat, extra Ecclesiam non esse Sacrificium; hoc verum est de efficaci, & utili ipsi offerenti. Tertia tandem pars habetur ex Canone Missæ, ubi dicit Sacerdos; *Pro quibus tibi offerimus, vel qui tibi offerunt*: ergo quilibet fidelis potest offerre Sacrificium Missæ suo modo, concurrente scilicet ad Missam per opus externum; sive inserviendo, sive offerendo panem aut vinum, sive dando stipendium celebranti.

Objic. contra primam partem: Hostia præsupponitur actioni sacrificandi, sed non præsupponitur Christus sub specie panis & vini ad actionem sacrificantis: imò per eam ponitur

sub utraque specie : ergo Christus , ut est sub speciebus , non est hostia. Respondeo , hoc verum esse in sacrificiis animalium ; ubi res oblata erat nobilior antequam offerretur , quàm post ; antea enim erat vivens , & postea fit mortua ; non sic autem de Eucharistia , ubi id quod sequitur ad destructionem panis , nempe Christus , est nobilior ipso pane.

Q U Æ S T I O III.

In qua actione consistat essentia hujus sacrificii ?

PLURIS sunt actiones in Missâ , scilicet oblatio panis & vini ante consecrationem , ipsa consecratio , oblatio corporis & sanguinis post consecrationem , fractio hostiæ & commixtio cum sanguine & tandem distributio laïcis. Non potest consistere sacrificium in primâ oblatione , quia nondum est Christus : non potest etiam consistere in secunda , quia pro tunc non immutatur hostia ; non consistit tercio in fractione , quia si casu aliquo hestia in calicem caderet , omitrenda esset fractio , & sumenda species panis cum calice ; quarto non consistit in distributione laïcis , multæ sunt enim Missæ , ubi sacerdos solus communicat : superest ergo difficultas , an essentia hujus Sacrificii consistat in consecratione , vel in sumptione hostiæ.

CONCLUSIO.

SACRIFICIUM Missæ præcisè consistit in solâ consecratione, non in sumptione: non consistit inquam in sumptione, quia de fide est, ut habet Concilium Tridentium, quòd Christus sacrificaverit in nocte cœnæ; licet non sit de fide ipsum sumpsisse suum corpus & sanguinem; communior tamen pars Doctorum hoc sentit. Deinde sacrificium est actio Sacerdotis, ut Sacerdos est, ad quam habet potestatem præcisè, ex vi suæ ordinationis; Sumptio autem non est actio Sacerdotis, nisi in quantum fidelis est: ergo sacrificium non consistit in sumptione: superest igitur ut in consecratione consistat: diximus enim quòd Christus est principalis offerens in hoc sacrificio: ergo sacrificium consistit in illâ actione, quæ fit in personâ Christi, & consecratio sola fit in persona ejus, ubi Sacerdos nomine Christi, dicit: *Hoc est corpus meum*, & sic in consecratione consistit Sacrificium Missæ. Adde quod Sacrificium consistit in illa actione quæ immutat & destruit hostiam: hoc autem fit per consecrationem, ubi Christus ponitur ut immolatus, quoniam separatur corpus à sanguine vi verborum.

O B J E C. Sacrificium debet esse sensibile, ut patet ex definitione ejus; sed consecratio seu mystica separatio corporis à sanguine, non est sensibilis: ergo, &c. Resp. esse sensibilem ratione formæ, seu verborum quæ sensibilibiter proferuntur, & quæ, quantum est in seipsis, idest mysticè, separant corpus & sanguinem. Dices, Ergo post consecrationem potest non sumi hostia, quod omnes negant. Respondeo,
I ij

duplicem esse finem hujus sacrificii: Unus est in trinfecus, scilicet gloria Dei, ad quam Missa destinatur; alius est extrinfecus, nempe utilitas sacrificantis: propter finem ergo extrinfecum non debet fieri consecratio sine sumptione hostiæ.

OBJIC. ex 1. ad Corinth. II. *Hoc est corpus meum quod pro vobis frangitur; hic est calix qui pro vobis effunditur;* illa autem fractio & effusio fiunt in sumptione. Respondeo. quòd corpus frangitur, non in sumptione, ubi franguntur tantum species, non corpus; sed in consecratione, ubi ponitur corpus Christi ut immolatum & divisum à sanguine. Dices, Si sacrificium consistat tantum in mysticâ fractione hostiæ: ergo hoc sacrificium non est reale, sed tantum mysticum. Respondeo, esse reale simul & mysticum; mysticum quidem, quia mysticè tantum mactatur hostia; est tamen reale, quia continet realiter Christum qui Deo offertur. Dices: Si sacrificium perficitur in sola consecratione, Sacerdos in consecrando deberet applicare suam intensionem pro vivis & defunctis; solet tamen Ecclesia facere memoriam defunctorum post consecrationem calicis. Respondeo quòd effectus qui habetur per Missam ex opere operato, applicetur in ipsâ consecratione, effectus autem qui applicatur dum Sacerdos facit memoriam defunctorum, est tantum ex opere operantis; unde intentio ministri debet exprimi, vel paulò ante Missam, vel saltem ante consecrationem.

QUESTIO IV.

*Ad Sacrificium Missæ sit propitiatorium
& impetratorium ?*

NON dubitatur quin sit laetificum seu honorarium , in quantum offertur ad cultum Dei qui summè honoratur per hoc Sacrificium : non est etiam difficultas , quin sit Eucharisticum seu Sacrificium laudis , in quantum potest offerri in actionem gratiarum pro beneficiis à Deo acceptis : sed potest suboriri aliqua difficultas , an sit impetratorium & expiatorium : hoc ultimum negant hæretici ; quia dicunt , quòd si Eucharistia esset expiatoria , hoc cederet in injuriam Passionis Christi , qua Christus satisfecit abundantissimè pro omnibus peccatis , ut habetur ad Hebr. cap. 9. & 10. contra eos tamen erit.

CONCLUSIO.

SA CR I F I C I U M Missæ est expiatorium & impetratorium : Expiatorium quidem , in quantum , ut habet D. Paulus ad Hebr. 5. præcipuum munus Sacerdotis , est offerre sacrificium pro peccatis ; non quòd formaliter peccata remittantur per hoc sacrificium , quia supponit gratiam : ergo offertur pro expiatione peccatorum. Deinde , in veteri testamento erant sacrificia propitiatoria , quæ vocabantur hostiæ pro peccato , & quæ auferebant peccata legalia , & poenam ipsis debitam : ergo Sacrificium Missæ expiat etiam peccata , & poenat

illis debitas tollit, vel saltem partem earum. Per hoc tamen non fit injuria Passioni Christi, quia non est Sacrificium Missæ; quod nobis præcisè relaxat poenam debitam peccatis; sed per Sacrificium Missæ nobis applicatur efficacia Sacrificii Crucis, sicut per quodcumque Sacramentum & per quamcumque actionem meritoriam efficacia crucis nobis applicatur. Quod autem Sacrificium Missæ sit etiam impetratorium, patet ex liturgiis DD. Jacobi, Clementis, Basilii, Chrysostomi & aliorum, qui offerebant illud pro pace, & fructibus terræ impetrandis. Ratio est, quia si Sacrificium Missæ potest placare Deum, ut peccata condonet, poterit etiam impetrare à Deo bona temporalia. Deinde sicut sacrificia veteris legis erant impetratoria, ut patet ex secundi Regum cap. 14. ubi David obtulit hostiam pacificam pro peste avertenda; sic etiam nostrum sacrificium, quod est longè nobilius, erit impetratorium.

QUESTIO V.

Quis sit effectus Sacrificii Missæ?

NON loquimur de effectibus quos habere potest ex opere operantis; sicut enim per quodlibet opus bonum, homo in gratia constitutus, potest mereri augmentum gratiæ, auxilia actualia, satisfacere pro se & pro aliis; quoad poenam temporalem, & sibi etiam & aliis multa impetrare; sic hoc potest etiam fieri

per Sacrificium Missæ, quod est actus præstantissimus orationis : loquimur ergo tantum de effectibus qui procedunt à Sacrificio Missæ ex opere operato.

CONCLUSIO.

SACRIFICIUM Missæ non confert gratiam habitualement in se, nec in augmento immediate; potest tamen utrumque facere mediate. Non producit primò gratiam habitualement in se, quia supponitur jam producta, tum in sacrificante, tum in illis pro quibus Sacrificium meritoriè offertur. Non producit secundò augmentum gratiæ per se, quia cresceret gratia in infante, amente & dormiente, si pro illis offerretur; producere tamen potest utramque gratiam mediate, impetrando scilicet actualia auxilia, mediantibus quibus peccator poterit resurgere à peccato, & sic recipere gratiam habitualement in se, impetrando etiam auxilia actualia iusto, mediantibus quibus poterit elicere actum charitatis, & mediante illo actu crescere in gratia. Eodem modo dicendum est de remissione peccati ac de gratia; quod scilicet non non remittat peccata mortalia immediate; sed tantum mediantibus auxiliis actualibus, quibus homo à peccatis resurgit; & etiam venialia sic remittit, mediante scilicet speciali auxilio, excitante ad actum perfectum amoris divini, quo peccatum veniale remittitur: specialior ergo effectus Sacrificii Missæ est, quod impetret gratias prævenientes, quibus peccatores ad poenitentiam excitentur & iusti ad maiorem perfectionem; & quod causet etiam relaxationem

100 DE SACRAMENTIS.
pœnæ temporalis debitæ peccato, sive secundum se totam, sive secundum partem.

Q U Æ S T I O . VI.

An valor Sacrificii Missæ sit finitus vel infinitus?

LOCUTI fuimus in præcedenti quæstione de effectu Sacrificii Missæ, qui non tam se extendit ad gratias habituales procurandas, quàm ad impetrationem gratiarum prævenientium, quibus resurgant illi pro quibus offertur, & ad impetrationem etiam relaxationis pœnæ debitæ peccato; & tandem ad impetrationem beneficiorum temporalium. An autem hi effectus impediuntur à ponentibus obicem, seu ab existentibus in peccato mortali; distinguendum est: si enim loquamur de relaxatione pœnæ temporalis, ille effectus non conceditur nisi iustis, & non peccatoribus; An autem reviviscat ille effectus, quando quis resurgit à peccato, nihil certi affirmari potest, licet hoc credat Henriques. Quod beneficia etiam temporalia, non est verisimile quòd Deus illa conferat iis qui illi sunt odio per peccatum. Si autem sermo sit de gratiis prævenientibus, collatio earum non impeditur per peccatum mortale; imò ideo offertur, ut per pœnitentiam remittantur peccata: potest tamen quis per obstinationem se reddere indignum, ut recipiat majores gratias, quâs Deus daturus esset, si per insignem malitiam peccatoris non impediretur. Postquam autem hæc omnia dicta

sunt de effectu hujus Sacrificii; videndum nobis est, an valor & effectus ipsius, sit finitus vel infinitus: ubi per valorem Sacrificii intelligimus moralem dignitatem quam habet ex re oblatâ, vel ex parte offerentis; per effectum verò intelligimus id quod datur intuitu talis dignitatis: & illa tandem dignitas repeti potest, vel ex parte offerentis principalis, qui est Christus, vel minus principalis, qui est Sacerdos.

CONCLUSIO.

SACRIFICIUM Missæ ut est à Christo, est infiniti valoris, & finiti ut est à Sacerdote, & effectus illius simpliciter finitus dici debet. Ratio primi est, quia Christus, qui est hostia & principalis offerens, est infinitæ dignitatis, ratione unionis ipsius cum Verbo divino: ergo valor Missæ, ut ab utroque repetitur, est infinitus: non quod habeat hoc Sacrificium potentiam merendi aliquid, aut operandi novam satisfactionem; quia Christus qui beatus est, non est amplius in statu merendi: sed hoc Sacrificium dicitur infinitum, quia habet vim infinitam impetrandi quoddam Passio Christi applicetur nobis; & sic hoc Sacrificium non facit injuriam Sacrificio Crucis, quia non habet suum effectum, nisi in ordine ad Passionem Christi, quam nobis applicat. Ratio secundi est, quia si spectetur Sacrificium Missæ, in quantum à simplici Sacerdote offertur, vel ab Ecclesiâ, valor ille est finitus, quia sanctitas utriusque est finita, & in oblatione magis consideratur donatio offerentis, quam res oblata, quando res oblata non facit ditiores illum cui offertur. Quod si aliquis dicat, hoc

sacrificium esse infinitum in valore : hoc debet intelligi mediatè , quatenus impetrat peccatori gratias prævenientes, quibus deletur peccatum quod est aliquo modo infinitum. Ratio tandem tertii est , quòd si Sacrificium Missæ haberet effectum infinitum , tam proderet omnibus quàm singulis , & Ecclesia uno Sacrificio Purgatorium vacuare posset ; & sic non deberet curare quòd anniversaria pro eadem animâ dicerentur : imò non deberet permittere , quòd pro una persona particulari Missa celebraretur ; iret enim contra charitatem , celebrando pro una , si sine diminutione effectûs , ita proderet omnibus quàm uni : ex hoc etiam sequeretur , quòd qui accepisset centum elemosynas pro centum missis à centum personis , posset satisfacere , si tantum diceretur una Missa ; quia tam proderet illis centum , quàm uni solùm , quod est pravum & erroneum sentire.

OBJEC. ex dictis , Principalis offerens est Christus , hostia oblata est ipsemet , & Sacerdos nihil facit nisi in persona Christi ; quoniam ergo hæc omnia sunt infinita , valor hujus Sacrificii erit infinitus , & effectus infinitus. Resp. quòd aliud est loqui de valore , aliud de effectûs : posset enim valor seu dignitas Sacrificii esse infinita & producere effectum finitum : non sufficit autem quòd aliquid sit infinitum in se , nisi offerens instituat illud ad effectum infinitum ; quodlibet enim opus Christi erat sufficiens ut redimeret genus humanum ; quia tamen Deus instituerat ut sola mors Christi nostram salutem operaretur , ideo aliæ actiones.

pœnales non habuerunt effectum infinitum, nisi quatenus dicunt ordinem ad ipsius mortem: quia ergo Christus non instituit hoc Sacrificium, ut haberet fructum infinitum; ideò effectus ipsius remanet semper finitus. Deinde, omne opus meritorium mensuratur ab acceptance divinâ; idest, in tantum valet apud Deum, in quantum acceptatur ab illo qui nemini tenetur: quoniam ergo Deus non acceptat Sacrificium Missæ, ut habeat effectum infinitum, ideò remanet finitus in effectu. Quòd autem Deus non acceptet illud pro infinito, habetur ab Ecclesiâ, quæ plura Sacrificia pro eadem persona offert.

O B J E C. secundò: Si plures Sacerdotes consecrarent eandem hostiam, & quilibet sibi applicaret fructum ejus, vel alteri, quilibet haberet tantum fructum, ac si unus consecraret, ut tenent communiter Doctores; quod signum est Sacrificium Missæ habere effectum infinitum. Resp. verè quidem singuli haberent tantum fructum, quantum unus; sed hoc non procedit ex infinitate effectûs Sacrificii Missæ, sed ex eo quòd pro tunc essent plura Sacrificia, tot scilicet quot essent Sacerdotes; quia singuli consecrant per se independentem, ut totales ministri, & Sacrificium consistit in actione consecrantis, quæ pro tunc esset multiplex, si proferrent verba eodem instanti. Quòd si hostia sit unica, hoc non impedit multiplicationem Sacrificiorum, sicut nec multæ hostiæ ab eodem Ministro consecratæ faciunt plura Sacrificia.

 QUÆSTIO VII.

Pro quibus possit celebrari Sacrificium Missæ.

TRIPLEX fit communiter applicatio Missæ. Prima est generalis, quæ fit ab Ecclesia applicante Sacrificium generaliter pro vivis & defunctis, & singulariter pro Summo Pontifice, Rege, Episcopo & aliis, quorum meminit Sacerdos, ut habetur in canone. Secunda est specialis, quæ competit illis, pro quibus Sacerdos intendit specialiter offerre Sacrificium. Tertia est specialissima, & hæc fit Sacerdotis. De secundâ nobis est quæstio.

C O N C L U S I O.

SACRIFICIUM Missæ potest offerri pro omnibus viventibus, qui sunt intra Ecclesiam, si ve sint justî, si ve peccatores; sunt enim capaces fructuum hujus Sacrificii, dum sunt in hac vitâ: imò Sacerdos non potest aliquem excludere à tali oblatione; quia si hoc fieret palam, esset scandalosum; si clam, signum esset odii occulti. Non potest autem offerri pro excommunicatis excommunicatione majori, hoc enim prohibetur in Jure Canonico; potest tamen offerri pro infidelibus, qui sunt extra Ecclesiam, quia nulla lex prohibet; e contra Paulus jubet fieri orationes pro Regibus Gentilibus qui erant extra Ecclesiam: ergo Sacrificium Missæ, quod est præstantissimum genus orationis, potest illis applicari. Si August. dicat, non debere offerri pro peccatoribus; hoc

est pro peccatoribus mortuis. Si Concil. Bracharense idem dicat de Catechumenis ; loquitur de illis qui mortui sunt sine Baptismo. Quando Concil. Meld. dicit, non esse offerendum pro Energumenis ; se explicat dicens, non debere nomina eorum recitari in publicâ oratione. Quoad mortuos, non potest offerri pro beatis, ut est latreuticum, quia sic soli Deo offerendum est ; nec ut satisfactorium, quia non habent pœnam luendam ; nec ut impetratorium, quia nullo bono carent, quoniam summo Bono fruuntur ; potest tamen offerri pro illis, ut est Eucharistium, agendo Deo gratias pro beneficiis, quæ Deus illis contulit ; hoc enim cedit in eorum gaudium accidentale, videndo quòd in sui memoriam offeratur Deo Sacrificium. Quoad animas damnatas, pro illis non potest offerri ; sunt enim fructuum ejus incapaces ; quoniam *in inferno nulla est redemptio* ; unde quod de Trajano & aliis ab inferno liberatis dicitur, reputatur fabulosum. Tandem quoad animas in purgatorio existentes, potest illis applicari, ut est satisfactorium ; relaxat enim pœnas earum, applicando illis satisfactionem Christi : quomodo autem illis proffit ; dicendum est quod profit tantùm illis, quibus applicatur Sacrificium, & non aliis ut pecunia quæ solvitur pro uno, & non pro alio : & ratio petitur ex hoc quòd satisfactio Christi applicetur ex intentione offerentis : unde Sacrificium Missæ non est ut lucerna accensa pro principe, quæ illuminat nedum illum, sed & alios qui sunt in comitatu, ut aliqui voluerunt.

QUÆSTIO ULTIMA.

*De quibusdam circumstantiis ad Missam
requisitis?*

QUAMPLURIMÆ sunt circumstantiæ quæ Sacrificium Missæ concernunt; sed quia potius à Canonistis, quàm à Scholasticis exquiri debent, de solemnioribus tantùm dicetur aliquid, quæ videntur magis necessaria: an v. g. Sacerdos celebrare teneatur; qua hora, quo loco, quibus vestibus celebrare possit, & debeat; & hæc omnia explicabuntur.

CONCLUSIO.

QUO AD necessitatem celebrandi, probabile est quod Sacerdotes vi ordinationis suæ teneantur celebrare aliquoties in vita; licet aliqui sentiant contrarium, dicentes de hoc nullum esse præceptum, nec divinum, nec Ecclesiasticum; unde explicant verba Christi dicentis, *hoc facite*, quòd scilicet per ea Christus voluerit obligare non singulos Sacerdotes, sed Ecclesiam totam, vel saltem prælatos, qui sunt successores Apostolorum, quibus Christus dixit, *hoc facite*; unde addunt, quòd Sacerdos per ordinationem acceperit quidem potestatem sacrificandi, non obligationem; & quòd possit non sacrificare, sicut potest non absolvere. Contrarium tamen tenetur communiter; & asseritur, quòd Sacerdos vi sui officii acceperit onus intercedendi pro populo apud Deum, sicut faciebant Sacerdotes veteris legis, & pro-

pter hanc causam teneatur offerre Sacrificium; si enim non sacrificaret, faceret, ut in vanum gratiam Dei recepisset, cum in Ordine potestatem consecrandi receperit: Deinde nunquam sacrificando, daret occasionem scandali; tandem Pius V. videns Caëtanum dicentem Sacerdotem tantum peccare venialiter, qui nunquam sacrificat; curavit hanc opinionem deleri ex commentario supra D. Thomam. Quoties autem teneatur sacrificare Sacerdos, hoc non expressè dicunt Doctores, sed solum affirmant quemlibet teneri, saltem aliquoties in anno celebrare.


Quoad horam celebrandi sacrificium Missæ, non licet hoc facere ante auroram; cuius rei duplex affertur ratio: una mystica, quia offertur in Missa Christus qui est candor lucis æternæ; & alia litteralis, quia ante crepusculum diei non sunt homines ad tam pium opus dispositi. Excipitur tamen ab hac regulâ nox Nativitatis Domini, & olim excipiebatur etiam nox Resurrectionis, in qua Missa celebrabatur, quia Christus in nocte surrexit; nunc autem cessavit illa consuetudo, & illa Missa anticipatur & dicitur in Sabbato sancto. Quod si Telephorus determinaverit, Missam non esse celebrandam, nisi hora tertia, loquitur de Missis Cathedralibus & Conventualibus. Si etiam loquatur de aliis, hoc communi consuetudine revocatum est. Missa etiam non debet regulariter post meridiem inchoari; dixi regulariter, per privilegium enim licet aliquando etiam post meridiem celebrare.

Quoad locum hujus Sacrificii, debet fieri

celebratio in Ecclesiâ, ob reverentiam ; potest tamen Episcopus sine ullâ necessitate, utendo solùm jure suo, dare licentiam celebrandi in domo privatâ, & Oratorio non consecrato ; modo habeatur semper altare portatile. Quoad Ecclesiâ violatam, non licet in eâ celebrare. Sex autem modis potest violari Ecclesia : primò, propter voluntarium homicidium ; secundò, propter injuriosam sanguinis effusionem ; tertio, propter seminis humani effusionem, non occultam ; quartò, per sepulturam fidelis excommunicati ; quinto, per sepulturam infidelis ; sexto, quando parietes comburuntur, vel ita destruuntur, ut integrè reedificari debeant. Qui in Ecclesiâ violatâ celebrat, peccat mortaliter ; non tamen fit irregularis, sicut qui celebrat in Ecclesiâ interdictâ. Potest dare Episcopus licentiam celebrandi in loco violato, quia potest dare licentiam consecrandi in non consecrato. Si violatio contingat ante canonem incertum, Sacerdos debet desinere : si post, debet absolvere. Si Ecclesia sit tantùm benedicta & non consecrata, potest Sacerdos statim eam reconciliare per asperisionem aquæ benedictæ, & alias ceremonias quæ habentur in Rituali : si autem sit consecrata ab Episcopo, debet ab eo reconciliari.

Quoad ornamenta ; requiruntur primò altare lapideum consecratum, sive portatile ; & in hoc non potest dispensare Episcopus, nec Papa unquam fecit, licet possit facere. Secundò, linteum super altare, quod ipsum tegat ; deinde mappa, super quam ponatur

corporale; & sic ad minimum debent esse duæ palæ extensæ, vel una duplicata. Tertio corporale benedictum ab Episcopo, vel ab alio habente privilegium benedicendi. Quarto, debet esse lumen, sine quo peccatum mortale est celebrare. Quinto, Missalis liber, in quo sit ad minus canon, & sine ipso celebrans peccat mortaliter, quia se exponit periculo. Sexto, requiruntur calix & patena, quæ sint aurea argentea, vel ad minus stannea. Septimo, tandem requiritur alba, cingulum, amictus, stola, manipulus, & casula.



CAPUT QUINTUM.

De Pœnitentiâ.

PŒNITENTIA, quæ secundum vim nominis, nihil aliud est, quàm pœnæ tenentia; in quantum peccator debet in se tenere pœnam pro peccato commissio expiando; potest spectari vel ut est virtus, vel ut est Sacramentum. Antequam autem agamus de pœnitiâ, ut Sacramentum est, quædam prælibanda sunt de eâ, ut est virtus; & tria præcipuè, nimirum quid sit pœnitentia virtus? in quibus conveniat cum Pœnitiâ Sacramento? & tandem in quibus discrepet?

Quoad definitionem Pœnitentiæ, ut virtus est, sic traditur: Est virtus supernaturalis inclinans hominem ad detestationem peccati,

inquantum est offensa Dei, cum voluntate satisfaciendi Deo. Primò, dicitur *virtus*; detestari enim peccatum est actus honestatis & laudabilis, à pœnitentia procedens, tanquam ab habitu laudabili & honesto, maximè, quando talis detestatio habetur propter Deum offensum. Ideò etiam dicitur *supernaturalis*, quia actus pœnitentiæ disponunt ad gratiam: ergo sunt supernaturales; ex Conc. Trid. sess. 6. cap. 6. Potest tamen dari aliqua pœnitentia naturalis procedens à lumine naturæ, quod dicat Deum authorem naturæ non esse offendendum; sed illa pœnitentia non conducit ad gloriam. Quando postea additur quod Pœnitentia sit *virtus supernaturalis inclinans ad detestationem peccati*; ex hoc patet quòd peccatum est objectum materiale ejus; & quando subjungitur, *ut est offensa Dei*; illa formalitas est objectum formale pœnitentiæ: quia aliæ virtutes detestantur vitium sibi oppositum, ut sibi oppositum est, pœnitentia verò detestatur peccatum, ut est Dei offensivum; & sic Pœnitentia est virtus ab aliis distincta, quæ est pars potentialis justitiæ; quoniam per pœnitentiam aliquomodo compensamus Deum pro peccato commisso. Cùm denique apponitur, quòd talis detestatio debeat fieri *cum efficaci voluntate Deo satisfaciendi*; hoc ideò adjungitur, quia talis voluntas requiritur ad remissionem peccati: Unde sciendum est, quòd Pœnitentia virtus necessaria sit absolutè, sive implicitè, sive explicitè, ut recipiamus effectum Sacramenti Pœnitentiæ.

Quantum ad convenientias Pœnitentiæ, ut est

virtus, & ut est Sacramentum, hæ sunt. Utraque est utilis medicina ad delendum peccatum actuale; imò si peccatum mortale sit, utraque est necessaria: Utraque versatur circa peccatum actuale: Utraque habet pro subjecto hominem adultum: Ut Sacramentum tamen est, respicit hominem baptizatum, & ut virtus, ad non baptizatum etiam pertinet. Utraque potest iterari, etiam circa idem peccatum, pluries illud detestando aut confitendo.

Quantum autem ad differentias utriusque, dicendum est quod disconveniant in his: quia scilicet Pœnitentia virtus est sub genere habitus, aut actus; Sacramentum verò sub genere signi. Deinde Pœnitentia virtus, est actus internus; licet enim aliquando ad actum externum transeat, potest tamen salvari in actu interno, quo quis in corde detestatur peccatum, ut est autem Sacramentum, præter internum dolorem addit adhuc actum externum, nempe confessionem & absolutionem. Tertiò Pœnitentia virtus, est quædam pars essentialis Pœnitentiæ Sacramenti, quæ confunditur cum Contritione; Pœnitentia verò Sacramentum, est ipsum totum Sacramentum quod involvit Confessionem, Dolorem, Satisfactionem, & Absolutionem. Tandem Pœnitentia virtus, est de jure naturali divino; dicitur enim ratio naturalis detestandum esse peccatum commissum contra Deum; Pœnitentia verò, ut Sacramentum, est de jure divino positivo, scilicet de institutione Christi; antequam enim Christus instituisset Sacramenta novæ legis, Pœnitentia erat tantum virtus, non Sacramentum.

QUÆSTIO PRIMA.

Quid sit Pœnitentia Sacramentum, quando fuerit instituta, & an necessaria fuerit?

PŒNITENTIA potest sumi pro retractatione voluntatis, etiam si mala non sit; & sic illum pœnitere dicitur, qui vellet aliquid non fecisse: sumitur aliquando pro dolore de rebus male factis; & tunc si procedat ex motivo supernaturali, dicitur pœnitentia virtus: sumitur etiam pro absolutione à censuris, & tunc non est præcisè Sacramentum; per talem enim absolutionem non remittuntur peccata, sed tantum relaxatur vinculum & pœna imposita ab Ecclesia: sumitur quartò pro satisfactione imposità à ministro absolutionis, & pro tunc non est nisi pars materialis hujus Sacramenti: tandem sumitur pro pœnitentiâ Sacramento, & de eâ sic sumptâ nobis dicendum est.

CONCLUSIO PRIMA.

PŒNITENTIA est novæ legis Sacramentum, consistens in actibus pœnitentis & absolutionis, quod institutum fuit à Christo per modum judicii emendativi ad remissionem peccatorum. Dicitur *novæ legis Sacramentum*, quia ante Christum Pœnitentia non erat Sacramentum, ex Concil. Trid. sess. 14. cap. 3. unde quando in veteri testamento mentio fit de Pœnitentia cui Deus promittit remissionem peccatorum, hoc intelligendum est de Pœnitentiâ virtute, seu de contritione. Dicitur secundò,

DE SACRAMENTIS. 213

consistens in actibus poenitentis & absolventis; quia actus utriusque sunt materia proxima Pœnitentiæ. Dicitur quod sit à Christo institutum, ut mox videbitur. Additur, *per modum iudicii emendativi*; per Pœnitentiam enim, seu per absolutionem non condemnatur, sed emendatur homo. Subjungitur denique, *ad remissionem peccatorum*, ut pateat quod peccata mortalia sint materia circa quam versatur Pœnitentia.

CONCLUSIO SECUNDA.

INSTITUTUM fuit Sacramentum Pœnitentiæ à Christo sicut & alia, ex Concilio Tridentino sess. 7. can. 10. Quantum ad tempus, institutum fuit quando post resurrectionem dixit Apostolis Joan. 20. *Accipite Spiritum sanctum, quorum remiseritis peccata, remittuntur eis: & quorum retinueritis, retenta sunt.* Sic Concilium Tridentinum sess. 24. cap. 1. Quando ergo Christus Matthæi 18. dicit Apostolis, *Quaecumque alligaveritis, &c.* erat tantum promissio facta illis de potestate absolvendi, sicut quando dixit Petro Matth. 16 *Tibi dabo claves regni cœlorum.* Et talis potestatis habuit possessionem Petrus, cum dixit illi Jesus Joann. ult. *Pasce oves meas*; pro tunc enim illum constituit Summum Pastorem, cum supremâ potestate. Quando etiam Christus dixit Apostolis, *Pœnitentiam agite*, loquebatur de Pœnitentiâ virtute. Non audiendi sunt consequenter illi qui asserunt, Pœnitentiam fuisse institutam antequam Apostoli communicarent; quia non requiritur Pœnitentia Sacramentum, nisi post institutionem Christi; & sicut Apostoli debite

sumerent corpus Christi, sufficiebat contritio, seu poenitentia virtus pro illis qui erant consci peccati mortalis, ut Judas; hoc tamen non impedit quin inchoata fuerit Poenitentia nocte cœnæ, quando Christus ordinavit Apostolos, deditque illis per Ordinem characterem Sacerdotalem, qui est fundamentum potestatis absolvendi; quod autem fuit pro tunc inchoatum, perfectum fuit tempore supradicto, juxta Concilium. Quod si Christus ante resurrectionem remiserit peccata Magdalene & aliis, hoc non faciebat vi Sacramenti, sed propria virtute. Quod si etiam quis dicat, potestatem absolvendi dari cum Ordine sacerdotali, & sic Christum ordinando Apostolos instituisse Poenitentiam, hoc negandum est: recipitur enim primò actualis potestas consecrandi, cum Episcopus dicit, *Accipite potestatem offerendi sacrificium in Ecclesiâ*, & postea recipitur potestas absolvendi, cum dicit Episcopus, *Accipite Spiritum sanctum, quorum remiseritis, &c.* Quia tamen per prima verba confertur character Ordinis, qui non confertur novus per alia verba, sed tantum augetur, idè potest dici quod potestas radicalis absolvendi tradatur per prima, & compleatur per secunda.

CONCLUSIO SECUNDA.

SA CRAMENTUM Poenitentiae est necessarium illis qui mortaliter peccaverunt post baptismum, tum necessitate medii; quia est medium sine quo peccatum mortale actuale remitti non potest: tum necessitate præcepti, ut habetur in Concilio Tridentino sessionis 14. cap. 2. Hujus ratio est, quia quæcumque sunt necessa-

ria necessitate medii, sunt etiam necessaria necessitate præcepti, saltem si sint in nostra potestate; & hoc ideo additur quia prima gratia est necessaria necessitate medii, non verò præcepti; quia autem Pœnitentia est necessaria necessitate præcepti, ideo ille qui jam est contritus, debet adhuc confiteri peccata & absolvi ab illis, unde in Contritione virtualiter includitur Pœnitentia. Porro, quando diximus Pœnitentiam esse necessariam, hoc est vel in re, vel in voto; imò potest aliquando fieri, quod virtualis Pœnitentia sufficiat; aliquis enim potest per actum amoris divini perfectam obtinere remissionem sui peccati: sed quia nullus potest perfectè Deum diligere, nisi doleat saltem virtualiter de offensis in Deum commissis; ideo talis actus amoris divini dicitur involvere votum Pœnitentiæ, saltem implicitè.

OBJEC. Pœnitentia non est necessaria nisi ad tollendum id quod remansit in peccatore, transeunte actu peccaminoso; sed nihil remansit: ergo non requiritur Pœnitentia. Resp. distinguo minorem, nihil remansit quoad substantiam actus, concedo: nihil remansit quoad reatum peccaminosi actus, nego; Vel nihil remansit physicum, concedo: morale, nego; remansit enim reatus & obligatio ad pœnam; seu remansit culpa, quia homo est ingratus Deo & obligatus ad pœnam æternam pro peccato mortali, quæ commutatur in temporalem per Pœnitentiam; & illud morale, quod remanet post actum peccati, non est quid reale; sed est tantum respectus rationis; ut quando

quis propter injuriam factam principi, est illi inimicus & ad poenam deputatur, nihil reale & positivum in eo reperitur.

Q U A E S T I O II.

Quanam sit materia Pœnitentiæ?

MA T E R I A Pœnitentiæ, vel est remota, vel proxima; vel est etiam sufficiens, vel necessaria. Materia sufficiens est ea, quæ sufficit ut conferatur absolutio: sic peccatum veniale & mortale jam confessum & remissum, sunt materia sufficiens Pœnitentiæ; peccata verò mortalia nondum confessâ, sunt materia necessaria, quia necessariò debent explicari, ut gratia conferatur. Quando autem dicimus quòd peccata sunt materia poenitentiæ; hoc intelligitur de materiâ, circa quam destruendam; ad destructionem enim peccati tendit Pœnitentia.

C O N C L U S I O P R I M A.

MA T E R I A remota Pœnitentiæ sunt peccata actualia commissâ post Baptismum: quia materia remota est ea circa quam versatur materia proxima; sed actus poenitentis, qui sunt materia proxima, nempe contritio, confessio & satisfactio, versantur circa peccata quæ confitemur; & de quibus dolemus: ergo peccata sunt materia remota. Dixi, commissâ post Baptismum; ea enim quæ committuntur ante Baptismum, & non sunt expiata per illum, propter obicem & fictionem, non sunt materia pœnitentiæ,

Pœnitentiæ ; quia sunt commissa ab illis qui sunt extra Ecclesiam ; quia verò pœnitentia est iudicium , & non potest fieri iudicium , nisi in ea quæ subduntur Ecclesiæ ; dicendum est quòd illa peccata quæ sunt commissa ante Baptismum fide receptum , remittuntur per ipsummet baptismum præcedentem , quando scilicet removeretur obex : fictio verò quæ est peccatum concomitans & obsequens Baptismum , est materia Pœnitentiæ ; & sic licet baptisatus non teneatur confiteri peccata ante Baptismum fide receptum commissa , teneatur tamen confiteri fictionem & alia peccata quæ sequuntur. Quia diximus peccata esse materiam Pœnitentiæ , nedum mortalia , sed etiam venialia ipsi subsunt ; cum hoc discrimine , quòd mortalia sint materia necessaria Pœnitentiæ , venialia autem sunt tantum materia sufficiens : unde quis potest confiteri tantum unum aut duo peccata venialia & alia reticere , quoad peccata verò dubiat , non sunt materia neque necessaria , neque sufficiens Pœnitentiæ : Unde sacerdos non debet impendere absolutionem , quando pœnitens est dubius si peccaverit : quòd si tamen sint quædam circumstantiæ non quidem convincentes , sed quæ magis inclinent in partem peccati , potest dari absolutio sub conditione.

CONCLUSIO SECUNDA.

MATERIA proxima Pœnitentiæ sunt actus pœnitentis , nimirum Contritio , Confessio & satisfactio ; Absolutio enim cadit immediatè super illos actus ; & mediatè super peccata , & huius actus congruè requiruntur,

ut corde, ore & opere compensem injuriam Deo factam per peccatum. Hi autem actus requiruntur, tum pro peccatis mortalibus, tum pro venialibus; ita quòd tamen contritio, confessio, & satisfactio, cadentes supra peccata venialia & supra mortalia jam confessa, sint materia proxima sufficiens Pœnitentiæ; cadentes verò supra mortalia non confessa, sint materia necessaria.

O B J E C. contra id quod diximus peccata mortalia jam confessa & remissa, esse materiam sufficientem pœnitentiæ, quòd scilicet forma non possit bis cadere supra eandem materiam: ergo nec absolutio duplex supra idem peccatum. Respondeo, nostram assertionem veram esse. Benedictus enim Undecimus in extravaganti primâ de Privilegiis, dicit esse salubrem talem confessionem, cujus ratio peti debet ex institutione Christi, qui ad majorem utilitatem animarum, non limitavit hoc Sacramentum ad unum actum remissionis; unde, ut respondeatur ad objectionem, dico: Quòd forma non possit quidem cadere bis supra eandem materiam proximam; unde sacrilegium esset proferre duplicem absolutionem supra unam confessionem; forma tamen potest cadere bis super eandem materiam remotam, ex eâdem enim aquâ potest fieri multiplex Baptismus; & sic absolutio poterit cadere supra duplicem confessionem quam aliquis faciet de eodem peccato.

O B J E C. secundò: Si peccatum jam remissum denuò absolvatur; Forma absolutionis qua Sacerdos dicit, *Ego te absolvo*, non erit

vera: quia non absolvit à peccato, nec peccatum remittit, quoniam jam remissum est. Respondeo, quòd Sacerdos non absolvit in tali occasione absolutè, quasi remittat peccatum antea non remissum; quia prima absolutio semper manet rata, absolvit tamen proportionatè, juxta dispositionem suscipientis, augendo scilicet ipsius gratiam per beneficium absolutionis, absolutio ergo habet suum effectum, qui consistit in collatione gratiæ, qua peccatum deletur, si sit in animâ, vel qua anima magis gratificatur, si non habeat peccatum: & sic forma est semper vera suo modo.

Q U Æ S T I O I I I .

Quanam est forma Pœnitentiæ

SCOTUS ait, Pœnitentiæ essentiam consistere in verbis formæ, quamvis requirantur necessariò actus pœnitentis ad validam ejus receptionem. D. Thomas verò & alii, asserunt essentiam Pœnitentiæ constare ex actibus pœnitentis & absolutione tanquam materia & forma: sed facile conciliantur; quia Scotus per essentiam intelligit id quod præcisè confert gratiam, quod attribuendum est verbis; sicut enim sola verba significant gratiam, proinde illam conferunt. Hoc non impedit autem, quin actus pœnitentis requirantur ad faciendam essentiam completam hujus Sacramenti. Quærimus autem hîc, quanam sint verba quæ pertinent præcisè ad formam hujus Sacramenti.

CONCLUSIO.

FORMA Pœnitentiæ consistit præcisè in his duobus verbis, *Absolvo te* ; pronomen enim, ego, continetur sub verbo : & ratio nostra est ; quia forma cujuslibet Sacramenti consistit in illis verbis quæ significant proprium effectum ejus ; sed illa duo verba significant remissionem peccati quæ est ejus effectus : ergo forma illius præcisè consistit in ipsis. Eundem tamen effectum possent producere verba æquipollentia, sic validè absolveret quisquis, dicendo, *Remitto tibi peccata, impertior tibi Sacramentum absolutionis, libero te à peccatis tuis, absolvo tuam dominationem, absolveris à me, absolvatur servus Christi*, ut Græci dicunt. Potest etiam cadere absolutio super plures in necessitate, ut in periculo naufragii, vel pugnæ imminantis. Ex hac conclusione plura colligi possunt scitu dignissima.

Primò, verba quæ præcedunt aut sequuntur non esse de necessitate Sacramenti : congruè tamen præmittitur ista deprecatio, *Miserere tui*, ad impetrandum à Deo ne sit impedimentum ex parte recipientis. Non est necessarium addere, *à peccatis tuis* ; quia factâ confessione peccatorum, satis patet sententiam absolutionis applicari ad peccata confessa ; jure tamen dicitur ad majorem expressiorem. Frustra dicitur *ab omnibus*, quia non potest unum absolvi sine alio. Non est tandem necessarium dicere : *In nomine Patris, & Filii, & Spiritu sancti* ; unde Doctores sentiunt Pœnitentem esse absolutum eo instanti, quo hæc verba proferuntur, *absolvo te*.


DE SACRAMENTIS: 221

Secundò quòd per hæc verba , *absolvo te* , Sacerdos non tantùm declarat pœnitentem esse absolutum à Deo , ut vult Magister sententiarum ; sed reipsâ Sacerdos absolvit , tum à culpâ , tum à pœnâ æternâ quam commutat per absolutionem in temporalem ; si enim Sacerdos tantùm declararet pœnitentem esse absolutum à Deo , debuisset Christus dicere , quæcumque soluta sunt in cœlis , solvetis in terrâ ; contrarium tamen dixit , scilicet , *Quæcumque solveritis super terram , erunt soluta & in cælis*. Concil. Constant. determinavit hanc veritatem , sicut Trident. sess. 14. cap. 16. unde Martinus V. declaravit hæreticum contrarium asserentem. Quòd si Deus dicat Esayæ 43. *Ego ipse deleo peccata* ; hoc est , principaliter , & Sacerdos ministerialiter.

Tertiò sciendum , Absolutionem sub conditione futurâ esse invalidam , validam verò sub conditione de præsenti ; unde non potest Sacerdos dicere , *ego te absolvo* , si cras restituas ; potest tamen dicere , *ego te absolvo* , si doles , vel si intendas restituere. Ratio autem quare absolutio sub conditione futurâ non valet , est quia Sacerdos non potest suspendere effectum Sacramenti ; Sacramentum enim vel est validum statim atque prolata est forma , vel est validum adveniente conditione ; non autem est validum dum profertur forma , quia Sacerdos non habet intentionem ipsum absolvendi , nisi positâ conditione , non est etiam validum cum ponitur conditio , quia pro tunc non est amplius materia , nec forma : ergo sub tali conditione futurâ invalida est absolutio : sic omnes Doctores,

222 DE SACRAMENTIS.

Quartò notandum, absolutionem non possèdari absenti, unde Clemens Octavus in decreto super hoc edito statuit absolutionem absenti collatam esse invalidam, & illos affici excommunicatione Summo Pontifici reservata, qui absolvunt absentem, vel dicunt aliquem posse per litteras, vel per nuntium peccata confiteri absenti, & ab eodem absolutionem obtinere. Ratio est, quia forma debet proferri voce humanâ, & ad personam præsentem dirigi, ut patet ex particula, *absolvo te*, quoad personas præsentès. Nec absolutio debet dari in scriptis, nec confessio fieri; utraque enim debet esse verbalis, & maxime absolutio; licet enim confessio defectu linguæ possit fieri signis & nutibus, non tamen sic absolutio dari potest; unde differt Pœnitentia à Matrimonio, quod potest confici nutu, signo, & inter absentes: quia Christus instituit Matrimonium ut contractum, cui addidit nomen Sacramenti; sic autem potest fieri contractus. Quòd si quis dicat, absolutionem posse dari in scriptis, hoc verum est de absolutione censurarum, & de relaxatione reservationis casuum; non verò de absolutione Sacramentali, quæ tollat peccatum reservatum, vel delictum cui annexa est censura.



QUÆSTIO IV.

Utrum per Pœnitentiam omnia peccata remittantur ?

CUM locuti fuerimus antea de naturâ Pœnitentiæ , ipsius materia & formâ , nunc dicendum est de ipsius effectu , qui est quadruplex ; quorum primus versatur circa remissionem peccatorum mortalium : secundus circa remissionem venialium : alter circa relaxationem reatûs seu pœnæ debitæ peccato : ultimus tandem est reviviscentia meritorum & recuperatio virtutum. De his deinceps quæremus. Primò , an per Pœnitentiam quodlibet peccatum mortale remittatur.

CONCLUSIO.

OMNIA peccata mortalia per pœnitentiam ita remitti possunt , ut nec gravitas , nec multitudo ipsorum hanc remissionem impediat. Hoc est contra Novatianos , dicentes reliqua peccata , præsertim Apostasiam à fide , & Negationem Christi in tormentis , non posse remitti. Quòd multitudo peccatorum non impediat Pœnitentiam , patet ex responso Christi ad Petrum , *Non dico tibi usque septies , sed usque septuagies septies* : quod omnes intelligunt de infinitis vicibus. Quod gravitas peccatorum non obstat efficacitati Pœnitentiæ , testatur Esayas cap. 1. *Si fuerint peccata vestra ut coccinum , quasi nix dealbabitur.* Quoad opinionem

224 DE SACRAMENTIS.

Novatianorum, contradicit Scripturæ; quoniam Petrus qui Christum negavit, egit pœnitentiam, & Paulus 2. ad Timotheum 2. docet eos qui à fide defecerunt, admonendos esse, si fortè per Pœnitentiam resipiscant. Quoad rationes utriusque partis confirmativas, petuntur ex hoc quòd infinitus sit thesaurus bonitatis divinæ; quòd etiam Deus velit neminem perire, quod insuper damnatus fuerit Cæinus dicens, *Major est iniquitas mea, quàm ut veniam merear*; quod denique homo in hac vitâ existens est semper viator, & proinde potest semper accedere ad beatitudinem, & per consequens potest semper obtinere remissionem suorum peccatorum per Pœnitentiam. Non est ergo credendum, esse quemdam numerum peccatorum ad quem perveniens peccator, non possit amplius veniam obtinere: Unde, si Scriptura aliquando dicere videatur, quòd mensura peccatorum est impleta; hoc intelligitur respectu punitionis temporalis, non verò æternæ; ita quòd sensus sit, quòd Deus decreverit permittere certum numerum peccatorum, & postea punitionem temporalem infligere de illis.

Objic. ex ad Hebr. 6. *Impossibile est eos qui semel illuminati sunt, & ceciderunt, rursus ad Pœnitentiam renovari.* Resp. hoc intelligi de renovatione per alium baptismum, qui vocatur Pœnitentia, ad differentiam multiplicis lavacri quod erat in veteri lege: vel si sit sermo de Pœnitentiâ, ibi *impossibile* sumitur pro difficile. Quòd si ad Hebr. cap. 10. dicat Paulus, *Voluntariè peccantibus post acceptam notitiam ve-*

DE SACRAMENTIS. 225

ritatis non relinqui hostiam pro peccato; hoc est, non debere expectari quòd Christus iterum pro illis moriatur. Quòd si peccata in Spiritum sanctum dicantur irremissibilia: Respondendum, quòd aliqui per peccata in Spiritum sanctum intelligant præsumptionem de divina misericordia, desperationem de illa, contemptum gratiæ, invidentiam fraternæ gratiæ, & impugnationem agnitæ veritatis; quæ omnia peccata læduat bonitatem divinam, quæ appropriatur Spiritui sancto; & pro tunc illa peccata dicuntur irremissibilia, in quantum scilicet difficile est, ut remittantur: Scotus verò per peccatum in Spiritum sanctum, intelligit impœnitentiam finalem, quæ certè irremissibilis est, quia supponitur quòd homo in illâ decedat. Sic etiam intelligendus est Joannes dicens, *Esse peccatum ad mortem*: loquitur enim de peccato, cum quo aliquis moritur, & pro tali non est orandum.

QUESTIO V.

An peccata possint remitti sine Pœnitentiâ?

CONSTAT primò, sine Pœnitentiâ Sacramento posse remitti peccatum cum Pœnitentiâ virtute: quando scilicet deest locus Sacramento Pœnitentiæ, secundum Chrysostomum Homil. 23. in Matthæum. *Non est aliquod omninò peccatum quod non cedat pœnitentiæ virtuti.* Constat 2. quòd ubi adest copia Pœnitentiæ Sacramenti, peccatum non remittatur

sine illa de communi lege. Constat 3. quòd virtualis Pœnitentia, quæ consistit in dilectione Dei super omnia, possit remittere peccatum; qui enim nullo modo de peccatis cogitat, potest elicere actum dilectionis Dei, quo convertitur ad Deum, & per quem paratus est compensare injuriam Deo factam, & observare illius mandata; sed dubitatur, utrum sine Pœnitentia virtute & sine Pœnitentia Sacramento formaliaut virtuali, possint remitti peccata per absolutam Dei potentiam.

CONCLUSIO.

DE potentia Dei absoluta potest remitti peccatum sine Pœnitentia, modò homo non actualiter inclinetur ad illud; habere enim talem affectum actuale est peccare de novo. Conclusio hæc est Scoti in quartum distinct. 14. quæst. 1. parag. *Ex his.* Cujus ratio est, quia actus peccatoris, v. g. Attritio, non requiritur ad remissionem peccati, tamquam forma per se expellens peccatum, sed tamquam dispositio; atqui non repugnat Deum conferre effectum formalem absque dispositione: ergo Deus potest conferre gratiam, qua peccatum remittatur sine pœnitentia & sine ullo actu pœnitentis. Non dependet enim infusio gratiæ ita absolute à Pœnitentia hominis, ut implicet contradictionem, illam dari absque ullo actu ejus. Deinde, per potentiam absolutam Deus potest ita diligere hominem in peccato, ut illum elevet ad sui visionem: ergo poterit elevare ad gratiam. Tandem non est quid minus, dare suum filium peccatoribus, quàm gratiam; sed Deus dedit nobis suum filium, cum adhuc esse-

mus in peccato : ergo poterit dare gratiam peccatori, dummodo non adhæreat actu suo peccato.

Objic. Tandiu peccator in peccato manet, quamdiu illud non retractavit : ergo non potest peccatum remitti sine actu peccatoris. Resp. antecedens esse verum de lege communi, in qua Pœnitentia necessaria est ; falsum tamen de lege extraordinaria, ubi Deus altiori modo remitteret peccatum per formam contrariam ipsum expellentem, nempe per gratiam, quæ daretur sine illa Pœnitentia. Dices, Ut tollatur peccatum, debet tolli conversio ad creaturam; sed illa conversio non potest tolli nisi per actum peccatoris : ergo sine actu peccatoris, idest sine Pœnitentia, peccatum non potest remitti Resp. talem conversionem posse tolli per infusionem gratiæ, quæ habet vim convertendi hominem ad Deum, & proinde tollit conversionem ad creaturam.

Q U Æ S T I O VI.

Virum peccatum possit remitti sine infusione gratiæ ?

EX præcedenti quæstione sine Pœnitentia & motu pœnitentis potest peccatum remitti per gratiam habitualement, quæ est forma incompossibilis cum peccato, & proinde peccatum tollit. Hic quærimus, an etiam sine ipsa gratia & sine actibus pœnitentis possit peccatum remitti de potentia Dei absoluta.

SINE ullâ mutatione pœnitentis, vel extrinsecâ, quæ fiat per actus ipsius; vel intrinsecâ, quæ fiat per infusionem gratiæ, potest peccatum remitti per condonationem; modò, ut diximus, voluntas peccatoris nullo modo actualiter adhæreat peccato; quia si actu inhæreret, esset novum peccatum, & implicat peccatum remitti pro eo instanti quo committitur; quia peccatum sic esset, & non esset. Ratio est, quia Deus potest facere sine causâ secundâ, quod facit cum eâ, atqui per gratiam Deus remittit peccatum: ergo sine illâ potest illud remittere, simpliciter condonando ipsum. Deinde, macula & offensa quæ incurritur per peccatum, non est physica, sed moralis: ergo ut tollatur, non requiritur mutatio physica quæ fiat per gratiam, sed sufficit mutatio moralis per condonationem: illa tamen remissio peccati non erit propriè justificatio, quia non infundetur gratia justificans: Unde ille cui peccatum remitteretur sine gratia, non esset propriè amicus Dei, quia non haberet gratiam; nec esset inimicus, quia non haberet peccatum; sed amor ille, quem Deus haberet pro illo homine, esset purè naturalis, quia per eum diligeretur homo in puris naturalibus existens.

OBJEC. Peccatum habituale consistit in privatione gratiæ: ergo non potest tolli sine infusione illius. Resp. negando antecedens, aliàs Angelus in puris naturalibus existens esset peccator; sed consistit peccatum in aversione à Deo, quæ involvit privationem gratiæ,

& averſio à Deo duplex adhuc eſt ; negativa ſcilicet , qua homo non eſt converſus ad Deum , & hæc non habet rationem peccati , & poſitiva , qua homo poſitivè eſt averſus à Deo , & illi contrarius ; ſi ſine gratia peccatum remitteretur , homo remaneret averſus à Deo , ideſt non converſus ad illum , neque per gratiam , neque per poenitentiam ; non eſſet verò averſus à Deo poſitivè , neque contrarius , quia non haberet peccatum . Dices , Peccatum remanet quamdiu remanet macula ; ſed macula non poteſt tolli niſi per gratiam : ergo nec peccatum . Negatur minor , illa enim macula non eſt forma realis & phyſica , quæ debeat deleri per formam realem & phyſicam ; ſed eſt tantum moralis , quæ conſiſtit in inimicitia Dei , quam Deus poteſt condonare gratis ; & pro tunc eſſet ſignum & effectus amicitia Dei , non quidem poſitivæ quâ Deus conferret bonum ſeu gratiam , ſed negativæ , qua Deus auferret malum .

O B j e c t . Cauſa formalis juſtificationis eſt gratia , ex Conc. Trident. ſeſſ. 6. cap. 7. ergo ſine illâ peccator non poteſt juſtificari : ergo nec peccata ejus ſine ea remitti poſſunt . Reſp. concedendo primam conſequentiam : quia nullus reverà juſtificari poteſt ſine gratia juſtificante ; poteſt tamen remitti peccatum ejus ſine juſtificatione , per condonationem ſcilicet ; & ſic negatur ultima conſequentia . Dices , Ergo pro tunc peccata remitterentur per non imputationem , quod eſt Calvinisticum . Negatur conſequentia , quia quando peccata non imputantur , non tolluntur reverà ; ſi verò

230 DE SACRAMENTIS;

condonarentur, tollerentur absolute, licet non tollerentur per justificationem, ut fiunt de lege communi & per Pœnitentiam ordinariam, ubi Deus perfectiori modo remittit peccatum, tollendo, scilicet peccata & peccatorem justificando.

QUESTIO VII.

An unum peccatum mortale possit remitti sine alio?

DE lege communi hoc non fit: quia enim Deus remittit peccatum mortale per gratiam, non potest remitti unum peccatum mortale per infusionem gratiæ, si remaneat aliud; pro tunc enim homo esset simul amicus Dei, per gratiam scilicet; & inimicus ejus, nempe per peccatum quod remaneret: quando ergo justificatio hominis fit per infusionem gratiæ, omnia mortalia tolluntur. Quæstio ergo nostra est de lege Dei absoluta; & affirmativa erit.

CONCLUSIO.

DE potentia Dei absoluta, unum peccatum mortale sine alio remitti potest; si enim, ut diximus in præcedenti conclusione, Deus absolute possit remittere peccata per condonationem, poterit remittere unum sine alio; quia potest condonare unum, non condonando aliud. Deinde, Deus potest statuere per quemcumque actum Contritionis peccatum condonare, & non infundere gratiam; sed po-

DE SACRAMENTIS. 231

test quis atteri de uno peccato, agnoscens illius foeditatem, & non atteri de alio: ergo potest unum sine alio remittere. Tandem, posita contritione de pluribus peccatis, potest Deus acceptare Contritionem pro uno & non pro altero; licet enim Contritio sit actus contrarius peccato, non expellit tamen formaliter peccatum, sed tantum dispositivè; & non obstante tali dispositione, Deus potest absolute negare remissionem peccati.

QUESTIO VIII.

*Utrum peccatum tollatur per solam non-
imputationem?*

HÆRETICORUM aliqui voluerunt remissionem peccatorum fieri tantum per non imputationem, non verò per destructionem illorum; itaut peccata remaneant in homine justo, licet Deus illa non imputet peccatori, sed ita se gerat circa illum, ac si peccatum non esset in eo. Alii autem putaverunt peccatum remitti quidem per condonationem, non infundi verò gratiam quæ formaliter inhæreat animæ, sed peccata tantum condonari per justitiam Christi, quæ nobis imputatur. Utroque refutabit

CONCLUSIO.

PECCATA non remittuntur per solam non imputationem, nec per solam condonationem, sed per infusionem gratiæ & justitiæ habitualis quæ nobis formaliter inhæret. Ra-

tio primi est, quia peccatum non imputari, est non remitti, sed tantum non puniri; atqui peccata hominum remittuntur & tolluntur reverà: ergo non remittuntur per solam non imputationem. Minor habetur Joann. 1. *Ecce Agnus Dei, ecce qui tollit peccata mundi.* Act. 3. *Convertimini ut deleantur peccata vestra.* Ezechielis 36. *Effundam super vos aquam mundam, & mundabimini.* Secundum habetur primo ex Concilio Tridentino sess. 6. can. 4. *Si quis dixerit, homines justificari vel sola imputatione justitiae Christi, vel sola peccatorum remissione, exclusa gratia & charitate qua in cordibus eorum per Spiritum sanctum diffundatur atque illis inhæreat, Anathema sit.* Ratio est, quia Christus per Pœnitentiam nobis restituit id quod amiseramus in Adamo; sed in ipso amisimus, non justitiam imputativam, sed justitiam inhærentem: ergo justitia inhærens in Pœnitentiâ recuperatur. Deinde si peccatum remaneret in homine, licet non imputaretur, non possemus propriè vocari justi: quando enim sunt duæ formæ contrariæ, una inhærens, alia extrinsecâ, denominatio sumitur ab inhærente; Æthiops enim semper dicitur niger, quamvis indutus candidâ veste: ergo à pari, si justitia quâ remittitur peccatum, esset tantum forma extrinseca quæ nobis imputaretur, non deberemus ab illâ vocari justi, sed potius injusti, si peccatum non destrueretur.

O b j e c. ex Psalmo 31. *Beati quorum remissa sunt iniquitates, & quorum tecta sunt peccata.* Versu item 3. *Beatus vir cui non imputavit*

Demonstratur peccatum. Denique 2. ad Corinth. 5. *Deus dicitur in Christo mundum reconcilians sibi, non reputans illis peccata ipsorum.* Respondeo, quòd reverà peccata hominum non imputantur illis post Pœnitentiam; sed ideò non imputantur, quia destruuntur per gratiam habitua-lem; unde dicimus in conclusione, illa non remitti per solam non imputationem; sed dicuntur non imputari & regi, non quòd remaneant; sed quia tolluntur. Quòd si 2. ad Corinth. 5. *Christus dicatur peccatum fecisse; imò & peccatum factum fuisse; ut nos efficiamur iustitia Dei in illo:* Ex hoc non concludendum est, quòd non habeamus aliam iustitiam præter iustitiam Christi; sed ideò hoc dicitur, quia iustitia Christi meruit nostram.

Q U Æ S T I O I X.

An per Pœnitentiam remittantur peccata venialia?

EFFECTUM nobiliorem Pœnitentiæ, qui est peccati mortalis remissio, sequitur alter, qui est remissio venialis: de hoc quæremus, utrum possit remitti per Pœnitentiam; & ulterius, utrum possit remitti extra illam?

C O N C L U S I O.

PECCATA venialia delentur per Sacramentum Pœnitentiæ; possunt tamen remitti extra illud, per contritionem scilicet, & per dilectionem Dei, non verò per attritionem,

nisi jungatur cum Pœnitentia, vel aliis Sacramentis, quæ habent vim faciendi de attrito contritum. Primum patet ex hoc quòd Pœnitentia possit remittere peccata mortalia; ergo & venalia, cum sit minor offensa in istis. Eadem currit ratio pro secundo & pro tertio: quia si Contritio & dilectio Dei extra Sacramentum possunt remittere mortalia, à fortiori venialia. Ut tollat autem contritio extra Sacramentum, seu pœnitentia virtus, peccata mortalia, debet dolere peccator de peccatis venialibus, vel in communi, vel sigillatim; non tantum quatenus sunt offensa Dei, sed & ut levis offensa Dei; dolor enim de peccatis venialibus ut sunt gravis offensa Dei, non sufficeret ad deletionem venialium: unde actus doloris requisitus est ad delenda mortalia, quia ad delendum peccatum mortale sufficit voluntas non displicendi Deo in gravibus, & ad tollendum veniale requiritur voluntas non displicendi Deo in minimis; & sic iste amor & ista voluntas involvit priorem, quoniam non potest quis dolere de levi offensa Dei, quin doleat de gravi; potest tamen dolere de gravi, non de minima. Ut etiam dilectio Dei possit remittere venialia, debet ita perfecta esse, ut per eam homo velit placere Deo, nedum in gravibus actionibus, sed etiam in minimis. Quoad quartum, Attritio extra Sacramentum non remittit peccata venialia: quia vel remitteret homini injusto; vel homini justo; non remittere autem potest homini injusto, quia conjunguntur cum peccato mortali, quod non potest remitti per solam Attritionem; ergo nec

veniale: Nec etiam remittit homini iusto, quia sequeretur nunquam peccata venialia remitti per absolutionem, quoniam absolutio præsupponit Attritionem, & sic, si attritio deleret peccatum veniale, nihil faceret absolutio, contra mentem Doctorum, qui dicunt peccata venialia esse materiam sufficientem absolutionis.

Q U Æ S T I O X.

Virum Sacramentalia possint peccata venialia remittere?

PER Sacramentalia intelliguntur res, aut actiones sacræ institutæ ab Ecclesia, ut per earum usum, peccatorum venialium obtineatur remissio. Hæ autem actiones hoc versu continentur: Orans, tinctus, edens, confessio, dans, benedicens. Per *orans*, intelligitur oratio Dominica, vel ea quæ fit in Ecclesia consecrata, aut unctio pectoris, ut habetur in jure canonico. Per *tinctum*, intelligitur aqua benedicta; & unctio ceremonialis in Regem, & similes; Per *esum*, intelligitur manducatio panis benedicti; Per *confessionem*, intelligitur Confessio generalis, quæ v. g. fit publicè ante missam; Per *dans*, intelligitur eleemosyna, vel alia opera misericordiæ, tam corporalia, quam spiritualia. Tandem per *benedicens*, intelligitur benedictio Episcopi vel Abbatis consecrati,

CONCLUSIO.

SACRAMENTALIA delent peccata venialia; ad hoc enim instituuntur ab Ecclesiâ, ut habet traditio communis. Illorum effectus non est infallibilis; non est enim fundatus in speciali promissione Christi; sed in impetratione Ecclesiæ, quæ ob sui sanctitatem meretur exaudiri à Deo, licet aliquando non exaudiatur, oratio enim non semper habet suum effectum, maximè quando pro aliis funditur: si ergo aliquando Sacramentalia peccata venialia non deleant, hoc est ex defectu suscipientis, qui cum multoties sit in peccato, dum illa accipit, peccatum ejus impedit, quia Ecclesia audiatur. Quòd si quæramus, quomodo Sacramentalia peccatum veniale remittant; Respondendum est, illa non remittere *ex opere operato*; ea enim instituit Ecclesia, quæ instituere non potest signa sensibilia quæ remittant peccata, vel gratiam conferant *ex opere operato*: superest ergo ut deleant peccata venialia *ex opere operantis*; quatenus si sumantur ut debent & cum debitâ reverentiâ, nata sunt impetrare à Deo per preces Ecclesiæ gratias actuales quæ in nobis excitent actum contritionis impossibilem cum peccatis venialibus, & consequenter ea tollentem: quia tamen aliquando sumuntur irreverenter, talis gratia non datur; vel si datur, rejicitur aliquando, & sic non remittuntur peccata venialia.

Hic quæri posset, an peccatum mortale possit remitti sine veniali; an veniale possit tolli sine mortali; an unum veniale possit remitti

sine alio; an venialia remittantur sine infusione gratiæ; quomodo tandem peccata venialia remittantur quando quis cum ipsis moritur. Respondeo primò, peccatum mortale posse remitti sine veniali; ad remissionem enim mortalis sufficit displicentia peccati, ut est gravis offensa; & ad remissionem venialis requiritur displicentia ipsius, ut est levis offensa Dei: potest autem quis sibi displicere de gravi offensâ, & non displicere de levi: ergo mortale potest tolli sine veniali. Respondeo secundò, de potentiâ ordinariâ non potest tolli veniale sine mortali; quia tolleretur vel per attritionem junctam cum Sacramento, vel per contritionem extra Sacramentum, vel tandem per attritionem sine Sacramento. Si autem tolleretur peccatum veniale per attritionem cum Sacramento, vel per contritionem solam, infunderetur gratia habitualis quæ producit per utramque, ac proinde remitteretur etiam peccatum mortale, quoniam est impossibile cum gratiâ. Non potest etiam peccatum veniale remitti per attritionem extra Sacramentum; quia attritio sola non remittit, neque peccatum mortale, neque veniale, ut diximus in præcedenti quæstione. Hoc tamen non impedit quin de potentiâ extraordinariâ aliquis possit elicere actum doloris impossibilem cum peccato veniali, quo ipsum deleretur, & Deus denegare gratiam; & sic removeretur peccatum mortale, deleta veniali. Respondeo tertio, quòd unum veniale possit remitti sine aliò veniali; homo enim potest elicere actum doloris de intemperantiâ

238 DE SACRAMENTIS.

levi admissa, & sic habere remissionem illius; non autem dolere de levi Injustitia quam commisit; & sic remanebit unum peccatum veniale, & remittetur aliud. Respondco quartò, non remitti quidem veniale peccatum sine infusione gratiæ, aut ejus augmento; vel enim peccata venialia remittuntur cum peccato mortali, & tunc infunditur gratia, sine qua peccatum mortale non deletur, vel remittuntur sine mortali, respectu scilicet justì, qui habebit tantum peccata venialia, & tunc peccatum veniale remittitur per actum Contritionis, qui cum sit bonus & meritorius, auget proinde gratiam; & sic nunquam remittitur peccatum veniale sine gratia, vel ejus augmento. Ex natura tamen peccati venialis non requiritur gratia, ut remittatur; quia si actus Charitatis vel Contritionis de peccato veniali non mereretur augmentum gratiæ, posset tamen delere peccatum veniale, etiamsi Deus non augetet gratiam. Resp. quintò, quòd alii dicant peccatum veniale cum quo quis moritur, remitti, in primo instanti; quo anima exiit è corpore in quo cognoscit statum suum peccati; & habet auxilium sufficiens, quo retractet illud peccatum: Adduntque, quòd si non sit amplius in statu merendi, respectu præmii essentialis, possit tamen adhuc mereri remissionem talis peccati, quòd non potest remitti alio modo; necessarium tamen est ut remittatur, quoniam ex una parte *nihil coinquinatum intrabit in regnum calorum*; & ex alia parte non est justum, quòd anima in gratia Dei existens, semper privetur visione beatifica. Sco-

tus verò dicit, peccatum veniale remitti per solutionem pœnæ debitæ in Purgatorio, adjuncto tamen actu Charitatis quo anima acceptat liberè tales pœnas, qui quidem actus potius delet peccatum, quàm pœna; quia ille actus est impossibilis cum peccato & mixtus aliquo dolore; pœna verò non solvit peccatum quantum ad maculam.

QUESTIO XI.

An remissa culpa, tollatur reatus ad pœnam?

PER culpam duo contrahit homo, maculam scilicet & reatum pœnæ, seu obligationem ad pœnam; remissa culpa per Pœnitentiam tollitur quidem macula peccati, & aufertur reatus pœnæ æternæ; an autem remaneat reatus seu obligatio ad pœnam temporalem, negant hæretici, affirmant Catholici, dicentes pœnam æternam mutari in temporalem, quia scilicet Deus taxavit diversas pœnas diversis peccatis: ita quòd peccato manenti in æternum assignaverit pœnam æternam; & peccato per pœnitentiam revocato assignaverit pœnam temporalem proportionatam malitiæ peccati, vel contritioni, aut attritioni; ita ut si contritio fuerit major, minus remaneat de pœna subeunda; si fuerit minor, magis supererit.

REMISSA culpâ, non semper tollitur omnis reatus ad pœnam, sed sæpissimè remanet pœna temporalis luenda, non tamen semper; quia actus contritionis aliquando est ita fervens, ut culpam & pœnam tollat. Hæc conclusio habetur expressè 2. Reg. 12. ubi David, ob adulterium & homicidium, remissâ culpâ, punitur morte filii in pœnam sui peccati; unde dixit illi Nathan Propheta, *Transtulit à te Deus peccatum tuum,* (en remissio culpæ) *veruntamen quia blasphemare fecisti inimicos Dei vivi, filius qui natus est tibi, morte morietur,* en pœna remanens. Deinde, licet remissum sit peccatum originale per Baptismum, remanent tamen mors, morbi, fomes peccati & aliæ pœnalitates: ergo sic dicendum est de actuali. Tandem, requirit communiter Pœnitentia in illis qui convertuntur, luctum, jejunium & eleemosynam, secundum hæc dicta, *Convertimini ad me in toto corde vestro, in jejunio & fletu & plantu.* Joël 2. & illud, *Eleemosynis redime peccata:* hoc autem denotat, pœnam temporalem luendam remanere post remissionem culpæ. Nulla tamen datur ratio hujus, nisi sola voluntas divina; sicut enim culpam & pœnam æternam gratis remittit, sic & temporalem, quod tamen non facit; jure enim tales pœnas exigere potest Deus, ne detur nimia peccandi licentia.

Objic. Ezech. 18. *In quacumque die impius se averterit ad impietate sua, impietas ejus non amplius ei nocebit: sed Deus omnium peccatorum ejus obliviscetur.* Resp. hoc intelligi de pœnâ æternâ quæ

quæ post remissionem peccati non ampliùs nocebit homini; & de culpâ, quàm Deus revera obliviscitur post Pœnitentiam. Quòd si Deus multis remiserit peccata, & pœnitentiam non injunxerit; hoc factum fuit per gratiam specialem, quam Deus non omnibus impendit; & idè taliter usus est Christus circa illos, quia excitaverat in eis tantam contritionem, quòd per eam omnis pœna relaxari debuerit. Nec dicant adversarii, Deum infinitè satisfecisse pro nobis: ergo nos non indigere ulteriori satisfactione: quia licet infinitè satisfecerit quoad oblationem pretii, debemus tamen nobis hanc satisfactionem applicare; quòd sit reverà per pœnas quas subimus post remissionem culpæ. Si dicant, ablata causâ, aufertur effectus: ergo ablata peccato tollitur pœna: Hoc verum est tantùm, ubi effectus dependet continuò à causa sua; aliàs, sublato patre non remaneret filius. Reatus autem illius pœnæ non dependet à perseverantiâ peccati; sed à solo peccato, etiamsi parum duret. Dices, Contritio aufert culpam & pœnam æternam: ergo à fortiori temporalem, quæ est facilior. Resp. contritionem neutrum tollere, sed est Deus qui tollit utrumque ex pura misericordia, statuens dare contritioni remissionem culpæ, & relaxationem pœnæ æternæ, non verè pœnæ temporalis.



 QUÆSTIO ULTIMA.

*Utrum merita mortificata redeant per
Pœnitentiam ?*

HIC est tandem quartus effectus Pœnitentiae, de quo locuturi, prænotamus opera nostra vel esse mortifera, quæ mortem animæ afferunt, ut peccata; vel mortua, quæ fiunt ab homine existente in peccato mortali, ut eleemosyna facta extra gratiam, quæ dicitur mortua, quia caret principio vitæ, nempe ipsâ gratiâ; vel mortificata, quæ facti sunt ab homine dum est in gratiâ, dicuntur tamen mortificari per peccatum adveniens, in quantum stante peccato non habent jus ad gloriam: vel sunt vivificantia, quæ vitam gratiæ animæ afferunt, ut contritio & attritio cum Sacramento: vel sunt tandem viva, quia fiunt ab homine in gratia existente. Hoc posito, certum est, quod opera mortua non reviviscant, quia non antea vixerunt, & reviviscere supponit antea vixisse; sed quæstio nostra est de operibus mortificatis quæ facta fuerunt in gratiâ, & per peccatum mortificantur; quaeriturque de illis, an remoto peccato per Pœnitentiam, reviviscere incipiant.

CONCLUSIO.

OPERA mortificata redeunt per Pœnitentiam. Sic Concilium Tridentinum sess 16. cap. 6. sic & Hieronymus in hæc verba Pauli ad Galatas 3. *Tanta passi estis sine causa, non ta-*

men sine causa ; super quòd dicit, *qui ob Christi fidem laboraverit & postea lapsus fuerit in peccatum, non perdet merita sua, si ad pristinam fidem & studium revertatur.* Ratio est, quia merita nostra non extinguuntur per peccatum, sed semper manent in acceptatione divinâ, & solùm impeditur ipsorum efficacia propter peccatum ; & sic ablato peccato reviviscunt, idest dant jus homini ad præmium æternum ; tota enim ratio quare mortificantur, erat peccatum : ergo sublato peccato, vivificantur.

O B J E C. Peccata remissa non redeunt quando quis denuò cadit in peccatum : ergo nec merita redeunt per pœnitentiam. Resp. negando consequentiam ; ut enim, inquit Scotus, Deus pronior est ad miserendum, quàm ad puniendum ; unde vult quòd merita præterita redeant, non vult tamen quod revocentur peccata. Deinde idèd peccata non redeunt, quia destructa sunt penitus per Pœnitentiam, merita verò redeunt, quia remanserunt in acceptatione divinâ.

Quæres, an opera mortificata reviviscant ex misericordiâ vel ex justitiâ. Alii tenent primum cum Scoto, alii secundum : Utrumque tamen dici potest : Primum quidem, quia merita reviviscunt per ablationem peccati, peccatum autem tollitur ex divinâ misericordiâ ; justificatio enim est gratuita : Secundum etiam dici potest, quia Deus promisit dare præmium meritis, etiam mortificatis, modò reviviscant per gratiam ; Joëlis enim 2. Dominus pœnitentibus ait, *Reddam vobis annos, quos locusta, bruchus & rubigo comedit*, quod

Hieronymus intelligit de reditu bonorum operum quæ impediabantur per peccata quæ vocantur Locusta & Rubigo ; & sic redeunt ex iustitia fundata in promissione Dei.


Quæres secundò, an ille qui resurgit à peccato per Pœnitentiam, resurgat ad maiorem gratiam ? Dissentiunt Doctores : omnes quidem dicunt quod resurgat ad maiora merita, quia ad antiqua merita mortificata quæ redeunt per Pœnitentiam, additur meritum Pœnitentiæ, seu actus contritionis quem elicit : omnes etiam fatentur quod resurgat ad maiorem gloriam, quia gloria datur juxta intensiorem meritorum : cum ergo resurgat ad maiora merita, resurgit etiam ad maiorem gloriam. An autem resurgat ad maiorem gratiam ; alii respondent negativè, quia prima gratia, inquit, extincta est per peccatum, & merita remanent in acceptatione divinâ : & sic licet resurgat ad maiora merita, non tamen resurgit ad maiorem gratiam, nisi actus contritionis sit ita intensus, ut per illum mereatur maiorem gratiam illâ quam perdidit : Alii verò, & verisimiliùs, affirmant, & hoc juxta Concil. Trident. sess. 6. cap. 16. & 13. ubi habetur quod recuperetur gratia per Pœnitentiam ; quod si recuperetur gratia, & addatur nova correspondens actui Pœnitentiæ, sequitur quod per pœnitentiam ille qui resurgit à peccato, resurgat etiam ad maiorem gratiam, sicut ad maiorem gloriam & ad maiora merita ; & sic dicendum est quod gratia maneat etiam in acceptatione divinâ, quia merita non sunt merita, nisi quatenus infor-

mantur gratia; unde si merita maneat in acceptatione divina, manet etiam gratia. Nec est dicendum quod peccator recipiat utilitatem à peccato, si resurgat ad maiorem gratiam & gloriam; hoc enim non provenit ex peccato, sed ex poenitentia & meritis præcedentibus. Nec est etiam dicendum quod minori contritioni dabitur gratia major; licet enim gratia correspondens contritioni sit maior vel minor juxta intentionem contritionis, attamen gratia correspondens meritis præcedentibus potest esse major, si major fuerit ante peccatum.

Quæres, an sicut merita redeunt per poenitentiam, sic etiam redeant per novum peccatum peccata quæ antea remissa fuerant per poenitentiam. Jam respondimus negativè: quia tamen hoc majori explicatione indiget: Resp. primò, ipsa non redire quoad culpam; destructa sunt enim per poenitentiam; & sic si redirent, Deus illa reproduceret, quoniam homo ea non reproducit; hoc autem dicere est blasphemum. Resp. secundò, non redire peccata quoad poenam sensûs, quia non redit poena, si culpa non redeat. Resp. tertio, peccata redire quoad privationem gratiæ, & quoad poenam damni; quotiescumque enim aliquis in peccatum relabitur, privatur gratia, & debitum, incurrit carendi visione divina. Resp. quartò, peccatum posse redire tum quoad culpam, tum quoad poenam, de potentia Dei absoluta; potuit enim Deus remittere tum culpam tum poenam peccati, cum hac conditione, quod si committeretur denuò peccatum,

prima non censerentur amplius remissa, sed redirent tum quoad culpam, tum quoad poenam; quia tamen remittuntur peccata absolute & independenter ab eventu futuro, illa non redeunt. Resp. quintò, licet peccata non redeant formaliter, redeunt tamen virtualiter, in quantum aggravatur peccatum subsequens propter ingratitudinem in Deum, à quo peccator accepit summum beneficium, nempe remissionem peccatorum præcedentium, & quò peccata graviora sunt remissa, eo ingratitudo est gravior. Perriò, licet illa ingratitudo sit circumstantia notabiliter aggravans novum peccatum, non continet tamen omnem malitiam, quam continebant peccata remissa, nec constituit speciale peccatum. Quòd si in parabolâ Matth. 18. latâ dicatur revocatum fuisse primò omne debitum servi, attamen regem postea reperisse illud debitum à servo, quia non misertus erat conservi sui; ex hoc non est concludendum quòd, Deus sic faciat ad commissionem novi peccati; ex parabolâ enim nihil convincens inferri potest, sed tantum attendi debet finis ipsius; unde cum hæc parabola tantum ostendere prætendat, faciendam esse eleemosynam, propterea non est concludendum quòd peccata redeant, nisi virtualiter.





CAPUT SEXTUM.

De partibus Pœnitentia.

PARTES essentielles Pœnitentiæ sunt tantum duæ, scilicet materia & forma; per formam autem intelligitur absolutio Sacerdotis debite applicata; & per materiam intelliguntur actus pœnitentis, præsertim contritio & confessio; nam satisfactio est quidem pars integrans illius; non tamen essentialis, quia sine illâ potest remitti peccatum; ut patet de illis qui moriuntur antequam eam impleverint; est tamen pars integrans, quia ad integritatem iudicii pertinet punitio delicti, seu satisfactio pro illo: sicut ergo omnia membra sunt partes integrantes hominis, corpus verò & anima partes essentielles illius, sic in pœnitentia materia & forma sunt partes essentielles, satisfactio verò cum contritione & confessione est pars integrans. Volentibus ergo de omnibus agere, incipiendum est à contritione.

QUESTIO PRIMA.

Quid sit Contritio propriè sumpta?

CONTRITIO est nomen metaphoricum sumptum à rebus naturalibus; sicut enim aliquid dicitur conteri, quod cum antea du-

rum fuerit, in minutissimas partes postea comminuitur, ut destruatur; sic voluntas hominis dicitur conteri, quia cum antea veluti indurata fuerit in peccato, postea per gratiam emollitur & aboletur in eam peccatum, tum effectus peccati. Secundum rem, contritio est internus animi dolor de peccato commisso cum proposito non peccandi deinceps; & hæc dividitur in perfectam & imperfectam, juxta Concilium Tridentinum sess. 14. cap. 4. Prima, de qua nunc loquimur, vocatur contritio simpliciter; secunda attritio, & de illa postea dicemus.

CONCLUSIO.

CONTRITIO est dolor seu detestatio de peccato; ut est offensa Dei, super omnia detestabilia, propter Deum summè dilectum, cum spe veniæ & proposito non peccandi de cætero, & servandi mandata Dei, præsertim illud quod est de Confessione Sacramentali & de satisfactione suo tempore faciendis. Dicitur primò, *dolor*; non quidem appetitus sensitivi, sed voluntatis sibi displicentis & tristitiam habentis de peccato commisso; & in hoc attritio convenit cum contritione. Quòd si non habeatur tristitia de his quæ voluntariè accidunt, non minùs tamen habetur de peccato; licet enim velimus illud, cum committimus ipsum, tamen illud nolumus, dum conterimur. Dicitur secundò, *peccati ut est offensa Dei*; quia peccatum est objectum contritionis, ut est offensa Dei; detestari enim peccatum ut est contra rationem, vel ut sanitatem minuit, non est habere veram contritionem. Dicitur tertio, *super*

omnia detestabilia ; detestamur enim malum culpæ, & malum pœnæ ; & ad veram contritionem exigitur , ut plus detestemur malum culpæ , quàm quodcumque malum pœnæ : qui tamen conteritur, non debet in particulari comparare singula mala , v. g. mortem temporalem, aut pœnam æternam cum peccato , nec illam comparisonem debent proponere Confessarii, ut contritionem excitent in pœnitentibus ; imò hoc periculosum est , ut notat D. Thomas hîc q. 3. art. 3. ad quartum ; sed sufficit in confuso destetari peccatum super omnia mala detestabilia , & illa potiùs eligere quàm peccatum. Dicitur quartò , *propter Deum summè dilectum* ; *Veram* enim *pœnitentiam non facit, nisi amor Dei & odium peccati* , inquit Augustinus, serm. 7. de tempore. *Qui* ergo detestaretur peccatum super omnia detestabilia , quia adducit reatum pœnæ æternæ, non contereretur ; sed illa detestatio debet procedere ex amore Dei super omnia ; non quidem intensivè , potest enim mater habere dolorem intensiorem de morte filii , quàm de peccato ; sed appretiativè , ita quòd debeat præferre mortem filii ad peccatum. Dicitur quintò , *cum spe veniæ* ; qui enim desperaret de misericordia consequenda , committeret peccatum. Dicitur sextò , *cum proposito non peccandi deinceps* ; si tamen hoc propositum fuerit tantùm implicitum , sufficit ; illud autem includitur semper in contritione ; qui enim conteritur de peccato , diligit Deum super omnia , & non velle illi displicere neque in præsentî, neque in futuro. Dici-

tur septimò , *cum proposito servandi mandata Dei* ; qui enim non haberet talem voluntatem , censeretur habere affectum saltem virtualem ad peccatum. Additur tandem , *mandata* , præsertim de confessione & satisfactione ; quia licet contritio tollat peccatum , hoc facit semper in ordine ad confessionem & satisfactionem , quarum votum includitur saltem virtualiter in contritione.

Quæres , utrùm contritio cum tali voto remittat peccata ante absolutionem ? Omnes respondent quòd sic , quando contritio elicitur extra Sacramentum , ita quòd homo eliciens actum contritionis cum voto confitendi peccata , datâ occasione , illicò gratiam recipiat ; unde si postea confiteatur peccata , hoc est ut suum votum impleat & recipiat augmentum gratiæ virtute Sacramenti , & relaxationem pœnæ debitæ peccatis , & ut securior sit de remissione peccatorum ; quia si habuisset tantum attritionem loco contritionis , peccata quæ non fuissent remissa per talem attritionem , remitterentur per absolutionem sequentem , modò perseveraret attritio. An verò per contritionem remittantur peccata in Sacramento ante absolutionem ; aliqui respondent negativè , asserentes illam contritionem præcedentem absolutionem , manere in acceptatione divinâ , donec adveniat absolutio , cui præcisè spectat gratiam conferre & remittere peccatum : alii tamen meliùs asserunt ipsam contritionem conferre gratiam pro eo instanti quo elicitur , etiam si nondum advenerit absolutio ;

quod videtur conforme Concilio Tridentino
 Iess. 14. cap. 4. Quòd si dicatur, ergo frustra
 recipitur absolutio: ergo etiam falsa est forma
 Sacramenti, quâ Sacerdos dicit, *Ego te absolvo*:
 Respondebitur, utramque consequentiam
 esse falsam: Primò enim absolutio non est
 frustra; auget enim gratiam quam confert
ex opere operato, pœnam æternam remittit, &
 hominem reddit securiorem; cum enim nullus
 sciat se esse contritum, debet absolvi, ut vi Sa-
 cramenti & absolutionis ex attrito fiat contri-
 tus. Secundò, forma absolutionis non est falsa;
 Sacerdos enim dicens, *Ego te absolvo*, non inten-
 dit absolvere absolutè, sed secundùm exigen-
 tiam pœnitentis, in quantum scilicet Sacerdos
 potest, & pœnitens indiget; ita quòd si pœ-
 nitens habet tantùm attritionem de peccatis, re-
 verà absolvat de illis; si verò peccata sint
 remissa per antecedentem contritionem, pro
 tunc non remittit quidem peccata, sed gratiam
 auget, pœnam peccatorum minuit, & vulnus
 peccati tollit; quæ omnia sunt beneficia abso-
 lutionis; & sic verba Sacerdotis dicentis, *Ego
 te absolvo*, non sunt falsa.



QUESTIO II.

Quid sit Attritio, & quomodo à Contritione differat?

- **A**NTEA loquuti fuimus de contritione, quam alii dicunt esse actum charitatis, quia procedit ex amore Dei super omnia, licet meo sensu potius dici debeat actus poenitentiae virtutis: licet enim contritio includat actum amoris Dei, elicitur tamen à Poenitentiâ, quæ est virtus inclinans hominem ad compensandam offensam Deo factam; unde est quædam species iustitiæ commutativæ, quæ habet quatuor actus; quorum primus est dolor interior de peccato commisso, secundus est propositum non amplius peccandi, tertius est confessio peccatorum, quartus tandem est satisfactio pro poena debita peccato; nunc ergo dicendum est de Attritione.

CONCLUSIO.

ATTREDITIO ex Concil. Triden. sess. 14. cap. 4. est dolor imperfectus de peccato commisso, quatenus oritur; non ex dilectione Dei super omnia, sed ex aliis motivis, v. g. ex metu gehennæ, & ex metu amissionis gloriæ, vel ob turpitudinem peccati, cum spe veniæ & intentione non peccandi denuò. In hoc ergo differunt præcisè contritio & attritio, quòd contritio fiat ex motivo amoris Dei super omnia, non sic verò attritio; unde, si alii

dicant eas differre intentione vel duratione, aut quia una semper acceptetur à Deo, non semper altera, aut quia illa semper informatur gratia, non ista; aut tandem quia prima sufficit per se ad justificationem, non ultima; hæ omnes differentiæ non sunt essentielles; prius enim naturâ est contritio, quàm intendatur, quàm longius duret, quàm acceptetur, quàm sufficiat ad tollendum peccatum, & quàm informetur gratia, licet eodem tempore contritio sit contritio & gratiam conferat.

Quæres, si contritio & attritio differant specie, quomodo attritio fiet contritio? Resp. quòd attritio non fiat contritio; idem enim actus numero qui est attritio, non potest esse contritio: sed dicunt Doctores, hominem ex attrito fieri contritum, per Sacramentum scilicet; in quantum attritio juncta Sacramento habet eundem effectum ac contritio; remittit enim peccata & gratiam confert, & sic attritus fit contritus; non formaliter, quia attritus manet semper attritus, sed æquivalenter & effectivè.

Q U Æ S T I O I I I.

An Attritio sufficiat ad remissionem peccati?

H I c non loquimur de illo dolore, quo quis dolet de peccato ob pravam finem; v. g. de gula, quia non potest adimplere actum venerum, iste enim est malus; nec de illo qui

elicitur ob finem naturalem ; ut quando quis dolet de peccato , quia est contra rationem , vel contra Deum authorem naturæ ; ille enim est naturalis , & sic non potest obtinere gratiam quæ supernaturalis est : Nec de illo qui est sine proposito , saltem virtutis , non peccandi in posterum ; esset enim ille dolor compatibilis cum voluntate peccandi : sed loquimur de illo dolore & de attritione illa , quæ secundum Concil. Trid. sess. 14. cap. 4. elicitur impulsu Spiritûs S. moventis hominem ad illum actum doloris super omnia sua peccata , sive in communi , sive in particulari ; quæ quidem attritio procedere potest vel ex sceleris peccati , vel ex metu gehennæ , vel ex amore gloriæ.

CONCLUSIO.

AD remissionem peccati sufficit attritio cum Sacramento , unde homo solùm attritus potest recipere fructuosè absolutionem à peccatis. Sic Concil. Trident. sess. 14. cap. 4. determinans , quòd attritio , quam vocat contritionem imperfectam , non solùm non faciat hominem hypocritam & magis peccatorem , sed esse donum Dei & impulsu Spiritûs sancti , non adhuc inhabitantis , sed tantùm moventis , quo pœnitens viam sibi ad iustitiam parat ; & quamvis sine Sacramento pœnitentia per se ad justificationem peccatorem perducere nequeat , tamen eum ad Dei gratiam in Sacramento pœnitentia impetrandam disponit. Catechismus Romanus idem affirmat cap. 5. secundæ partis : Augustinus similiter ; lib. 1. in de Catechizandorum rudimentis , cap. 17. dicit , *Qui volunt fieri Christiani , tenentur habere aliquam dispositionem , non*

omnino perfectam, sed sufficientem, ut baptismum recipiant & per illum iustificentur: loquitur autem Augustinus de attritione quæ habetur ex metu damnationis, & dicit illam esse sufficientem, ut quis per baptismum gratiam recipiat. Accedit determinatio Facultatis Parisinæ, quæ anno 1638. declaravit contrariam opinionem esse temerariam, erroneam, & virtutis Sacramenti Pœnitentiæ imminutivam.

CONFIRMATUR conclusio rationibus. Primò, quia Pœnitentia dicitur Sacramentum mortuorum, in quantum per absolutionem dat vitam gratiæ peccatoribus; sed si ad absolutionem requireretur contritio, absolutio nunquam remitteret peccata, quia contritio præcedens Sacramentum Pœnitentiæ seu absolutionem, illa remittit & gratiam confert, ex Concil. Trident. sess. 14. cap. 4. ergo attritio sufficit ad remissionem peccati, mediante absolutione. Secundò, quia Christus dedisset frustra potestatem clavium sacerdotibus, si contritio prævia ad absolutionem requireretur; nunquam enim sacerdotes peccata solverent, quando quidem jam essent soluta per contritionem; & sic Sacramentum Pœnitentiæ careret suo effectu, qui est peccati remissio, & sacerdotes suâ jurisdictione: ergo dicendum est, quod attritio sufficiat, quâ positâ, absolutio habet suum effectum, & sacerdos utitur suâ auctoritate. Tertiò, quia in lege Mosaicâ per solam contritionem peccata remittebantur sine confessione: ergo nostra esset durior, si cum confessione requireretur contritio: ergo, ut sit dulcior, debet dici quod sufficiat sola at-

256 DE SACRAMENTIS.

tritio cum confessione & absolutione.

O B J E C T. Attritio ex timore concepta non est meritoria : ergo non est sufficiens ad remissionem peccati. Resp. quòd timor potest concipi , vel ut excludit Deum , & est conjunctus cum affectu peccandi , ut quando quis esset paratus perseverare in peccatis , si poena non esset illis imposita ; & ille timor , qui vocatur serviliter servilis , malus est , quia includit affectionem ad peccatum ; alius est timor qui est servilis simpliciter , & qui non admittit talem affectum ad peccatum , nec Deum excludit , quo videlicet peccator Deum punientem ita timet , ut ad illam poenam evitandam doleat de peccatis , & iste timor bonus est ; Deus enim illum excitat in nobis , dicens , Matth. 10. *Nolite timere eos qui occidunt corpus ; sed time-
eum qui potest animam & corpus perdere in gehennam ;* & ille timor sufficit ad justificationem eum absolutione ,

O B J E C T. ex Concil. Trident. sess. 6. cap. 6. non justificantur adulti , nisi Deum diligere incipiant : ergo non sufficit attritio orta ex timore sine amore Dei. Resp. in attritione involvi actum divini amoris , saltem virtualiter & remotè , qui enim timet infernum , desiderat virtualiter possessionem gloriæ , quoniam inter utrumque non est medium ; qui autem cupit gloriam , vult etiam virtualiter amare Deum , in quo stat beatitudo. Dices , qui culpam odit propter poenam , malè agit ; quia culpa , quæ est malum gratiæ , est odibilior poena , quæ est malum naturæ. Resp. odisse culpam propter poenam non est actus malus ,

sed non est ita perfectus, ac si culpa odiretur propter se; homo autem non tenetur facere id quod est perfectius, nec ordinare minus bonum in majus, imò aliquando majus bonum potest ordinari in minus, quando utrumque ordinatur ad summum bonum, ut patet in sententia eorum qui dicunt Christum ordinatum fuisse in bonum hominis, quia scilicet tum Christus, tum homo, ordinati fuerunt ad Deum: quia ergo tum fuga poenae, tum odium culpae ordinantur ad Deum possidendum, potest sine injustitia odio haberi culpa propter poenam; & sic attritio sufficere potest ex metu gehennae ad remissionem peccati.

Quæres, qualis esse debeat attritio? Resp. primo, ad melius esse; debet præcedere aut concomitari confessionem; quia confessio non est tantum narratio peccatorum, sed est actus poenitentiae virtutis, qui debet procedere à corde dolente; potest tamen succedere confessioni, quia pro tunc censetur moraliter jungi cum confessione: non verò potest differri post absolutionem, aliàs caderet forma super materiam non dispositam. Idem dices de contritione in Sacramento. Resp. secundò, Attritio debet esse dolor supernaturalis ex Concilio Tridentino sess. 16. cap. 4. quia dispositio ad formam supernaturalem, qualis est gratia, debet esse supernaturalis. Resp. tertio, Attritionem debere esse cum proposito efficaci & absoluto non peccandi in futurum; & sic non sufficit propositum inefficax, quo quis dicit: vellem quidem non furari, si non essem paupertate affectus; remanet enim absoluta

258 DE SACRAMENTIS.

peccandi inclinatio cum illa velleitate : propositum tamen illud absolutum non necessariò debet esse explicitum, sed implicitum sufficit, Resp. 4. quòd Attritio debet esse universalis; se extendens ad singula peccata, vel saltem ad omnia generaliter; non enim disponitur peccator ad gratiam, si non habeat displicentiam de omnibus peccatis. Resp. quintò, quòd attritio debeat esse vera, & quòd existimata non sufficit; unde si quis bonâ fide ad Sacramentum accedat cum examinatione conscientiae, etiamsi conatus fuerit elicere attritionem supernaturalem, non potest absolvi, si illam actu non habeat, quidquid dicant aliqui Resp. sextò, quòd ad attritionem non sufficit voluntas suscipiendi Sacramentum, sed requiritur attritio formalis, quæ vel actualis sit, vel paulò ante actualis fuerit. An autem sufficiat actus, quo quis dolet quòd non habeat attritionem; affirmant Navarrus, Paludanus, & alii; negant Bonacina, Henriques, Vasques & cæteri: verisimile est tamen, quòd si talis dolor sit verus & supernaturalis, conjungitur cum dolore de peccatis, licet non dignoscatur; & pro tunc ille actus sufficeret ad absolutionem.



QUESTIO IV.

An Contritio sit necessaria?

CONTRITIO non est quidem necessaria necessitate medii in lege gratiæ; quia cum attritione junctâ Sacramento, peccator salvari potest: An sit verò necessaria necessitate præcepti; explicabit

CONCLUSIO.

EXTRA Sacramento Pœnitentiæ necessaria est contritio necessitate præcepti, non verò in Sacramento; aliàs cum attritione nullus salvaretur: illud autem præceptum de contritione elicienda habetur in illis locis ubi pœnitentia injungitur, ut Ezech. 18. *Convertimini, & agite pœnitentiam ab omnibus iniquitatibus vestris; & non erit vobis in ruinam iniquitas.* Quo jure autem necessaria sit contritio, & quando sit necessaria; dicendum est primò, quòd nedum sit de jure divino, ex Lucæ 13. *Nisi pœnitentiam egeritis, omnes simul peribitis;* & Ezechielis 18. *Convertimini, & agite pœnitentiam:* sed est etiam de lege naturæ; Concil. enim Tridentinum sess. 14. cap. 4. dicit quòd contritio necessaria fuerit omni tempore: ergo erat necessaria in lege naturæ, ubi non erat præceptum positivum: Ratio est, quia suppositâ fide, qui peccavit in Deum, tenetur naturaliter reconciliari cum Deo, & proinde dolere de offensâ in ipsum commissâ. Quoad secundum, dicendum est quòd

260 DE SACRAMENTIS.

præceptum contritionis urgeat per se in articulo mortis etiam existimato, & in periculo amentiae perpetuae, pro tunc enim est maxima necessitas se convertendi ad Deum: si tamen in his casibus quis haberet attritionem cum confessione, tenetur communiter, quod non sit præcepta contritio; hoc enim faciens non se committit periculo damnationis, nam sit de attrito contritus: aliqui tamen contrarium tenent. Per accidens aliquando extra illas occasiones præcipitur contritio extra Sacramentum; ut quando recepturi sumus, vel administraturi aliquod Sacramentum, ne sacrilegium committatur; vel quando quis est in periculo aliud committendi peccatum, ad quod traheretur per peccatum præcedens, juxta illud Gregorii, *Peccatum quod per poenitentiam non deletur, suopondere in aliud trahit*: ne ergo in istud incidat peccator, debet illud revocare per contritionem. Contritio insuper necessaria est, quando quis dubitat de oblivione peccatorum; vel quando urget generalis calamitas Ecclesiae, pro qua sit publica oratio: de hoc tamen dubitant aliqui, & longè plures de contritione eliciendâ in die festo.

O B J E C T I O. Si per Scripturam præcepta est contritio, ex quo habetur quod attritio sola cum Sacramento sufficiat? quoniam præceptum de contritione generale est, Lucæ 13. *Nisi poenitentiam egeritis, omnes simul peribitis*. Respondendum, legem istam habere suam exceptionem ex eadem Scriptura, ubi Christus dedit Apostolis clavium potestatem, & jus remittendi peccata; si enim possunt remit-

tere peccata, hoc faciunt applicando absolutionem super attritionem solam; quia quando præcessit contritio, pro tunc ministri non remittunt peccata per absolutionem. Porro, quando diximus contritionem esse necessariam extra Sacramentum, hoc intelligitur saltem de contritione virtuali, quæ consistit in dilectione Dei, quæ quidem peccata remittere potest.

Quæres, an aliquis teneatur conteri eo ipso quo peccavit. Aliqui hoc affirmant, quamplurimi tamen, & melius negant; quia præceptum contritionis est affirmativum quod non obligat pro semper, sed certo quodam tempore: sequeretur enim ex hoc, quod qui non contereretur, in instanti sequenti novum peccatum committeret, transgrediendo præceptum contritionis; in secundo etiam instanti aliud peccatum faceret, & in tertio tertium, & sic deinceps. Dices, Ergo si non teneatur conteri, potest velle pro illo instanti non poenitere. Resp. non posse velle non poenitere absolute, sed posse velle non poenitere pro eo instanti quo contritio non est præcepta. Dices, quando lapsi sumus in morbum, tenemur recurrere ad medicum; ergo à fortiori, quando sumus in peccato. Negatur antecedens, quando medicina differri potest sine probabili periculo; & sic dicendum est de peccato: unde si immineret periculum moriendi, non deberet differri contritio. Dices, debemus corripere fratrem eo instanti quo lapsus est in peccatum: ergo debemus resurgere à peccato illicò ac in illud lapsi

262 DE SACRAMENTIS.

sumus. Resp. non teneri statim, nisi quando volitio peccati perseverat in fratre, vel quando timetur novum peccatum; & in his duabus conditionibus tenetur etiam conteri, vel saltem non continuare in volitione peccandi. Dices: tenemur restituere statim ac furati sumus: ergo & reddere Deo honorem, eo instanti quo hunc illi abstulimus per peccatum. Negatur paritas; qui enim non restituit, transgreditur de novo præceptum non furandi, quo prohibetur subreptio & detentio rei alienæ; unde qui detinet, & non restituit quando potest, peccat: qui verò non conteritur, non it contra præceptum, quia non præcipitur contritio pro omni tempore: deinde ille qui intulit injuriam cum damno, debet illi- cò illam reparare, non tamen quando est sine damno, ut quando Deum offendimus. Dices, Nullo momento licet esse in peccato: ergo omni momento debemus conteri. Distinguo antecedens, non licet esse in peccato positivè, idest non licet patrare peccatum, concedo: negativè, nego: possumus enim non conteri, quia contritio est præceptum positivum: quando ergo scriptura dicit, *Non tardes converti ad Deum*; ibi est consilium, non præceptum.



QUESTIO ULTIMA.

Qualis debeat esse Contritio?

CONTRITIO spectari potest quantum ad intensiorem, quantum ad durationem, & quantum ad extensionem. Quantum ad intensiorem, dolor contritionis debet esse summus; nascitur enim ex amore Dei quem debemus diligere ex toto corde; non tamen requiritur ut sit summus intensivè, quasi non possit dari intensior; sed debet esse summus appretativè, ita ut quodcumque malum præferamus peccato. Quantum ad durationem, non requiritur quod longius duret; eo enim ipso quo elicitur actus contritionis, est sufficiens dispositio ad gratiam; sicut enim eo instanti quo homo peccat, gratiam amittit, sic eodem quo conteritur, gratiam recuperat. An autem possit elici contritio in instanti: si spectetur ut involvit omnia quæ necessaria sunt ex parte intellectus & voluntatis, non potest fieri in instanti; est enim actus humanus ad quem requiritur consideratio peccati iudicium practicum intellectus distantis dolendum esse de peccato, & tandem consensus voluntatis, quæ omnia non possunt fieri in instanti: si autem sumatur pro solo actu voluntatis hæc omnia præsupponentis, potest fieri in instanti. Quantum ad extensionem denique voluntatis circa peccata, respondebit

CONCLUSIO.

CONTRITIO debet quidem esse de omnibus peccatis, quia nullum est peccatum quod remittatur, nisi retractetur per contritionem; de quolibet tamen peccato non requiritur specialis contritio; essent enim plures contritione partiales ex quibus componeretur contritio totalis quæ justificat, quod falsum est; contritio enim est simplex animi motus omnia peccata saltem in communi detestans: quia autem nullus potest dolere de peccatis, nisi de illis recogitet; dicendum est, si contritio fiat extra Sacramentum, non requiri distinctam peccatorum recogitationem, sed sufficere confusam; si verò contritio fiat in Sacramento, in ordine ad confessionem, tunc necessaria est explicita recogitatio singulorum peccatorum; sed hoc non requirit contritio ut sic, sed potius confessio.

CAPUT SEPTIMUM.

De Confessione.

QUESTIO PRIMA.

Quo jure necessaria sit Confessio?

CONFESSIO aliquando sumitur pro laudatione. Psal. 32. *Confitemini Domino in cytharâ*: aliquando pro publicâ protestatione fidei, Rom. 10. *Corde creditur ad justitiam, ore fit confessio ad salutem*: propriè sumitur pro accusatione.

accusatione sui ipsius, unde describitur, *Legitima accusatio de peccatis propriis, facta Sacerdoti jurisdictionem habenti, ad veniam obtinendam virtute clavium.* Calvinistæ & Lutherani dicunt eam esse tantum ab Ecclesiâ inventam, & non à Christo institutam.

CONCLUSIO.

CONFESSIO est de jure divino; Christus enim illam instituit, non tanquam liberam quasi homo possit illa uti, vel non; sed ut necessariam pro illis qui habent peccata mortalia. Sic Conc. Trident. sess. 14. can. 14. *Si quis negaverit confessionem sacramentalem esse jure divino institutam, vel jure divino ad salutem necessariam; si quis etiam dixerit modum secretè confitendi soli Sacerdoti, esse ab institutione & mandato Christi alienum aut esse inventum humanum, Anathemasit.* Quoad locum Scripturæ ubi Christus eam instituit, habetur Joan. 10. ubi Christus dicens Apostolis, *Sicut misit me vivens Pater, & ego mitto vos, & mox subjungens, Accipite Spiritum sanctum, quorum remiseritis peccata, remittentur eis, &c.* commisit Apostolis & eorum successoribus potestatem judicalem remittendi aut retinendi peccata, quod non possent facere juridicè, si poenitentes sua peccata non aperirent per confessionem; & sic est de jure divino? unde Ecclesia in Concilio Lateranensi præcipiens confessionem annuam, non facit præceptum de confessione, sed modificat præceptum Christi (quod erat indeterminatum) ad singulos annos: sic Concilium Tridentinum sess. 14. cap. 5. unde Papa non potest abrogare præceptum confes-

266 DE SACRAMENTIS.

sionis, nisi ex ea parte qua est Ecclesiasticum, non iubendo illam fieri annuarim.

Objiciunt communiter adversarii Christum remisisse peccata Magdalenæ & Paralytico sine confessione: sed licet hoc fecerit Christus, qui habebat potestatem excellentiæ non alligatam Sacramentis, & qui intima cordium penetrabat; non propterea sic agere possunt ipsius Ministri. Quod si dicant, Petrum per lacrymas sine confessione obtinuisse suæ negationis remissionem: nil mirum est, nondum enim Apostoli habebant potestatem ligandi & solvendi; quæ tantum data fuit post resurrectionem: Joann. 20. Quod si Nestarius Patriarcha Constantinopolitanus dicatur abrogasse confessionem; non abrogavit secretam, sed publicam, quæ fieri solebat; & hoc propter hanc occasionem. Mos inoleverat, ut in qualibet civitate deputeretur Sacerdos aliquis qui exciperet confessiones quorundam peccatorum publicorum, quæ congruum aliquando judicabat publicare inter solemnia Missarum coram astantibus, tum ut aliis incuteretur timor; tum ut fieret aliqua satisfactio illis quibus scandalum datum fuerat; quadam autem die mulier nobilis se accusando, accusavit diaconum cum quo peccaverat, de qua re grandis tumultus factus est in Ecclesia, quem audiens Nestarius, prohibuit ne deinceps fierent confessiones publicæ.

Objiciunt in super aliquos Patres & præsertim Chrysostomum Homil. 3. in Epist. ad Hebræos dicentem, *Non dico tibi, ut te prodas in publicum, neque apud alios te accuses*, Et in Psal.

num. 59. *Si confunderis alicui dicere quia peccasti, dicito quotidie in anima tua*: Homil. etiam 4. de Lazaro, *Cave homini dixeris peccata, ne exprobrat tibi; nec enim conservo tuo confiteris*. Resp. Chrysostomum per hoc non respuere confessionem secretam; illam enim astruit Homilia 58. in Joannem, & libro 3. de Sacerdotio; sed tantum rejicit publicam, abrogatam per Nectarium antecessorem suum; fiebat enim pro tunc duplex confessio, una publica ante populum ad incutiendum timorem, & scandalum de peccatis publicis reparandum; alia auricularis coram sacerdote ad absolutionem recipiendam. Primam rejicit Chrysostomus, secundam retinet; ita quod sensus illius sit, ut postquam poenitens sua peccata confessus fuerit sacerdoti, non tanquam homini, nec tanquam conservo suo, sed tanquam Deo cujus vices tenet, postea secretam poenitentiam faciat de peccatis suis, non illa declarando iterum hominibus, ut fieri solebat, sed soli Deo inter privatos parietes.

Quæres, utrum confessio fuerit præcepta in lege Mosâicâ? Resp. negativè; tunc enim sacerdotes non habebant claves regni coelorum, nec potestatem remittendi peccata, quæ tantum data fuit Apostolis; unde si discernebant inter lepram & lepram, hoc intelligitur de leprâ corporali; judicabant enim qualis esset lepra, & an esset perfectè sanata, eam tamen sanare non poterant. Quod si Numer. 5. habeatur. *Vir, si ve mulier cum transgressi fuerint mandatum Domini, confitebuntur peccatum suum*; hoc intelligitur de peccatis exterioribus, non

de internis, quæ nos ipsi tenemur confiteri; unde ea confessio erat tantum figura nostræ: confitebantur autem illa peccata exteriora graviora per certa quædam sacrificia, quæ pro certis quibusdam peccatis destinabantur, & quæ tenebantur offerre, in quo consistebat illorum confessio.

Q U Æ S T I O I I.

Quos obliget præceptum Confessionis?

APUD omnes Catholicos in confessio est, præceptum confessionis esse à Christo Domino institutum, ut dictum est superius; aliqui tamen putaverunt confessionem non fuisse à Christo præceptam: sed quia hoc secundum æquè ac primum, determinatum est in Concilio Tridentino sess. 14. cap. 6. non est quod immoremur in probandâ hac veritate; sed quærimus tantum, qui sint obligati ad confessionem.

C O N C L U S I O.

OMNES fideles baptisati, postquam rationis usum attigerint, si habent peccata mortalia commissa post baptismum aut in susceptione baptismi, tenentur confiteri. Quia diximus, omnes, ideo Summus Pontifex ad confessionem tenetur, nedum ex jure divino, sed & Ecclesiastico; si non ex vi coactiva, saltem ex vi directivâ; decens enim est ut observet legem, quam condidit. Quia diximus, fideles baptisati, ideo infideles & Catechumeni

non tenentur ad confessionem , neque jure Ecclesiastico (Ecclesia enim habet tantum jus in baptisatos) neque jure divino , quia Christus neminem voluit ad confessionem teneri , nisi esset baptisatus ; unde Baptismus dicitur janua Sacramentorum , & Concilium Tridentinum sess. 14. cap 5. dicit *hoc Sacramentum esse necessarium lapsis post baptismum*. Quia diximus , *postquam rationis usum attigerint* ; ideo fi-
ent illi qui carent usu rationis , non tenentur huic præcepto ; qui tamen rationis sunt com-
potes , etiam ante pubertatem , ad confes-
sionem tenentur , tum de jure divino , tum de Ecclesiastico ; cum sint enim capaces pecca-
ti , debent ad remedium currere ; qui tamen in hac ætate non confiteretur quotannis , non incurreret poenam excommunicationis aut pri-
vationis sepulturæ Ecclesiasticæ , quæ statuitur contra non confitentes annuatim , ex capite *Omnis utriusque sexus* ; Gregorius enim IX. di-
cit , *Pueros sæpe delinquere , non tamen in illis puniendi esse delicta , sicut in maioribus* ; si tamen percuterent clericum , excommunicationem in-
currerent. Quia diximus , *si habent peccata mor-
talia* ; ideo qui habet tantum venialia , non te-
netur confiteri quotannis ; hoc enim non præ-
cipitur , neque jure divino , neque Ecclesiasti-
co ; tenetur tamen comparere coram paroco ,
testificaturus se non indigere confessione , &
hoc jure naturali ad vitandum scandalum.
Quia diximus , *post Baptismum & in Baptis-
mo commissæ* : peccata commissæ ante Baptis-
mum non sunt materia legitima confessionis ,
quia commissæ sunt ab homine non submisso

Ecclesiæ; fictio tamen cum quâ Baptismus recipitur, debet aperiri in confessione.

QUESTIO III.

Quo tempore obliget præceptum Confessionis?

NEMO tenetur ad confessionem eo instanti quo peccatum commisit; est enim præceptum affirmativum, sicut contritio; & sic obligat tantum pro certo aliquo tempore: pro quonam autem? aliud est, loqui de jure divino, aliud de jure Ecclesiastico; aliud est etiam loqui de necessitate confessionis per se, vel per accidens.

CONCLUSIO.

IURE divino per se tenetur fidelis peccata confiteri in periculo mortis. Per periculum mortis intelligitur nedum gravis morbus, sed & navigatio periculosa, vel prælium, aut quæcumque alia occasio in qua moraliter mors imminet. Ratione hujus præcepti Pius V. anno 1566. renovavit prohibitionem factam medicis, ne curarent infirmos, quin prius eos monuerint de confessione facienda; cui legi dicuntur medici satisfacere, dum monent infirmos de confessione, vel parentes ut ad confessionem excitent infirmos. Præcepto eodem mulier quæ primâ vice paritura est, aut quæ jam peperit cum periculo vitæ, tenetur ad confessionem, sicut & condemnatus ad mortem, & ægrotus qui in diuturno morbi periculo peccavit post confessionem factam; licet enim non

teneatur de novo Eucharistiam sumere, quam antea sumpsit; (quia non est medium ad salutem absolue necessarium) tenetur tamen confiteri iterum. An autem extra periculum mortis aliquis teneatur de jure divino confiteri peccata; negant D. Thomas in 4. dist. 17. art. 4. & Scotus in 4. dist. 17. art. 4. circa finem. Alii cum Bonacina, sentiunt quod si Ecclesia non determinasset præceptum confessionis ad singulos annos, non tamen debere differri usque ad mortem; quia non est verisimile, quod Christus instituerit tam æstimabile Sacramentum, ut semel tantum reciperetur. Tempus quo sit emittenda confessio extra articulum mortis, determinari debet ex judicio prudentis viri, ita quod, inquit aliqui, non debeat differri ultra quatuor vel quinque annos.

Quoad tempus quo fieri debet confessio de jure divino per accidens; facienda est cum quis conscius peccati mortalis Eucharistiam sumere intendit; pro tunc enim, dum adest copita Confessarii, non sufficit contritio; sic Concilium Tridentinum sess. 13. cap. 7. fundat autem Concilium hanc necessitatem confessionis esse de jure divino in verbis Apostoli 1. Corinth. 11. dicentis, *Probet autem seipsum homo*. Non est idem dicendum de receptione aliorum Sacramentorum, in quibus contritio sufficit, cum nullum sit præceptum divinum aut Ecclesiasticum de confessione; unde Concil. Trident. Sess. 24. cap. 1. de reformatione Matrimonii, hortatur quidem conjuges, ut peccata confiteantur antequam contrahant, non

tamen præcipit ; melius tamen est , ut quodcunque Sacramentum recipiens confiteatur , nè loco contritionis habeat tantùm attritionem. Quòd si urgente necessitate , Sacerdos absque confessione celebraverit cum contritione sola , tenetur post celebrationem quamprimùm confiteri , id est , prima data copia Confessarii ; hoc tamen præceptum non est divinum , sed Ecclesiasticum tantùm , latum in Concil. Trident. sess. 13. cap. 7. Quantum verò ad laïcos , qui accesserunt ad altare , sumpturi Eucharistiam , & recordantur alicujus peccati mortalis , quod ob scandalum non possunt confiteri ante communionem , non tenentur post illam citius confiteri peccatum , quia Concilium obligat tantùm sacerdotes , & leges rigorosæ extendi non debent.

CONCLUSIO SECUNDA.

QUANTUM ad præceptum Ecclesiasticum , tenentur fideles , cùm ad annos discretionis pervenerint , confiteri peccata mortalia semel in anno. Sic habetur ex capite *Omnis utriusque sexus* ; non quod per hoc confessio præcipiatur , est enim de jure divino : non quòd etiam determinet tempus quo de jure divino confessio necessaria sit : confessio enim annua esset de jure divino explicato per Ecclesiam , illud tamen præceptum est tantùm Ecclesiasticum ; sed per hoc Ecclesia vult instituire præceptum Ecclesiasticum de tempore confessionis. Super hoc præceptum multa sunt notanda. Primò , quòd præceptum illud non obliget pro certâ & determinatâ parte anni ; unde si præcipiatur in Paschate , hoc est per accidens ,

ratione Eucharistiæ sumendæ, ad quam non sufficit contritio, ex Concil. Trid. sess. 13. c. 7. Licet ergo melius sit computare annum ab uno Paschate ad aliud, vel ab una confessione ad aliam, ille tamen satisfaceret præcepto Ecclesiæ qui confessus fuisset mense Januario præterito, & differret aliam confessionem usque ad mensera Decembrem anni sequentis; quia licet essent viginti tres menses inter illas confessiones, nullum tamen annum præteriret sine confessione. Sic Gamacheus de Sacramento Pœnitentiæ cap. 15. ff. *Quod attinet*. Ratio est, quia præceptum non est de confessione faciendâ intra annum, sed singulis annis; in dato autem exemplo confessio fieret in quolibet anno. Secundum quod notetur, est quod si confessio fiat invalidè, retinendo v. g. peccata, non satisfat præcepto Ecclesiæ, nisi invaliditas confessionis oriretur ex ministro sine culpa pœnitentis, ut pote si Confessarius non haberet jurisdictionem, quam crederet habere pœnitens; qui faceret tamen illam confessionem invalidam, non incurreret pœnas latas à Concilio Lateranensi, ut sunt expulsio ab Ecclesia & privatio sepulturæ Ecclesiasticæ, si hoc sacrilegium esset verè occultum; Ecclesia enim in foro externo non judicat de occultis, si tamen est aliquomodo externum, ut si peccator illud revelaverit alteri, tunc incurritur pœna. Sic Gamacheus quæstione 15. ff. *Respondemus*, sic etiam Navarrus, & multi alii apud Bonacinam, qui contrarium tenet, incurri scilicet excommunicationem, etiamsi sacrilegium sit occultum, Notetur tertio, quod qui prævi-

det se non habiturum copiam Confessarii quando confessionis urgebit præceptum, tenetur illam anticipare; sicut qui prævidet se non posse vesperi recitare vespervas ob impedimentum, tenetur illas manè recitare; licet aliqui teneant hoc non esse necessarium, quando impedimentum debet oriri ex febris. Quarto, qui non est confessus anno præterito, tenetur quamprimum confiteri; quia non limitatur annus, ut per hoc finiat præceptum confessionis, sed ad illam sollicitandam: & sic toties peccat qui non confitetur, quoties est confitendi opportunitas. Quod si quis dicat, præceptum jejunii, auditionis sacri, & communionis in Paschate, non obligare post tempus elapsum, respondetur, aliquid esse præceptum vel ob venerationem temporis determinati, vel absolutè & in se, nè ampliùs differatur; hoc ultimo modo præcepta est confessio, & sic elapso tempore Paschatis debet fieri; jejunium verò, auditio sacri & communio Paschalis præcipiuntur ob venerationem temporis; & sic illo elapso non obligant: verisimilius est tamen quòd præceptum communionis etiam urgeat post Pascha. Quintò, qui non est confessus in periculo mortis, cessante periculo non tenetur confiteri; cessat enim periculum imminens damnationis, propter quod imminente morte præcipiebatur confessio. Sextò, qui confessionem non emisit in aliquo anno, tenetur in sequenti duas emittere ad minus, unam pro anno præterito, & aliam pro præsentis, si habeat peccata mortalia intra illum; licet enim unico actu satisfieri possit pluribus.

præceptis, ut quando quis jejunit tantum semel pro die Vigiliæ & Quadragesimæ; quando tamen præcepta respiciunt plures actus per se faciendos, ut in confessione, quæ duplex esse debet in duobus annis, una confessio non sufficit: alii contrarium tenent. Septimò, ad observationem præcepti hujus, confessio debet fieri Sacerdoti approbato, & sic non sufficit confiteri religioso non approbato; non est enim legitimus judex: sed si sit approbatus, valida est confessio; nam si ex capite *Omnis utriusque sexus*, confessio debeat fieri proprio sacerdoti, hoc verum est, excluso privilegio; imò in eodem capite subjungitur, *vel alteri de ejus licentia*. Cum ergo Papa sit proprius Sacerdos omnium fidelium, & Episcopus Diocesano- rum, Religiosus approbatus ab Episcopo, habens Privilegium papale, censetur depuratus à Papa, qui est proprius parochus ordinis superioris; & sic potest audire confessionem annuam: Quis enim dicit quòd pastor possit committere licentiam sacerdoti approbato audiendi suas oves, & non possit Papa, aut Episcopus idem facere? Octavò, qui post communionem Paschalem meminit se oblitum fuisse aliquod mortale peccatum, non tenetur quamprimum illud confiteri, sed potest differre ad annum sequentem. Si etiam aliquis ante elapsum annum confessus est sua peccata mortalia, & postea relapsus est in aliud, probabile est non teneri ad confessionem illius, quia observavit præceptum Ecclesiæ: si tamen confessus est tantum peccata venialia, debet illud mortale confiteri intra annum, quia tenetur

singulis annis ad confessionem mortalium, & nullum confessus est.

Quæres, in quibus casibus excusari aliquis possit à Confessione. Respondeo, quòd multi sint. Primò, qui non habet confessarium, nec potest illum adire, nisi cum gravi incommodo aut periculo; v. g. maris, aut hostium: nec enim Christus, aut Ecclesia præcipiunt aliquid cum gravi detrimento. Secundò, qui timet probabiliter revelationem enormis peccati ex quâ oriretur infamia, vel grave scandalum; non tamen dispensatur à confessione aliorum, quorum revelatio multum obesse non potest. Tertiò, qui non potest confiteri sub sigillo confessionis, ut quando confessarius est surdus, & pœnitens in navi existit, & non potest confiteri, nisi ab aliis audiatur. Quartò, qui non potest confiteri, nisi per interpretem, quia confessio præcipitur facienda soli sacerdoti; tunc autem non esset solus. Quintò, qui non potest aliter confiteri quàm per Scripturam; ut si pœnitens careat lingua, vel confessarius sit surdus, si per nutus non possit peccata explicare, non tenetur ad confessionem, si sit periculum infamiæ; aliàs tenetur. Sextò, qui habet lubricam memoriâ non tenetur peccata confiteri ex instanti quo ea commisit, nec etiam tenetur peccata scribere, quando illa patravit: quando tamen procedit ad confessionem, & scit se coram Sacerdote multa peccata oblitterum, tenetur ea scribere, modò in tali Scripturâ non sit periculum manifestandi confessionem: in talibus ergo circumstantiis, ad contritionem est recurrendum, quæ sufficit,

eum non urgeat pro tunc præceptum confessionis.

QUESTIO IV.

Quanam sint conditiones Confessionis ?

SEX DECIM communiter assignantur, quæ requiruntur : aliquæ ad valorem, & omnes ad perfectionem ejus ; & illæ his quatuor versibus continentur, quas tradet & explicabit

CONCLUSIO.

S*it simplex, humilis, confessio, pura, fidelis, Atque frequens, nuda & discreta, lubens, verecunda,*

Integra, secreta, lacrimabilis, accelerata, Fortis & accusans, qua sit parere parata.

Quia primò confessio debet esse *simplex*, idèd superflua debent prætermitti, licet enim poenitens teneatur distinctè explicare sua peccata, numerum eorum & ipsorum circumstantias, inutile tamen prohibentur discursus.

Quia secundò debet esse *humilis*, idèd confessio quæ fit cum jactantia, est invalida, tum quia deest dolor ; tum quia novum peccatum committitur ; si tamen fieret non flexis genibus, aut non detecto capite, etiam extra necessitatem ; non esset invalida ; non fieret enim gravis injuria Sacramento.

Quia tertio debet esse *pura*, quantum ad intentionem, si fiat ob finem peccaminosum, v. g. ob hypocrisim, est invalida ; si fiat tamen

ut conservetur bona opinio apud Confessarium, qui est vir gravis & pœnitenti notus, est valida.

Quia quartò debet esse *fidelis*, idèd non licet mentiri circa peccatum mortale non antea confessum; si tamen fuerit antea confessum, potest dicere pœnitens se illud non commisisse, quia non est materia necessaria confessionis. Invalida etiam esset confessio, si quis diceret majorem numerum peccatorum, quàm commiserit; quia hoc est decipere judicem in materiâ necessariâ, nisi hoc fiat bonâ fide, ut sæpiùs evenit in rudibus, qui credunt se plus peccasse, quàm peccaverint. Invalida etiam esset confessio, si peccata dubia pro certis exprimerentur, & certa pro dubiis: certa enim debent exprimi ut certa, & dubia ut dubia; & sic qui dubitat, an aliquod peccatum commiserit, debet non illud reticere, sed confiteri ut dubium; quia tutior pars est eligenda. Quòd si in dubio melior sit conditio possidentis, ut patet de illo qui dubitans an votum emisit, nec ne, non tenetur illud implere, hoc est verum quando non datur lex contraria. Cùm ergo secundùm Doctores sit lex de confitendo peccato dubio, illud non est reticendum. Porriò, confessio non est invalida, si pœnitens mentiatur circa peccatum veniale, dicendo se non illud commisisse; quia non est materia necessaria, nec Confessarius jus habet interrogandi de illo; hoc esset tamen peccatum veniale. Quòd si pœnitens confiteretur tantùm unum peccatum veniale circa quod mentiretur, dicendo se illud commisisse quod

non commiserit, tunc peccaret mortaliter; quia faceret sacrilegium; esset enim causa cui applicaretur forma Sacramenti super materiam insufficientem.

Quia quintò debet esse *frequens*, hoc intelligitur de consilio, quia multæ utilitates procedunt ex frequenti confessione; hoc tamen non est de precepto, nisi quando quis sæpius labitur in peccatum, quod vitare non potest nisi auxilio confessionis; tunc enim illius frequentia est de jure divino.

Quia sextò debet esse *nuda*, idè excusationibus palliari non debet, nec obscura reddi; debet enim esse talis, ut Sacerdos, ad quem spectat judicare de peccatis, possit cognoscere an mortalia sint, vel venialia. Quod si hoc non possit cognoscere, non debet intendere illa absolvere ut mortalia vel ut venialia; sed sufficit si indeterminatè absolvantur peccata.

Quia septimò debet esse *discreta*, pœnitens debet uti verbis honestis & pudicis, dum peccata carnis explicat, non descendendo ad circumstantias inutiles; quam discretionem debet etiam adhibere confessorius: eàdem conditione caveat pœnitens, nè declaret suum complicem. Denique debet adire confessorium eruditum, unde si dubitans de usurâ accedat sacerdotem, quem scit ignarum, ut propter ipsius ignorantiam excusetur à restitutione, invalida est confessio.

Quia octavò debet esse *libens*, requiritur voluntas & intentio confitendi peccata, aliàs esset invalida; si tamen quis confiteretur ad

virandam infamiam aut excommunicationem, modo adhibeat debitas circumstantias, esset valida: quia esset voluntaria intrinsecè, licet admitteret involuntarium extrinsecum.

Quia nonò debet esse *verecunda*, ideò poenitens debet confusionem aliquomodo recipere de commissione peccati; unde non debet confiteri sacerdoti cum quo commisit peccatum, quia non solet esse erubescencia, cum declaratur peccatum illi cui jam notum est. Adde quod ex hoc posset dari occasio perseverandi in peccato; si tamen hoc fieret aliquando, poenitens deberet confiteri etiam peccata illa quæ antea nota essent confessario, debet enim illa cognoscere ut iudex.

Quia decimò debet esse *integra*, & integritas nedum est de perfectione confessionis, sed etiam de ipsius validitate; quæstio subsequens instituetur ex professo de integritate confessionis.

Quia undecimò debet esse *secreta*, ideo errant hæretici, qui dicunt initio fuisse publicam, & postea secretam; secreta enim confessio semper fuit in usu Ecclesiæ, licet aliquando extiterit etiam publica iusta de causa, ob humilitatem peccatoris & reparationem scandali; cum illa tamen fiebat adhuc secreta, & illa publica abrogata est.

Quia duodecimò debet esse *lacrymabili*: non propterea poenitens fundere debet lacrymas, aut emittere gemitus; sed per hoc requiritur dolor internus, sive sit contritio, sive attritio, ut diximus.

Quia tertio decimò debet esse *accelerata*, non ideo peccator debet confiteri eo ipso quo peccavit, sed non debet illam longius differre ob periculum damnationis, & ideo hoc pertinet aliquo modo ad consilium.

Quia quarto decimò debet esse *fortis*, poenitens debet vincere aversionem quam suggerit illi pudor; debet etiam fortiter deserere omne peccatum & omnem occasionem peccati, etiamsi sit detrimentum proprium passurus.

Quia quintodecimò debet esse *accusans*, peccata non debent proferri per solam narrationem; nec accusatio quæ sit de peccatis debet esse cum excusatione injustâ; licet excusatio justa possit afferri ad tuendam famam, ad quod omnes tenentur ex jure naturali.

Quia tandem debet esse *parere parata*, poenitens debet obedire confessario injungenti fugam occasionis peccati, restitutionem rei, vel famæ ablatae, reconciliationem cum proximo, & satisfactionem pro peccatis commissis.

Q U Æ S T I O V.

An Confessio debeat esse integra?

NON loquimur de integritate confessionis quantum ad peccata venialia; non sunt enim materia necessaria Poenitentiae, sed tantum sufficiens; unde unum potest exprimi, & aliud reticeri: sed loquimur de integritate confessionis quoad peccata mortalia.

DE necessitate confessionis est, quod sit integra, ita quod poenitens exprimere debeat species peccatorum, numerum illorum, & ipsorum circumstantias, saltem speciem peccati mutantem; & hoc intelligitur post diligentem conscientiae examinationem, quæ tanta debet esse, quanta adhiberi solet in negotio arduo, spectatâ etiam conditione personæ, qualitate officii ejus, & temporis intervallo quo confessio non est facta, unde qui confessus esset non prævio examine, confessio esset nulla, si sacerdotis interrogatio defectum examinis non suppleverit; & idem si confessorius advertat poenitentem non præmisisse examen, tenetur illum dimittere, vel interrogare; excipitur enim *Omnis utriusque sexus*, confessorius debet diligenter inquirere de peccatoris & peccatorum circumstantiis.

Quantum ad species peccatorum quæ debent explicari, ut confessio sit integra; hoc intelligitur de speciebus moralibus, ita quod poenitens teneatur dicere se commisisse tale, vel tale peccatum quod est contra tale vel tale præceptum: non autem necessarium ut exprimantur species physice peccatorum; unde qui confecit venenum, vino miscuit & propinavit inimico, satisfacti integritati confessionis, dicendo se veneno occidisse aliquem; aliquando tamen species physice explicandæ sunt. Primum quando alter ad peccaminosam actionem assumitur, v. g. si quis dedit venenum servo suo scienti, qui illud obtulit inimico. excitare enim aliquem ad peccatum, peccatum novum est,

& ideo exprimendum. Secundò, quando inter plures actus physicos tanta intercedit mora, ut plura numero peccata fiant ratione plurium volitionum quæ sunt interruptæ; & sic qui hodie venenum composuit, & cras illud propinavit, tenetur tales actus diversos exprimere, quia sunt diversa peccata numero. Tertiò, quando illi actus physici habent adjunctas circumstantias, quæ moraliter diversæ sunt; ut si quis iter suscipiens ad occidendum inimicum, conculcavit segetes.

Quando conclusio dicit quod confessio debeat esse integra quoad numerum peccatorum; hoc intelligitur etiam in eadem specie, ita quod pœnitens teneatur dicere, se v. g. decies jurasse; non requiritur tamen, ut ille numerus sit certus mathematicè, hoc enim aliquando impossibile est; sed sufficit quod sit certus moraliter; unde si certus numerus non occurrat, debet exprimi verisimilis; qui si non possit haberi ob longam & frequentem peccati habitudinem, satis est si pœnitens indicet tempus à quo cœpit peccare, & consuetudinem quam habet peccandi ter vel quater quotidie. Ratione hujus veritatis; sequitur primò, quod ille qui furatus est centum nummos centum vicibus, debeat specificare illos centum actus repetitos, quia quilibet est peccaminosus. Sequitur secundò, quod non sufficiat sacerdoti dicere, se absolvisse vel communicasse aliquos dum erat in peccato, sed teneatur dicere quot absolverit; non est enim unica actio moralis, quia una absoluto non ordinatur ad alteram. Sequitur tertiò quod ille qui positivè dixit se

blasphemasse decies, & factâ confessione agnoscit se blasphemasse duodecies, tenetur in primâ confessione explicare duplicem illam blasphemiam; non tenetur tamen, si dixerit se decies vel circiter blasphemasse. Sequitur quartò, quòd ille qui dicit se plura peccata commisisse quàm commiserit, si hoc fecerit malâ fide, non tantùm tenetur hoc explicare in novâ confessione, sed primam confessionem tenetur repetere ut invalidam; voluit enim decipere iudicem in materia gravi; si autem hoc fecerit bonâ fide, ad neutrum tenetur. Quod si deceperit circa peccata venialia, etiam mala fide, non tenetur repetere confessionem, nec hoc peccatum confiteri; est enim tantùm peccatum veniale, quod potest non subijci confessioni. Sequitur quintò, quod peccata venialia, quando sola subijciuntur absolutioni, debent explicari, si non quoad numerum, saltem quoad speciem; unde non sufficit si quis dicat se commisisse duo peccata venialia, sed debet explicare qualia sint, vel saltem unum eorum; licet enim de se non sint materia necessaria Poenitentiae, quando tamen aliquis vult recipere absolutionem de illis solis, sunt materia necessaria; & sic debent explicari quantùm ad speciem. Sequitur sextò, quod non sufficit dicere se subtraxisse rem alienam, sed specificandum est se non restituisse per tale tempus quo potuit restituere, qui enim restituere potest, & non restituit, novum peccatum facit, quoniam furtum consistit & in usurpatione rei alienae, & in detentione illius.

Quantùm ad circumstantias peccatorum, alie mutant speciem peccati, quæ scilicet

adversantur speciali præcepto, ut quando, v.g. quis furatur in loco sacro; hæc circumstantia addit malitiam sacrilegii supra malitiam furti; quando etiam quis fornicatur cum affini, additur supra simplicem fornicationem violatio honoris debiti parentibus. Aliæ sunt circumstantiæ aggravantes peccatum intra suam speciem, ut gravis vel minor percussio, furtum decem vel centum nummorum, &c. Circumstantiæ mutantes speciem peccati quæ addunt specialem malitiam, debent exprimi. Sic Conc. Trident. sess. 14. cap. 5. idèd qui concupivit mulierem, vel cum ea peccavit, debet exprimere, an fuerit virgo, an corrupta, conjugata, voto ligata, affinis, vel consanguinea; sacerdos tamen qui carnaliter cognovit poenitentem, non tenetur hoc explicare; non est enim incestus, nec sacrilegium; modo illam non sollicitaverit in confessione, nec sit parochus, nec ipsi incumbat ex officio onus procurandæ salutis poenitenti, sic Bonacina, folio 140. Quantum ad circumstantias aggravantes; si non aggravent notabiliter peccatum, non sunt necessariò exprimendæ; si verò aggravent notabiliter, licet multi negent, quòd debeant exprimi (in quorum sententiâ, qui esset furatus mille nummos, teneretur tantùm dicere, se furtum mortale commississe, dummodo restituerit vel paratus fuerit restituere) alii tamen melius affirmant. Porro, circumstantiæ mutantes speciem peccati & aggravantes, continentur hoc versu.

Quis, quid, ubi quibus auxiliis, cur quomodo, quando.

QUÆSTIO VI.

In quibus casibus possit non esse integra Confessio.

NULLA datur lex ita generalis, quin aliquando exceptionem patiatur; unde licet detur præceptum divinum de integritate confessionis faciendæ uni & eidem sacerdoti; non desunt tamen occasiones in quibus non urgeat hoc præceptum.

CONCLUSIO.

CONFESSIO multipoties potest non esse integra. Primò ex ignorantia & oblivione, ut quando quis, dum esset puer, ignorabat aliquod peccatum esse declarandum, postea agnoscit illud debuisse subjici confessioni, non tenetur priores confessiones iterare, sed sufficit, si illud peccatum fateatur: si etiam quis inculpabiliter oblitus est peccatum mortale, debet tantum illud declarare, non verò alia quæ jam confessus est, & quæ absoluta sunt, licet illorum confessio non fuerit integra. Ad observandum ergo præceptum, Christi de integritate confessionis, sufficit quòd sit integra formaliter, & non requiritur semper quod sit integra materialiter: est autem integra formaliter: quando explicantur omnia peccata mortalia, quæ moraliter explicari possunt, itaut nullum retineatur sine justa causa: est verò materialiter integra, quando omnia peccata mortalia, nullo dempto, explicantur; Christus autem non præcepit integritatem materiale confes-

fionis, aliquando enim est impossibilis, ut quando quis, facto diligenti examine, non meminit alicujus peccati; aliquando etiam non est facienda integra propter justas causas, de quibus illicò. Præceptum verò Christi est consentaneum rationi & onus ipsius leve est, unde non præcepit semper integritatem materiale confessionis.

Secundò, ab integritate materiali confessio- nis dispensatur pœnitens, qui incepit confiteri & præ morbi gravitate perficere non potest. Dispensatur etiam qui signis & nutibus explicat sua peccata in specie, licet non explicet quantum ad externum sermonem, quia hoc non potest. Præterea, dispensatur qui linguâ carens aliqua tantum peccata exprimit in specie, & alia exprimere non potest, nisi in genere. Sic dicendum est de extraneo, cujus idioma non percipitur; cum enim faciat quod in se est, debet absolvi, si non sit alius Sacerdos qui ipsum intelligat. Ægrotus qui dat & dare tantum potest signa confessionis in genere, absolvi debet; imò, si non det actu talia signa, modo dederit antea, potest absolvi, si illi qui moribundum audierunt, testimonium dederint, inquit Concil. Carthaginense quartum can. 76. nulum enim est periculum sacrilegii ex parte ministri, quia habet semper, & habere debet in mente sua, vel in verbis intentionem conditionatam de absolvendo pœnitente secundum ipsius dispositionem; unde in absolutione additur communiter *in quantum possum, & indiges*. Si autem nullum detur testimonium, quod moribundus dederit signa contritionis, aut at-

tritionis, absolvi non potest, nec etiam sub conditione; ut enim applicetur forma Sacramenti sub conditione, materia debet esse probabiliter disposita. Idem dicendum est de amentem, qui ante amentiam dedit signa contritionis.

Tertiò, dispensatur ab integritate confessionis, quando ex confessione alicujus peccati imminet aliquod grave damnum corporale aut spirituale, sive pœnitenti, sive confessario; præceptum enim Christi non obligat cum tanto incommodo, quia jugum ejus suave est; unde si pœnitens probabiliter timeat, quod sacerdos revelet grave aliquod peccatum, debet alia confiteri & istud retinere, si non sit alius cui omnia possit explicare. Si etiam pœnitens occiderit patrem vel matrem confessarii, non tenetur illi aperire hoc peccatum, nè ipsi det locum vindictæ, quod est grave damnum confessario. Si fœmina confitens sacerdoti se esse fornicatiam, probabiliter timeat, ne ipsam confessarius sollicitet, à confessione dispensatur. Si pœnitens morbo contagioso laboret, potest dare absolutionem confessarius post unius peccati mortalis confessionem, si sine periculo non possit à longè audire omnia. Si confessarius morbo corripiatur, potest ad confessionem primi peccati mortalis absolvere, si pœnitens sit in periculo, & non sit alius sacerdos, ut reperitur tempore pestis. Si plures pœnitentes reperiantur simul ubi mors imminet, v. g. in prælio, in procella maris, in domo quæ igne conflagratur, &c. possunt aliqui eorum aliqua peccata alta voce proferre, & statim

statim sacerdos absolvere in plurali, dicendo, *Absolve vos*. Si tandem timet Sacerdos quin infirmus moriatur, debet audito aliquo mortali peccato absolvere.

Quartò, multi tenent, ut Cajetanus, Scotus, Valentia, Antoninus & Navatrus, quòd ille qui habet peccata reservata cum non reservatis, possit adire Superiorem à quo absolvatur, qui si gravioribus negotiis occupetur, & tempus non habuerit audiendi integram confessionem, nec voluerit propter rationabiles causas alteri dare licentiam audiendi & absolvendi, poterit tantùm audire reservata, & absolvere illa cum onere explicandi non reservata alteri confessario; & tunc, inquiunt, illa confessio est sacramentalis & per absolutionem remittuntur peccata reservata directè, & non reservata indirectè; ita quòd debeant postea subjici clavibus Ecclesiæ, ut remittantur directè, sicut peccata quæ oblita fuerunt in præcedentibus confessionibus indirectè remissa fuerunt, & directè postea absolvi debent, idest impendi beneficium absolutionis, ut gratia augeatur & non committatur peccatum novum, illa non confitendo: Nec tunc, aiunt, violabitur integritas confessionis, quia tanta sit quanta requiritur judicio Superioris: alii tamen & meliùs, sentiunt Superiorem non posse sic confessionem dividere; & in hoc casu, si sit negotiis præpeditus, debere tantùm tollere reservationem illorum peccatorum, & absolvere ab excommunicatione; si quæ sit contracta, & postea remittere poenitentem cuilibet confessario approbato, ut faciat illi confessionem sacramentalem.

de omnibus, & absolutionem recipiat.

Quintò, Navarrus, Valentia & alii putant quòd pœnitens dispenseretur à confessione peccati, quando non potest illud exprimere, nisi manifestando complicem; quia inquiunt, præceptum de non infamando proximo, quod est de jure divino naturali, prævalet præcepto confessionis integræ, quod est tantùm de jure divino positivo. Contrarium tenent & probabilius D. Bonaventura, Scorus, Durandus, Sylvester & alii, pro quibus stat D. Bernardus opusculo *de honesta vita formulâ*, circa finem; dicens, *de nullo prorsus loquaris sinistrè, nisi in confessione; & hoc ubi aliter manifestare non potes peccatum tuum*; unde dices ad rationem allatam, quòd occultum peccatum proximi manifestare, non sit illum infamare, quando hoc fit ex rationabili causa & sine intentione infamandi, ut fit in confessione, ubi peccatum manifestetur tantùm Confessario, qui tenetur servare sigillum.

Q U Æ S T I O VII.

An solus Sacerdos sit minister Confessionis?

QUIA in mente hæreticorum Sacramenta & ministri non aliter remittunt peccata, nisi excitando fidem in suscipientibus; idè quilibet laïcus potest hoc facere, & in remissione peccati Papa non excedit mulierculam, inquit Vvicleffus.

SOLUS Sacerdos potest esse minister hujus Sacramenti. Sic Concil. Trident. sess. 14. cap. 6. Ratio est, quia illi soli possunt absolvere, quibus potestas clavium, seu remittendi peccata concessa est; solis autem Apostolis, nedum quatenus repræsentabant Episcopos, sed quatenus Sacerdotes erant, dictum fuit; *Quacumque ligaveritis super terram, &c. Quorum remiseritis, &c.* Hoc, inquam, illis dictum fuit, ut erant Sacerdotes, sicut & hæc verba, *Hoc facite in meam commemorationem*; Cujus ratio est, quia Sacramentum hoc est omnibus necessarium; ergo & conferendum ab illis qui habent characterem communem, nempe sacerdotalem; non potest ergo Ecclesia dispensare, ut aliquis non sacerdos absolvat; hoc enim est de jure divino: Unde, si dicat Jacobus cap. 5. *Confitemini alterutrum peccata*; non loquitur de confessione sacramentali, sed de confessione publica, quæ fiebat humilitatis causâ, de qua dicit Bernardus libro de vera & falsa pœnitentia, *Si desit Sacerdos, peccator confiteatur proximo*: non loquitur, inquam, Apostolus, de confessione Sacramentali ad absolutionem, si enim laicus illam præsumeret conferre; fieret irregularis ex jure Canonico. Quod si loquatur de sacramentali hoc est ad Sacerdotes, qui taliter sunt patres spirituales, ut sint etiam fratres. Quod si ex jure canonico Communio danda est furibus Presbytero aut Diacono confessis; hoc intelligitur de confessione generali quæ fiebat cum privata, ut viderent omnes, an essent contriti & digni Communionem. Sic intelligendus est

292 DE SACRAMENTIS.

Cyprianus committens absolutionem lapsorum cuidam Diacono; loquebatur enim de absolutione illâ, quâ publici pœnitentes recipiebantur in communionem Ecclesiæ.

QUESTIO VIII.

An omnis Sacerdos sit Minister Confessionis?

QUIA dicemus, quod Sacerdos debeat habere potestatem clavium ut absolvere possit; dicendum est quod potestas clavium nihil aliud sit, quàm potestas solvendi & ligandi, quâ sacerdos ut iudex Ecclesiasticus dignos admittere valet ad regnum cœlorum, & indignos repellere; unde sunt duo actus hujus potestatis, quorum primus est solvere, & alius ligare: primus est primariò intentus, & fit per actionem positivam, conferendo gratiam remissionis peccati; posterior verò fit per negationem actionis seu solutionis. In quolibet confessario duplex clavis requiritur, scilicet Ordinis & jurisdictionis. Potestas seu clavis Ordinis nihil aliud est, quàm character sacerdotalis, quo ex institutione divina aliquis deputatur, ut possit esse iudex in foro conscientię. Potestas seu clavis jurisdictionis est autoritas quâ unus alteri est superior in foro pœnitentiali. Prima vocatur potestas tantùm habitualis, impedita defectu materiæ cui possit applicari; Sacerdos enim ut sacerdos, non habet subditos, & consequenter non est iudex: secunda verò vocatur actualis, quia est expedita ad ope-

randum, habetque debitam materiam cui applicetur, nempe subditos: Porro prima est indelebilis sicut caracter, secunda verò auferri potest per excommunicationem & hæresim.

CONCLUSIO.

OMNIS Sacerdos non est Minister hujus Sacramenti, & sic non sufficit sola clavis Ordinis, quam habet ut Sacerdos; sed requiritur clavis jurisdictionis, quâ subditos habeat quos absolvere possit. Sic Concil. Florent determinans tria esse necessaria essentialiter ad hoc Sacramentum, nempe materiam, formam; & ministrum habentem jurisdictionem: unde Concil. Trident. sess. 14. cap. 7. dicit, nullius esse momenti eam absolutionem quam sacerdos profert in eum in quem ordinariam aut subdelegatam non habet jurisdictionem. Ratio in promptu est, quia absolutio est actus judicialis, qui requirit jurisdictionem in subditos. Quando autem illa potestas jurisdictionis datur? Aliqui dicunt, eam tradi cum datur potestas Ordinis ita quod Sacerdos in Ordinatione duplicem potestatem recipiat, unam super corpus Christi verum quod potest consecrare, alteram super mysticum, nempe super Fideles, ad quos absolvendos sit aptus, licet suspendatur ab Ecclesiâ, donec habeat subditos. Sed hoc verum non censetur; sicut enim non potest suspendi potestas Ordinis circa corpus Christi verum, non posset etiam suspendi circa mysticum. Alii dicunt, partim dari potestatem jurisdictionis in Ordine, & partim extra ordinationem, quando committuntur subditi; hoc tamen non placet, quia jurisdictio & subjectio

sunt correlativa ; unde quia in ordinatione non habet subditos ; nullam habet etiam jurisdictionem. Dicendum ergo est, quod potestas Ordinis & Jurisdictionis sint distinctæ ; & quod hæc detur extra Sacramentum Ordinis, per externam concessionem, vel ex officio, quando aliquis destinatur ad curam animarum, ut Papa, Episcopi & Pastores ; eo enim ipso quo ad talia munera recipiuntur, jurisdictionem habent in subditos.

Obj. 1c. Sacerdotes in suâ ordinatione recipiunt potestatem offerendi sacrificium, præterquam nulla alia potestas requiritur, ut sacrificare valeant ; ergo cum accipiant pro tunc etiam potestatem remittendi peccata, nullâ aliâ indigent ; ergo illam habent vi ordinationis, & sic omnis sacerdos absolvere potest. Resp. negando paritatem ; quia potentia consecrandi non habet rationem clavis, non est enim judicium ; unde non requirit jurisdictionem ; bene autem potestas absolvendi exigit ; quia fertur per modum judicii. Dices, in suâ ordinatione constituitur judex ad ferendam absolutionem, ut patet ex verbis Episcoporum ; *Quorum remisseris peccata, remittuntur eis* ; ergo non requiritur alia potestas jurisdictionis. Resp. ex vi ordinationis datur quidem potestas absolvendi, quæ est completa in ratione activi, sed non est completa in ratione passivi ; quia non habentur subditi ; si ergo in Ordine constitutur judex, hoc verum est secundum habitudinem, non secundum actum.



Q U Æ S T I O I X.

*An quilibet Sacerdos possit absolvere à
venialibus peccatis ?*

EX antecedenti quæstione quilibet Sacerdos non potest absolvere à peccatis mortalibus, quia requiritur jurisdictio, sive ordinaria sive delegata ; quod intelligitur etiam de Sacerdotibus circa alios Sacerdotes, ut habetur ex Conc. Trident. sess. 13. cap. 15. ubi statuitur, nullum, etiam regularem, posse confessiones secularium, etiam Sacerdotum audire, nisi habeat parochiale beneficium aut approbationem ab Episcopo ; unde si contrarium sit in usu in multis locis, hoc fit validè & licitè, non ex vi alicujus consuetudinis ; huic enim derogavit Conc. sed ex consensu tacito Episcoporum, qui cùm hoc sciant & non prohibeant, censentur approbare sacerdotes ad hoc ; si tamen hoc prohibeant, non ampliùs est licitum, & manendum est in determinatione Concilii hoc prohibentis : potest nihilominus oriri difficultas de peccatis venialibus, an simplex Sacerdos non approbatus ab illis absolvere possit.

C O N C L U S I O.

SI M P L E X sacerdos cum clavi solius Ordinis absolvere potest à venialibus. Sic Navarrus, Medina & alii. Ratio peti potest ex hoc quod peccata venialia, licet sint materia sufficiens absolutionis, non sunt tamen materia necessaria ; liberum enim est pœnitenti ea subi-

N iij

198 DE SACRAMENTIS.

cere clavibus Ecclesiæ, vel non : ergo liberum est etiam pœnitenti ea submittere cuicumque iudici, modo habeat potestatem Ordinis. Quod confirmari potest ex cap. *Omnis utriusque sexus*, præcipiente, ut singuli confiteantur peccata mortalia proprio Sacerdoti ; unde signum est venialia posse subjici alteri. Deinde, hoc habetur ex consuetudine Ecclesiæ, & tacito consensu Prælatorum.

Q U Æ S T I O X.

An quilibet Sacerdos possit absolvere in articulo mortis ?

AL I Q U I hanc potestatem auferunt excommunicatis, suspensis & interdictis ; quia, inquiunt, censura Ecclesiastica tollit jurisdictionem, quæ tamen est necessaria ; sed ad hoc dicendum est, quod censura tollat jurisdictionem ad licitè absolvendum, non verò ad valide.

C O N C L U S I O.

QU I L I B E T Sacerdos etiam non approbatus in articulo mortis absolvere potest ; ut enim Sacerdos possit absolvere, requiritur tantùm ut habeat potestatem Ordinis & clavem jurisdictionis ; sed utramque habet Sacerdos in articulo mortis : habet enim primò potestatem Ordinis, quia est Sacerdos ; & clavem jurisdictionis, ex concessione enim Ecclesiæ Sacerdos habet quemlibet pro legitimâ materia in articulo mortis ; quod etiam non est de-

negandum Sacerdoti excommunicato, interdicto, suspenso & hæretico; Concil. enim Triden. sess. 14. cap. 7. docet quod omnes Sacerdotes absolvere possint in articulo mortis. Quod dicitur de articulo mortis, dicitur etiam de quovis probabili vitæ periculo, ut in pugnâ, in periculosâ navigatione, & pro eo tempore, quo quis teneretur ex præcepto divino confiteri proprio sacerdoti, si illum haberet. Hæc omnia intelligenda sunt quando deest sacerdos approbatus non excommunicatus qui velit absolvere, pro tunc enim moribundus non est in necessitate confitendi simplici sacerdoti; si autem esset tantum sacerdos excommunicatus præsens, vel degradatus, vel hæreticus; sacerdos non approbatus potest & debet absolvere, non vero excommunicatus. Porro, potestas quam habet simplex sacerdos absolvendi in articulo mortis, est absoluta & directa, itaut absolutus non teneatur, elapso periculo, peccata iterum alteri confiteri, etiamsi reservata fuerint: si tamen habeant censuram annexam, debet absolutus elapso periculo se præsentare Superiori; non ut ab illo absolvatur denuo, sed ut ostendat se esse absolutum, & ad quamlibet poenitentiam recipiendam paratum; aliàs in easdem censuras reincideret ex jure canonico. Hic sciendum, quemlibet Sacerdotem posse summum Pontificem absolvere; sicut enim potest assignare alios pro materiâ, sic & seipsum.

 QUESTIO XI.

Quis sit Minister ordinarius Confessionis?

CERTUM est, omnes Fideles proprium habere sacerdotem cui tenentur confiteri, vel alteri de ejus licentia, itaut aliter Confessio sit nulla: nomine autem proprii Sacerdotis intelligitur ille, cui ex officio animarum cura incumbit, & qui habet jurisdictionem ordinariam in foro conscientiae; siue talis jurisdictio sit proxima & immediata, qualem habent parochi; siue sit universalis & quasi remota, ut est in Episcopis & in summo Pontifice.

CONCLUSIO.

TRIPLEX est Minister ordinarius confessionis; scilicet Summus Pontifex, Episcopus Dioecesanus, & proprius Parochus. Ad summum Pontificem reducuntur summus Poenitentiarius, Legatus à latere, & similes, ad Episcopum reducuntur eorum Vicarii, Abbates exempti, Generales Ordinum & Provinciales, qui habent jurisdictionem quasi Episcopalem super subditos; ad Parochum reducuntur Vicarii perpetui, & in religionibus immediati Praelati, ut sunt Priores, Rectores, Guardiani, &c. eorum omnium jurisdictio non terminatur loco, sed personis; quare extra Dioecesim, vel Parochiam absolvere possunt: talis enim jurisdictio spectat ad personam, non ad locum; quia administratio ejus non requirit solemnitatem. Hi ergo omnes, tum Papa, tum Episcopus, tum Parochus, sunt proprius Sacerdos,

prout proprius condistinguitur contra alienum; unde quilibet potest confiteri in Paschate sua peccata Episcopo, vel ejus Vicario, & in Ecclesia Cathedrali Eucharistiam recipere, quia est mater Ecclesia omnium: Papa tamen & Episcopi non sunt proprii sacerdotes, prout proprius condistinguitur à communi; solus enim est proprius sacerdos qui proximam curam habet administrandi Sacramenta.

QUESTIO XII.

Utrum quis possit dare delegatam Jurisdictionem,

JURISDICTIO in foro conscientiae potest delegari directè, vel indirectè. Delegatur directè, quando Episcopus committit alicui absolvendi potestatem; delegatur indirectè, quando datur poenitenti facultas eligendi sibi confessorium à quo absolvatur, hoc est enim indirectè dare Confessario potestatem absolvendi.

CONCLUSIO.

OMNES qui habent potestatem ordinariam, possunt eam delegare; delegatio enim est unum ex actibus jurisdictionis ordinariae; unde Papa potest illam delegare pro quolibet loco & quibuslibet peccatis; Episcopi etiam delegare possunt in suâ Dicecesi, licet verò Parochi possint delegare in sua parochia jure communi, quia habent jurisdictionem ordinariam, jure tamen positivo non possunt delegare, nisi eos qui approbati sunt ab Episcopo; eorum enim potestas restricta est per Concil. Trident. Præ-

N vj

ter hos, nullus delegare potest apud sæculares Ecclesiasticos; alii enim sunt delegati, & delegatus delegare non potest, nisi ex commissione speciali; tamen apud Regulares, Generales & Provinciales delegare possunt, & Guardiani respectu eorum, qui approbati sunt à Provincialibus: Delegatio nullam habet formam specialem ad delegandum necessariam; sed sufficit quod delegans explicet suam voluntatem, quoquo modo hoc fiat. Quoad tempus quo durat delegatio, dicendum est posse revocari à delegante. Quòd si fiat ad præfixum tempus, durat tantum pro illo: si vero delegatio facta fuerit indefinitè, tamdiu durat quamdiu non revocatur: nec per mortem delegantis amittitur jurisdictio delegata, quia tenet legem gratiæ & favoris; favor autem non expirat morte concedentis: sic privilegia regularium durant mortuo Papâ aut Episcopo, modo non fuerint revocata à successore, vel à Capitulo.

QUESTIO XXIII.

An habens potestatem audiendi Confessiones à Papâ vel Episcopo, possit illas audire sine licentiâ Episcopi aut Parochi?

PAPA, Episcopus, & Parochus sunt ministri ordinarii confessionis, ad quos pertinet delegare; excepto tamen parochi, cui per Concil. Trident. delegandi restricta est potestas ad sacerdotes approbatos: cum ergo

Papa possit delegare in totâ Ecclesiâ, quæritur, utrûm talis delegatio valeat sine licentiâ Episcoporum; cûm etiam Episcopus quilibet deputare possit in suâ Diœcesi, quæritur utrûm sic delegatus ab Episcopo possit audire confessiones reluctantes Parochis.

CONCLUSIO.

SUFFICIT Jurisdictio delegata Papæ aut Episcopi, ut quis possit audire confessiones, reluctante Episcopo, aut Parocho, nisi hæc restrictio apponatur in delegatione. Sic omnes Summistæ, qui hoc colligunt ex Joanne XII. in extravaganti *vas electionis*, Benedicto XI. & Martino V. Ratio est, quia Papa & Episcopus possunt per se audire confessiones cujuscunque subditi sine licentiâ Pastorum inferiorum; habent enim jurisdictionem, nedum illis æqualem, sed & superiorem: ergo possunt alios ita delegare, ut operari possint sine Parochi licentiâ. Deinde, si privilegium à superiore concessum exigeret licentiâ inferioris, esset inutile; quia ipsa licentiâ inferioris, sufficeret; unde Honorius III. rogatus de quodam privilegio concessio Ordini Minorum & Prædicatorum de celebrando in altari portatili, respondit privilegium intelligendum esse sine licentiâ inferiorum prælatorum, quia aliàs nihil operaretur.

OBJEC. privilegium concessum alicui intelligendum esse sine præjudicio alterius ex communi axiomate juris; hoc autem cederet in præjudicium Parochi qui privaretur jure suo. Resp. quod non privaretur jure suo; habet enim tantum jurisdictionem subordinatam

superiori; unde sicut superior potest illa uti, quando vult, sic illam delegare potest alteri. Deinde non habet jurisdictionem propter suam utilitatem, sed ovium suarum. Tandem per hoc juvantur Parochi.

O B J E C. secundò, ex cap. *Omnis utriusque sexus*, omnes Sacerdotes debent proprio Sacerdoti vel alteri ex ejus licentiâ confiteri; nomine autem proprii Sacerdotis intelligitur Parochus, unde Sixtus I V. agens de privilegiis Mendicantibus concessis dicit, per illa privilegia non esse derogatum, quominus Fideles semel in anno tempore Paschatis suo proprio Sacerdoti confiteri teneantur. Resp. nomine proprii Sacerdotis intelligi vel Papam, vel Episcopum, vel Parochum; unde ait D. Thomas cap. 4. opusculi 191. *Qui confessus est Episcopo suo, vel habenti vicem ejus, confessus est proprio Sacerdoti*; ex quibus patet, confessionem sanctam religioso satisfacere pro annuo præcepto, sicut expressè definivit Benedictus XI. extravag. prima *de privilegiis*, & Joannes XXI. extravaganti *vas electionis*, de Hæreticis, & Clemens VIII. qui hanc conclusionem definivit, dum quidam pastores hanc questionem moverent. Quòd si Sixtus I V. dicat, se non velle religiosos hoc prædicare; hoc est ad servandam pacem; additur enim in eadem bulla, *ipsi fratres Mendicantes non consentur exclusi, quominus secundum juris communis & privilegiorum eisdem concessorum dispositionem confessiones audire & poenitentias injungere valeant*. Hoc confirmat Pius V. in bullâ: *Et si Mendicantes*, ubi sic habet, *A confessionibus audiendis, tam intra*

eorum Ecclesias & domos, quàm extra, minimè prohibeantur Mendicantes, super hoc litteras felicis recordationis Pauli Papa IV. prædecessoris nostri, concedentes eisdem fratribus Mendicantibus regularis observantia, posse confessiones secularium personarum etiam infirmarum, etiam extra domos & monasteria sua & ubi libet audire, approbando, & de novo concedendo. Nec dicant, omnia privilegia (quæ vocant Regularium, & quæ potius vocari deberent populorum privilegia, quoniam in favorem illorum & non regularium sunt) esse revocata; hoc enim dicere non sufficit, imò probandum remanet; nec ullo modo probari poterit: licet enim Pius IV. Pius V. & Gregorius XIII. ad terminos Concil. Trident. ea reduxerint; non tamen ullo modo illa revocarunt; imò Urbanus VIII. qui revocavit privilegia quibus certi quidam religiosi audiebant confessiones sine approbatione Ordinarii, in bulla quæ incipit, *in plenitudinem potestatis*, confirmat omnia regularium privilegia, dummodò sint in usu, sacrique Concilii decretis minimè adversentur; nusquam autem reperietur in Concilio, revocatum fuisse privilegium, quo in Paschate absolvere possunt Regulares etiam ad impletionem præcepti annuæ confessionis; imò Clemens VIII. renovavit illud, & Innocentius X. qui in brevi Apostolico dato anno 1649. post maturam discussionem determinavit, quòd Regulares & communionem dare & confessionem recipere possent, etiam in Paschate. Concil. Trident. etiam nullomodo revocavit privilegium, quo fideles audire possunt

Missam in Ecclesiis regularium, & non teneri ulterius ad Missam Parochialem; Leo enim XI. in Bullâ quæ incipit, *intelleximus*, qua situs an Fideles satisfaciant præcepto Ecclesiæ de audiendâ Missâ diebus festis & dominicis, cum illi adsunt in Ecclesiis regularium, respondet affirmativè, modo hoc fiat non contempto proprio Sacerdote Parochiali; & ibi derogat decretis omnibus in contrarium emanatis: unde Concil. Trident. sess. 21. tantummodo præcipit, quòd moneantur populi, ut frequenter ad suas parochias, saltem diebus Dominicis, & majoribus festis accedant; supra quod congregatio Cardinalium sacri Concilii interpretum notat, admonendos esse & non cogendos populos, ut frequentent Parochias suas ad audiendam Missam. Pius V. hoc decretum Concilii explicavit in Bullâ. *Et si Mendicantium*, intentionem Ecclesiæ declarans, quòd satisfiat præcepto audiendi Missam diebus festis & dominicis in Ecclesiis regularium. Idem determinavit Clemens VIII. in Bullâ *Significatur*. Quòd si Sixtus IV. inhibeat fratribus Mendicantibus, ne hoc prædicent; hoc est ad pacem servandam. Quòd si idem Sixtus dicat, hoc jure cautum esse, quòd Parochiani Missas audiant in sua Parochia; addit illicò, *Nisi forsitan ex honesta causa ab Ecclesia se absentarent*; illa autem justa causa potest esse, quòd aliqui magis recolligantur in Ecclesiis regularium, quàm in aliis; vel quòd ibi majorem devotionem habere soleant. Quoad constitutionem juris hoc præcipientis, continetur capite *us Dominicis, de Parochiis*; ubi additur hoc esse

prohibitum, si fiat proprio contempto presbyro. Quòd si multoties vel ex jure, vel in bullis specialibus habeatur, quòd regulares non possint administrare Sacramenta; hoc est ex jure communi; possunt tamen ex privilegio.

Q U Æ S T I O X I V.

Quis sit minister vagorum, & itinerantium?

S U M M U S Pontifex potest sibi eligere confessarium jure divino, Episcopi & Prælati jure Ecclesiastico, cap. ult. *de pœnitentia & remissione*, Parochi & sacerdotes sæculares hoc habent ex consuetudine; debent tamen eligere sacerdotes approbatos ab Episcopo, uti determinavit Concil. Trident. sed respectu vagorum & itinerantium quid sit sentiendum, quærimus.

C O N C L U S I O.

Q U I duo habent domicilia in quibus æquè habitant per annum, possunt utrique Parocho confiteri, quia uterque est proprius Sacerdos, & hæc jurisdictio non sequitur actua-lem habitationem, seu domicilium. Quoad illos qui habent in aliquo loco fixum domici- lium, non in alio, ut Scholares, Milites, Mer- catores, Litigantes, possunt confiteri in paro- chia in qua habitant; talis enim consuetudo fuit justè introducta, nè diutius hoc Sacra- mento careant. Quoad vagos, debent confite- ri in loco ubi vagantur, tali sacerdoti qualem voluerint eligere; actualis enim habitatio te-

net locum domicilii, & parochus loci in quo commorantur, potest ad hoc illos astringere. Quoad peregrinos, possunt confiteri Parocho loci ad quem perveniunt; olim de hoc perebant licentiam à proprio sacerdote, nunc ex consuetudine sufficit tacita licentia illius, modo iter agant bona fide & non in fraudem legis.

Q U Æ S T I O X V.

*Quanam conditiones requirantur in
Confessario?*

ALIÆ requiruntur, ut validè administretur confessio; aliæ, ut licitè fiat. Ut validè confessio administretur, requiritur quòd Minister sit sacerdos; quòd sit approbatus ab Ordinario poenitentis, ipsis enim demandata est cura de suis ovibus; & quòd non sit excommunicatus, suspensus, degradatus, aut hæreticus; tales enim censentur amisisse jurisdictionem: requiritur denique, ut intentionem absolvendi habeat. Quoad conditiones requisitas, ut licitè administretur confessio, explicabit

C O N C L U S I O .

TRES præfettim conditiones requiruntur ad licitè administrandam confessionem, nimirum Bonitas moralis, Scientia, & Prudentia. Requiritur primò Bonitas, ut volunt omnes, non enim debent administrari Sacramenta cum conscientia peccati mortalis: sa-

sacerdos ergo debet prius esse confessus vel contritus; & sic peccatum est eligere confessarium, quem constat esse in peccato mortali; est enim contra charitatem inducere aliquem ad opus, quod facturus sit cum peccato mortali; quòd si tamen accedatur minister ex officio, cui ex onere pastoratus incumbit audire confessiones, tunc licitum est uti jure suo, & ab illo absolutionem petere, modo non sint alii.

Secundò, requiritur Scientia: nullus enim debet exercere judicium in aliqua causa gravi, nisi habeat scientiam proportionatam ad ferendum æquum judicium, aliàs se exponeret periculo malè judicandi. Debent autem communiter scire confessarii, quænam sit distinctio inter peccatum mortale & veniale; quænam peccata habeant adjunctam excommunicationem, & quæ non; debent scire, quæ circumstantiæ mutant speciem peccati, & quæ aggravent tantum; non debent ignorare, quando pœnitens ad restitutionem tenetur; & sic debent scire contractus usurarios, & aliquid de speciebus irregularitatum, maxime si confessarius velit absolvere sacerdotes; debet scire quæ sint necessaria, ut pœnitens sit dispositus ad absolutionem recipiendam, tum ex parte doloris pro peccatis præteritis, tum ex parte propositi pro futuris vitandis; non debet tamen scire solutionem omnium difficultatum quæ oriri possunt, sed sufficit ut possit solvere ea quæ frequentius accidunt, & de aliis possit dubitare, ut consilium petat vel à peritis vel à libris.

Tertiò, requiritur Prudentia in confessario. Primò in interrogando pœnitentem de his

quæ ignorat, vel occultare vellet. Secundò in adjuvando ipsum, ut contritionem concipiat & firmum propositum non recidivandi. Tertiò in erudiendo illum de credendis & faciendis. Quartò in pacificando ipsius conscientiam, si scrupulis angatur. Quintò in adhibendo consilia & remedia pro peccatis vitandis. Sextò in expendendo an pœnitens sit ritè dispositus ad absolutionem recipiendam; ubi attendere debet an illa sit deneganda. Quòd si pœnitens peccatum, aut occasionem proximam peccati relinquere non vult, absolvi non potest; signum enim est quòd non verè doleat de peccato: si verò ex merâ fragilitate in eadem peccata sæpius relabatur, non desinat absolvi, mo-
 mo præsumatur accedere cum verâ Contritione aut Attritione de peccatis, & firmo proposito non amplius peccandi: sic enim expressè habet Concilium Trident. sess. 14. cap. 2.

Q U Æ S T I O X I V .

Quid dicendum sit de casibus reservatis?

PER reservationem peccatorum intelligitur ablatio, seu non concessio jurisdictionis à superiore ad absolvenda certa quædam peccata; cum enim jurisdictio absolvendi à peccatis detur per auctoritatem superioris, ideò potest illam dare circa aliqua peccata, & negare circa alia, & ista censentur reservari.

CONCLUSIO.

EST in Ecclesiâ potestas reservandi casus, non tantum quoad externam gubernationem, sed etiam in foro conscientiæ. Sic determinavit Concilium Trident. sess. 14. cap. 11. *Si quis dixerit Episcopos non habere jus reservandi sibi casus, nisi quoad externam politiam, atque idè casuum reservationem non prohibere, quominus sacerdos à reservatis verè absolvat, Anathema sit.* Licet autem loquatur tantum de Episcopis, attamen illa potestas residet in omnibus prælatis jurisdictionem habentibus, sive summam, quam habet Papa; sive Episcopalem, quam habent cum Episcopis Generales & Provinciales Ordinum. In Papâ est potestas reservandi in Ecclesiâ universâ, in Episcopo pro suâ Diocesi, & in prælatis regularibus pro suis subditis. Parochi, quia non sunt prælati, non habent potestatem reservandi sibi casus, nec Guardiani nostræ religionis; licet enim prælati sint, quia habent jurisdictionem in forum interno, tum externo; non possunt tamen sibi reservare casus, quia ut diximus, casuum reservatio est tantum ablatio seu non concessio jurisdictionis circa certa peccata, & sic pertinet tantum ad illos, ad quos spectat approbatio & concessio jurisdictionis; sed collatio jurisdictionis non spectat ad Guardianos; ergo nec casuum reservatio. Imò Generales non possunt reservare, nisi ex consensu generalis Capituli, & Provinciales ex consensu provincialis Capituli, ut habetur ex decreto Clementis VIII. Quoad peccata quæ reservari possunt, dicendum est venialia reservari non posse;

310 DE SACRAMENTIS.

quia possunt non subjici absolutioni ; sunt enim materia tantum sufficiens confessionis, non necessaria : mortalia verò tum interna, tum externa reservari possunt non tamen reservantur nisi externa : omnia ergo peccata externa reservari possunt validè, non tamen licitè ; sed tantum ea quæ habent gravitatem aliquam, vel quæ necessaria sunt ad bonum publicum, ut reserventur ; si tamen Prælati sine justa causa reservet sibi peccatum, reverà reservabitur. Aliqua peccata reservantur ratione censuræ ipsis annexæ ; non potest enim quis absolvi à peccato, nisi antea ab illo tollatur excommunicatio ; impedit enim excommunicatio participationem Sacramentorum. Alia reservantur propter solam culpam, quam non vult absolvi superior. Omnes casus reservati Summo Pontifici habent annexam excommunicationem ; non sic de casibus Episcopis reservatis. Episcoporum casus reservati vel sunt de jure communi ; & sunt hi quinque, nempe homicidium voluntarium, falsificatio litterarum Episcopaliū, violatio libertatis Ecclesiæ, violatio immunitatis Ecclesiæ, & sortilegium. Alii sunt reservati de jure speciali Ecclesiæ, de quibus videantur ritualia Episcoporum. Alii tandem sunt reservati de jure personali, & hos quilibet Episcopus sibi reservat.

Quoad potestatem absolvendi à casibus reservatis ; dico, quòd qui reservavit sibi peccata, potest de illis absolvere, sicut & superior ipsius ; nemo enim peccata reservans intendit sibi potentiam absolvendi adimere, nec suo superiori, nec suo successorì æqualem juris.

ditionem habenti. In articulo mortis quilibet sacerdos absolvere potest à casibus reservatis, pro tunc enim non sunt casus reservati, ut habet Concil. Trident. Sess 14. cap. 7. quando tamen aliqui absolvuntur ab excommunicatione Pontifici reservata, debet ab eis exigì juramentum, quòd si convalescant, præsentabunt se ei à quo extra articulum mortis poterant absolvi. Quòd si superior audiat omnia peccata tum reservata, tum non reservata, ab omnibus debet absolvere; necessaria est enim integritas tum absolutionis, tum confessionis. Quòd si superior negotiis præpeditus non possit integram confessionem audire, debet dare licentiam alicui, ut audiatur pœnitens & absolvatur ab omnibus. Quòd si propter justas causas non velit, maximi momenti authores dicunt quòd possit tantùm audire peccata reservata, & illa absolvere: alii æqualis famæ & numeri contrarium sentiunt, in quam partem facilius descenderem, dicendo scilicet, quòd tale impedimentum non sit ratio sufficiens ad tollendam integritatem confessionis; unde censerem, quòd superior pro tunc deberet tollere reservationem casuum, & absolvere ab excommunicatione in foro externo, tuncque dimittere pœnitentem ad ordinarium confessarium.



 QUESTIO XVII.

Quo jure & in quibus servari debeat Sigillum Confessionis?

PER Sigillum Confessionis, quod est nomen metaphoricum, intelligitur obligatio, quam habent sacerdotes & alii participantes ad auditionem confessionis, celandi ea quæ per eam noverint. Dicendum ergo nobis est aliquid de Sigillo.

CONCLUSIO.

SIGILLUM Confessionis debet servari tum de lege naturali, tum de divina, tum de Ecclesiastica. Debet servari de jure naturali; per illud enim tenemur servare depositum, præstare fidelitatem, famam illorum servare qui illam apud nos deposuerunt, tandem alteri non facere quod nobis fieri nolumus. Debet etiam servari ex jure divino, quia confessio est juris divini: ergo secretum Confessionis præcipitur eodem jure, sine quo esset nimis, odiosa; qui enim præcipit finem, censetur ea præcipere sine quibus finis subsistere nequit, Quod denique sit de jure humano Ecclesiastico, constat ex capite *Omnis utriusque sexus*, de poenitentis & remissionibus, ubi hoc prohibetur strictissimè sub poenâ gravissimâ à judice infligendâ; sacerdos tamen qui peccatum confessum manifestaret, non fieret irregularis; hoc enim non fertur in jure. Ad secretum servandum plures tenentur. Primò Confessarius,


rius. Secundò illi qui quovis modo cognoscunt aliquod peccatum ex confessione , ut interpres confessionis , & illi qui sedentes prope confitentem , casu aut industriâ peccata audiunt. Tertio qui fingit se esse sacerdotem , & ut talis confessionem audit. Quartò laïcus , cui facta fuit confessio ex humilitate. Quintò ille cui revelata fuit confessio à sacerdote , injustè , aut justè de licentia pœnitentis. Sextò tenentur Superiores ad secretum quibus confessarii aliquid virtualiter de confessione revelaverint , ut petendo ab illis licentiam à peccatis reservatis absolvendi. Septimò qui invenit chartam ubi peccata scripta sunt : Non tamen tenetur pœnitens ad celandam ea quæ sibi dicta sunt à confessario , qualis est Pœnitentia , nisi hoc exigeret confessarius.

Sigillum confessiones servandum est tam directè , quàm indirectè ; unde non potest sacerdos dicere se non absolvisse talem pœnitentem ; esset enim moraliter revelare peccatum mortale , sine quo non negatur absolutio. Non debet etiam manifestare venialia in particulari , licet minima sint. Servandum est secretum tum verbis , tum signis , unde sacerdos non potest publice negare Eucharistiam ex scientia habitâ solùm in confessione. Non potest sacerdos ullum crimen revelare , qualecumque sit , non obstante quacunque interrogatione , sive extra iudicium , sive in iudicio , sive cum iuramento , sive absque eo ; nulla enim est iuridica interrogatio circa hoc , & sic semper æquivocare debet sacerdos , quòd scilicet hoc nesciat ut revelet , hoc nesciat ut homo , sed ut minister Dei.

Confessarius vi Sigilli non potest uti extra confessionem notitiâ acquisitâ per illam; & sic non potest Confessarius extra tribunal loqui cum pœnitente de peccatis confessis, cum animo illum adjuvandi, quidquid dicant aliqui; hoc enim pudorem & confusionem injicit ipsi pœnitenti: per hoc tamen non frangeretur Sigillum confessionis; non enim esset revelare peccata audita alteri: pœnitens ergo debet interrogare extra confessionem, vel dare licentiam ut loqui possit sacerdos. Ex hac veritate multa colliguntur: Primò, superiorem qui audivit confessionem sui inferioris, non posse illum ita gubernare, ut alii possint suspicari peccatum illius; imò, ut ipse agnoscat, hoc sibi fieri ratione confessionis, ne illi odiosum reddatur Sacramentum; si tamen noverit alio modo suum peccatum, potest illud punire, ac si non fuisset confessum. Secundò, qui ex confessione novit servum suum esse furem, non debet ex solâ scientiâ confessionis illum dimittere, nec prætexere excusationem ut dimittat. An Confessarius possit denegare suffragium pœnitenti, ut eligatur ad beneficium, quem aliàs novit probum & per confessionem improbum videt; negant Bonacina, Sanches, Suares, Filiucius; alii verò affirmant. Tertiò, Parochus non potest aliquem rejicere à Matrimonio quem novit impotentem ex confessione, aut convictum gravi crimine. Quartò, nullus potest uti scientiâ ex confessione habita cum revelatione peccati aut ejus periculo, ad tuendum bonum temporale aut spirituale quantumcunque magnum sit. Quintò, ille qui per confes-

DE SACRAMENTIS. 315

nē novit Ecclesiam esse pollutā, non potest hoc detegere, ut reconcilietur. Sexto, non potest Confessarius ob peccata confessa vultum asperiores solito præbere pœnitenti. Septimo denique, qui scit per confessionem pœnitentem admiscuisse venenum vino, potest abstinere à celebratione Missæ, inquiunt omnes Doctores.



CAPUT OCTAVUM.

De Satisfactione.

VNA fieri potest extrà Sacramentum, quando scilicet quis cognoscens se commisisse peccatum, aliquas pœnas acceptat: alia fit in Sacramento per opera injuncta à Confessario, & hæc vocatur Sacramentalis, de quâ loquendum est.

QUESTIO UNICA.

Quid dicendum sit de Satisfactione?

SATISFACTIO, quæ, ut diximus, est pars integrans Pœnitentiæ, describitur, Compensatio pœnæ temporalis debitæ ob injuriam Deo illatam, consistens in operibus pœnalibus taxatis à Confessario. Illa autem Satisfactio est pars Sacramenti, non quidem essentialis, quia Sacramentum potest esse sine satisfactione exhibitâ, & confert effectum ante expletam satisfactionem; dicitur tamen pars integrans, quia

regulariter tamen debet esse tale, ut major sit Pœnitentia. Tandem opus satisfactionis debet esse personale, licet aliquando confessor possit acceptare opus eliciendum ab alio iusta de causa.

Satisfactio Sacramentalis confert effectum *ex opere operato*, scilicet remissionem alicujus pœnæ temporalis; quoniam enim est pars Sacramenti, debet operari ut Sacramentum, Sacramentum autem confert suum effectum *ex opere operato*: hoc tamen debet intelligi, modo non ponatur obex; quia qui in peccato existens elicit opus injunctum à confessario, satisfacit quidem præcepto sacerdotis, & reddit Sacramentum integrum, & sic non peccat mortaliter, quod faceret si prætermitteret illud opus: illud tamen opus non prodest illi ad remissionem pœnæ peccati, licet proficit, ablato impedimento, ut dicunt quamplurimi Doctores: præter remissionem autem pœnæ quæ per Pœnitentiam tollitur, seu per opus Satisfactionis *ex opere operato*, potest tolli alia pœna, quæ respondebit *operi operantis*.

Pœnitens tenetur acceptare Pœnitentiam tolerabilem, acceptamque adimplere, ex Concilio Tridentino, sess. 14. cap. 8. ubi potestatem ligandi sacerdotibus concessam intelligit, quantum ad potestatem obligandi ad satisfactionem. Sic habetur ex cap. *Omnis utriusque sexus*, ubi præcipitur ut quisquis fidelis impleat Pœnitentiam à confessario injunctam. Ratio est, quia quilibet subditus tenetur obtemperare sententiæ sui legitimi judicis; potest tamen pœnitens rogare confessarium, ut illam mitiget, cui debet annuere confessarius ad red-

318 DE SACRAMENTIS.

adendum facilius jugum confessionis : imò potest poenitens ante acceptam absolutionem dicere sacerdoti, quòd si nolit moderare Poenitentiam, melius velit alterum adire Confessarium ; non tenetur enim Confessario obedire, nisi in ordine ad absolutionem.

Confessarius ex justa & rationabili causa Poenitentiam mutare potest ; sive sit data à se, quia sicut eam semel injunxit, ita mutare potest, cum nulli faciat injuriam ; sive ab æquali sit injuncta, quia Confessarius æqualis habet potestatem æqualem ; sive etiam à Superiore, modo injuncta sit propter peccata non reservata ; quia sicut potuisset illa peccata absolvere, etiam posito quòd Superior absolverit, potest Poenitentiam commutare ex rationabili causa. Quòd si peccata fuerint reservata, aliqui dicunt Poenitentiam posse mutari, aliqui non. Quando autem mutatur Poenitentia, debet poenitens iterare confessionem majorum peccatorum, super quæ applicata fuit illa Poenitentia, supposito quòd eam oblitus fuerit ; si verò poenitens recorderetur suæ poenitentiae, poterit mutari sine iteratione peccatorum ; tunc enim sufficienter cognoscit statum poenitentis ad mutandam illius Poenitentiam.





CAPUT NONUM.

De Indulgentiis.

PŒNITENTIA non tollit pœnas peccati totaliter, sed de æternis illas mutat in temporales: remissa ergo culpa per absolutionem, remanet pœna luenda in hoc sæculo, vel in purgatorio; per actiones scilicet pœnales in hoc sæculo, quæ satisfactoriæ sunt; & hæc est via ordinaria quâ pœna peccati remittitur, alia est via ordinaria: per indulgentias scilicet, quibus nobis applicantur merita Christi & Sanctorum in satisfactionem pœnarum quas debemus luere in hoc sæculo, vel in futuro; unde postquam egimus de Pœnitentia, quæ tollit culpam, & de satisfactione quæ est via ordinaria ad remissionem pœnæ, agendum est de Indulgentiis, quæ sunt via extraordinaria.

 Q U A S T I O P R I M A.

Quid sint Indulgentia, & in quo consistant?

AL I Q U A N D O nomen Indulgentiæ significat nimiam licentiam agendi impunè contra legem; aliquando significat remissionem criminis: sed ut sumitur in præsentī, significat remissionem pœnæ temporalis debitæ peccato post ipsius absolutionem, quæ

O iiiij

totaliter remittitur, si Indulgentia sit plenaria; & partialiter tantum, si sit limitata.

CONCLUSIO PRIMA.

INDULGENTIA est relaxatio pœnæ temporalis, debitæ peccatis actualibus, concessa per applicationem thesauri Ecclesiastici. Dicitur primò, *relaxatio pœna*; quia per Indulgentiam tollitur pœna peccato debita: hoc etiam dicitur, ut innotescat per indulgentiam peccatum non tolli, nequidem veniale, sed tantum pœnam. Dicitur secundò, *pœna temporalis*; quia per Indulgentias non remittitur pœna æterna, quoniam debetur peccatis mortalibus nondum deletis, & per Indulgentias non delentur peccata. Dicitur tertio, *debita peccato actuali*; non originali; quia remittitur per Baptismum, quo aufertur peccatum & omnis reatus seu pœna peccati. Additur, *per applicationem thesauri Ecclesiastici*; quia sicut in republica servatur thesaurus seu copia pecuniæ civibus distribuendæ juxta necessitatem, ita in acceptatione Dei conservatur thesaurus constans ex infinitis meritis Christi & satisfactionibus Sanctorum, cujus dispositionem habet Summus Pontifex; unde potest illum distribuere secundum necessitatem Ecclesiæ.

CONCLUSIO SECUNDA.

INDULGENTIÆ fundantur in potestate quam habet Ecclesia condonandi pœnas peccatorum, etiam extra Sacramentum; quæ potestas colligitur ex Matth. 16. *Quodcumque solveris super terram, erit solutum & in colis*: hæc autem verba sunt universalissima, unde vi sua omnem actum solvendi includunt, non solum à pec-

catis, sed etiam à peccatorum pœnis, ut confirmat traditio Ecclesiæ & usus antiquissimus. Illa potestas concedendi Indulgentias habet pro fundamento merita Christi & satisfactiones Sanctorum; multa enim opera egit Christus, quæ erant superabundantia, quando quidem per unum actum infinitos mundos poterat redimere, quodlibet enim opus Christi erat infiniti valoris; unde quandoquidem multa opera meritoria elicit Christus, non debuerunt esse inania, sed remanserunt in thesauro Ecclesiæ, hoc est in acceptione divina, ut peccatoribus applicarentur. Multi etiam Sancti multa opera satisfactoria præstiterunt, quæ sibi non erant necessaria, & hoc etiam tempore iusti faciunt multa opera quæ sunt supererogationis, & præstant exuperantes satisfactiones quibus non indigent; unde reponuntur in thesauro Ecclesiæ & nobis conceduntur per Bullas Pontificum, quæ sunt signa externa per quæ voluntas Pontificis nobis applicantis tales satisfactiones, innotescit: Nec propterea dicendum est, quod nos redimant Sancti, quia redemptio illi tantum attribuitur qui liberat à culpa & à pœna æterna.

Objiciunt Hæretici, merita Christi & Sanctorum recepisse sufficiens præmium: Christus, v. g. sui nominis exaltationem recipiendo, & Sancti accipiendo gloriam quæ superat omnia merita: ergo nec Christus nec Sancti habuerunt superabundantia opera in quibus fundetur thesaurus Ecclesiæ. Resp. quod Christus propter infinitatem suorum meritorum nullum potuerit recipere præmium creatum propor-

tionatum illis ; quoad sanctos, bona illorum opera erunt simul & meritoria & satisfactoria : ut erant meritoria non fuerunt superabundantia, quia illis data fuit pro præmio & gloria æterna ad quam *non sunt condigna passiones huius temporis*, inquit D. Paulus : ut erant verò satisfactoria, illis correspondet remissio poenæ peccati ; & quia elicuerunt plura opera post expiationem suorum peccatorum, talia opera erant superabundantia in satisfactione ; & sic remanserunt in thesauro Ecclesiæ : Quis enim putat quòd Joannes Baptista, qui nullum peccatum mortale unquam admisit, non præstiterit plura opera satisfactoria superabundantia, quæ inutilia esse non debuerunt ? quod à fortiori dicendum est de beata Virgine, quæ semper benè operata est, & nullum quantumvis leve peccatum admisit : Sanctorum ergo satisfactio illis superflua, aliis est necessaria & ipsis applicatur : & in hoc stat aliquo modo Sanctorum communio. Notetur tamen, à satisfactionibus Sanctorum thesaurum Ecclesiæ non esse infinitum, sed à meritis Christi, quæ infinita fuerunt ; unde evacuari non potest. Porro, ex hoc non est dicendum, quòd satisfactiones Sanctorum sint superflue, si satisfactio Christi sit infinita : potest enim ex hoc tantum inferri quòd non sint necessariae absolutè ; & ut superflue non remaneant, respondent aliqui, quòd per Indulgentias applicetur certus & limitatus gradus satisfactionum Christi, qui additur gradus satisfactionum Sanctorum ; hoc enim est Christo honorificum, quoniam Sanctorum merita sunt à passione Christi,

QUESTIO II.

Quotuplex est Indulgentia, & quomodo Indulgentia ad tempus intelligi debeant?

DIVIDITUR communiter Indulgentia in personalem, localem & realem. Personalis est illa quam Pontifex ita confert personæ, ut illi quasi inhæreat; sicut quando Papa dat alicui Indulgentiam, quotiescumque profert ter nomen Jesu & Mariæ. Localis est ea quæ inhæret loco, ut quando datur Indulgentia illis qui aliquam Ecclesiam visitant. Realis denique est ea quæ inhæret alicui rei; ut quando Pontifex dat Indulgentias ferenti Rosarium, aut Imaginem Crucifixi: istæ autem sunt annexæ rei, & ob hoc dicuntur reales. Præter hanc divisionem Indulgentiarum est alia, quam asseret

CONCLUSIO PRIMA.

DIVIDITUR Indulgentia in Plenariam & Temporalem, seu ad tempus aliquod limitatam. Plenaria est ea quæ remittit, non quidem culpam, ut diximus, sed totam pœnam debitam peccatis; & hoc vel absolute, quando scilicet nulla est restrictio in Bullâ; vel in certo genere, ut quando in Bullâ datur Indulgentia Plenaria de pœnitentiis injunctis; pro tunc enim hæc verba denotant Indulgentiam prodesse tantum ad remittendam pœnam debitam pœnitentiis injunctis, & non peractis. Indulgentia temporalis est ea quæ tantum aliqua

O vj

324 DE SACRAMENTIS.

pars pœnæ debitæ peccato relaxatur; ficut quando dantur Indulgentiæ quadraginta dierum, vel septem, aut centum, aut mille annorum. Aliquando per certas Indulgentias remittitur quarta, vel tertia, vel dimidia pars pœnarum peccatis debitarum; & tunc qui habet plures pœnas luendas, indulgentias lucrando, per accidens majorem fructum percipit. Aliquando datæ sunt Indulgentiæ duarum, vel trium aut quatuor Catenarum, in primitivâ enim Ecclesia injungebatur aliquando Catena, idest obligatio jejunandi in pane & aqua quadraginta diebus, qui præcedebant septem annos pœnitentiæ publicæ pro certis peccatis & hæc pœnitentia injungebatur illis, qui falsa accusatione erant causa mortis alterius. Aliqui distinguunt inter plenariam Indulgentiam & Jubilæum; distinctio tamen nulla est, nisi accidentalis, ratione scilicet adjunctorum; in quantum in Jubilæo conceditur major potestas, absolvendi nimirum à casibus reservatis & censuris, & dispensandi super aliqua vota, & aliquando super irregularitatem; sed hoc non est de ratione Indulgentiæ, quia respicit tantum remissionem, non culpæ, sed pœnæ temporalis, quæ æqualiter condonatur in Indulgentia plenaria, ac in Jubilæo.

CONCLUSIO SECUNDA.

QUANDO dantur Indulgentiæ, v. g. centum annorum, per hoc intelligi non debet, quòd relaxentur centum anni de pœnis solvendis in purgatorio; sed intelligitur, quòd tot & tantæ pœnæ purgatorii remittantur, quot & quantæ deletæ fuissent per Pœnitentiam.

tiam centum annorum injunctam per antiquos canones; olim enim pro gravibus peccatis, v. g. pro adulterio & similibus injungebantur Pœnitentiæ septem annorum, & pro gravioribus longiores; unde, illi qui multa millia peccatorum patraverant, multis annorum millibus Pœnitentiam debuissent agere, si potuissent; istæ autem Pœnitentiæ minuebant pœnas quæ debebantur peccatis in purgatorio; unde Indulgentiæ mille annorum, v. g. tot relaxabant pœnas purgatorii, quod relaxassent mille anni Pœnitentiæ antiquæ.

QUESTIO III.

Quid sit Jubilæus?

ANTEQUAM ipsius explicationem afferamus, notandum est, quod ipsius figura duplex habeatur in veteri Testamento, quarum prima fuit in anno Sabbatico, & secunda in anno Jubilæo.

Annus Sabbaticus in lege Mosaïca erat septimus, quo in memoriam diei septimæ, Judæi non colebant terram, nec metebant; sicut enim Deus sex diebus operatus est, & septimo requievit; sic jussit Hebræis Exod. 23. ut sex annis colerent terram & meterent, & septimo cessarent ab omni cultura; quo anno gaudebant pauperes fructibus qui sponte nascebantur; anno verò sexto Deus dabat benedictionem terræ, ut fructus sufficientes ferret pro anno sexto & septimo. Tria fiebant in

illo anno. Primò remittebantur debita illis qui erant ex genere Judæorum, non verò gentilibus, aut peregrinis, nec profelitis, id est, illis qui facti erant Judæi. Secundò, servi in libertatem remittebantur, modo essent Hebræi. Tertiò denique legebatur populo Deuteronomium, quod est veluti appendix legis veteris, Porro, hic annus Sabbaticus non cœpit numerari ab illo tempore, quo Judæi egressi sunt ex Ægypto, quia ex hoc non cœperunt terram colere; sed ex quo ingressi sunt tertam promissionis, & divisio illis facta fuit à Josue; tunc enim cœperunt terram colere. Hic autem annus fuit figura nostri Jubilæi, in quo poenæ debitæ peccatis remittuntur.

Annus Jubilæus, qui inceptit sicut annus Sabbaticus, à primo scilicet anno possessionis & culturæ terræ promissionis, erat quinquagesimus. In illo fiebant hæc tria, quorum duo prima erant communia anno Sabbatico: Primò, remittebantur debita: Secundò, servi fiebant liberi: Tertiò, avitæ possessiones redibant ad pristinos dominos, quod non fiebat in anno Sabbatico; unde quando quis vendebat agrum, eo charius vel vilius vendebat, quo magis vel minus distabat ab anno Jubilæi, & hic annus fuit secunda figura nostri Jubilæi.

CONCLUSIO.

PER Jubilæum intelligitur Indulgentia plenaria, quæ in amplissimâ formâ conceditur, quâ datur potestas confessario approbato absolvendi ab omnibus censuris & casibus reservatis, sicut & commutandi vota quædam; & etiam aliquando dispensandi super irregula-

ritates, juxta præscriptum Bullarum quæ semper legendæ sunt, quia tantum valent, quantum sonant. Licet annus Jubilæus, qui sanctus dicitur, figuram habuerit in veteri Testamento, ut diximus; non est tamen de jure divino, sed tantum Ecclesiastico; instituit enim illum Bonifacius VIII. anno D. 1300. & simul ordinavit ut centesimo quolibet anno renovaretur. Clemens VI. ipsum anticipavit; instituit enim illum anno 1350. & jussit ut renovaretur quolibet anno quinquagesimo. Tandem Sixtus IV. illum reduxit ad annum vigesimum quintum: hoc tamen non impedit quin in necessitatibus Ecclesiæ sæpius Jubilæa concedantur.

Annus Jubilæi incipit in vigilia Nativitatis Domini, & durat usque ad sequentem vigiliam Nativitatis Domini: quod intelligitur de urbe Româ; in regnis enim & provinciis incipit tantum cum Bullæ Pontificum ab Ordinariis receptæ & publicatæ sunt. Incipit, inquam Romæ immediatè ante vespertas, quâ horâ aperiuntur valvæ sancti Petri, & desinit anno sequenti eodem die, finitis vespers; & protunc ipsæ valvæ clauduntur. Quando in Bulla Jubilæi datur facultas absolvendi à casibus reservatis in Bullâ Cœnæ Domini, potest absolvi de Hæresi, quicquid aliqui sentiant, fundati super enormitatem hujus casûs; sic enim responsum fuit in Poenitentiariâ anno Domini 1617. occasione Jubilæi à Paulo V. concessi; quod tamen de hæresi occultâ intelligitur. Quoad actiones faciendas ut quis lucretur Jubilæum, præscribuntur à Bullâ. Quoad Confessarium, potest tempore Jubilæi eligi

quilibet approbatus ab Ordinario; unde regularis qui habet tantum approbationem sui Superioris, potest quidem absolvere regularem, sed non sæcularem; quia non est approbatus ab Ordinario ipsius sæcularis.

QUESTIO IV.

Quis possit Indulgentias concedere?

NEMINEM latet, multos esse superiores dignitate Ecclesiastica pollentes, quorum omnium caput est supremus Pontifex, cui succedunt Archiepiscopi, Episcopi, Superiores ordinum, majores scilicet, qui super subditos dignitatem quasi Episcopalem habent. De his omnibus procedit quæstio, sicut & de Concilio de quo quæritur, an possit Indulgentias concedere.

CONCLUSIO.

SOLUS Summus Pontifex potest primariò & jure divino Indulgentias concedere: quia facultas distribuendi bona publica, per se competit principi supremo reipublicæ, & proinde Summo Pontifici, universalis Ecclesiæ rectori, cui soli dictum est, *Pasce oves meas*; & idè est fons omnis jurisdictionis: Episcopus autem habet hanc potestatem, sed hoc est à Summo Pontifice; unde sicut Summus Pontifex limitat potestatem Episcoporum circa absolutionem (multos enim casus sibi reservat Papa, de quibus non possunt absolvere Episcopi) sic etiam illam limitat quoad indulgentias; unde Episcopi possunt tantum concedere Indulgentias

unius anni in dedicatione solum Ecclesiæ, & in aliis occasionibus possunt tantum concedere Indulgentias quadraginta dierum. Quod si concedant aliquando in sua visitatione Indulgentias plenarias, hoc est ex concessione Summi Pontificis, cujus Bullam obtinere tenentur. Potestas illa Episcoporum circa Indulgentias vocatur quidem ordinaria, quia sequitur illorum munus, & eorum dignitati annexa est, autoritate summi Pontificis. Idem dicendum est de Archiepiscopis, qui tamen in hoc superant Episcopos, quod possint per totum suum Archiepiscopatum Indulgentias tales concedere, & etiam in Episcopatibus suorum suffraganeorum, ut habetur capite *à nostro*, de poenitentiis & remissionibus, quod intelligitur in suis visitationibus. Si Episcopi darent Indulgentias excedentes quadraginta dies, non essent invalidæ simpliciter, sed tantum quoad excessum. Tum Archiepiscopi, tum Episcopi possunt Indulgentias conferre, modo sint electi & confirmati, etiamsi non sint consecrati; quia Indulgentiæ emanant ab exteriori jurisdictione quæ non requirit consecrationem: sic Summus Pontifex electus, & non consecratus potest Indulgentias concedere. Si Episcopus sit excommunicatus denunciatus, concedere non valet Indulgentias, quia caret actu jurisdictionis. Si in peccato mortali existat, dum illas concedit, non peccat mortaliter, quia non exercet actum Ordinis, sed jurisdictionis. Potest Episcopus delegare suam potentiam concedendi Indulgentias, clerico, non laico; jure enim humano ab Ecclesiasticis

removetur ; potest tamen Summus Pontifex de absolutâ authoritate. Tandem Episcopus potest tantum dare Indulgentias suis Diocesanis, quibus participare possunt etiam regulares exempti , se submittendo in hoc Episcopis ; exemptio enim regularium non debet cedere in illorum damnum.

Quoad Concilium generale, si sit Acephalum, hoc est sine capite, non potest concedere Indulgentias & sic mortuo Pontifice, Concilium non potest amplius plenarias concedere, quia non reperitur, quod hæc potestas sit concessa Ecclesiæ, sed Petro, cui dictum est, *Pasce oves meas*. Quod si Concilium uniatur capiti per se, vel per legatos, tunc potest concedere Indulgentias in totâ Ecclesiâ ; suis enim legatis suam potentiam delegavit Pontifex. Quoad Cardinales, Patriarchas & Primate, non habent potestatem concedendi Indulgentias de jure communi, nisi in quantum sunt Archiepiscopi, vel Episcopi : vel nisi illis detur talis potestas ex privilegio, commissione, aut consuetudine. Quoad rælatos regulares potestatem quasi Episcopalem habentes, ut sunt Generales Ordinum & Provinciales, Rodericus dicit eos habere ordinariam potestatem Indulgentias concedendi ; quâ tamen non utuntur per desuetudinem ; possunt tamen authoritate Apostolicâ ipsas concedere ; Leo enim decimus concessit Ministris Provincialibus de Observantiâ, ut possint concedere suis subditis plenariam Indulgentiam in suâ visitatione. Sic Alexander IV. quadraginta dies Indulgentiæ concessit audientibus sermones Fratrum Minorum,

QUÆSTIO ULTIMA.

Quanam requirantur, ut quis possit Indulgentias consequi?

CONSTAT quidem, quod ex parte concedentis requiratur justa & legitima causa, ut validè Indulgentias possit concedere; quæ quidem justa causa est honor Dei, Ecclesiæ utilitas, bonum commune, vel privatum; Pontifex enim non est dominus meritorum & satisfactionum Christi, sed tantùm dispensator, qui thesaurum sibi commissum debet distribuere secundum intentionem Christi. Intentio autem Christi & Sanctorum est, ut Ecclesiæ thesaurus non dispensetur, nisi ob honorem Dei & Ecclesiæ utilitatem: idè qui sine justa causa hunc thesaurum dispensat, quod est potius dissipare, nedum peccat mortaliter, sed invalida est concessio. Requiruntur etiam conditiones multæ ex parte illius qui indulgentias lucrari peroptat. Debet primò esse viator, quia concessio Indulgentiæ est actus jurisdictionis, qui non potest exerceri nisi in viatores. Debet etiam esse fidelis & baptisatus; infideles enim non sunt membra Ecclesiæ, & sic ipsius influentiam recipere non valent, sicut nec hæretici, aut apostatæ à fide, qui sunt membra præscissa; imò excommunicati etiam fideles & contriti, Indulgentias consequi non possunt, quia afficiuntur pœnis excommunicationis, quarum una est, privari communibus

Ecclesiæ bonis; sunt aliæ denique quas mox sumus explicaturi;

CONCLUSIO.

AD recipiendas Indulgentias requiritur status gratiæ & adimpletio operum in-junctorum in Bullâ concessionis. Ratio primi est; quia non potest remitti pœna, non remissâ culpâ: ut ergo quis relaxationem pœnæ debitæ peccato obtineat per Indulgentiam, debet habere peccata jam remissa; an autem lucraturus Indulgentias debeat esse in gratiâ per confessionem, vel an sola contritio sufficiat; distinguendum est, & dicendum, quod si non exprimatur confessio facienda in Bullâ, ut quando simpliciter dicitur, qui hoc vel illud fecerit, tales Indulgentias consequetur, pro tunc non est facienda confessio, quia existens in gratiâ est capax Indulgentiarum, nec superior confessionem exigit: si verò Bulla exprimat confessionem esse faciendam, ut quando dicitur, qui post confessionem & communionem tale opus elicuerit, tali gaudebit Indulgentia, non sufficit pro tunc contritio, sed confessio ultra facienda est, saltem si quis sit conscius peccati mortalis; si nullum enim tale peccatum commisit ab ultima confessione, censetur habitualiter confessus, quia perseverat in antecedenti confessione, & non indiget confessione peccati venialis; sicut enim Ecclesia extra Indulgentias confessionem venialium non exigit, sic nec in Indulgentiis; quia tamen aliqui contrarium sentiunt, in praxi consulerem confessionem.

Ratio secundæ partis est, quia superior

concedit solum Indulgentias sub conditione operum in junctorum in Bullâ : ergo ipsa facienda sunt ; unde adolescens qui nondum vigesimum primum annum attigit, non minus tenetur jejunare, si præscribatur jejunium. Qui etiam prætermittit aliquod opus in junctum, etiam ex impotentia vel ex justo impedimento, Indulgentias non lucratur, nisi commutatio talis operis in aliud exprimatur, quia Indulgentiæ, non sunt absolutè ad salutem necessariæ. Quando exprimitur eleemosyna facienda, magna vel parva sufficit, modò in Bulla non exprimatur, pro cujuscumque facultate ; Navarrus tamen putat debere esse diversam pro diversitate personarum. Qui dat pecuniam servo, ut impendat eleemosynam quam non largitur servus, non lucratur Indulgentiam, contra Emmanuelem ; non enim præstat opus præscriptum. Qui prætermittit opus tantum leve, ut qui in Rosario dicendo omitteret unum Ave Maria, lucratur Indulgentias, quia hæc materia est levis respectu operis in juncti : si tamen esset levis in se, & non respectu operis in juncti, qui prætermitteret illam, Indulgentias non lucraretur ; unde si daretur Indulgentia dicenti unum Pater noster cum Ave Maria, qui omitteret Ave Maria, non haberet Indulgentiæ fructum ; licet enim illa materia esset levis in se, esset tamen gravis respectu operis in juncti.

Qui elicit opera in juncta ad percipiendam Indulgentiam, non tenetur esse in gratia toto tempore quo præstat illa opera, sed sufficit, ut in gratiâ existat, dum facit ultimum opus,

quo posito conceditur Indulgentia. Quando ergo tempore Jubilæi præscribitur jejunium & communio; qui jejunabit in peccato mortali, modo communicet in gratia; Indulgentiam consequitur; illud enim opus non requiritur ut meritorium, nec ut satisfactorium, nec ut applicans Indulgentias, sed est tantum ut conditio, qua posita, Summus Pontifex Indulgentias applicat. An autem quis lucretur Indulgentias quando omnia opera injuncta fecit in peccato mortali, & remover postea impedimentum per pœnitentiam: Respondent affirmativè Sylvester, Paludanus & Henriques; communiter tamen negant alii, quia hoc non sonat ex Bullâ.


O b j e c. nos malè dixisse, quod soli viatores possint Indulgentias lucrari, quandoquidem Indulgentiæ possunt applicari animabus existentibus in purgatorio, quæ non sunt amplius viatrices, quoniam nec mereri, nec demereri possunt. Resp. reverà posse applicari Indulgentias defunctis, est enim communis mens Doctorum & traditio Ecclesiæ, quæ admittit communionem suffragiorum inter Ecclesiam militantem & patientem, ità quod nostra bona opera pro illis animabus possint offerri: hoc tamen debet expressè specificari in Bulla; si enim Indulgentiæ concedantur tantum pro fidelibus, non comprehenduntur sub hoc termino defuncti; sed debet exprimi in Bulla pro fidelibus vivis & defunctis; & pro tunc quilibet potest pro defuncto lucrari Indulgentiam, cui tantum proderit, quantum prodesset illi qui opera injuncta exercet pro

defuncto. Respondendum ergo est, hoc supposito, ad objectionem: Indulgentiæ applicari possunt defunctis; per modum suffragii, concedo: per modum iudicii, seu absolutionis & authoritatis, nego. Applicare autem Indulgentiam per modum iudicii, est immediatè remittere poenam alicui, tanquam Dei minister & iudex illius cui poena remittitur; cum autem Summus Pontifex non sit iudex animarum Purgatorii, non potest concedere Indulgentias pro illis per modum iudicii. Applicare verò Indulgentias per modum suffragii, est offerre Deo pro anima alicujus defuncti pretium æquale poenis ipsi debitis, ut ipsemet Deus illas remittat & relaxet; sic qui applicat Jubilæum alicui defuncto per modum suffragii, offert ipsi Deo merita Christi & satisfactiones Sanctorum, quæ dispensantur à Summo Pontifice in illo Jubilæo, ut tali animæ profint.

Quando in Jubilæo conceduntur Indulgentiæ pro vivis & defunctis, debent opera injuncta in Bulla bis præstari, semel pro vivo, & semel pro defuncto; potest tamen vivus concedere jus suum defuncto, & non pro se lucrari. Solus Summus Pontifex concedere potest Indulgentias pro defunctis; ad vivos enim limitatur potestas Episcoporum à Summo Pontifice. Porro, hæc est differentia inter Indulgentiam pro se accipiendam, vel pro defuncto; quod si aliquis illam velit lucrari pro se, non valeat, nisi ille sit in gratia qui eam consequi desiderat; accepta autem pro defuncto, valida est, etiamsi eliciens opera non sit in gratia: ille enim non satisfacit, sed tantum præstat opus

336 DE SACRAMENTIS.

externum, quo posito Summus pontifex applicat defuncto Indulgentiam per modum suffragii, quatenus offert Deo satisfactiones Christi & Sanctorum, quas dignetur acceptare in solutionem poenarum solvendarum à defuncto: unde dicunt Doctores, Indulgentiam habere valorem *ex opere operato*, & non dependere à sanctitate illius qui illam lucratur pro defunctis; & sic Filiucius, Navarrus, Suares, Corduba, Henriques, & alii citati à Bonacinà, qui est ejusdem mentis.



CAPUT DECIMUM.

De Extrema-Unctione.

PONITENTIAM quæ in remedium peccati mortalis instituta est, proximè sequitur Extrema-Unctio, tum in remedium peccati venialis, tum ad tollendas reliquias peccati, ut dicemus loquendo de ejus effectibus. Omnia autem quæ dicturi sumus de Extrema-Unctione proponuntur & solvantur in eadem quæstione.



Q U A E S T I O U N I C A.

*Quid sit Extrema-Unctio? An sit Sacramentum,
à quo instituta? Qua sit materia, forma,
minister, subjectum & fructus ejus?*

NON sumus locuturi de illa Unctione, qua baptisatus chrismate ungitur in vertice, nec de ea qua Catechumeni oleo benedicto ungebantur in pectore & scapulis, nec de illa qua unguntur Confirmati in fronte, nec de illa qua Episcopi unguntur in capite & manibus, & Sacerdotes in manibus tantum; non agimus etiam de unctione qua unguntur reges, sicut nec de ea qua templum, altare & calix unguntur; sed de illa qua unguntur infirmi periclitantes de vita, quæ vocatur extrema. Ex his patet septem esse unctiones in Ecclesia.

C O N C L U S I O P R I M A.

EX TREMA-UNCTIO est Sacramentum nova legis consistens in Unctione corporis aroti periclitantis, facta ex oleo consecrato in partibus corporis, ubi præcipue vigent sensus, sub præscripta verborum forma, ad salutem mentis & corporis aroti ordinatum. Hæc omnia & ex se patent, & patebunt ex sequentibus.

C O N C L U S I O S E C U N D A.

EX TREMA-UNCTIO est verè & propriè Sacramentum; quia habet tres conditiones ad Sacramentum requisitas, quæ sunt signum externum, promissio gratiæ & institu-

quando potestatem absolvendi Apostoli receperunt ; ad quam absolutionem pertinet hoc Sacramentum , cū sit ad deletionem peccati venialis institutum.

CONCLUSIO QUARTA.

MATERIA remota hujus Sacramenti , est Oleum olivarum benedictum ab Episcopo ; proxima verò est unctio. Quod debeat assumi oleum pro materia , patet ex Jacobo ; *ungentes oleo* ; quòd debeat esse olivarum , constat ; quia oleum simpliciter dictum est oleum olivarum : quod debeat esse benedictum ab Episcopo , habetur ex Conc. Florent. & Trident. sess. 10. cujus ratio est , quia materia hujus Sacramenti non fuit sanctificata usu Christi. Quod unctio sit materia proxima ; liquet , quia per eam applicatur oleum : illa autem unctio fit in modum crucis , ex consuetudine tantum , non ex necessitate , ut sit in Confirmatione , ubi ungitur homo , tanquam Christi miles , qui ducis , nempe crucis , signum portare debet ; hic autem ungitur per modum medicinæ , ut salutem recipiat. Illæ unctiones septem communiter enumerantur , scilicet oculorum , aurium , narium , oris , manuum , pedum & lumborum ; duæ tamen ultimæ non sunt de necessitate Sacramenti ; imò unctio lumborum omittitur in foeminis ; aliæ verò sunt ita necessariæ , ut si unus sensus non ungatur , Sacramentum sit invalidum , ex D. Thomâ ; quia Sacramentum hoc ordinatum est ad tollendas sordes & reliquias peccati , cujus radix est in quinque sensibus. Quod si quis careat aliquo membro , pars propinquior ungenda est.

CONCLUSIO QUINTA.

FORMA hujus Sacramenti consistit in his verbis, *Per istam sanctam unctionem, & suam piissimam misericordiam indulgeat tibi Deus quicquid deliquisti per visum, auditum, gustum, tactum & olfactum*; vel *per incessum & per ardorem libidinis*, quando unguntur pedes & lumbi; Invocatio Trinitatis est tantum ex usu Ecclesiæ, non ex necessitate Sacramenti; hoc enim Sacramentum non est professio fidei; sicut Baptismus. Quando ponitur in forma, *Per suam misericordiam*, illa verba non sunt de necessitate Sacramenti; non possunt tamen omitti sine peccato. Dum periculum mortis imminet, sacerdos ungendo omnes sensus, potest tantum proferre unam formam, dicendo, *Parcat tibi Deus quicquid deliquisti per visum, auditum, gustum, &c.* Porro, hæc forma est deprecatoria, non judicativa; ut sunt istæ, *Ego te absolvo, ego te baptizo*; unde sacerdos debet dicere, *indulgeat tibi Deus*; non verò, *indulgeo*; non quod hoc Sacramentum habeat suam efficaciam ex vi orationis Presbyteri, ut est opus operans; habet enim ex vi promissionis Christi, quæ est infallibilis; sed quia hoc instituit Christus sub verbis deprecatoriis, ut patet ex Jacobi 5. *Inducat Presbyteros Ecclesia, & orent super eum.*

CONCLUSIO. SEXTA.

MINISTER hujus Sacramenti est Sacerdos. Sic Concilium Trident. unde Jacobi 5. habetur, *Inducat Presbyteros Ecclesia*; nomine autem Presbyteri intelligitur Sacerdos; si administraret ergo Diaconus vel

Suddiaconus, Sacramentum esset invalidum, etiam de licentiâ Papæ, hoc enim est de jure divino. Si laïci dicuntur unxisse; hoc fuit unctione factâ ex devotione, non Sacramentali. Omnis autem Sacerdos ungere potest, sive sit excommunicatus, sive degradatus, aut nullam habens jurisdictionem; hoc enim Sacramentum non datur per modum judicii, ut Pœnitentia; peccarent tamen isti, si ministrarent extra necessitatem. Debet tantum esse unus minister; & sic, si dicat Jacobus, *Inducat Presbyteros Ecclesia*; idest, unum ex Presbyteris; potest tamen in necessitate unus facere unam unctionem & alius aliam; modò ille qui ungit, proferat formam tali unctioni respondentem.

QUESTIO SEPTIMA.


UT quis possit recipere hoc Sacramentum, debet esse baptisatus; Baptismus enim est janua Sacramentorum. Debet secundò habere vel habuisse usum rationis; qui enim non habuerunt, non deliquerunt; illis autem qui antequam reciderent in phrenesim hoc Sacramentum desideraverunt, potest dari, etiamsi tempore phrenesis contradicant; modò non speretur convalescentia, aut non fuerint in peccato notoriojante phrenesim. Debet tertio esse graviter infirmus; ista enim unctio vocatur extrema: non debet ergo dari non infirmis, licet sint in periculo mortis, ut sunt conscendentes mare, pugnam aggredientes, damnati ad mortem, mulieres in partu; tales enim non sunt ægroti, & est institutum pro ægrotis; dicit enim Jacobus, *Infirmatur*
P iij

quis vestrum : quia tamen senectus est morbi species , potest dari confectis senio. Debet , quattò non esse conscius peccati mortalis ; quia Sacramentum hoc , est Sacramentum vivorum , quod datur illis tantùm qui sunt in gratiâ. Quintò non debet esse excommunicatus.

CONCLUSIO ULTIMA.

EXTREMA-UNCTIO habet pro effectibus : Primò , augmentum gratiæ habitualis ; hoc enim commune est omnibus Sacramentis. Secundò , remissionem venialium , ex Jacobi 5. *Si in peccatis fueris , remissentur ei* : non remittuntur autem peccata mortalia ; hoc enim spectat ad Pœnitentiam ; ergo remittuntur venialia. Sic Concilium Trident. sess. 14. cap. 2. Non remittit autem peccata venialia immediate , sed mediatè ; in quantum per Extremam-Unionem dantur gratiæ actuales , per quas elicitur actus contritionis , vel dilectionis Dei , quibus actibus delentur per se peccata venialia. Tertiò , tollit reliquias peccati , idest peccata mortalia , vel venialia , quæ post alia Sacramenta relinquuntur , vel quia fiunt post illa , & non advertuntur ; vel quia non sunt absoluta per alia Sacramenta indebitè suscepta. Quattò denique , conducit aliquando ad salutem corporis , cum expedit animæ , aut providentiæ D. justum videtur ; habetur enim Jacobi 5. *Oratio fidei salvabit infirmum*. Quoad tempus quo hi effectus conferuntur , alii tenent conferri in primâ unctione , alii partialiter in qualibet ; sed melius alii , quando perficitur quinta unctio cum suâ formâ ; quia est ultima essentialis , quæ impendit hos effectus

virtute omnium præcedentium ; proprium enim est Sacramentorum consistentium in usu, ut producant gratiam eo instanti quo perficiuntur. Quod si Eucharistia producat effectum in sumptione corporis, licet Sacerdos non sumeret sanguinem, hoc est, quia verum est Sacramentum, etiamsi non sumatur sanguis; non sic autem de unicâ unctione; aliæ enim sunt essentielles. Non tamen dantur omnes gratiæ actuales in unctione ultima; aliquæ enim reservantur prout videtur Deo expedire, v. g. pro articulo mortis, ubi dantur ad confortandam animam ægroti contra difficultates in illo tempore occurrentes.



CAPUT UNDECIMUM.

De Ordine.

QUESTIO PRIMA.

Quid sit Ordo, & quomodo fuerit institutus?

NON sumitur hîc Ordo pro respectu inter res aliquas, quarum una est prior aliâ, vel naturâ, ut causa effectui; vel tempore, ut arbor fructui; vel loco, ut cœlum igne; vel dignitate, ut ordo judicis ordine civium. Non sumitur etiam hîc Ordo pro variâ Religione, quarum una vocatur Ordo sancti Benedicti, alia sancti Dominici, vel sancti Francisci; sed in nostro proposito su-

mitur pro signo seu ceremoniâ externâ , quâ
 confertur homini dignitas & officium in Ec-
 clesiâ Christi.

CONCLUSIO PRIMA.

ORDO est Sacramentum , quo traditur
 spiritualis potestas conficiendi Eucharis-
 tiam, vel ministrandi in ordine ad illam, adhi-
 bitis quibusdam rebus tanquam materiâ , &
 verbis tanquam formâ. Dicitur primò , *Sacra-*
mentum, & est reverâ , ut videbimus in sequen-
 tibus. Dicitur secundò , *quo traditur potestas*
spiritualis ; verba enim formæ sunt hæc , vel
 similia , *Accipe potestatem*. Tertiò dicitur, *circa*
Eucharistiam, vel *in ordine ad illam* ; Sacerdo-
 tium enim ordinatur immediatè ad Eucha-
 ristiam , & alii inferiores Ordines ministrant
 circa illam ; alii remotè , ut Minores Ordines ;
 alii proximè , ut Ordines sacri : Episcopatus
 etiam ordinatur ad Eucharistiam ; Episcopo-
 rum enim officium est , ut consecrent Sacer-
 dotes qui conficiunt Eucharistiam. Tandem
 adjungitur, *adhibitis quibusdam rebus, tanquam*
materia ; quia res porrectæ sunt materia Sa-
 cramenti hujus ; & *verbis* , *tanquam forma* ;
 verba enim Episcopi faciunt formam cujusli-
 bet Ordinis. Quare autem res sint materia, &
 verba sint forma , in promptu respondetur ;
 quia sicut materiâ præsupponitur ad formam,
 sic etiam res præsupponuntur ad verba, tan-
 quam significatum ad significans ; verba enim
 significant actionem quam facit Episcopus , &
 rem quam porrigit,

CONCLUSIO SECUNDA.

OR DINATIO fuit instituta in ultimâ coena; quando Christus dixit Apostolis, *Hoc facite in meam commemorationem*. Sic Concil. Trident. sess. 22. cap. 1. & can. 2. Sic etiam D. Thomas & alii explicantes hoc modo hæc verba Christi, *hoc facite*; idest, quemadmodum ego consecro Eucharistiam & illam offero, & vos consecro sacerdotes & Episcopos, ita vos accipite potestatem consecrandi Eucharistiam, & illam offerendi in sacrificium, sacerdotesque instituendi & Episcopos. Ratio probabilior est, quia constat Christum instituisse Sacramenta, hoc enim Ecclesia non potest; non apparet autem commodior locus institutionis Ordinis, quàm in ultimâ coenâ, cum ipsam Eucharistiam instituit & dedit potestatem illam consecrandi. Contulit autem Christus per excellentiæ potestatem omnes Ordines simul Apostolis; nam sub principali, quod est Sacerdotium, omnes comprehenduntur; quia participant aliquam potestatem circa corpus Christi, & conferendo tales Ordines, dedit etiam potestatem Apostolis illos conferendi.



Q U Æ S T I O II.

*Quot sint Ordines , & qui sint Majores
vel Minores,*

IN veteri Testamento, ubi Synagoga erat nostræ Ecclesiæ typus , tres erant Ministri templo inservientes , scilicet Levitæ , Sacerdotes & Pontifex : Levitæ erant ex tribu Levi, sicut Sacerdotes & Pontifex ; licet tamen ex hac tribu omnes dicerentur Levitæ , non tamen omnes erant Levitæ propriè , seu inservientes altari , nisi certo ritu consecrati fuissent. Levitæ Sacerdotibus ministrabant in sacrificiis, Sacerdotes verò offerebant victimas super altare holocausti , subministrabant ligna , ut nutrieretur ignis perpetuus , vespere & manè adolebant incensum super altare Thymiamatis, (erant enim duo altaria , unum æreum , quod erat altare holocausti , in quo victimæ offerebantur ; aliud aureum , nempe altare Thymiamatis , in quo incendebantur aromata ,) concinnabant lucernas quæ erant juxta altare , affuso oleo olivarum ; singulis Sabbatis panes duodecim calidos ponebant super mensam propositionis , amovebantque veteres , quos manducabant postea , nec debant profanis, immolabant vaccam rufam extra castra , adjurabant mulieres in casu-zelotypiæ , discernebant inter lepram & lepram , mundabant leprosos & menstruatas, & seminisfluos , legemque Dei scire & interpretari tenebatur. Quoad

Pontificem , præter hæc omnia officia quæ agere poterat , quatuor insuper faciebat. Primò , consecrabat Levitas & Sacerdotes ; secundò , in cōtroversiiis legalibus agebat supremum judicem & ultimam pronuntiabat sententiam , cui omnes sub pœna mortis parere tenebantur ; tertio , in rebus magni momenti Deum consulebat , & ab eo accipiebat responsum ; quarto denique , in solempni die expiationis seu propitiationis introibat Sanctuarium & publicam expiationem instituebat totius populi à peccatis (legalibus scilicet) Ut autem hæc omnia pateant , multa consideranda sunt , quæ & rarissima & cognitu necessaria videntur , ut sacra Scriptura , præsertim veteris Testamenti innotescat ; unde.

Norandum est primò , quòd in lege Mosàicâ Deus ex omnibus tribubus ad sui cultum tribum Leviticam sibi destinaverat , & ex hac tribu assumebantur Levitæ propriè dicti , Sacerdotes & Pontifex ; summum tamen sacerdotium secundum legem ordinariam erat in sola familia Aaron , qui fuit primus summus sacerdos , jure successionis ; licet enim ante Aaron Moïses fuerit Pontifex , hoc habuit via extraordinaria , divina scilicet ordinatione ; unde filij ejus non successerunt in pontificatu , bene autem filij Aaronis. Aaron , inquam , fuit primus Pontifex , cui succedebant posterij ; imminente enim morte Moïsis , jussit illi Dominus , ut assumeret Aaron in Pontificem & quatuor ejus filios , Nadab , Abiud , Eleazar & Ithamar , quos reverà unxit Moïses. Postea , duo primi occisi sunt à Deo igne cœlesti , eo

quod ignem alienum obtulissent; & cùm non haberent liberos, Eleazar successit patri, Eleazaro filius, & sic deinceps. Quia Levitæ non habuerunt partem in terrâ promissionis, habuerunt quadraginta & octo urbes cum agris suburbanis ad jumentorum pastum. Illarum urbium sex erant refugii pro solo homicidio involuntario, tres ex una parte Jordanis & tres ex altera. Æqualis erant distantia, & omnes in montibus, ut facilius videri possent. Præter has quadraginta & octo urbes, Deus voluit ut Levitæ alerentur aliarum tribuum decimis (sub nomine autem Leviatrum comprehendebantur etiam Sacerdotes & Pontifex) Deinde Sacerdotes & Pontifex, non verò alii Levitæ, habebant primitias quæ ter in anno solvebantur; in Paschate scilicet de novis spicis, in Pentecoste de novis panibus, & in festo Tabernaculorum, quæ erat decima quinta mensis Septembris, de novis fructibus. Insuper habebant primogenita tum hominum tum animalium, quæ si essent immunda, redimebantur quinque siclis; si essent munda, offerebantur. Tandem habebant oblationes, quilibet enim sponte aliquid offerebat in templo.

Notandum est secundo, ut pateant ea quæ diximus de officio Sacerdotum, quod in Scriptura fiat mentio Tabernaculi & Templi, quæ licet ad idem officium fuerint destinata, distinguebantur tamen in hoc, quod Tabernaculum factum à Moïse jussu Dei, erat portatile & per partes dissolvebatur, quando movebantur castra; Templum vero Salomonis erat

fixum, quia usque ad Salomonem fuerunt Hebræi in perpetuo bello; quadraginta enim annis erraverunt in deserto, & postea cum vicinis in Palæstinâ semper pugnaverunt, unde ne profanaretur templum à gentilibus, si victi fuissent, acceperunt tantum tabernaculum, quod erat portatile; quando verò in pace fuerunt omnia tempore Salomonis, habuerunt templum fixum. Tabernaculum fuit longum triginta cubitis, altum verò & latum decem, ex quâcunque parte constructum ex tabulis lignorum Serhim inauratis; ex parte tamen orientali, nullæ erant tabulæ, quia hæc ingrediebantur sacerdotes; sed illarum loco erant quinque columnæ inauratæ, quæ velo tegebantur, quo elevato, ingrediebantur sacerdotes. Tabernaculi coopertura erat tam superius, quam ad latera, ex cortinis factis ex cocco, purpurâ, hyacinto & bysso, & insuper erant cooperturæ aliæ contra pluviam. Extra Tabernaculum erat atrium, sicut cæmeterium, clausum sexaginta columnis aureis, & erat quasi Templum laicorum. In hoc atrio, prope Tabernaculum, erat altare holocausti; & inter altare holocausti & tabernaculum erat labrum æneum seu mare æneum; idest, quoddam vas denominatum mare ob magnitudinem, in quo Pontifex & Sacerdotes lavabant pedes & manus, quando ingrediebantur tabernaculum. Tabernaculum dividebatur in duas partes, una dicebatur Sanctum, in qua erant candelabrum, mensa panum propositionis & altare Thymiamatis; alia dicebatur Sanctum Sanctorum, ubi erat Arca foederis cum propitiatorio: in Sanctum

ingrediebantur quotidie sacerdotes ; tum ut adolerent Thymiamata, tum ut vespere accenderent lucernas & manè extinguerent ; sed in Sanctum Sanctorum solus Pontifex ingrediebatur semel in anno, nempe in festo Expiationis, de quâ inferius.

Templum, quod erat multo majus, dividebatur in duas partes, sicut Tabernaculum ; scilicet in Sanctum & Sanctum Sanctorum : inter utrumque erat velum lapideum quod scissum est in morte Christi. Templum habebat duo atria, unum pro sacerdotibus non sacrificantibus, aliud pro laïcis. In Sancto Sanctorum erat arca in quâ inclusæ fuerunt duæ tabulæ legis, quas à Deo recepit Moïses ; postea circa tempus captivitatis Babylonice Jeremias apposuit in eâ urnam auream in quâ erat manna, & virga Aaronis. Illa arca vocabatur Arca Testamenti, quia legem includebat, quæ erat veluti Testamentum Dei, quod volebat impleri ; aliquando vocabatur Arca fœderis, quia lex erat signum fœderis inter Deum & Israëlitas. Illa arca præcedebat castra Judæorum, quando movebantur ; illam ordinariè ferebant Levitæ, extraordinariè Sacerdotes, ut in transitu Jordanis, & nunquam Laïci ; unde Oza manu volens erigere illam, quia cadere videbatur, punitus est. Arca fuit primò in Tabernaculo, secundò in Templo, postea imminente captivitate Babylonica, Jeremias eam prævidens, ex instinctu Dei antequam vastaretur templum, portavit arcam & altare Thymiamatis ope Angelorum in montem Nebo, quàm tibi occultavit in quadam speluncâ, ubi occulta erit, in-

quit Epiphanius, usque in diem iudicii, quo manifestabitur ad confusionem Judæorum. Super arcam erat propitiatorium, quod erat veluti ejus coopertura, ex auro factum; & super illud erant duo Cherubim ex puro auro, qui expansis alis, tegebant ipsum, & super illos sedebat Deus & loquens cum Moïse propitiabatur populo, ut habetur Exodi 25. & Num. 7. In illâ parte templi, quæ vocabatur Sanctum, erant tria instrumenta; nempe candelabrum, mensa propositionis, & altare Thymiamatis. Candelabrum, quod præfuit in tabernaculo, erat ex auro mundissimo; ex ejus hastili septem rami procedebant, & tam in hastili quam in ramis æqualiter assurgentibus, erant lucernæ quæ illuminabant mensam propositionis & altare Thymiamatis, sed tantum nocte, unde dixi, quod sacerdotes manè illas extinguebant, & accendebant vespere. Mensa propositionis erat ex lignis Sethim auro obductis, super eam apponebantur duodecim panes, quia erant duodecim tribus Israël, sex ex unâ parte & sex ex aliâ, unus super alterum; omnibus superponebatur thus ad significandum Deo oblatos esse. Dicebantur propositionis, quia coram Deo proponebantur; erant azymi, singulisque sabbatis auferebantur veteres, & apponebantur novi calidi, qui pinsebantur à Levitis ex simillâ quæ offerebatur à populo; veteres autem manducabantur à ministris templi. Altare Thymiamatis erat illud, super quod offerebantur thus & alia aromata, quæ semel manè & semel vespere incendebantur.

Extra Tabernaculum in atrio Sacerdotum

sub dio erunt duo instrumenta ; altare scilicet holocaustorum & labrum æneum. Super altare Holocausti offerebantur omnia , præter aromata. Erat factum ex lignis Sethim sicut altare Thymiamatis , sed erat subductum tabulis æneis , & aliud tabulis argenteis , erat cavum ad continendum ignem pro sacrificiis comburendis , habebat superius craticulam auream foraminibus plenam , cui imponebantur victimæ , ut à supposito igne cremarentur. In cavitare hujus altaris erat focus æneus ex craticula pendens , in quo conservabatur ignis de cœlo descensus , qui nutriebatur à Sacerdotibus. Ignis ille sic è cœlo descendit. Postquam Aaron à Moïse consecratus est, volens primum offerre sacrificiū, Levit. 9. descendit ignis de cœlo, qui consumpsit Holocaustum. Illo igne debuerunt uti Sacerdotes in perpetuum ; unde quia Nadab & Abiud filii Aaronis usi sunt igne alieno in sacrificio , ignis descendit de cœlo , qui consummavit eos. Duravit ille ignis usque ad captivitatem Babylonicam , quo tempore Sacerdotes illum concluserunt in puteo , & post captivitatem Babylonicam , jussu Nehemiæ , quæsitus est à nepotibus illorum sacerdotum qui eum occultaverunt , & non est inventus, sed pro eo reperta est aqua crassa , qua jussit Nehemias aspergi sacrificia , & continuò in ignem versa est , & inflammavit ligna superposita. Aliud instrumentum , quod erat in atrio sacerdotum , erat labrum æneum , seu vas quoddam , in quo sacerdotes ad sacrificium accessuri lavabant pedes & manus , & hostiarum partes , antequam offerrentur, Huic simile

curavit fieri Salomon, sed multò capacius; unde propter suam immensitatem dictum est mare æneum.

Notandum est tertio, quod alia officia Sacerdotis, quæ sunt immolare vaccam rufam, mundare leprosos & adjurare mulieres in casu Zelothypix: duo prima connexionem inter se habent, quando aliqui erant immundi per se, ut puerperæ, leprosi, hæmorrhoides; vel ex contactu rei immundæ: tangendo scilicet leprosos, seminifluos, vestes eorum, aut sedilia, reptilia, animalia immunda, aut munda mortua sponte, aut cadavera, vel ossa, vel sepulchra; offerebantur pro illis diversa sacrificia, de quibus in Levitico; & insuper aspergebantur aqua lustrali vel expiationis quæ sic fiebat. Sacerdotes accipiebant vaccam rufam sine macula, quæ nunquam portaverat jugum, & eam immolabant extra castra, cum Judæi erant in deserto, vel extra portam, cum erant in Jerusalem, & totam comburebant cum ligno cedrino & hyssopo, & tunc illi cineres spargebantur in aquam vivam, & erat aqua lustralis, qua per asperisionem purificabantur immundi. Quantum ad Zelothypiam, vir dubitans de uxore sua eam adducebat coram tabernaculo ad sacerdotem. Secundo, offerebat sacrificium Zelothypix, idest, farinam hordeaceam sine oleo & thure. Tertio, Sacerdos accipiebat aquam lustrationis in vase fictili, in quam immittebat pauxillum terræ de pavimento tabernaculi, & ista aqua vocabatur amarissima. Quarto, super eam proferebat maledictiones infra dictas Quinto, discooperiebat caput mulieris & in manibus ejus ponebat

stentiâ præditos fuisse, quæ assistentia præsertim residebat in summo Pontifice; unde ex pluribus, erat infallibilis, quod patet ex Deuteron. 17. ubi Deus promittit litigantibus iudicii veritatem, si deferrent litigia ad illum; deinde ibidem jubet, quod sub poenâ mortis teneantur illi acquiescere; non mandaret autem acquiescere sententiæ quæ posset esse falsa. Habemus exemplum magni tribunali, Matth. 2. ubi dubitans Herodes, an Messias natus esset, detulit hanc difficultatem ad Concilium, ubi præsidebat Pontifex; ait enim Scriptura, *Rex turbatus est, & congregans omnes principes Sacerdotum sciscitabatur ab eis, ubi Christus nasceretur? Et illi dixerunt ei, in Bethleem Iuda; si enim scriptum est.* Tertiò, Pontifex in rebus magni momenti Deum cõsulebat; sed quomodo responsum acciperet dubitatur: Alii dicunt, quod hoc fieret per Angelum, voce humanâ; alii per revelationem; sed probabiliùs alii per splendorem lapidum pretiosorum, qui erant in rationali supra pectus Pontificis: si gemmæ plus solito lucebant, signum erat foelicis successus; si minus solito, signum erat mali; si more naturali, signum erat Deum non velle respondere. Quartò tandem, in die solemni Expiationis introibat Sanctuarium, & instituebat publicam expiationem peccatorum populi, quæ sic fiebat. Duodecimâ die mensis septimi seu Septembris, post multas alias ceremonias mittebat sortem super duos hircos, ut alter immolaretur pro peccato, alter vivus mitteretur in desertum; hunc statuebat in conspectu populi, & posita utraque manu sub capite ejus, confitebatur omnia

decimo quinto mensis septimi, usque ad septem dies sequentes, in memoriam illius beneficii quo Deus voluit Judæos in tabernaculis habitare, cum egressi sunt ex Ægypto. Nonò, erat festum Cœtus seu Collectæ, quod celebrabatur transactis septem diebus Tabernaculorum, in quo colligebantur ea quæ necessaria erant ad expensas divini cultus. His notatis, ad nostram quæstionem deveniendum est, cui respondebit

CONCLUSIO.

COMMUNITER assignantur septem Ordinem in universum; quorum tres dicuntur majores, & quatuor minores. Minores sunt, Ordo Ostiariorum, Lectorum, Exorcistarum, & Acolythorum: Majores verò, sunt Subdiaconatus, Diaconatus & Sacerdotium, quod subdividitur in Sacerdotium majus & minus; nam Episcopi sunt Sacerdotes majores, & alii minores. Hic numerus colligitur ex diversis actibus quos singuli habent circa Eucharistiam, quæ est finis Ordinationis; aliqui enim Sacerdotes consecrant qui possunt Eucharistiam conficere, & hi sunt Episcopi; alii eam conficiunt, & sunt Sacerdotes communes; alii ministrant immediatè ad illam, ut Diaconi, qui calicem & panem sacerdoti offerunt; alii mediatè; ordinando materiam in vasis, ut Subdiaconi: alii illam præsentant Subdiacono, ut Acolythi; alii autem versantur circa recipientes illam, vel arcendo infideles, ut Ostiarii; vel legendo Prophetas, & Catechumenos docendo fidei rudimenta, ut possint accedere ad Eucharistiam, & hi sunt Lectores, vel imponendo

QUESTIO III.

An quilibet Ordo sit Sacramentum?

OR DINATIO in se est Sacramentum, cum omnia necessaria ad Sacramentum illi convenient. Primò enim reperitur in Ordinatione ceremonia externa, nempe manuum impositio, Act. 6. *Hos statuerunt ante conspectum Apostolorum, & orantes imposuerunt eis manus;* ubi Scriptura loquitur de Ordinatione septem Diaconorum: Act. etiam 3. ordinantur Episcopi Paulus & Barnabas impositione manuum: & Act. 14. *Cum constituisent per singulas Ecclesias Presbyteros;* ubi in Græco habetur, *cum creassent per manus impositionem Presbyteros.* Secundò reperitur promissio gratiæ, quæ est secunda conditio Sacramenti; 1. enim ad Timotheum 4. dicit Paulus, *Noli negligere gratiam qua data est tibi cum impositione manuum Presbyterii.* Tertiò denique reperitur institutio Christi, quæ est tertia conditio; Act. enim 13. habetur, *Segregate mihi Saulum & Barnabam in opus, ad quod assumpsi eos.* Quòd si Christus non legatur imposuisse manus; non disputamus quid fecerit, sed quid iusserit. Constat ergo Ordinationem in se esse Sacramentum, quidquid negent hæretici; unde videndum remanet, utrum quodlibet sit verè Sacramentum.

interdicere potest. Nec quis inferat, posse ergo aliquem ordinari Episcopum, qui non sit Sacerdos; hoc enim est falsum; sicut enim aliquis non potest ordinari, nisi sit baptizatus, sic nec Episcopus fieri, nisi sit antea Presbyter. Nec etiam quis instet, dicendo, quod si Episcopatus conferat characterem, erit major caractere Presbyteri, & sic erit aliqua potestas major potestate consecrandi Eucharistiam; respondebitur enim quod si character Episcopalis sumatur integraliter, pro tunc est major Sacerdotali, quia illum includit, & pro tunc etiam Ordo Episcopalis erit major extensive: si verò sumatur præcisè pro ultimâ consecratione & potestate quam addit Episcopatus super Presbyteratum, est minor intensive; nulla enim potestas major est, quàm potestas consecrandi Eucharistiam.

Ordo Diaconatus est propriè Sacramentum: (nullus enim dubitat de Presbyteratu;) Act. enim 6. ordinantur Diaconi per manuum impositionem, sicut Episcopi & Presbyteri. Deinde Diaconi in absentia Presbyterorum possunt dare Eucharistiam, reconciliare publicos poenitentes, prædicare, ac ferè omnia munera Episcoporum & Sacerdotum, exercere in eorum absentia, ac proinde eorum ordinatio est Sacramentum. Tandem Diaconatus Ordo imprimit characterem; non potest enim amitti nec repeti: ergo est Sacramentum; sola enim Sacramenta imprimunt characterem, quo scilicet Diaconus constituitur in statu aliquo immutabili.

Ordo Subdiaconatus est verum Sacramentum: hoc non est ita constans, sicut præcedens, communiter tamen tenetur à Doctoribus, pau-

DE SACRAMENTIS. 36;

plures Ordines sunt unum Sacramentum genere subalterno ; quòd si non Ordinati possint actus minorum Ordinum exercere ; hoc est , non ex officio , sed ex deputatione ministrorum Ecclesiæ.

QUÆSTIO IV.

Quanam sint materia & forma Sacramenti Ordinis ?

DIFFICULTAS quæ major est in hac quæstione , consistit in hoc quòd aliqui sentiant , impositionem manuum non esse de essentia ullius Ordinis , sed esse tantum ceremoniam accidentalem in Presbyteratu & Diaconatu ; contra ipsos tamen stat universus coetus Theologorum , Scriptura & Patres , dicentes manuum impositionem esse absolute necessariam & essentialem. Sic Concilia Nicenum sess. 14. cap. 4. ubi de Extremâ-Untione loquens , dicit , ministrum ejus esse Episcopum & Presbyterum ritè ordinatum per manûs impositionem. Quòd si Patres & Concilia , præsertim Florentinum , assignando materiam hujus Sacramenti , loquantur tantum de porrectione instrumentorum ; non explicuerunt totum ritum , sed tantum illam partem de quâ dubitabant Armeni. Si dicatur , Sacerdotes fieri , dum in porrectione vasorum dicit Episcopus , *Accipe potestatem offerendi sacrificium* ; per hoc fit tantum incompletè Sacerdos , habet enim duas potestates , inquit Scotus , quæ ipsum adæquatè constituunt ,

Qij

unam supra corpus Christi reale, quæ traditur per porrectionem vasorum, aliam supra corpus Christi mysticum, seu Fideles, quæ traditur per impositionem manuum. Constet ergo, quod pars essentialis materiæ, secundum communem Doctorum sententiam, sit impositio manuum respectu Presbyteri & Diaconi: unde ad vasorum porrectionem, quæ est alia pars essentialis, & ad declarationem formæ cujuscunque Sacramenti deveniendum est.

CONCLUSIO.

MATERIA proxima ordinationis Episcoporum, est impositio manuum trium aliorum Episcoporum, sub quâ comprehenduntur virtualiter aliæ ceremoniæ: Forma verò sunt verba quæ proferunt, dicendo, *Accipe Spiritum sanctum*. In ordinatione Sacerdotis materia proxima est porrectio calicis cum vino & patenæ cum hostiâ, & impositio manuum Episcopi: & forma sunt hæc verba, *Accipe potestatem offerendi sacrificium, & accipe Spiritum sanctum, quorum remisero peccata, &c.* quæ ultima verba dicuntur in impositione manuum, & prima in porrectione calicis. In Ordinatione Diaconi materia est manuum impositio; & porrectio libri Evangeliorum: Forma verò quæ respondet manuum impositioni, est: *Accipe Spiritum sanctum, ac robur ad resistendum diabolo & temptationibus ejus*; & forma quæ respondet porrectioni libri, est, *Accipe potestatem legendi Evangelium in Ecclesia Dei*: Christus tamen non instituit hoc Sacramentum in porrectione libri Evangeliorum, quia nondum erant, sed in impositione manus & traditione alicujus rei, quâ

officium Diaconi designaretur, quæ relicta fuit in dispositione Ecclesiæ; sic de formâ dicendum est. In ordinatione Subdiaconi materia est traditio calicis vacui cum patena superposita, & libri Epistolarum: Forma verò est, *Accipe librum Epistolarum, ut habeas potentiam legendi eas in Ecclesiâ sancta Dei*. Tandem in aliis Ordinibus materia est traditio rerum quæ designant officium cujuslibet Ordinati; forma verò sunt verba prolata ab Episcopo, quibus tales res porriguntur. Porro, debet esse contactus materiæ traditæ ab Episcopo; sed alii dicunt contactum moralem sufficere, quia Sacramenta sunt entia moralia, & moralia sunt moraliter intelligenda; qui quidem contactus moralis consistit in acceptione rei traditæ, v. g. in extensione manuum; tutius tamen est, & gravis momenti Doctores asseverant, contactum debere esse physicum; non est tamen necessarium, ut omnia instrumenta tangantur physice, nec quòd proferantur simul mathematicè verba Episcoporum, dum tanguntur vasa. Potest Episcopus cum unica forma in plurali prolata porrigere vasa multis; sic enim determinatum fuit in quadam congregatione Romæ habita.



QUESTIO V.

*Quis sit minister Ordinis ; & qui sint
ordinandi.*

Hic quæritur tum de ministro ordinario, tum de ministra ex commissione ; quia autem dicam, solum masculum posse Ordinari, sciendum est quod per Presbyteras, de quibus agitur in Conciliis, intelligantur viduæ seniores, quæ aliis ratione ætatis præerant ; Presbyter enim idem est ac senior : vel intelliguntur foeminae quarum mariti ex earum consensu ad Sacerdotia erant evecti, quæque castitatem tenebantur servare. Per Diaconissas intelliguntur mulieres quæ deputabantur ad ministerium aliquomodo sacrum, ut ad obsequium reddendum Sacerdotibus ; vel intelliguntur foeminae quarum mariti ad Diaconatum evecti erant.

CONCLUSIO.

ORDINARIUS minister Ordinis est solus Episcopus, plures tamen alii sunt ministri ex commissione. Prima pars est contra Calvinum & Lutherum, qui volunt ordinationem esse à tota multitudine fidelium & Clero ; quòd si soli pastores Ordinent, hoc est nomine totius populi. Ratio conclusionis est, quia Ordo est quædam dignitas Ecclesiastica, & ad solum principem, qualis est Episcopus, pertinet dignitates distribuere. Cum autem diximus Episcopum esse ministrum ordinarium, hoc intelligitur, si ve sit excommunicatus, si ve interdictus,

aut privatus suo Episcopatu; hoc enim emanat à potestate Ordinis quæ in illis residet, nec amitti potest: si tamen non sit Sacerdos, non potest ordinare. Ut licitè Ordines conferat, debet tantùm ordinare Diocesanos; validè tamen ordinantur qui ordinati sunt ab alieno Episcopo. Quòd si dicantur irritè ordinari; hoc est, quia privantur legitimo usu suorum Ordinum. Quoad secundam partem, patet; quia Cardinales Presbyteri possunt tonsuram & minores concedere ex commissione illis delegata per privilegium eorum dignitati annexum.. Abbates jus mittæ & baculi habentes possunt conferre minores & tonsuram suis subditis Regularibus; aliis verò tantùm ex speciali consensu Ordinarii. Simplex Sacerdos ex commissione Papæ potest conferre minores, Subdiaconatum & Diaconatum, ut constat ex privilegio concessio Abbati Cisterciensi, & aliis quatuor primis Abbatibus ejusdem Ordinis, quo privilegio Abbas Cisterciensis omnes sui Ordinis monachos potest Ordinare; alii verò quatuor, tantùm suos subditos. Hoc privilegium fuit illis concessum ab Innocentio VIII. anno 1489. Summus Pontifex non potest dispensare, ut quis Ordinetur Sacerdos à non Episcopo, hoc enim nunquam visum fuit, neque pro distantia, aut inopia Episcoporum, aut alià quâcumque causa, sicut videmus potestatem administrandi Confirmationem delegatam fuisse simplici Sacerdoti: minus ergo simplex Sacerdos potest consecrare Episcopum; major enim à minori non potest benedici. Non potest denique Summus Pontifex communicare po-

testatem Ordinandi non Sacerdoti, quia Ordinatio est potestas Ordinis majoris.

CONCLUSO SECUNDA.

MULTÆ conditiones requiruntur in Ordinandis. Primò, Ordinandus debet esse masculus; sic enim voluit Christus, qui solos Apostolos ordinavit, dicens *Hoc facite*, non verò fœminas, nequidem matrem suam, quæ omnium erat sanctissima. Secundò, debet esse baptisatus; Baptismus enim est janua Sacramentorum, & sic non baptisatus invalidè Ordinatur. Tertio debet esse Confirmatus; sic Concilium Trident. sess. 23. cap. 4. ubi non confirmatis prohibetur tonsura, quæ est præparatio ad Ordines; qui tamen non confirmatus ordinaretur, validè esset ordinatus. Quartò, debet esse initiatus tonsurâ ex communi praxi Ecclesiæ, valeret tamen ordinatio sine illâ. Quintò, requiritur legitima ætas: ad primam tonsuram & minores, septem anni, completi saltem; ad Subdiaconatum viginti duo anni inchoati; ad Diaconatum viginti tres inchoati; ad Presbyteratum viginti quinque inchoati; ad Episcopatum verò tringinta completi. Sic habetur capite *cum in cunctis*, de electione; unde qui malâ fide ante hos annos suscipiunt Ordines, sunt suspensi; & si exerceant, fiunt irregulares: si verò suscipiant bona fide, v. g. testimonio parentum, non sunt suspensi; unde exercendo postea etiam scientes se non habere ætatem, peccant quidem mortaliter: sed non fiunt irregulares, quia non violant censuram; suspensio enim non fertur, nisi contra eos qui malâ fide ante debitam ætatem Ordines suscipiunt. Sic

Suares, Toletus & cum aliis Bonacina. Hæc conditio intelligitur de licita susceptione Ordinum; validè enim quilibet ordinatur in qualibet ætate; unde dicunt Doctores, Sacerdotium & Episcopatum posse recipi ante usum rationis: ratio enim requiritur tantùm in Sacramentis quæ consistunt in aliquo actu recipientis, ut in Matrimonio, quod consistit in mutuo consensu, & Pœnitentia quæ consistit in dolore & confessione; in Ordinatione autem non requiritur actus suscipientis, sed sufficit intentio ministri & Ecclesiæ. An autem ille qui sic ordinaretur, teneretur ad votum continentia, dum sit adultus, negatur, nisi ordinationem suam ratificet, quia ad votum requiritur deliberata intentio. Sextò, non debet esse censurâ innodatus; sic enim recipiens Ordinem fieret irregularis, teneret tamen Ordo. Septimò non debet suscipere Ordines per saltum, idest, non debet Diaconatum suscipere qui Subdiaconatum non habet; valeret tamen Ordo, & in hoc posset dispensare Episcopus; modo sic Ordinatus actum Ordinis superioris non exercuerit, tunc enim fieret irregularis; & solus Papa posset dispensare. Octavò, debet habere titulum, dum promovetur ad Ordines, & recipiens Ordinem sine titulo suspenditur ab executione Ordinum, nisi privilegium habeat, ut Regulares. Sic Concilium Trident. sess. 21. cap. 1. Nonò, debet habere sufficientem scientiam ad usum uniuscujusque Ordinis. Decimò, debet habere testimonia morum; tandemque debet servare interstitia, de quibus dispensant Episcopi.

QUÆSTIO ULTIMA.

*Quinam sint effectus Ordinis ? ubi de Gratia ;
carattere & celibatu.*

HÆc omnia in eâdem quæstione , licet per varias conclusiones , proponemus & resolvemus , quippe quæ spectant ad Sacramentum Ordinis , tanquam effectus ad suam causam.

CONCLUSIO PRIMA.

ORDO producit in subjecto gratiam habituales , saltem in augmento , quia omnia Sacramenta illam conferunt , vel in se , ut Sacramenta mortuorum , vel augmentum ejus , ut Sacramenta vivorum ; Ordo autem est Sacramentum vivorum , quod confertur tantum illis qui supponuntur esse in gratia per Pœnitentiam : ergo per se non confert gratiam habituales quam supponit , sed illam intendit & augeat. Per accidens tamen confert gratiam in se , quando scilicet quis recipiendo hoc Sacramentum , putat se esse in gratiâ , & in peccato existit ; quia scilicet vel non debite absolutus est vel attritionem supernaturalem non habuit quando fuit absolutus , vel non habuit contritionem extra Sacramentum ; in hoc casu si Ordinandus habuerit tantum attritionem ; tunc justificatur per receptionem Ordinis , quia Sacramenta quæ ibet de attrito faciunt contritum. Cum quis Ordinem recipit in peccato mortali ; constat quod gratiam nullomodo re-

cipiat; sed quæri potest an recedente obice, seu peccato, gratia redeat: Affirmant aliqui, negant alii; sed mihi videtur utendum distinctione, & dicendum, quod gratia habitualis non redeat, bene autem Sacramentalis, quæ consistit in auxiliis actualibus quæ requiruntur ad actus Ordinis ritè obeundos. Ratio est, quia gratia habitualis per aliud medium recuperari potest, nempe per poenitentiam; gratiæ verò Sacramentales nunquam redirent, & sic ordinatus illis semper careret. Ex his constat Ordinem cum gratiâ habituali conferre Sacramentales.

CONCLUSIO SECUNDA.


SA CRAMENTUM Ordinis confert characterem, ex Conc. Trid. sess. 13. can. 4. per Baptismum enim homo consignatur ut consecratus familiæ Christi, per Confirmationem consignatur ut miles ad ferendum vexillum Christi & in Ordine consignatur in ejus Ecclesiâ, ut spiritualia munera obeat. Quia character est indelebilis, quando quis degradatur, tantum privatur exercitio Ordinis; quando etiam Pontifex dispensat cum Diaconis & Subdiaconis, non dispensat de Ordine qui est indelebilis, sed de oneribus quæ sunt annexa Ordini, qualia sunt coelibatus & recitatio officii. Quilibet Ordo confert specialem characterem in animâ: unde si dicatur, ergo plura accidentia differentia solo numero sunt in eodem subiecto; respondendum erit, quod differant specie sicut & singuli Ordines: deinde plura accidentia relativa, ut plures paternitates, possunt esse simul. Quia ordo characterem confert, iterari non potest, & sic illos iterans peccaret; non tamen sic-

ret irregularis, sicut in Baptismo; quia in jure irregularitas non fertur circa iterantes Confirmationem aut Ordinem, sed Baptismum. Porro, confertur character in ultimâ actione essentiali quâ confertur Ordo, v. g. in impositione manuum respectu Sacerdotis & Diaconi.

CONCLUSIO TERTIA.

COELIBATUS est annexus sacris Ordinibus; unde nemo conjugatus sacris Ordinibus initiari potest, nisi antea perpetuam castitatem voverit uxor: nemo etiam ordinatus uxorem ducere potest; denique, qui sacris ordinibus initiatur, perpetuam castitatem servare debet. Coelibatus annexus est Ordini jure tantum Ecclesiastico, in quantum annexum est votum castitatis, quod tacitè emittitur per susceptionem Ordinum; qui vult enim aliquem statum, vult onera ejus: quòd autem Coelibatus non sit de jure divino, ex hoc patet quòd Ecclesia permiserit Sacerdotibus Græcis usum Matrimonii contracti ante ordinationem: licet tamen non sit coelibatus de jure naturali aut divino, est tamen de antiquo jure Ecclesiæ, quæ hoc justè præcipit, ut facilius Ordinati possint orationi incumbere, & ut purius agnum immaculatum sacrificent.





CAPUT ULTIMUM.

De Sacramento Matrimonii.

QUÆSTIO PRIMA.

Quid sit Matrimonium, & quando institutum fuerit?

MATRIMONIUM sic dicitur, quia est matris munimen, seu matris munium; liberi enim ex Matrimonio procreati matrem munire, & protegere debent. Tripliciter potest spectari; primò, ut est officium naturæ, ad procreandos liberos qui naturam conservent, sic fuit in lege naturæ integræ. Secundò, ut est remedium concupiscentiæ, sic fuit in statu naturæ corruptæ, ubi cœpit vigere concupiscentia. tertio, ut est Sacramentum novæ legis, per quod datur gratia habitualis & Sacramentalis ad facilius portandum onera matrimonii; & sic est in lege gratiæ, ubi non tantum ordinatur in officium naturæ, vel in remedium concupiscentiæ, sed etiam ad gratiam conferendam, prout est Sacramentum, ut dicemus.

CONCLUSIO PRIMA.

MATRIMONIUM est legitimus & indissolubilis contractus inter virum & foeminam, quo traditur & acceptatur mutua corporum potestas, & confertur gratia. Dicitur primò, *legitimus contractus*, quia debet celebrari juxta leges Ecclesiæ. Dicitur secundò, *indisso-*

lubilis ; unde non potest dissolvi consensu contrahentium , sicut alii contractus civiles ; & sic non valet illud axioma juris , res per quas nascitur , per eandem dissolvitur. Dicitur tertio , *inter virum & foeminam* ; idest inter unum & unam , ut dicemus. Dicitur quarto , *quo traditur & acceptatur mutua corporum potestas* ; & in his consistit materia & forma hujus Sacramenti. Tandem additur , *& confertur gratia* , nempe habitualis & Sacramentalis ; quarum ultima consistit in auxiliis supernaturalibus , quæ Deus confert ad levius portanda onera Matrimonii.

CONCLUSIO SECUNDA.

MATRIMONIUM ut erat in officium tantum naturæ in statu innocentiae , non fuit institutum à Christo , nec ut fuit in remedium concupiscentiae in lege scripta ; erat enim ante Christum , & pro tunc habebat tantum rationem contractus civilis ; sed ut est Sacramentum in lege gratiae , ab illo institutum est ; Matrimonio enim , quod erat antea tantum contractus civilis , Christus addidit rationem Sacramenti mediante gratia , quam illi annecti voluit. Controvertitur autem quo tempore instituerit ipsum Christus ; alii enim dicunt institutum fuisse , dum Christus adfuit nuptiis Canæ in Galilæa , sed probabilius sentiunt alii Christum illud instituisse , cum dixit Matt. 19. *Dimittet homo patrem & matrem, & adhærebit uxori suæ : quod Deus conjunxit, homo non separet*, quod amplius potuit declarari in sermone quem habuit ad discipulos in nocte coenæ,

Q U Æ S T I O I I.

Vtrum Matrimonium sit & fuerit in præcepto?

S U P P O N I T U R Matrimonium esse bonum, & nuptias non esse inventas à diabolo, ut voluerunt aliqui; aliàs non dixisset Deus Genes. 1. *Crescite, & multiplicamini*, nec Matth. 19. *Quod Deus conjunxit, homo non separet*; nec ipse adstitisset nuptiis Canz. Ratio hujus est, quia propagatio naturæ humanæ cum debito modo, est per se bona; non posset autem ritè propagari per educationem liberorum, nisi pater & mater nexu indissolubili conjungerentur: ergo Matrimonium bonum est. Et si dicat Tatianus hæreticus actum Matrimonii esse ejusdem speciei ac fornicatio & adulterium; hoc verum est in genere naturæ; non moris; fornicator enim & adulter non habent jus ad talem actum, bene autem maritus. Posito autem quòd bonum sit Matrimonium, de præcepto ejus loquendum est.

C O N C L U S I O.

M A T R I M O N I U M primò sumptum ut est in officium naturæ, semper fuit in præcepto, non singulis hominibus, sed toti hominum communitati, ut habetur ex his verbis, *Crescite, & multiplicamini*. Quod si ignominiosum fuerit in veteri Testamento non habere prolem; per hoc non debet inferri quòd Matrimonium fuerit omnibus præceptum; non erat enim odiosa virginitas, quia secundum Patres, plures

in coelibatu vixerunt, ut Melchisedech, Josue, Elias, Jeremias, Eliseus, & Joannes Baptista: sed sterilitas erat tantum odiosa in Matrimonio, in quantum carebat Matrimonium hac Dei benedictione, *Crescite, & multiplicamini.* Secundò, si Matrimonium spectetur ut est in remedium concupiscentiæ, non est præceptum nisi per accidens; quando scilicet per jejunium, castigationem corporis, eleemosynam & similia comprimi non potest concupiscentia; pro tunc enim Matrimonium præceptum est ex Paulo 1. ad Corinth. 4. *Propter fornicationem autem, unusquisque suam uxorem habeat;* Tertiò, Matrimonium, ut est Sacramentum, nullomodo præceptum est, aliàs non diceret Paulus primæ ad Cor. 7. *Qui Matrimonio jungit virginem suam, bene facit; qui autem non jungit, melius facit.*

QUESTIO III.

An Matrimonium sit Sacramentum?

SI contrahatur inter infideles est tantum contractus civilis, si contrahatur inter fidelem & infidelem, probabilius est non esse Sacramentum, quia est tantum unus contractus & unum Sacramentum; unde si una pars est incapax illius, altera similiter erit. De Matrimonio inter Fideles intelligitur

CONCLUSIO.

MATRIMONIUM est Sacramentum ex Conc. Trid. sess. 24. cap. 1. & ex D. Paulo ad Ephes. 5. *Relinquet homo patrem & matrem,*

Et adhærebit uxori suæ ; Sacramentum hoc magnum est , dico , in Christo Et in Ecclesia : in quantum adhæsiō cum uxore , est Sacramentum significans conjunctionem Christi cum Ecclesiā. Quod autem Matrimonium conferat gratiam sicut alia Sacramenta , habetur ex 1. ad Timoth. secundò , Salvabitur mulier per filiorum generationem , si perseveraverit in fide ; id est , in fidelitate.

O B J E C T. Si Matrimonium esset Sacramentum , vir esset simoniacus , si acciperet ab uxore pecuniam. Nègatur ; non accipitur enim pecunia pro Matrimonio ut Sacramentum est ; sed ut est contractus civilis , ad sustinenda scilicet onera Matrimonii. Dices , Ecclesia non potest variare Sacramenta , nec impedire quominus sint legitima , si habeant materiam , formam & intentionem ministri ; attamen Conc. Trident. cap. de reformatione Matrimonii irritavit istud ; si non fiat coram paroco & testibus , ubi sine illis erat validum ante Concilium. Resp. Ecclesiam invalidate tantum contractum civilem qui subest Sacramento , declarando ipsum esse irritum , si non fiat cum tali circumstantiā : non invalidat tamen Sacramentum , quia non habet jus in illud , nisi remotè ; licet habeat jus proximè in contractum civilem , & hoc habet à principibus qui illum reliquerunt in potestate Ecclesiæ ; unde quando contractus civilis est invalidus , invalidum est etiam Sacramentum.

QUESTIO IV.

Quid sint materia, forma & minister hujus Sacramenti?

NOBIS breviter dicere competit de materiâ, tum proximâ, tum remotâ; & aliter concludendum est de ministro hujus Sacramenti, quàm de ministris aliorum, ubi Sacerdotes Sacramenta ministrant, hîc verò ministri sunt ipsæmet partes quæ contrahunt, & non sacerdos qui dicit, *ego conjungo vos*.

CONCLUSIO.

QUANTUM primò ad materiam remotam Matrimonii, sunt corpora contrahentium, sicut materia remota venditionis est id quod venditur. Quantum secundò ad materiam proximam, est mutua traditio corporum; quia id quod immediatè sequitur materiam remotam, est materia proxima. Quantum tertio ad formam, est mutua acceptatio partium verbis vel signis expressa; applicat enim materiam, & ille contractus esset imperfectus cum sola traditione corporum, perficiturque per acceptationem mutuam: alii dicunt mutuum consensum habere rationem materiæ & formæ; sed hoc idem est; nam mutuus consensus involvit tam traditionem, quæ est materia, quàm acceptationem, quæ est forma. Quantum denique ad ministrum, sunt ipsi contrahentes, non Parochus, quia sine præsentia Parochi ante Concil. Trid. validum erat Matrimonium. Deinde ille est minister qui applicat formam in materia, sed ipsi contrahentes ponunt acceptationem &

mutuam traditionem corporum : ergo sunt ministri. Non requiritur ergo Parochus , ut minister , sed tanquam conditio requisita essentialiter , ad contractum civilem ; hoc verò exigit Ecclesia in Concilio Trident. ut consensum partium expostulet , & suâ benedictione solenni confirmet Matrimonium.

Q U A S T I O V.

Qualis requiratur consensus ad Matrimonium?

C O N S T A T quidem mutuum consensum ita necessariò ad Matrimonium requiri , ut sine illo non possit esse verum ; non potest enim esse contractus sine consensu partium , nec Matrimonium sine contractu. An Deus possit consensum supplere in Matrimonio , aliqui affirmant , quia se habet in genere causæ efficientis ; alii negant , dicentes ipsum reduci ad causam formalem , quam Deus non potest supplere : sed melius distinguendum est , quòd si Matrimonium sumatur , prout dat potestatem viro super mulierem , supplere possit Deus ; non verò si sumatur pro contractu , quia est de essentia illius. Ille autem consensus debet exprimi per voces aut signa externa ; est enim contractus humanus qui essentialiter requirit consensum internum externo actu expressum , ex quibus duabus partibus actus humanus completus componitur. Signa sufficiunt , nedum in mutis , sed & in his qui non possunt loqui , modo signa externa sufficienter exprimant consensum internum.

CONCLUSIO.

CONSensus ad matrimonium requisitus, debet primo esse à deliberata ratione; ille enim consensus mutuam obligationem inducit, & obligatio non inducitur in re gravi, nisi fiat deliberato animo. Debet secundò non esse extortus per metum gravem, quem vocant cadentem in constantem virum, idest qui talis sit, ut virum constantem perturbare & cogere valeat. Non debet tertio esse factus ex ignorantia personæ secundum substantiam, ut si quis putet sponsare Mariam, & Annam ducat. Non debet quarto esse ex ignorantia personæ quoad servitutem, ut si foemina consentiat in servum quem putat liberum; consensus enim matrimonii fertur in personam liberam, quæ habet potestatem corporis sui, & alteri potest eam tradere. Nè dicatur tamen quòd error conditionis minus præcipuè consensum impediat; validum enim est, si foemina consentiat in virum quem putat divitem, nobilem, pulchrum & castum, qui tamen hæc omnia non habet. Quintò, consensus debet esse absolutus, & non sub conditione de futuro; quia aliàs suspenderetur Sacramentum, donec poneretur, vel non poneretur conditio. Quòd si conditio futura sit necessaria, ut si diceretur, *Sponso, te si sol cras oriatur*, valet consensus; habetur enim talis conditio pro non adjectâ, quoniam necessaria est, & non est verisimile quòd persona prudens suspendat consensum, donec impleatur conditio necessaria, quasi incertus esset ejus adventus. Si quis tamen intenderet expectare eventum talis conditionis,

non esset Matrimonium de præsentì. Sextò , consensùs datus sub conditione turpi , non impedit Matrimonium , quia censetur pro non adjectâ illa conditio , ait Gregorius XI. cap. si conditiones ; v. g. ego te duco , si parentem interfeceris. Septimò , illa conditio censetur pro non adjectâ , si sit contra substantiam Matrimonii , ut duco te si prolis generationem impedieris maleficio. Octavò denique , si conditio sit de præsentì aut de præterito , validum est matrimonium , stante conditione.

Q U Æ S T I O V I.

An Matrimonium possit contrahi per procuratores

C O N S E N S U S , quem diximus esse necessarium ad valorem Matrimonii , fertur præcisè in traditionem corporum , non verò fertur essentialiter in copulam ; aliàs Matrimonium B. Virginis & S. Joseph non fuisset verum Matrimonium , quod est temerarium negare ; distinguitur enim dominium ab usu , unde si foemina consentiat in traditionem sui corporis sub potestate viri , non consentiendo in copulam , nec dissentiendo , consensus ille sufficit , licet usus sequatur communiter ad dominium. Dubitari potest , an Matrimonium contractum per procuratorem validum sit.

C O N C L U S I O.

E X praxi apud Reges constat , Matrimonium posse contrahi per procuratorem , sive procurator sit vir , sive foemina , & etiam per

382 DE SACRAMENTIS.

litteras ; Matrimonium enim est contractus elevatus ad Sacramentum , & natura contractus postulat ut possit fieri per litteras , vel per procuratorem ; ad hoc enim requiritur tantum consensus , & consensus potest dari & explicari , tum per litteras , tum per verba procuratoris. Quod si in talibus Matrimoniis sponsi præsentes jungantur denuò in facie Ecclesiæ ; hoc est tantum ad ratificationem ejus , vel ut tollantur scrupuli , vel ut suppleantur solemnitates Ecclesiæ quæ omissæ fuerant.

Requiruntur multæ conditiones , ut procurator validè contrahat Matrimonium. Primò , debet illud celebrare coram Parocho & testibus , & illis debet ostendere litteras & procurationem , & nedum traditio partis debet innotescere , sed etiam acceptatio. Secundò , debet habere procurationem specialem , ubi nominatim agatur de Matrimonio , generalis enim pro contractu quolibet faciendo non sufficit. Tertiò , procuratio debet esse determinata pro tali persona ; mandatum enim vagum non sufficeret. Quartò , procurator debet per se exequi procurationem , nec alium potest substituere , nisi hoc exprimat procuratio. Quintò , requiritur ut procuratio non sit revocata eo tempore quo procurator contrahit ; pro tunc enim irritum esset Matrimonium , etiamsi de retractione non constaret procuratori aut alteri conjungi ; imò si retractatio esset tantum interna , Matrimonium non valeret , etiamsi ille qui procurationem dedit , jurasset se eam non revocaturum. Hoc est ex jure Canonico , ex quo patet , actum consensus procuratoris &

consensus mandantis constituere unum tantum actum numero in genere moris.

Ratio quare Matrimonium contractum per procuratorem est validum, petitur ex hoc, quod Christus elevans hunc contractum naturalem & civilem ad esse Sacramenti, non mutavit rationem ejus; unde, quia contractus ille factus per procuratorem, vel litteras, est legitimus contractus, ideo talis contractus inter fideles est legitimus Sacramentum. Forma hujus Matrimonii qua procurator uti potest, est hæc; recipio te in uxorem nomine Petri; vel, Petrus accipit te in uxorem, mediante me; similiter sponsa dicere debet, ego duco Petrum nomine tuo, vel te mediante. An autem Procurator peccet mortaliter contrahendo Matrimonium in peccato mortali, negatur: quia non est minister principalis, nec Sacramentum recipit; mandans verò peccat mortaliter, si negligat se disponere ad recipiendum Sacramentum, quando probabiliter putat procuratorem contracturum matrimonium; similiter etiam gratiam recipit pro illo instanti, si non ponat obicem. Si quærat, an peccet inter dormiendum, si sit in peccato, dum Matrimonium contrahitur, affirmat Sanchez, negant alii, ob inadvertentiam; & credunt quod potius peccaverit ante somnum, dum prævidens se matrimonium contracturum, præparationem ad illud neglexit.

& cui Sacramentum ita subest, ut ipso posito, ponatur Sacramentum inter Christianos, & ipso ablato, auferatur.

Matrimonium tamen contractum sine denunciationibus non est minùs validum post Conc. ac ante; committitur tamen peccatum mortale, nisi in certis casibus. Primò, si timeretur Matrimonium malitiosè impediendum à parentibus & tutoribus, ut eorum bona absumant, vel eos jungant indignis; tunc si non possit adiri Episcopus, aut rogatus noluerit ex odio dispensationem dare, proclamationibus omissis, potest contrahi. Secundò, quando ex proclamationibus oriretur scandalum, v. g. quando vir & scemina, qui creduntur matrimonio conjuncti, attamen vivunt tantùm in concubinato, postea contrahere volunt, non requiritur pro tunc ulla proclamatio. Tertio, quando Episcopus dat licentiam, quod tamen ordinariè non facit absolutè; jubet enim saltem unam fieri, ne lateant impedimenta. Quarto, quando vir moribundus in uxorem vult ducere suam concubinam ad prolem legitimandam. Sunt & aliz exceptiones cognitu faciles.

Q U Æ S T I O VIII.

Quales debeant esse Parochus & testes?

LEx Concilii, de quâ locuti fuimus in quæstione antecedenti, quæ exigit præsentiam Parochi & testium, aliquas patitur exceptiones. Primo, respectu infidelium; est

enim illa lex merè Ecclesiastica, & sic non obligat infideles; si unus tamen est fidelis, Matrimonium nullum est. Secundò, respectu fidelium, qui prius contraxerunt in facie Ecclesiæ, sed invalidè, ob occultum impedimentum, postea clam contrahere possunt. Aliqui dicunt, ignorantiam etiam dispensare ab hac lege, sed falsò. Tertiò, respectu eorum qui contrahunt in loco, ubi Concil. non est receptum, etiamsi transeant tantum; imò etiamsi hunc locum accedant eo fine, ut contrahant Matrimonium; qui vult enim contractum civilem facere, ubicumque ipsum inire potest, & fraus tunc non fit legi: potest enim quilibet jure suo uti; habet verò jus eo cundi: peccat tamen mortaliter, quia ante Conc. matrimonium occultum prohibitum erat, & nunc adhuc est, ubi non recipitur Conc. Exceptis his casibus, requiruntur Parochus & testes; sed videamus, quales esse debeant.

CONCLUSIO.

PAROCCHUS debet esset proprius parœciæ sponsi aut sponsæ, vel alter ex ejus licentiâ: potest etiam esse Episcopus vel Vicarius generalis Episcopi; qui unam personam constituit cum illo cujus vices gerit: vel Capitulum sede vacante, vel Legatus Pontificis in terris suæ legationis, vel à fortiori Summus Pontifex. Quoad Archiepiscopos in suffraganeorum Diœcesibus, nihil in hoc possunt, nisi cum actu visitant, aut quando causa ad eos devolvitur per appellationem. Quoad vagos, contrahere debent coram Parocho loci in quo hospitantur; etiamsi non sit Sacerdos; Conc. enim

exigit tantum Parochum. Quod si Conc. dicat matrimonium non aliter debere fieri, nisi coram Parocho, vel alio Sacerdote, ex hoc non debet inferri quod Parochus debeat esse Sacerdos; nam ly, alius, sæpe refertur ad aliquid diversæ qualitatis, ut Luc. 23. *Ducebantur autem & alii duo nequam cum illo.* Licet Parochus sit excommunicatus non toleratus, validè tamen assistit, quia non est actus jurisdictionis, sed testis. Quod si excommunicatus non possit esse testis; hoc est in causis communibus, non in gravibus, ubi infames possunt adhiberi. Quod si Parochus vel ejus Vicarius habens commissionem administrandi Sacramenta, dent licentiam alteri; hoc debet fieri alteri Sacerdoti. Debet non esse revocata hæc delegatio & tam Parochus quam commissus debent assistere modo humano, id est attendere ad contractum; & sic dormiens, amens, & similes adistere nequeunt.

Quoad testes, debent esse præsentés præsentia etiam morali, & attendere ad ea quæ fiunt; licet tamen adsistant inviti, non minus sunt legitimi testes, ut declaravit congregatio Cardinalium. Porro, qualescumque testes præsentés esse possunt, etiamsi illis desint conditiones in jure requisitæ; unde infames, excommunicati, parentes, consanguinei; familiares, famuli, foeminae recipi possunt; tales enim non rejicit Conc. & sic non est ratio cur excipiantur; favores enim sunt ampliandi, & matrimonium est materia favorabilis.

Q U Æ S T I O I X.

An matrimonium sit indissolubile?

HOc potest intelligi vel respectu status innocentiae, vel respectu status legis Moisaicae, vel denique respectu Evangelicae legis. Quoad tempus intermedium inter statum innocentiae & tempus legis Moisaicae, non loquimur de illo; quia nulla fuit in eo lex particularis. Quoad statum innocentiae, in eo Matrimonium fuit indissolubile; quia pro tunc tale fuit, quale erat ex institutione divinâ, sed ex institutione divinâ erat indissolubile; ex intentione enim Dei & naturae ordinabatur ad educationem prolis, non solum ad breve tempus, sed per totam vitam ipsiusmet prolis: ergo parentes debebant simul manere. Quod si Abraham & Moïses dimiserint uxores suas, hoc fuit ex dispensatione Dei; Abraham enim iussu Dei repudiavit Agar quæ serva erat, & accepit Sara quæ erat libera, ut significaret se repudiatum Synagogam, & accepturum Ecclesiam. Licet tamen Matrimonium ex se sit indissolubile, potest tamen quæri, utrum fuerit aliquando dissolutum ex dispensatione divinâ.

C O N C L U S I O.

IN lege Moisaica sicut in Evangelicâ Matrimonium erat indissolubile, & est adhuc; in illâ tamen ex concessione divinâ licitum fuit justâ de causâ Matrimonium solvere, etiam quoad vinculum.

Pro lege Mosaicâ, patet; quia in omni lege tale fuit Matrimonium, quale fuit ex institutione suâ; sed ut diximus, ex institutione suâ est indissolubile: ergo tale remansit in lege Mosaicâ. Constat tamen ex Deuteronomii 24. quodd ex concessione divinâ solutum aliquândo fuerit; ibi enim habetur: *Si acceperit homo uxorem, & habuerit eam; & non invenerit gratiam ante oculos ejus propter aliquam fœditatem, scribet libellum repudii, & dabit in manu ejus, & dimittet eam de domo sua. Cumque egressa alterum maritum duxerit, & ille quoque oderit eam, dederitque ei libellum repudii, & dimiserit de domo suâ, vel certè mortuus fuerit, non poterit amplius eam prior maritus recipere in uxorem.* Nec refert, quodd Matth. 19. dicatur, hoc Deum Judæis permisisse propter duritiem cordis; sequeretur enim Deum verè non concessisse hanc solutionem; sed eam tantùm reliquisse impunitam; quod falsum est, & pugnat cum verbis supradictis, maximamque dedisset Judæis occasionem peccandi, quippe qui omnes credebant lege hoc sibi esse licitum. Matth. ergo mox allegatus ostendere tantùm intendit, quodd pronitas Judæorum ad peccandum, fuerit causa cur Deus eorum imbecillitati subvenire cùpiens, tale repudium illis concesserit, licet verè & sincerè. Quodd si etiam habeatur Deuteronomii 24. mulierem repudiatam alteri nuptam fieri abominabilem; hoc est in quantum est repudiata; (per hoc enim infamiam incurrit) non in quantum nupta est.

Quantùm ad legem Evangelicam, Matrimonii indissolubilitas habetur Matth. 19.

Quod Deus conjunxit homo non separet; & qui dimissam duxerit, mœchatur: habetur etiam Matth. 19. *Relinquet homo patrem & matrem, & adhærebit uxori suæ*. Ratio nostra est; quia in lege gratiæ Matrimonium est Sacramentum significans unionem Christi cum Ecclesiâ per incarnationem; illa autem unio perpetua est, unde Matth. cap. 19. dicens, *Qui dimiserit uxorem, nisi ob fornicationem, mœchatur*, intelligendus est de dimissione quoad thorum, non quoad vinculum.

Reperiuntur tamen quædam occasiones in quibus matrimonium potest dissolvi. Primò, quando contractum est inter infideles, & alter conjugum ad fidem convertitur, pro tunc fidelis potest cum alio inire; non est enim obstrictus infideli; & in hoc casu Deus ipse dispensat. Secundò, quando matrimonium inter fideles contractum tantummodo ratum est, & altera partium religionem ingreditur ante consummationem matrimonii. Hujus rei causa est voluntas Christi declarata per traditionem Ecclesiæ; & hoc habetur in Conc. Trid. sess. 14. can. 6. *Si quis dixerit, Matrimonium ratum non solvi per solemne votum professionis, Anathema sit*: unde eo ipso quo quis professus est Religionem approbatam, sive militarem, sive regularem, conjux potest cum alio contrahere; & professus ita liber est, quòd si Papa dispensaret supra votum, posset aliam ducere, inquiunt aliqui. Non potest tamen dissolvi Matrimonium ratum per receptionem Ordinis sacri, nec etiam Episcopatus, ut habetur in extravag. antiqua de voto, hoc enim privilegium soli

professioni datum est. Tertiò, potest dissolvi matrimonium ratum per dispensationem Summi Pontificis; dispensat enim in vota solemnia religionis quæ sunt majora: deinde, hoc fecit aliquando; non est autem verisimile ipsum errasse in tanto negotio. Dixi, justâ de causâ, sine causâ enim invalidè dispensaret; nam in his quæ sunt de jure divino, non est dominus, sed dispensator: dispensatio autem rei alienæ sine justâ causâ & contra voluntatem domini, nulla est.

QUESTIO X.

An Matrimonium sit necessariò unius cum unâ?

MONTANISTÆ & Novatiani secundas nuptias negantes esse licitas, contradicunt Apostolo dicenti ad Rom. 7. *Si mortuus fuerit vir ejus, liberata est à lege viri; ut non sit adultera, si fuerit cum alio; & primæ ad Timoth. 5. Volo juniores viduas nubere.* Dicendum ergo est, quòd si in Neocæsariensi Conc. prohibeantur Presbyteri interesse celebritati secundarum nuptiarum, cum poenitentia injungenda sit illis qui sæpius nubunt; hoc idèd dicitur, quia ut ait D. Thomas, hoc est signum incontinentiæ, & idèd parum honorificum est. Quòd si Chrysostomus secundas nuptias fornicationem appelleret; hoc reperitur tantùm in Opere imperfecto, cujus non est auctor, quippe qui multis refertus est erroribus; ipse au-

tem contrarium sentit Homil. 2. ad Ephes. ubi dicit, se non damnare secundas nuptias: quæstio ergo nostra non intelligitur, an Matrimonium sit unius cum unâ successive, sed simul & semel; ita quòd homini liceat habere simul plures uxores, & hoc est quærere, an Polygamia sit licita.

CONCLUSIO.

NON possunt simul plures uxores duci, Polygamia enim est absolutè illicita: nam repugnat primæ institutioni Matrimonii, quoniam Genes. 1. habetur, *Masculum & feminam fecit eos*; Aliquo modo etiam est contra legem naturæ (non absolute, quia de ea non posset fieri ulla dispensatio) nam in primo Matrimonio traditur maritus uxori, & contra legem naturæ videtur esse, quòd res uni tradita tradatur adhuc alteri. Licet tamen Polygamia sit illicita, nihilominus ex dispensatione Dei concessa est; non quidem ante diluvium, sed post. Non ante diluvium; quia eo tempore solus Lamech habuit duas uxores Genes. 5. qui ob hoc reprehenditur ut adulter à Nicolao Papâ. Post diluvium plures sanctissimi viri plures habuerunt uxores, utpote Abraham, Jacob, Elcana, David, & alii: illi autem vixissent in perpetuo concubinato, si ex dispensatione divina Polygamia illis non licuisset. Nec refert; quòd illæ uxores concubinæ dicantur; concubina enim & uxor usurpabantur pro eodem; & in hoc solum stabat distinctio, quòd illa quæ dicebatur uxor, sumebatur simul in conjugium & in administrationem familiæ; sic

DE SACRAMENTIS. 393

erat Sara in Domo Abrahæ, sic Lia & Rachel in domo Jacob; concubinæ autem dicebantur illæ quæ erant tantùm assumptæ in ordine ad generationem. Porro, in lege gratiæ reductum est Matrimonium ad primam sui institutionem, idest, ad unicam uxorem, ubi animadvertendum quòd licet fuerit in veteri lege licitum viro habere plures uxores, nusquam tamen habuit eadem uxor plures viros.

Q U Æ S T I O X I .

Quanam sint bona Matrimonii?

CONFUNDUNTUR vulgò bona Matrimonii cum effectibus ejus; unde postquam diximus quòd Sacramentum Matrimonii conferat gratiam habitualement illis qui obicem non ponunt, sicut & gratiam actualem seu Sacramentalem, quæ consistit in auxiliis quibusdam actualibus à Deo collatis pro loco & tempore, ut onera Matrimonii portentur; postquam etiam asseruimus, hoc Sacramentum inter fideles contractum legitime, & ab illis consummatum, producere indissolubilitatem; nobis dicendum remanet de bonis ipsius Matrimonii; si prænotaverimus, quòd ad gratiam habitualement per hoc Sacramentum recipiendam non requiritur ut tollatur obex peccati mortalis per confessionem; nulla enim lex hoc præcipit, sed ad hoc sufficit contritio, vel vera, vel existimata: si enim sit vera, peccatum tollit, &

R v

pro tunc confessio non est necessaria necessitate
medii, nec præcepti; si verò est tantum existi-
mata, contrahens vi Sacramenti de attrito sit
contritus.

CONCLUSIO.

TRIA communiter assignantur bona Ma-
trimonii; nempe bonum Sacramenti con-
sistens in charitate & in indissolubilitate, de
quâ egimus; bonum Fidei; bonum denique
Prolis. De istis superest loquendum.

Ad fidem conjugalem tria exiguntur: Primò,
ut sponsi simul cohabitent & administrent fa-
miliam cum hoc ordine, ut viro subdita sit
mulier in tali administratione; & vir teneatur
præstare uxori & familiæ alimenta & alia ne-
cessaria. Ex illâ ratione tenetur uxor sequi ha-
bitationem viri, nisi in hoc pateretur grave in-
commodum, ut si ad bellum proficisceretur. Se-
cundò, ut alter alteri debitum reddat 1. Co-
rinth 7 *Vxori vir debitum reddat, similiter Co-
nux viro*: & ad hoc tenentur ex justitiâ; nam
uterque conjux contrahendo tradit alteri po-
testatem sui corporis, 1. Cor. 7. *Mulier sui cor-
poris potestatem non habet, sed vir; similiter au-
tem vir sui corporis potestatem non habet, sed mu-
lier* Conjux ergo qui negaret debitum conjugii
petenti sive tacitè, sive expressè, iret contra
justitiam: petere autem tacitè censetur mu-
lier, quando vir cõgnoscat in ea voluntatem pe-
tendi, quam præverecundiâ non explicat. Ter-
tiò, requiritur ad fidem conjugalem, ut conjux
vivente conjuge, cum aliâ personâ non contra-
hat; esset enim adulterium. Rom. 7. *Vivente
viro, vocabitur adultera, si fuerit cum alio viro*:

unde, ut altera partium ad alias nuptias convolet, debet haberi certum testimonium de morte suæ partis, nec quantumlibet tempus absentię ad hoc sufficit.

Licet ad fidem conjugalem cohabitatio requiratur, impediri tamen potest per divortium, in hoc distinctum à repudio, in quo fiebat solutio Matrimonii quoad vinculum, quodd in divortio fit tantum solutio quoad thorum & cohabitationem: fieri autem potest quoad thorum, propria autoritate; sed quoad habitationem, tantum autoritate Ecclesiæ, cap. *Porro*, de divort. Potest divortium fieri ex pluribus causis remanente vinculo; scilicet ob ingressum utriusque partis in religionem, ob adulterium, hæresim, perditos mores, denique ob sævitiam, & morbum contagiosum. Ista tamen impediunt quominus conjux possit separari à conjugē propter adulterium; si adulterium sine crimine sit, ut quando mulier patitur violentiam, vel alium virum cognoscit quem credit esse suum conjugem; si uterque conjux teneatur eodem crimine; si conjux sit conjugī adulterandi causa, si denique post adulterium unus cum alio rem habuerit.

Plura similiter conjuges dispensant à debito reddendo, quæ prolixius retexere non intendo, tum quia hoc meæ menti repugnat, tum quia hæc omnia de facili haberi possunt à Canonistis; dicam tamen in sequentibus casibus posse à traditione debiti dispensari. Primò, quando conjux petit benevole, non intendens conjugem adstringere ad hoc, sicut quando amicus petit rem sibi debitam ab amico, non in-

tendens illum obligare. Secundò, quando conjux adulterium commisit, conjux innocens potest illi negare debitum. Tertiò, excusatur à peccato qui raro negat, vel qui petitus differt redditionem per breve tempus; & hoc ob parvitatem materiz, modò non sit periculum incontinentiz; pro tunc enim non potest cessare obligatio debiti. Quartò, quando una partium frequentius petit, quàm par sit; debet enim in omnibus modis servari. Denique ob furorem, morbum contagiosum & metum mortis in partu, justum & rationabilem; non verò quando timetur filiorum multiplicatio, nisi conjuges mutuo consensu & sine periculo incontinentiz cedant juri suo, aut quando non habeant unde filios alant; tunc enim unum posse alteri debitum negare sentiunt Doctores.

QUESTIO XII

Quanam sint impedimenta Matrimonii?

NE M O dubitat, quin Papa possit impedimenta statuere, quæ dirimant Matrimonium; hoc enim habetur in Conc. Trident. sess. 24. can. 3. & 4. Non quòd habeat potestatem super Matrimonium, ut Sacramentum est; sed ut est contractus civilis, quem potest (non tamen sine justâ causâ) irritare; non tantùm in terris ubi dominatur temporaliter, sed per totam Ecclesiam; quia talis potestas circa res matrimoniales ablata est Prin-

cipibus temporalibus in jure canonico, & reservata est Ecclesiæ, ut patet ex Concil. Trident. sess. 24. can. 12. exceptâ causâ dotis & matrimonii infidelium, de quibus contractibus possunt cognoscere Principes sæculares. Ratio quare talis potestas reservata est Ecclesiæ, est quia Matrimonium non est tantum contractus civilis, sed Sacramentum & res spiritualis, quæ debet judicari ab Ecclesiâ. Quantum ergo ad principes fideles, præcisè statuere possunt impedimenta ad Matrimonium, ut est contractus civilis; sed illa potestas ab eis sublata est, & tantum illis reservatur causa dotis & Matrimonii infidelium & hæreticorum, quod non habet rationem Sacramenti, sed contractus purè civilis. Quantum ad principes infideles, possunt statuere impedimenta; tum quoad subditos infideles, respectu quorum Matrimonium est tantum contractus civilis, tum quoad fideles, inter quos Matrimonium non est vere Sacramentum, nisi sit vere contractus civilis: non esset autem legitimus contractus civilis, si leges civiles justæ quæ cedunt in reipubl. utilitatem, illum prohiberent. Porro, Judæi non possunt talia impedimenta condere; quia nec habent rempubl. nec principem legitimum, nec possunt uti legibus ceremonialibus Mosaïcis, quia abrogatæ sunt.

Constat ergo Ecclesiam posse statuere impedimenta ad Matrimonium, & multa reverà condidisse, quorum aliqua impediunt nè fiat, factum tamen non dirimunt: alia verò faciendum impediunt, dirimuntque factum. Sunt autem quinque specialiter quæ faciendum Ma-

Matrimonium impediunt, quorum primum est tempus prohibitum ab Ecclesiâ; unde peccarent mortaliter qui à primo die Adventûs usque ad diem Epiphaniæ, & à feriâ quartâ Cinerum usque ad octavam Paschæ inclusivè contraherent; hoc enim prohibitum est à Concil. Trident. sess. 24. cap. 10. Quod si ibi prohibeantur tantùm solemnitates nuptiarum; per illas intelliguntur benedictio conjugum in Ecclesiâ & traductio sponsæ, non tamen consummatio Matrimonii. Potest dispensare Ordinarius, ut sine solemnitatibus fiat. Secundum impedimentum est interdictum seu prohibitio, ut quando Episcopus, vel Parochus, vel iudex justè prohibent, nè una persona cum aliâ contrahat, vel hoc tempore aut illo. Tertium est votum castitatis, aut ingrediendæ religionis, aut suscipiendi Ordines sacros, aut non nubendi; peccat enim qui facit contra votum in re gravi. Quartum petitur ex sponsalibus celebratis cum alia persona. Quintum denique est crimen; multa autem crimina Matrimonium impediunt quæ videri possunt apud Bonacinam. Hæc quinque impedimenta duobus his versibus continentur.

*Tempora, Mandatum, Votum, Sponsalia,
Crimen,*

Impediunt fieri, permittunt facta teneri.

Quantùm ad impedimenta dirimentia, fuerunt semper duodecim expressa in versibus sequentibus, quibus duo adjunxit Concil. Tridentinum; impedit enim, quominus Matrimonium clandestinum sit legitimum, sicut & illud quod contrahitur inter raptorem &

raptam, quamdiu manet in potestate raptoris.

*Error, conditio, votum, cognatio, crimen,
Cultus disparitas, vis, ordo, ligamen, honestas
Si sis affinis, si forte coire nequibis:
Hæc socianda vetant connubia, facta retrahant.*

C O N C L U S I O.

ERRORE cadere potest vel in substantiam personæ, ut quando quis credens ducere Annam, ducit Mariam; & tunc invalidum est Matrimonium, jure etiam naturali; contrahens enim non consentit cum illâ personâ; unde non valeret apud infideles. Hoc intelligitur, etiam si error esset concomitans, ut quando quis ducit Annam putans ducere Mariam, quam ramen duceret, si cognosceret illam; quia non consentit actu circa illam; & consensus actualis requiritur. Vel potest error esse circa qualitatem personæ, ut quando aliquis ducit Mariam, quam putat divitem, formosam, nobilem, & talis non est; Matrimonium est validum, nisi talis qualitas apponatur per modum conditionis, vel transeat in errorem personæ. Ratione primi, si quis dicat: duco te in uxorem, si tu es nobilis, & non sit reverà, Matrimonium nullum est; defectus enim conditionis, sine quâ non factus fuisset contractus, invalidat contractum. Ratione secundi, non valeret Matrimonium, si Maria sponsaret Petrum se fingentem esse filium regis Galliarum, in quem illa consentit sicut in filium regis, qui reverà alius non est; tunc enim error censetur versari circa determinatam personam; vale-

400 DE SACRAMENTIS.

ret autem si contraheret cum Petro qui se fingit esse filium regis simpliciter; consentit enim in determinatam personam quam presentem ducit; & error tantum cadit supra qualitatem.

Conditio est secundum impedimentum Matrimonii; sumitur autem conditio non latè, de ea enim loquuti fuimus antè; sed strictè, pro servitute: & de ea dicitur, quòd Matrimonium contractum cum errore conditionis servilis, sit invalidum, modo conditio errantis sit deterior; sic qui contrahit cum servâ, quam putat liberam, invalidè contrahit, licet cum illa contraheret, si illam cognosceret servam: si tamen servus contraheret cum serva, quam putat liberam; aut cum libera, quam putat servam, contraheret validè; quia conditio ejus non fit deterior. Hoc impedimentum inductum est ab Ecclesia, ut tollatur inæqualitas inter contrahentes, & ne fiat injuria contrahenti. Servitus extendi potest ad illos qui damnati sunt ob crimina ad remos perpetuos, vel perpetuo carceri, quia sunt servi poenæ.

Votum tertio Matrimonium dirimit, nimirum solemne, quale in professione religionis & in sacrorum Ordinum receptione emititur; simplex autem votum castitatis tantum impedit, excepto apud RR. PP. Societatis Jesu, qui elapso biennio, emittunt votum simplex castitatis, quod non tantum impedit & dirimit Matrimonium respectu illorum, sed de facto excommunicationem incurrunt, si contrahant.

Cognatio, quartum impedimentum est diri-

mens Matrimonium; & est triplex, nempe legalis, spiritualis, & naturalis. Cognatio legalis est quædam propinquitas inter certas personas proveniens ex adoptione: Adoptio autem est legitima assumptio personæ extraneæ in filium aut filiam; illa cognatio impedimentum est, primò, inter ascendentes & descendentes usque ad quartum gradum inclusivè: secundò, inter adoptatum & filios adoptantis: tertio, inter adoptatum & uxorem adoptantis; & inter adoptantem & uxorem adoptati; primi sunt cognati in linea recta; secundi in linea transversali; & tertii per modum affinitatis legalis. Cognatio spiritualis est propinquitas inter quasdam personas ex Baptismo & Confirmatione proveniens: & triplex est, nempe Paternitas inter baptisantem & baptisatum, & inter levantem & levatum, sic de confirmato: Compaternitas, inter baptisantem, confirman-tem, patrinum, & patres carnales baptisati aut confirmati; denique est Confraternitas inter baptisatum seu confirmatum & filios baptisan-tis, confirmantis & patrinorum; sed ablata est Fraternitas per Concil. Trident. & remanse-runt sola Paternitas & Compaternitas, quæ ex eodem Concil. non amplius se extendit ad susceptores, & etiam limitatur ad unum & ad unam. Ad cognitionem spiritualem multa re-quiruntur. Primò, ut teneatur infans in Baptis-mo; unde si domi est baptisatus, qui tenet, dum supplentur solemnitates in Ecclesia, non contrahit. Secundò, ut quis teneat in primo Baptismo; unde si rebaptisetur, susceptores non contrahunt cognitionem, nisi probabile

esset primum fuisse invalidum; probabiliter enim esset cognatio. Tertiò, debet teneri infans in baptismo solemni; & si teneatur tantum domi, nulla est cognatio, quia Ecclesia non instituit susceptores nisi in Bapt. solemni. Quartò, susceptores suscipere debent puerum de manibus baptisantis, statim ac baptisatus est, aliàs non dicerentur levare de fonte sacro: unde mulier suscipiens puerum, non de manibus baptisantis sed patrini, non contrahit; & etiam, si susceptores tangant puerum tantum digito, non dicuntur propterea tenere; ex quo patet contactum physicum esse necessarium, siue sit proprius vel alienus; qui enim suscipit per procuratorem, contrahit, ut majors pars Doctorum sentit; non ipse procurator, ut declaravit congregatio Cardinalium; qui tamen constituit alium, ut suo nomine baptiset, non ipse contrahit, sed designatus.

Quantum ad cognationem naturalem, nil aliud est, quam propinquitas personarum descendantium ex eodem stipite proximo per naturalem generationem. Distinguitur per lineas & gradus. Linea est series seu ordo personarum ascendentium vel descendantium ab eodem stipite; stipites autem est illa persona ex qua fit descensus. Gradus est distantia major vel minor qua una persona magis vel minus distat ab alia. Linea duplex est, recta & collateralis; illa est secundum quam plures personae ita à stipite descendant, ut una sit genita ab alia; hoc est, qua plures personae ab eodem stipite descendant, non tamen quod una sit ab alia. Ut cognoscatur quot gradibus una perso-

na distet ab alia, accipiendæ sunt hæ tres regulæ. Prima. In linea recta ascendendum & descendendum tot sunt gradus, quot personæ, una dempta, scilicet stipite, sic Pater & Filius sunt in primo, quia dempto patre qui est stipes, remanet tantum una persona; sicque est tantum unus gradus; pari jure Nepos est in secundo gradu consanguinitatis cum Patre, Pronepos in tertio, &c. Secunda regula. In linea collateralis & transversa tot gradibus distant personæ inter se, quot distant à stipite, sic quia duo fratres distant à Patre uno gradu, distant inter se uno gradu. Tertia regula hæc est. Si in linea transversa, duæ personæ distent inæqualiter à stipite, quot gradibus distat persona remotior, tot gradibus inter se distant; unde si una sit in secundo gradu distans à stipite, & alia in tertio, sunt inter se distantes in tertio. Hoc posito, dico primò, Matrimonium esse invalidum intra quartum gradum consanguinitatis, tum in linea recta, tum in collateralis; sed hoc est tantum de jure Ecclesiastico, quod olim illud prohibebat fieri intra septimum. Dico secundò, quoddam aliqui sentiant, prohibitum esse Matrimonium in omni gradu lineæ rectæ, & hoc de jure naturæ; quia contractus & usus Matrimonii repugnant reverentiæ quæ debetur parentibus: alii tenent esse tantum de jure naturæ prohibitum in primo gradu, juxta illud Levitic 18. *Turpitudinem patris tui vel matris tue ne discooperias; mater enim tua est*: Unde, si Matrimonium intra quartum gradum ascendendum prohibetur, hoc est tantum de jure Ecclesiastico. Ad adversarios

204 DE SACRAMENTIS.

respondentes, dicunt quòd maxima reverentia debeat tantum principio immediato, nempe patri; non mediato scilicet avo. Dico tertio, in linea transversa Matrimonium esse prohibitum de jure naturæ in primo gradu, v. g. inter Fratrem & Sororem: inter illos enim est maximus pudor, cui adversatur usus Matrimonii. Quo si initio mundi contrahebant Fratres cum Sororibus, hoc erat ad conservandam speciem humanam, quod præceptum cuilibet alteri præponderat; unde, si eadem necessitas rediret, posset Pater contrahere cum Filia, & Frater cum Sorore.

¶ Quintum impedimentum matrimonium dirimens, est *Crimen*: illud autem crimen duplex est, nempe homicidium & adulterium. Ratione primi criminis, si vir & mulier simul machinentur mortem alterius conjugum, aut si unus eorum machinetur mortem suæ conjugis, ut matrimonium ineat cum alia, Matrimonium iniri non potest. Ratione secundi, si adulteri sibi invicem promiserint fidem de Matrimonio ineundo post mortem conjugis, contrahere matrimonium non possunt; quia videntur mortem alterius conjugis procuraturi: sic nec illi qui contraxerunt vivente altero conjugis, Matrimonium tamen non est irritum, si unus fingat alteri suam partem esse mortuam, ut illum decipiat, & inducat ad adulterium: Non etiam irritatur Matrimonium, si v. g. Petrus occidat ex vindicta maritum Annæ, non verò ut cum illâ contrahat. Non etiam irritatur, si solus Petrus occidat maritum Annæ ut eam ducat, modò illa non concurrerit, nec præcesserit adulterium cum homicidio.

Sextò impeditur Matrimonium per *cultus disparitatem*: Unde fidelis contraheret invalidè cum infideli non baptisato, etiam catechumeno; validè tamen contrahit cum hæretico; hoc enim nulla lege cautum est, licet sit grave peccatum, propter prohibitionem Ecclesiæ & periculum subversionis: quod intelligendum est de locis in quibus hæretici non sunt tolerati; alibi enim, ut in Gallia, cessante periculo perversiōis & scandalo (quæ rarò absunt) non esset peccatum mortale de se. Istud impedimentum est tantum de consuetudine Ecclesiæ, quæ non fuit tempore Augustini, cujus mater Monica virum duxerat infidelem. Quod si 1. Corinth. 7. Paulus permittat mulierem fidelem manere cum viro infideli; loquitur de muliere facta fidei post Matrimonium.

Impeditur septimò Matrimonium per *metum extrinsecum* cadentem supra constantem virum. Dicitur primò, per metum extrinsecum, qualis incuti potest à causa extrinseca libera, ut ab homine; non à causa intrinseca, qualis est ille qui incutitur à periculoso morbo, à morte, à feris animalibus, &c. Matrimonium enim initum ut hæc omnia vitentur, validum est; sic validum est Matrimonium filiz medici nolentis curare ægrotum, nisi ducat ægrotus illam filiam; metus enim non incutitur à medico, sed à morbo: Valet etiam dum contrahitur ob metum inferni. Dixi secundò, cadentem supra constantem virum, seu gravem. Gravis metus à levi in hoc differt; quod gravis est ille qui cogit eligere minus malum, ut majus vitetur: levis ex opposito est ille quo aliquis

cogitur eligere majus malum ut minus deviteatur: posito gravi metu ut extorqueatur consensus, Matrimonium invalidum est. Ad metum gravem reducitur metus mortis, mutilationis, atrocis cruciatus, carceris diuturni, exilij, stupri, amissionis partis notabilis bonorum, infamiae, &c. Quoad metum reverentialem, nisi sit gravis, id est, conjunctus cum minis gravibus, verberibus & similibus, Matrimonium non invalidat.

Octavò, Matrimonium invalidatur per *Ordines majores* susceptos validè, & hoc tantùm ex præcepto Ecclesiastico, non divino; aliàs Ecclesia Romana non permetteret Sacerdotibus Græcis usum Matrimonii. Licet tamen matrimonium Ordines majores subsequens invalidum sit propter votum solemne illis implicitè adjunctum, ex decreto Ecclesiae; non tamen susceptio sacrorum Ordinum Matrimonium antè contractum invalidat. Dixi, susceptos validè; si enim quis invalidè Ordinaretur, v. g. nolens, aut ab Episcopo non intendente Ordinationem, validè posset contrahere Matrimonium. Si quis Ordinem sacrum susci-peret, nesciens illi annexum esse votum castitatis, ad illam teneretur; qui vult enim statum, vult ea quæ sunt annexa statui, ut illud votum: Quòd si intentionem haberet positivam non votendi, ad castitatem nihilominus teneretur; non ratione voti, quia nullum est, sed præcepti Ecclesiastici Matrimonium ordinati prohibentis. An ille qui ordinatus est Ordine sacro ante usum rationis, teneatur castitatem servare, dum sit adultus; omnes respondent negativè.

nisi Ordinem ratificaverit: sed controvertuntur de ordinato ante ætatem pubertatis, seu sexdecim annorum: affirmativam probabilitatem tenet Bonacina.

Per *ligamen* nonò Matrimonium impeditur: Per *ligamen* autem intelligitur vinculum prioris matrimonii, quo stante, nullus potest aliam uxorem ducere. Vinculum hoc invalidat matrimonium ex jure naturæ, in quantum repugnat quieti & paci familiæ. unde super illud non potest dispensare Summus Pontifex. Quòd si in veteri Testam. licita fuerit Polygamia, seu pluralitas uxorum, hoc factum fuit ex Dei dispensatione; & sic hoc præceptum pertinet tantum ad secundarium jus naturæ, quoniam Deus in illud dispensat, quæ dispensatio ablata est à Christo, Matt. 19. *Quicumque dimiserit uxorem, & aliam duxerit, mœchatur*; si enim mœchatur, dimissâ aliâ, à fortiori mœchatur, illâ retentâ. Quoniam, jure naturæ plures uxores prohibentur, à fortiori prohibentur plures viti unius uxoris; hoc enim repugnat fini primario Matrimonii, nempe procreationi prolis, quæ impeditur ex seminum commixtione. Ex nostrâ conclusione sequitur, certitudinem moralem requiri de morte conjugis, ut superstes ad novum matrimonium convolet; & illa certitudo non censetur haberi per multorum annorum absentiam viri, nec per famam solam, nec per unum testem, nisi hæc conjungantur cum indiciis ita evidentibus, ut nullus remaneat dubitandi locus, quod relinquendum est iudicio prudentis viri. Mulier quæ existimato mortuo conjugè, alium duxit, cognoscens

certò primum esse viventem, à primo recedere debet; si vero tantummodo dubitat, non potest petere debitum, tenetur tamen reddere. Porro, licet Polygamia, quæ consistit in possessione plurium uxorum, illicita sit; Bigamia tamen, quæ plures habentur successivè, non est illicita, ad Rom. 7. *Si mortuus fuerit vir ejus, soluta est à lege viri, ut non sit adultera, si fuerit cum alio viro*: imò secundæ nuptiæ sunt Sacramentum, licet ille qui ad eas transit, fiat irregularis, quia per secundas nuptias non significatur perfectè conjunctio unius Christi cum unicâ Ecclesiâ.

Invalidat decimò matrimonium *publica honestas*, quæ est propinquitas quædam orta ex validis sponsalibus de futuro, vel ex matrimonio rato, non consummato; cum hac differentia, quod prima, quæ extendebatur usque ad quartum gradum inclusivè, limitetur ad primum: secunda verò ad quartum gradum protrahatur. Istud impedimentum vocatur *publicæ honestatis*; quia indecens est, ut frater ducat filiam quæ fuit sponsa fratris sui mortui.

Undecimò, irritatur matrimonium per *affinitatem*, quæ est propinquitas personarum proveniens ex carnali copulâ, sive licitâ, sive illicitâ: si oriatur ex licitâ, extendit se ad quartum gradum; sic ex illicitâ, ad primum limitatur. Cognoscuntur gradus affinitatis per hanc regulam. Quo gradu aliquis est consanguineus viro, eo gradu est affinis mulieri. Licet autem consanguinei viro sint affines uxori ejus, non tamen consanguinei viro sunt affines consanguineis uxoris; & sic duo fratres possunt in Matrimonium ducere duas sorores, & pater & filius contrahere

contrahere possunt cum matre & filia. An affinitas Matrimonium dirimat jure Ecclesiastico vel naturali? Resp. dirimere jure Ecclesiastico usque ad quartum gradum; jure verò naturæ aliqui dicunt dirimere in primo gradu lineæ rectæ; & sic Papam non posse dispensare, ut aliquis contrahat cum patre & filia, si filia sit orta ex copula licita, secus si ex illicita: alii in nullo gradu sentiunt Matrimonium esse prohibitum jure naturæ; sed omnes conveniunt in hoc, quod lege naturæ validum sit Matrimonium in primo gradu lineæ transversæ: unde Genes. 29. Jacob duas sorores sibi junxit, & summus Pontifex dispensavit cum Rege Angliæ Henrico VIII. ut sponsaret Catharinam uxorem fratris sui; licet eam postea repudiaverit ex prætextu quòd talis dispensatio esset invalida: unde propter hoc excommunicatus fuit. Quod si Joan. Baptista Herodem reprehenderit, dicens: *Non licet tibi habere uxorem fratris tui*, hoc est, quia illam habebat, vivente fratre, & quia hoc prohibitum erat lege divinâ positivâ, Levitici 18. *Turpitudinem fratris tui non revelabis*: quæ lex abrogata est per novam; unde nunc tale Matrimonium est tantum prohibitum lege Ecclesiastica.

Invalidatur Matrimonium duodecimò per *impotentiam*, modò sit perpetua, & respectu cujuscumque personæ, & Matrimonium præcèsserit. Impotentia censetur perpetua, quæ per triennium duravit ex jure canon. & quæ non potest tolli arte humana, vel sine vitæ periculo: sic ille censetur impotens perpetuus qui potens reddi non potest, nisi per miraculum, aut arte

magicâ , aut committendo aliquod peccatum ;
 ut quand mulier à viro cognosci non potest :
 nisi ab alio antea cognoscatur ; sic mulier cen-
 setur impotens quæ non potest reddi apta , nisi
 per incisionem vitæ periculum inducentem.
 Quod si impedimentum sit tantum respectu
 unius personæ , respectu talis personæ est qui-
 dem invalidum , non respectu aliarum ; & sic
 facto divortio autoritate Ecclesiæ , cum alio
 contrahi potest : sed debet illa impotentia pro-
 bari per triennium. Quod si impotentia sit ante-
 cedens Matrimonium , irritatur ; quia finis Ma-
 trimonii est , ut conjuges per copulam possint
 fieri una caro : si verò superveniat Matrimonio
 consummato , non dirimit ; quia jam facti sunt
 una caro per copulam : licet autem potestas ad
 copulam sit de essentia Matrimonii , non tamen
 copula actualis ad essentiam ejus spectat. Ex
 hoc sequitur, Matrimonium contractum ab Eu-
 nucho perfecto , qui omnino caret semine , esse
 invalidum etiam de jure naturæ ; quia copulam
 habere non potest , quæ consistit in emissionem
 seminis ; steriles verò inter quos potest esse vera
 copula , validè contrahunt ; non verò senex de-
 crepitus , si sit omnino impotens ad seminatio-
 nem ; & ad hoc non possit juvari aliqua arte.
 Quando cognoscitur impotentia perpetua , se-
 parari debent conjuges , nè sit periculum incon-
 tinentiæ in tactibus & osculis , quæ tantum li-
 cent in ordine ad copulam : secluso tamen scan-
 dalo & illo periculo , vir potest habere sororem
 quam non potest habere uxorem. Superfunt duo
 impedimenta quæ Matrimonium insuper irri-
 tant, à Concil. Trident. inducta , quorum unum

DE SACRAMENTIS. 411

est absentia Parochi & testium, & secundum est raptus. De primo diximus antea; de raptu dicam Matrimonium non posse contrahi, sed esse invalidum, si fiat cum puella rapta, quamdiu manet in raptoris potestate.

Quantum denique ad potestatem dispensandi in impedimentis Matrimonii, summus Pontifex dispensare potest in impedimentis dirimentibus matrimonium jure Ecclesiastico, nam habet summam potestatem in tota Ecclesia; non debet tamen hoc facere nisi juxta ex causa, maxime in his quæ sunt magni momenti, & quæ occasionem scandali præberent: in illis autem impedimentis quæ apponuntur jure naturæ, aut divino, dispensare non potest. Quoad impedimenta quæ Matrimonium non dirimunt, sed tantum prohibent, Episcopus dispensare potest, licet inducta à superiore sint, hoc enim consuetudine receptum est; excipe tamen votum castitatis & religionis. Episcopus etiam dispensare potest super impedimenta dirimentia, quando sunt occulta & Matrimonium publicum, conjugesque sine scandalo separari non possunt, nec facile ad Summum Pontificem recurrere. Potest insuper Episcopus dispensare super impedimenta dirimentia quæ Matrimonio superveniunt; & impediunt nè petatur debitum; ut quando advenit affinitas vel cognatio spiritualis. Affinitas illa advenire potest, quando sponsus cognovit consanguineam sponsæ; & cognatio spiritualis, quando sponsus extra necessitatem suam filium baptisavit.

 QUESTIO ULTIMA.
Quid dicendum sit de Sponsalibus?

SPONSALIA, quæ à spondendo, seu promittendo dicta sunt, sumuntur primò pro futuro Matrimonii promissione: secundò pro contractu Matrimonii rato, non consummato; unde venit nomen sponsi & sponsæ; unde etiam Luc. 2. Maria dicitur fuisse Josepho desponsata uxor: tertio promuneribus quæ olim à sponso dabantur sponsæ. Hic sumuntur Sponsalia primo modo, in quibus tres conditiones requiruntur. Prima, ut sit promissio futuri matrimonii; secunda, ut sit inter personas habiles ad contrahendum; tertia, ut manifestetur signis aut verbis. De his tribus dicendum est.

Quantum ad primum, dico quòd illa promissio futuri matrimonii debeat esse deliberata, mutua, & facta inter præsentes. Debet primò esse *deliberata*, id est facta cum tali advertentiâ, quanta requiritur ad opus meritorium, vel demeritorium. Si Sponsalium promissio fiat ex iracundia, aut alia passione, dicendum est quòd si illa passio ita perturbet rationem, ut advertentiam requisitam impediat, tantam quantam requirit commissio peccati mortalis, illa promissio non sufficit: quòd si cessante illo motu, promissionis sponsum poeniteat (nulla alia superveniente ratione) signum est non fuisse sufficientem deliberationem. Quando sponsalia fiunt sistè, & aliquis promittit exte-

rius, non tamen habet animum promittendi aut se obligandi, sponsalia nulla sunt. Quando quis habet voluntatem promittendi & se obligandi, non tamen adimplendi promissum, valida sunt sponsalia. Quando aliquis habet intentionem promittendi, non tamen se obligandi, controvertuntur Doctores, an illa promissio sit valida, & utramque partem existimant probabilem. Quando quis promisit Matrimonium contrahendum cum aliqua, etiam cum juramento, non tamen habet animum promittendi aut jurandi, non tenetur contrahere ratione fraudis aut injuriæ, quia nulla fit; posset tamen teneri, si in violatione fidei intercederet scandalum; si autem sub promissionis & juramenti prætextu aliquis Virginem violaverit, non sufficit illi dotem constituere, sed eam ducere debet; modò scandalum grave non superveniat, aut modò vir notabiliter mulierem non excefferit, aut nisi ex circumstantiis evidentibus potuerit mulier cognoscere fictionem promissionis; videretur enim pro tunc consensisse fraudi.

- Debet secundò, promissio Sponsalium esse *mutua*; Sponsalia enim sunt promissio futuri matrimonii, & matrimonium requirit consensum utriusque partis. Debet, inquam, esse mutua; unde quando sponсорum alter matrimonium promittit, & alter non repromittit, sed tantum promissionem alterius acceptat, invalida sunt sponsalia; per hoc enim iste acceptat quidem voluntatem promittentis, sed non intendit repromittere; nec pro tunc videtur consentire in repromissionem, sed tantum.

in acceptationem. An ille qui promittit matrimonium, alio non repromittente, obligetur ad illud, quando alter postea repromittit? alii dicunt obligari, non ex vi sponsalium, sed promissionis liberalis: alii sentiunt non obligari, quia illa promissio est onerosa; fit enim sub onere seu conditione repromissionis quæ non fuit: alii dicunt quòd si aliter paulò post repromittat, ita ut sit continuitas moralis & voluntas in alio perseveret, iste obligetur reverà.

Debet tertio promissio Sponsalium fieri *inter presentes*: unde si promissio matrimonii futuri facta alicui foeminæ absenti, nullo pro illa talem promissionem acceptante, revocari potest ante absentis acceptationem; & hæc acceptatio promittenti innotescere debet per litteras, vel per nuntium acceptantis. Quod si aliquis illam promissionem acceptet nomine absentis, revocari non potest: modo tamen illa promissio fiat præsentem, ut quando quis diceret, promitto tibi me ducturum Annam; si enim promissio fieret directè absenti, dicendo, promitto Annæ, me illam ducturum, posset revocari illa promissio, antequam acceptaretur ab absente. Quod si acceptans non habeat commissionem specialem repromittendi pro absente, ipse absens potest illam promissionem acceptatam non ratificare, quia acceptans non acceptavit illam nomine proprio, sed sub beneplacito absentis. Porro, non omnes pro absente acceptare possunt, sed tantum illi qui commissionem habent, vel qui sunt absenti consanguinitate, aut affinitate conjuncti, vel qui ex illa promissione aliquando commodum

reporrant , vel qui subsunt absenti aut præsunt ; ut filius pro patre , servus pro domino , princeps pro subdito , tutor pro pupillo , &c.

Quantum ad secundum , Sponsalia fieri debent inter personas habiles ad contrahendum : Sponsalia enim ad Matrimonium ordinantur ; unde qui habent inhabilitatem perpetuam ad Matrimonium , habent etiam ad Sponsalia. Dixi *perpetuam* : nam impuberes , & illi qui voto Castitatis obstringuntur ad tempus , possunt Sponsalia emittere de Matrimonio contrahendo , elapso illo tempore. Quoad ætatem , septem anni completi requiruntur ad Sponsalia , & quatuordecim ad Matrimonium in viris , duodecim verò in foeminis. Non requiritur diversa ætas in Sponsalibus , benè autem in Matrimonio ; quia ad Sponsalia sufficit usus rationis , qui eodem tempore cunctis advenit ; ad Matrimonium verò requiritur virtus generandi , quæ tardius advenit viris. Si Sponsalia fiant ante completum septennium , invalida sunt , modo malitia non suppleat ætatem ; malitia autem censetur ætatem prævenire , si contrahentes possint cognoscere naturam contractus quem faciunt , & si sint doli capaces. Quod si ultima dies septennii sit inchoata , hoc sufficit ad Sponsalia , in favorem Matrimonii , sicut sufficit in Testamenti favorem.

Quantum ad tertium ; Sponsalium promissio debet esse externa ; nam promissio fit homini , & ab homine acceptari debet ; non potest autem homo promissionem sibi factam acceptare , nisi sibi manifestetur aliquo signo exteriori ;

Votum ergo, quia fit Deo, potest consistere in promissione internâ; Sponsalia verò, quia fiunt homini, debent habere promissionem externam. Ad Sponsalia non sufficit votum factum Deo de contrahendo matrimonio cum tali fœminâ, quia votum est de meliori bono; erit tamen validum, si matrimonium necessarium sit, ut quando aliquis aliquam defloravit sub promissione matrimonii, vel quando ex tali matrimonio contrahendo advenit magna utilitas reipublicæ, ratione cujus matrimonium est melius cœlibatu. Promissio Sponsalium non satis exprimitur per taciturnitatem; si enim una regula juris habeat; *qui tacet, consentire videtur*; in alia habetur, hoc esse verum, quando consensus est in sui favorem, non verò quando est in sui præjudicium; tradere autem alteri potestatem sui corporis, hoc non est in favorem tradentis, sed illius cui fit illa traditio. Debet ergo consensus Sponsalium manifestari verbis, aut signo aliquo habente verborum æquipollentiam, v. g. per nulum; annuli autem subarrhatio est signum de se æquivocum; quod non semper promissionem matrimonii significat, cum possit annulus dari ratione simplicis amicitix; unde non est signum sufficiens consensus: sufficit tamen in locis ubi matrimonium futurum significat, vel ubi verba unius partis præcesserint, si postea fiat ab una immissio annuli, & ab alia receptio ejus: si etiam, habito contractu de matrimonio inter amicos, una pars alteri mittat arrhas vel jocalia, nihil aliud exprimendo, & altera recipiat, hoc sufficit; si-

ent quando vir promittit matrimonium per verba, & foemina sponte manum dederit; qui tacet enim, consentire videtur, ubi advenit aliquis actus positivus; hæc enim omnia verbis æquivalent: verba autem quibus exprimitur Sponsalium promissio, sunt ista, aut similia, *Accipiam te in uxorem, vel promitto te ducturum in sponsam, &c.*

Quantum ad obligationem Sponsalium, certum est illa sub peccato mortali obligare; quia contractus Sponsalium est obligatorius in materia gravi; ergo sub mortali peccato obligat, etiam jure naturæ, quo aliquis ex fidelitate tenetur promissis stare, & ex justitia debet reddere alteri quod suum est. Quod si in Sponsalium promissione non determinatum fuerit tempus quo contrahi debeat Matrimonium, non tenetur sponsus aut sponsa illud contrahere, nisi alter id petat, modò audeat petere; ex lege enim debitor non tenetur solvere, nisi à creditore requisitus: quod si sponsa non audeat petere adimpletionem Sponsalium, debet sponsus contrahere eo tempore quo prævidet sponsam velle exigere Matrimonium. Non est eadem ratio de voto quod aliquis emittit de ingressu religionis; debet enim data opportunitate, statim impleri, quia Deus semper illud exigit. Quod si Sponsalia facta sint à parentibus & tutoribus pro filiis aut pupillis suis, qui septimum annum non attigerunt, quod fieri potest in magna necessitate; sunt quidem valida, modò accesserit consensus expressus vel tacitus illorum, dum habent usum rationis; non tamen obligant illos ad consensum;

418 DE SACRAMENTIS.

non tenentur enim regulariter filii parentibus obedire in his quæ statum matrimonialem concernunt ; unde si jura dicunt , filium factum puberem teneri ad matrimonium contrahendum quod pater promissit pro illo , dum nondum adultus esset ; hoc verum est de debito honestatis , non de debito obligatorio sub peccato mortali.


Quantum denique ad Sponsalium solutionem , multæ communiter afferuntur rationes ob quas dirimuntur. Primò , per religionis ingressum factum bonâ fide , sive sequatur professio , sive non ; licet etiam sponsalia firmata fuerint juramento , illo non obstante , aliquis religionem ingredi potest ; promissio enim illa & juramentum , quod illam sequitur , censentur fieri sub tacita conditione , quòd status melior non eligatur : quòd si tamen virtute Sponsalium copulam habuerit cum Sponsa , religionem ingredi non potest ; quia resarcire injuriam , est de jure naturali , & religio tantum de consilio. Quòd si post votum de religione factum virginem defloravit aliquis , contrahere cum eâ tenetur , quia vinculum justitiæ fortius est vinculo charitatis ; hoc intellige , si votum erat ignotum mulieri. Secundò dirimuntur etiam per votum simplex castitatis , sive antecesserit Sponsalia , sive illis successerit ; nam in contractu Sponsalium , semper supponitur conditio hæc , modò status melior non eligatur ; ecclibatus autem de fide prævalet Matrimonio. Si ille qui castitatem vovit , dispensationem sui voti obtinuerit , est liber ut contrahat cum alia. Sicut si aliquis è religione egrediatur , modò

votum & ingressus religionis facta fuerint bonâ fide. Ratio est, quia quod extinctum est, nunquam reviviscit. Tertiò, dirimuntur Sponsalia per votum suscipiendi sacros Ordines; quia est illis annexum votum castitatis. Quartò, dissolvuntur per Matrimonium cum alia legitime contractum: quia obligatio Matrimonii est major obligatione sponsalium: si autem subsequens Matrimonium sit irritum, non dissolvuntur sponsalia; sicut nec dissolvuntur priora sponsalia per posteriora, etiamsi sequuta fuerit copula affectu maritali; dissolvebantur tamen ante Conc. Tridentinum, quia per talem copulam sponsalia posteriora transibant in Matrimonium. Et si posteriora sponsalia facta fuerint cum juramento, non anteriora, non minùs illa sunt valida; juramentum enim quod cedit in præjudicium tertii, iniquum est. Quintò, sponsalia facta ante pubertatem dissolvi possunt in pubertate; hoc enim jus concedit; intra tamen pubertatem non possunt dirimi, etiamsi uterque consentiat; nam daretur eorum levitati occasio sæpius sponsalia contrahendi. Si unus fiat pubes ante alium, potest revocare sponsalia, modò hoc fiat statim hoc est intra triduum; nam statim dicitur fieri, quod intra triduum fit, ex lege. Pubes contrahens sponsalia cum impubere, non potest ab illis resilire, etiamsi impubes consentiat; quia non censetur habere sufficiens iudicium ad solutionem sponsalium; unde solus impubes, quando fiet pubes, resilire poterit. Sextò, per lapsum termini præfixi dissolvuntur sponsalia; non quidem ex parte illius, per quem

410 DE SACRAMENTIS:

stetit mora ; sed respectu innocentis, qui paratus erat ad matrimonium contrahendum ; tunc enim liber est à sponsalibus, modo dilator moram non fecerit ex justo impedimento. Septimò, dissolvuntur ob discessum alterius sponsi absque licentia alterius ; etiamsi sponsalia sint firmata juramento : An autem debeat observari jus civile, præcipiens quod expectetur biennium, si sponsus sit intra provinciam ; vel triennium, si sit in alia ; dico debere tantum servari in foro externo, in interno enim jus canonicum nullum tempus præscribit. Octavò, dirimuntur per fornicationem ; illa enim sufficit ad separationem thori : quod intellige, etiamsi vim passa fuerit sponsa, ex cap. *Raptus* 27. *quæst.* 3. tunc enim fit notabilis mutatio in persona. Denique dissolvuntur ob impedimentum dirimens quod supervenit ; ut est affinitas ; ob notabilem fœditatem, vel gravem morbum ; ob sponсорum inimicitiam ; ob conversationis antipathiam ; ob paupertatem supervenientem, & similia.





DE ACTIBUS HUMANIS

COMPENDIOSA TRACTATIO.



UM Philosophis Moralibus incumbat necessitas loquendi de Actibus humanis ex professo, Theologi illorum explicationem ex Philosophiâ supponentes, de iis tantum agere tenentur, in quantum sunt veluti fundamentum peccatorum & virtutum, quæ ad considerationem Theologicam per se spectant; unde prolixitatis inutilitatem evitare eupientes, philosophicas difficultates ad Philosophiam remittimus, quædam solum dicturi de Actibus humanis quæ & necessaria videntur, & brevi appendice explicari possunt.

Dico primò, quòd actus humanus sumatur latissimè, pro omni actione quæ ab homine fit, sive etiam fiat à plantis & brutis, ut nutritio, augmentatio, visio, &c. Sumitur verò latè pro actione illâ quæ fit tantum ab homine, ut locutio, intellectio, &c. Denique usurpatur propriè pro actione quæ fit ab homine agente per deliberationem, seu cum ratione & libertate. Iste actus vocatur actus humanus; illi autem dicuntur tantum actiones

222 DE ACTIBUS HUMANIS.

humanæ. Actus humanus propriè sumptus definitur, operatio hominis voluntaria, seu omisso ejus; non tantùm enim ille dicitur agere, qui bonum operatur; sed etiam qui bonum, ad quod tenetur, omittit.

Dico, secundò, quòd vis, seu coactio, quæ fit ab extrinseco, tollat libertatem; vis enim affertur passo non consentienti, sed repugnanti; undè voluntas non potest cogi, nec violentari in actibus elicitis: eo enim ipso quo vult aliquid, & in illud consentit, libera est libertas saltem essentiali, quam explicuimus fol. 195. primæ partis: potest tamen cogi in actibus imperatis, licet enim manui imperetur ut quiescat, potest ipsa manus moveri violenter ab extrinseco. Quoad concupiscentiam, non tollit, sed minuit libertatem; quanto magis enim concupiscentia ad aliquid faciendum allicit, magis ad hoc se sponte & delectabiliter voluntas applicat, in quo stat libertas essentialis; quia tamen ad libertatem requiritur objecti cognitio, cùm perturbet concupiscentia aliquàlter judicium rationis, ideò libertatem minuit: hoc habetur fol. 347. secundæ partis. Quantum ad ignorantiam, videantur ea quæ habentur fol. 348. 2. par. Quantum denique ad metum, etiam diximus in præcitis, quòd voluntarium & liberum non tollat, sed minuat: non tollit quidem, quia metus v. g. naufragi adducit consensum in mercatore, ut merces in mare projiciat; & ubi est consensus voluntatis, ibi est libertas; illa tamen minuitur, quia talis projectio fit cum repugnantia & displicentia voluntatis.

An per metum ita minuatur liberum & voluntarium, ut promissio sic facta adimplenda sit. Respondet Dom. Gamachæus per tres sequentes regulas, quarum prima est hæc, *quæ sunt metu interno, debent censeri simpliciter voluntaria: unde promissio per talem metum facta adimplenda est.* Metus intrinsecus vocatur ille, ubi ab intrinseco tantum impellimur; ut quando quis metu mortis elemosynam vover, tale votum obligat, quia nemo cogit, sed homo sibi imponit legem; & licet sit aliqualis repugnantia in voluntate, actus tamen volendi prævalet actui nolendi. Secunda regula ista est: *Quæ sunt ex metu externo, sunt voluntaria & obligatoria in rebus honestis & indifferentibus, ubi Ecclesia non declaravit illas esse irritas.* Si quis ergo seriò juravit se datum pecuniam latroni aliunde mortem allaturum, tenetur illam solvere; quia juramentum non est de re malâ respectu jurantis, licet sit mala ex parte vexantis: hoc habetur cap. *debitores.* Quod si votum & matrimonium per metum gravem facta, sint invalida; hoc est; quia Ecclesia illa irritavit. Tertia regula sequitur: *Omnis actio & ommissio metu externo elicitæ voluntaria est, & ad culpam imputatur, si est contra legem Dei vel naturæ negativam, ut est lex, non mentieris, non occides, &c. Si autem est contra legem humanam Ecclesiasticam vel politicam, non solet ordinariè facere hominem reum coram Deo, quando est metus gravis, nisi legislator hunc metum providens, excipere noluerit, unde dux belli imperare potest militi, ut pugnet cum vitæ periculo. Quoad legem Dei positivam,*

424 DE ACTIBUS HUMANIS.

non obligat, præfente metu gravi, modò abfit scandalum; in hoc enim differunt lex pofitiva & negativa, quòd negativa obliget pro femper, pofitiva autem urget tantum data oportunitate, & certo tempore, quo fi adveniret gravis metus incuffus ab extrinfeco, non obligaret. Per gravem metum intolligitur ille qui fufficeret ad turbandos constantes viros, v. g. metus infamiæ, mortis, aut notabilis detrimenti; ob hoc dicitur metus cadens in constantem virum.

Dico tertio, bonitatem actus humani defumi ex bonitate objecti, finis & circumfiantiarum. Duplex eft finis actus humani, nimirum finis operis, feu intrinfecus, & eft ille quem immediatè respicit actio; & finis operantis, feu extrinfecus, qui respicitur ab agente: quando quis v. g. furatur, finis operis qui essentialis eft furto, eft ablatio rei alienæ; quando verò furatur ad fornicandum, fornicatio, quæ eft accidentalis furto, eft finis operantis. Quoad circumfiantias, nihil aliud funt, quàm quædam formalitates extrinfecæ fubftantiam operis circumfiantes, & illæ continentur hoc verfu, *Quis, Quid, Vbi Quibus auxiliis, Cur, Quomodo, Quando*. Illarum aliquæ augent bonitatem actus intra eandem fpeciem, ut colere Deum, & colere majori affectu, utrumque fpectat ad virtutem religionis: aliæ addunt actui interiori bonitatem fpecie diftinctam, ut dare eleemofynam pauperi facerdoti; eleemofyna pertinet ad charitatem, quòd verò detur facerdoti, ad religionem fpectat. Quando actus ex objecto indifferens eft, reddi poteft à fine bonus

vel malus; ut quando quis Ecclesiam ingreditur ut Deum colat, vel ob vanam gloriam. Quando actus est bonus ex objecto, & refertur in bonum finem, ita ut bonitas finis sit diversa à bonitate objecti, actus desumit novam rationem bonitatis ab illo fine; unde, qui daret eleemosynam sacerdoti, ut Deum deprecaretur, ille actus esset bonus ex charitate & ex religione, modò ametur illa eleemosyna propter se, & propter finem qui honestus est.

Dico quartò, eodem modo philosophandum esse de malitià ac de bonitate actuum humanorum; quod scilicet desumatur vel ex objecto, vel ex fine, vel ex circumstantiis; cum hoc discrimine tamen, quod bonitas objecti, finis & circumstantiarum sint tres conditiones requisitæ ad bonitatem actus; ad malitiam vero defectus unius tantum conditionis sufficit; unde, si in aliquo eorum sit turpitudine, jam actus non erit bonus, sed malus; *bonum enim est ex integra causa & malum ex quocumque defectu*: si ergo actus sit bonus ex objecto, & malus ex fine, non est dicendus partim bonus & partim malus, sed malus simpliciter censendus est. Quantum ad circumstantias quæ reddunt actum malum vel bonum; dicendum est quod si sumantur formaliter, ut circumstantiæ sunt, non addant novam bonitatem aut malitiam essentiali actui, sed tantum illam augent intra suam speciem, ut furari decem aut centum nummos: quia ut sic, sunt tantum accidentariæ in ipso actu, unde supponunt, non vero faciunt actum habere talem malitiam vel bonitatem essentiali; Quod si sumantur circumstantiæ,

ut sunt objectum actus humani, addunt illi bonitatem & malitiam essentialem; ut quando quis furatur in loco sacro, vel ob fornicationem.

Dico quintò, quòd actus exterior non addat novam bonitatem aut malitiam essentialem actui interiori, licet aliquam accidentalē adjiciat. Primum patet ex Genesi 22. *Quia fecisti hanc rem, & non pepercisti unigenito filio tuo propter me, benedicam tibi*; ubi Deus factum reputat quod tantum volitum est, & tanquam factum remunerat: ergo est æqualis meriti & bonitatis: Ratio est, quia actio externa non est bona aut mala, nisi quia actus internus à quo procedit, bonus aut malus est. Secundum constat primò, quia sæpè accedente actu externo, internus repetitur, & augetur illius bonitas vel malitia: secundò, quia diuturnior mora reperitur in actu interno dum exterior conjungitur, & sic bonitas vel malitia augetur: tertio, delectatio quæ in exercitio actus mali reperitur, & difficultas quæ est in exercitio actus boni, actum internum intendunt; sicque illum faciunt pejorem vel meliorem; unde regulariter martyr actu magis meretur, quàm martyr desiderio. Ex his sequitur quod licet actus internus & externus sint duæ actiones physice; sunt tamen una tantum actio in genere moris, & unum tantum peccatum formaliter; estò dicantur aliquando duo peccata materialiter & denominativè, in quantum una & eadem malitia denominat actum internum & externum, malum. Si dicatur contra primam partem: ergo non debuit Christus diversis præceptis pro-

hibere actum internum & externum, quod tamen fecit, dicendo: *Bonum proximi non concupisces, & Non furtum facies*: ergo etiam frustra suadentur opera externa: ergo denique sufficit dicere in confessione, adulterari volui.

Resp. ad primum, hoc sic fecisse Christum, ut doceret rudes Judæos, non solum furtum esse peccatum, sed & solam volitionem furti esse peccaminosam. Resp. ad secundum, ideo bona opera suaderi, quia sunt occasio augendi affectum & reiterandi actum internum. Ad tertium dico, actum externum debere exprimi in confessione, ut appareat censura, reservatio, obligatio restituendi, firma determinatio voluntatis ad malum, quæ sine actu externo potuisset esse forsan tantum simplex peccandi vel- leitas: denique actus externus explicari debet, quia voluit Christus, ut in poenitentiâ peccatum aperiatur secundum suam totam entitatem, quæ completur ex actu interno & externo, tanquam ex materiali & formali.

Dico sexto, quod bonitas vel malitia formalis prius competat actibus internis, quam externis; quia actus internus causat actum externum, tanquam suum effectum, v. g. volitio eleemosynæ causat ipsius largitionem; sed sicut causa est prior effectui, sic bonitas causæ est prior bonitate effectus: ergo prius competit bonitas actui interno, quam externo. Deinde, bonitas & malitia sunt proprietates actus humani, sed actus humanus est actus voluntatis, qui interior est: ergo bonitas & malitia competunt formaliter primo actui interno, & postea actui externo; quatenus scilicet infor-

matur quodammodo à bonitate actus interni. Dixi quòd bonitas & malitia formalis conveniant primo actibus internis; si enim quæstio intelligeretur de bonitate & malitiâ objectivâ, dici debet quod bonitas & malitia objectiva prius competat actibus externis; sic v. g. actio furti prius est malâ objectivè, in quantum est dissona rationi, quàm volitio furandi, quæ non est malâ, nisi quia furtum malum est; sed ipsa actio furti non est malâ formaliter, nisi adveniat actio interna, seu volitio furandi; antea enim non est actio humana; sed eo ipso, quod actui interiori advenit actio externa, actio externa incipit esse humana, & proinde bona vel malâ; ita quod postea una & eadem bonitas informet tum actum interiorem, tum exteriorem; cum hoc tamen ordine, quod prius competat actui interiori, & deinde externo. Quod si dicat Vasquez primariò prohiberi actionem externam, v. g. Furtum, Homicidium, &c. hoc est, quia prohibendo actionem externam, prohibetur interna, sine quâ externa non esset malâ; quippe non esset humana: quoniam actio humana est operatio voluntaria hominis. Si etiam actio externa dicatur primariò dissona rationi: ergo & primariò malâ. Vtrumque verum est objectivè & fundamentaliter, non formaliter; à solo enim actu voluntatis concomitante actum externum, ipse actus externus humanus est, & consequenter bonus vel malus.

Dico septimò, quod bonitas moralis sit convenientia actus liberi cum natura rationali, ut tali; idest, quatenus ex ratione opera-

tur : Sicut enim illud dicitur bonum alicui, quod est illi conveniens ; sic ille actus hominis dicitur bonus , qui convenit illius naturæ : ergo bonitas moralis consistit in convenientiâ. Consistit, inquam , in convenientiâ cum naturâ rationali, ut tali, idest , ut operanti secundum rectam & prudentem rationem ; unde non sunt actus moraliter boni in brutis , quæ licet operentur conformiter naturæ suæ , non tamen eliciunt actus suos secundum rationem , cum illâ careant. Actus etiam hominis indeliberati , licet sint materialiter boni , nimirum ex objecto , non sunt tamen boni formaliter ; quia bonitas formalis est convenientia actus liberi ; & illi non sunt liberi , quia non fiunt ex deliberatâ intentione : possunt tamen ex non moraliter bonis , fieri moraliter boni , dum ex non liberis fiunt liberi , ut quando motibus primo primis advenit advertentia rationis , quando continuantur. Porro , ut actus sit propriè moraliter bonus , non sufficit quòd sit liber libertate essentiali , quæ consistit in determinatione voluntatis ad aliquem actum cum præviâ cognitione ; sed requiritur ut sit liber libertate indifferentiæ , ita quod necessitatem excludat : ubi enim reperitur necessitas agendi , actus censeretur non debet laude vel vituperio dignus ; nec consequenter bonus aut malus moraliter dicendus est , nisi tantum latè & improprie. Ex his apparet quòd bonitas actus moralis sit entitas respectiva realis. Est primo respectiva , quia est convenientia actus cum ratione , & convenientia est relatio ; est deinde realis & non tantum denominatio merè extrinseca , aut

430 DE ACTIBUS HUMANIS

ens rationis, ut voluerunt aliqui; nam à parte rei actus qui dicitur bonus, est conformis rectæ rationi.

Dico octavò, quòd malitia moralis sit disconvenientia & repugnantia actûs liberi cum rationali naturâ, seu cum naturâ operante per rationem; discurrendum est enim de malitiâ; sicut de bonitate; sed animadvertendum est, quod ratio peccati & malitia moralis distinguantur in hoc, quod malitia peccati consistat in oppositione ad legem Dei; definitur enim *aliquid dictum, factum, vel concupitum contra legem Dei*; malitia autem moralis consistit in oppositione ad rationem præcisè; licet enim omnis actus malus repugnet aliququaliter legi divinæ, quâ omne malum prohibetur; sunt tamen aliqui actus de se moraliter mali citra specialem Dei prohibitionem, ut odium Dei, blasphemia, & similes; qui ideo prohibentur à Deo, quia mali sunt de se: alii autem ideo mali sunt, quia prohibentur jure positivo. An autem malitia moralis & malitia peccati consistat in aliquo positivo reali, aut tantum in privativo; Respondendum est, non tantum malitiam quæ reperitur in omissione actûs præcepti esse quid privativum, ut ipsa actûs omissio; sed etiam malitiam quæ est in actu positivo peccati, ut quando aliquis furatur, consistit formaliter in privativo; licet materiale actionis sit quid positivum. Utrumque patet ex hoc quod peccatum definiatur, *dictum factum, vel concupitum contra legem Dei*; ubi dum dicitur, *factum, dictum, vel concupitum*, indicatur materiale actionis; dum additur verò, *contra le-*

gem Dei, ostenditur negatio & repugnantia cum voluntate divinâ præcipiente, vel prohibente actum. Ob hoc dicunt Theologi, peccare nihil aliud esse, quam deficere à bono; & asserunt Philosophi, loquentes de coneurso, peccatum non habere causam efficientem, sed deficientem; similiterque bonum & malum non opponi contrariè, nisi quoad materiale actûs; sed opponi tantùm privativè, quantùm ad formale.

Dico nonò, dari actus indifferentes, nedùm in specie, sed & individuo. Per actus indifferentes in specie, intelliguntur actus in se considerati, qui ex suâ naturâ nec boni nec mali sunt, ut spuerè, ambulare: per actus indifferentes in individuo intelliguntur iidem actus, quatenùs eliciuntur ab homine, qui cùm debeat in omnibus actibus suis se conformare rationi, ideo aliqui dicunt quod licet dentur actus indifferentes secundùm speciem, idest, secundùm se, non dantur tamen actus indifferentes in individuo, quia in illis vel homo se conformat rationi, & tunc boni sunt; vel rationi non se conformat, & tunc sunt mali: Non obstante tamen hac ratione, dicimus dari actus indifferentes in individuo: sic Alensis, Bonavent. Scotus, & plurimi. Probat ex Hieronymi Epistolâ ad Augustinum, quæ est secunda inter Epistolas Augustini; *Bonum est*, ait, *Continentia*, *malum Luxuria*, inter utrumque indifferens ambulare; *capitis purgamenta naribus projicere*, *sputis rheumata jacere*, hoc nec bonum nec malum est; *sive enim feceris, sive non feceris, justitiam non habebis, nec injustitiam*. Quæ in-

religi debent de actibus in individuo sumptis; dicit enim, *sive id feceris, sive non feceris*: & sic spectantur non tantum in se, sed ut eliciuntur ab homine, quod est considerare illos in individuo. Ratio nostra est, quia illi actus sunt indifferentes etiam in individuo, qui eliciuntur ab homine cum advertentiâ rationis, & feruntur in objectum quod neque bonum neque malum est; sed plures eliciuntur tales actus, ut v.g. actus scribendi, ambulandi, &c. non enim sunt boni, quia non fiunt honestatis gratiâ; nec mali, quia licet ea prosequi quæ sunt commoda naturæ, modò non prohibeantur. Si quis dicat, actum illum in individuo esse malum, cui deest conditio finis honesti, si autem sit ex fine honesto, pro tunc esse bonum: ergo nullum dari actum humanum indifferentem in individuo. Resp. hominem non semper debere sibi finem honestum præfigere, sed sufficere aliquando quòd non agat contra finem honestum, licet agat propter finem utilem tantum, aut delectabilem. Si Dicat Paulus 1. Corinth. 10. *Omnia in gloriam Dei facite*: Resp. esse ibi consilium, non præceptum, quòd si sit præceptum; est tantum negativum, quo prohibetur nè quid contra gloriam Dei faciamus, vel quòd non possit in gloriam Dei referri. Si Matth. 12. habeatur, quòd de omni verbo otioso reddenda sit ratio: hoc intelligitur de verbo otioso quod mendacium & calumniam includit, inquiunt Chrysostomus & Theophylactus; vel hoc intelligitur de eo quod est absolutè otiosum & nullum habet finem: illud autem quod fit ob utilitatem, vel recreationem, vel necessitatem, non censetur

censetur pure otiosum, cujusmodi sunt actus
 nostri indifferentes, qui licet non fiant ob fi-
 nem honestum, & ob hoc non dicantur boni;
 fiunt tamen ob utilem aut delectabilem finem.
 Si quis instet actionem esse malam, quæ non
 est consentanea rationi; & illam esse bonam,
 quæ est rationi consentanea, quia ratio est re-
 gula actuum humanorum: ergo omnis actio
 vel bona vel mala est: Resp. ut actio non sit
 mala, sufficere quod sit consentanea rationi
 negative, ita quod illi non repugnet; non re-
 quiritur autem quod sit consentanea positive.
 Deinde, actus indifferentes sunt conformes ali-
 quo modo rationi, quæ judicat illos esse con-
 formes naturæ rationali, ut rationalis est; quia
 non fiunt ob finem honestum, sed sistunt in
 fine utili vel delectabili, non tamen prohibito.
 Si quis urgeat, actiones illas esse bonas, quia
 fiunt ob finem honestum; nam recta ratio
 dicitur esse v. g. ambulandum ad conservan-
 dam sanitatem; Resp. illam actionem cum ta-
 li respectu esse revera bonam & honestam;
 sed loquimur de actione quæ sistit pure in com-
 modo, vel utili, quærentes v. g. utrum caleface-
 re se, præcisè quia frigus corpori molestum est,
 sit moraliter bonum; quod nos asserimus esse
 actum indifferentem, qui bonus non est, quia
 non est quid honestum; nec malus, quia non
 est prohibitus; unde, inter bonum & malum
 mediat non bonum. His omnibus non obstanti-
 bus, Christianissimum semper erit omnes actio-
 nes suas in gloriam Dei referre, juxta D. Pau-
 lum dicentem: *Sive manducatis, sive bibitis, si-
 ve quid aliud facitis, omnia in gloriam Dei facite,*

Dico decimò , quòd ut actiones humanæ bonæ sint , debent esse conformes legi æternæ , voluntati divinæ , & conscientiæ agentis. Debent primò esse conformes legi æternæ , quia illa est prima & radicalis regula omnium agendorum : unde peccatum definitur ab Augustino , *dictum , factum , vel concupitum contra legem Dei æternam*. lib. 22. contra Faustum cap. 7. Debent secundò esse conformes divinæ voluntati ; ex intellectu enim divino & divina voluntate resultat exemplar primum , & regula quædam universalis , quibus conformati debent actiones nostræ , ut bonæ sint. Debent terriò esse conformes conscientiæ agentis ; quod enim est contra conscientiam , est peccatum , ex Paulo , *Omne autem quod non est ex fide , peccatum est* ; id est , quod non sit secundum dictamen conscientiæ. Sicut ergo lex æterna est prima & immediata regula faciendorum , ita conscientia est proxima & mediata regula eorum quæ facere aut vitare debemus. Conscientia propriè sumpta dicitur actus intellectus , quo judicamus aliquid esse hîc & nunc faciendum , vel non faciendum : Quod si attribuitur aliquando voluntati , cum aliquis dicitur bonæ vel malæ conscientiæ , quia benè vel malè operatur per voluntatem ; hoc est latè , & consequenter , in quantum conscientia excitat ad benè operandum ; formaliter tamen est actus intellectus. Conscientia distinguitur à synderesi & à ratione , in hoc quod synderesis sit habitus intellectus , quo cognoscuntur prima principia practica , v. g. *bonum est faciendum , malum fugiendum ; alteri ne facias*.

quod tibi fieri non vis: Ratio vero est discursus, mediante quo, conclusio deducitur, & conscientia est ipsamet conclusio dictans aliquid esse faciendum hîc & nunc. Hoc patet in isto syllogismo pratico, *Omne bonum est faciendum; sed eleemosyna est bona: ergo facienda est hîc & nunc*. Prima propositio est à synderesi, secunda à ratione dictante eleemosynam esse bonam; conclusio est à conscientia. Conscientia dividi solet in rectam seu infallibilem, erroneam, probabilem, dubiam, & scrupulosam. Recta seu infallibilis est ea quæ cognoscendo objectum sicuti est per media infallibilia, dictat faciendum quod revera faciendum est. Erronea est illa quæ cognoscendo objecta aliter quàm sunt, dictat facienda quæ non sunt facienda. Probabilis est ea, quæ cognoscendo objecta per media probabilia cum formidine falsi, dictat aliquid esse faciendum. Dubia est illa quæ ex diverso dictamine pratico ita fluctuans remanet, ut in neutram partem se determinare queat. Scrupulosa denique illa est, quæ assentitur uni parti cum formidine alterius ob levissimas & incertas conjecturas. De conscientia recta seu infallibili nihil est dicendum, nisi quod actiones quæ fiunt ex ipsius dictamine, sunt infallibiliter bonæ; de aliis dicemus aliqua scitu necessaria.

Dico undecimò, non esse licitum agere contra conscientiam errantem, faciendo quod ipsa prohibet, vel omittendo quod præcipit. Ratio est, quia non licet velle malum judicatum ut malum; qui autem operatur contra conscientiam errantem, vult malum judicatum

tum ut malum : ergo non licet agere contra conscientiam errantem. Si quis dicat , conscientiam erroneam non esse rectam regulam : non est recta regula respectu intellectus , cujus iudicium erroneum est ; sed est recta regula respectu voluntatis , quæ tenetur conscientiam semper sequi. Nec quis objiciat , ergo poterit quis gaudere de actu præterito , qui malus cognoscitur , quando cognitus est error. Resp. posse quidem gaudere de actu voluntatis , quo Petrus v. g. dedit pecuniam quam credebat suam , quia talis largitio bona fuit ; non potest tamen gaudere de objecto ; nempe de largitione pecuniæ alienæ , dum cognoscitur aliena. Si conscientia erronea iudicet ex ignorantia invincibili aliquid esse faciendum aut vitandum , quod neutrum tamen est , tenetur se conformare illi iudicio erroneo ; & si non faciat , peccabit , quia voluntas iudicium intellectus tenetur sequi tanquam suam regulam. Peccabit , inquam , mortaliter in materia gravi , venialiter in materia levi. Dum aliquis ex ignorantia vincibili iudicat aliquid esse præceptum quod tale non est , voluntas debet sequi dictamen illius conscientiæ ; debet enim sequi suam regulam , nempe tale iudicium. Licet tamen voluntas exequatur id quod ex ignorantia vincibili credebat bonum , & tale non erat , in hoc non bene operatur ; imo male agit , quando malum operatur quod putabat bonum ; quia ignorantia vincibilis non excusat à peccato , sicut ignorantia invincibilis ; unde debuit sic agens perquirere an quod agit , bonum sit vel malum , & deponere conscientiam

errantem, quantum potest; quamdiu tamen perseverat illa conscientia errans, debet voluntas illam sequi ex quacumque ignorantia erret. Nec dicendum est, ergo sic agens necessario peccat, siue agat ex conscientia erronea vincibili, siue illi non se conformet. Hoc falsum est; quia vel potest deponere suum errorem, & sic potest non peccare; vel non potest adhibita omni diligentia deponere suum errorem, & pro tunc illa ignorantia est invincibilis; & operari ex ignorantia invincibili, non est peccatum.

Dico duodecimò, conscientiam opinativam distingui à dubia in hoc, quod in dubia fluctuet intellectus, nec ulli parti assensum tribuat; in opinante verò intellectus ad unam partem se determinet, sed ob motivum tantum probabile, cui falsum subesse potest. Nullus dubitat quin inter opiniones æquè probabiles alterutram sequi liceat, imò communis opinio est, quod non teneamur necessario probabiliori adhærere, cum possimus relicta probabiliori, sequi probabilem, quæ peritis & doctis placet: sic inter alios Dom. Gamachæus in 1. 2. quæst. 19. fol. 155. Quod intelligendum est cum hac restrictione, modo non immineat periculum aliquod, ad quod vitandum charitas vel justitia excitet, ut probabiliozem sequamur; modò etiam probabilis sententia suam probabilitatem non amiserit, vel ideo quia antiquata est, vel ob rationem novam auctoribus contrariæ sententiæ ignotam, quam putamus insolubilem. Per probabilem opinionem non intelligimus illam, quæ plures habet.

authores simpliciter; sed quæ plures habet authores classicos; probos & peritos, qui ex professo quæstionem examinent, & perpensis utriusque partis rationibus, unam è contradi-ctoriis opinionibus determinent. Quòd illa probabilis opinio seligi possit, patet; quia si teneremur probabiliorem eligere, maximè angeremur in perquirenda opinione probabiliori, & non est verisimile quòd ad tantam anxietatem nos Deus reducere voluerit; imò credibilius est, quòd ille qui prudentum opinionem sequitur, non peccet, cum prudenter & rationabiliter agat. Ratione distinctionis appositæ, nullus potest in administratione Sacramentorum uti materiâ, aut formâ, aut intentione dubiâ, licet sint probabiles; nisi in casu necessitatis, ubi materia certa v. g. aqua pura haberi non potest, sed tantum lixivium: Ratio hujus est, quia in hoc casu imminet salutis periculum, ad quod vitandum Charitas & Justitia excitant, ut quilibet probabiliorem partem sequatur. Eadem ratione medicus habens pharmacum certò profuturum ægroto, non potest adhibere pharmacum tantum probabiliter profuturum, aliàs censeretur imprudenter agere in re magni momenti; & in his occasionibus verum censetur hoc axioma, *in dubio tutior pars eligenda est.*

Dico tertiodecimò, illam conscientiam esse dubiam, quando intellectus neutri parti assentitur, sed fluctuans in æquilibrio manet, vel ex ignorantia juris, vel ex ignorantia facti; vel ex diversis authorum opinionibus. Ignorantia juris, est quando v. g. aliquis ignorat, an men-

dacium sit licitum : ignorantia autem facti, est quando aliquis dubitat an tale verbum sit mendacium. Conscientia potest esse dubia, vel speculativè, vel practicè. Est dubia speculativè, quando quis dubitat in genere, an aliquid licitum sit vel illicitum : est dubia practicè, quando quis in ipso exercitio dubitat, an talis actus in particulari sit licitus : quando miles v. g. dubitat an bellum in se sit licitum, conscientia est speculativè dubia ; quando verò dubitat an hoc bellum in quo est, sit licitum, est dubia practicè. Debet regulariter conformari iudicium practicum iudicio speculativo intellectus, nisi aliqua ratio adveniat in objecto, propter quam objectum varietur ; sic qui cognoscit in genere, furtum esse illicitum debet scire, hîc & nunc non licere furari ; qui tamen scit furtum esse illicitum, judicare potest, licitum esse surripere rem alienam in extremâ necessitate. Nunquam licet agere ex conscientia practicè dubiâ, idest, dubitante, an hoc sit hîc & nunc licitum ; sed determinatè debet intellectus dictare, hoc mihi licet : primò, quia qui sic ageret in humanis, frangeret leges amicitiz ; secundò, quia qui sic agit, se exponit peccandi periculo, quod est malè operari ; tertio, quia voluntas non potest dici à ratione dirigi, quamdiu ratio non se determinat ad alterutram partem. Peccat ergo qui agit ex conscientia practicè dubiâ ; peccat, inquam, tali peccato, quale est dubium ; idest, si dubitat an peccatum sit mortale aut veniale, an sit peccatum furti, vel homicidii ; contrahitur hujusmodi peccatum


440 DE ACTIBUS HUMANIS.

Debet ergo dubium deponi antequam fiat actio : hoc est debet intellectus ad alterutram partem se determinare cum ratione aliquâ. Quod si occurrant duo præcepta impossibilitatis, ut audire sacrum, vel moribundo assistere ; examinandum est quodnam magis obliget, & illud debet præligi, deposito dubio : Si undequaque sit periculum peccandi quod vitari non potest, eligatur quod appareat minus, ait Greg. 23. Moral. & tunc non eligitur malum ut malum est, sed ut minus malum, & ideo ut bonum. Si denique sit æquale periculum peccandi æqualiter, nec possit dubium deponi, attamen necessarium sit alterutrum agere, utrumque licitum est; & adveniente bona fide, quis non peccabit, cum faciat in tali eventu quod in se est. Aliquando licet operari ex conscientia speculative dubia, quando practice ad unum est determinata; quia regula voluntatis non est scientia speculativa, sed judicium practicum intellectus: sic aliquis potest dubitare speculative, an bellum hoc sit justum; & esse certus practice, quod sibi liceat certare in tali bello, cum sciat non suum esse judicare de justitia belli, sed debere Principi obedire, donec appareat de belli injustitia, & ibi est certitudo practica cum dubitatione speculativa. Quando quis dubitat speculative de honestate alicujus actionis, & postquam consulit Jurisperitos, si res spectet ad dispositionem, juris vel inquisivit consuetudines locorum, si pertineat ad jus particulare loci; vel denique interrogavit Doctores Ecclesiasticos in rebus morum vel fidei, & nondum apparere

possit de honestate actionis, illa actio omittenda est.

Dico ultimò, in hoc differre conscientiam probabilem & scrupulosam; quòd illa fundamenta habeat rationabilia suæ probabilitatis, v. g. authores famæ, vel rationem aliquam firmam; ista verò fundatur tantum in suspitione orta ex levibus fundamentis & motivis. Nomen scrupuli per metaphoram desumitur à parvo quodam lapillo in calceo pedem urgente, qui ob hoc scrupulus dicitur. Ille conscientiam dicitur habere scrupulosam, qui licet practicè judicet aliquid sibi esse licitum, speculativè tamen timet & dubitat ex levibus fundamentis, nè illicitum sit. Licet bonum sit scrupulosam conscientiam deponere, antequam fiat actio de quâ habetur scrupulus; potest tamen actio illa bene fieri, manente scrupulo: Ratio est, quia hic scrupulus non inducit dubitationem practicam, sed tantum speculativam, ortam ex levi motivo: cum ergo judicium practicum, dictans aliquid esse bonum, habeat rationabile fundamentum, & judicium speculativum, dictans illud non esse bonum, nitatur levi fundamento; qui sequitur judicium illud practicum, censetur benè & prudenter agere, præferendo firmum motivum levi fundamento: si tamen scrupulus ille deponi queat, deponendus est. Scrupuli suboriuntur communiter ex melancholia, quâ homo in omnibus timidus efficitur: ex ignorantia, qua stante, non potest verum à falso discerni: ex suggestionem diaboli angustias inducentis in animam, ut pax interior perturbetur: ex jejuniis nimis,

vigiliis, & aliis corporis macerationibus, quæ cerebrum exsiccentes, judicium perturbant; ex conversatione cum scrupulosis; denique ex superbiâ, quam Deus punire intendens, subortum scrupulorum & anxietatis animæ permittit. Inter alia scrupulorum remedia, utilissimum est, ut ille qui scrupulis torquetur; primò Deum frequenter oret, ad implorandum ipsius auxilium: secundò, ut cum omnis mentis humilitate has animi molestias acceptet, indignum se reputans, qui conscientię serenitate persuiatur, ob sua peccata, & neglectum gratiæ; tertio, ut deponat suum judicium, & non obstantibus suis ratiocinationibus, se humiliter submittat judicio docti & probi Confessarii.



TRACTATUS

De Legibus, & de poenis Ecclesiasticis contra infractores legum; seu de Censuris.

DUPLICEM habemus regulam cui conformari debent actus humani, quarum prima est interna, scilicet conscientia; alia verò est externa, nempe Lex, quæ faciendæ præcipit, & prohibet vitandæ. Postquam ergo de actibus humanis in bonum dirigibilibus, & de conscientia, quæ est ipsorum directiva intrinsecè, dictum est; non ineptè agendum venit de Legibus, quæ ipsosmet humanos actus

extrinsecè regulant, acturi postea de Censuris, quæ sunt certæ quædam poenæ inflictæ ab Ecclesiâ in suarum legum infractores. Hoc fiet in tribus Disputationibus; quarum una erit de Legibus in genere, secunda de Legibus in specie, tercia de Censuris, ubi & de Irregularitate.

::***:***:***:***:***

DIPUTATIO PRIMA.

De Legibus.

NOMEN Legis vel à *ligando* habetur, in quantum homines ad aliquid obligantur per legem; vel à *legendo*, quia lex editur & scribitur, ut sæpius legatur ad instructionem subditorum; vel denique à *deligendo*, quatenus docet quæ sunt deligenda & eligenda. Videamus aliquid de Legibus in communi.

 QUÆSTIO PRIMA.
Quid sit Lex?

NEC de existentia, nec de utilitate legis nullus dubitare potest; quantum enim ad existentiam, constat ab orbe condito datas fuisse leges & Angelis & hominibus: imò ab æterno erant idæ quædam in mente divinâ existentes, ad quas Deus tanquam ad certas leges respiciens, in tempore omnia crea-

vit, ordinavit, & conduxit, sicut decreverat ab æterno. Quoad legum utilitatem, clarior adhuc est; quomodo enim sine legibus posset humana societas subsistere; nisi per leges improborum malitia refrænaretur, & excitaretur bonorum labor & virtus; Agendum est ergo solum de ipsarum Legum definitione, & quæ sit illarum divisio.

CONCLUSIO.

LEx est regula quædam perseverans, indita vel præscripta ab eo qui potestatem habet obligandi communitatem, in cujus utilitatem cedit, actiones humanas conducens in bonum & avertens à malo, sufficienter promulgata. Dicitur primò, *regula*; quia actus humani diriguntur per legem: sed an illa regula sit actus intellectus aut voluntatis, controvertuntur Doctores: Thomistæ enim volunt legem ad intellectum pertinere; Scotistæ verò melius illam ad voluntatem referunt; vis enim obligandi ad voluntatem formaliter spectat, licet præsupponi debeat actus intellectus legislatoris, judicantis, an quod per legem fertur, bonum sit & utile. Dicitur secundò, *perseverans*; in quo à præcepto distinguitur, quod modò adest, modò abest, & semper cessat per mortem præcipientis, ubi leges perseverant & sunt stabiles regulariter ratione sui, licet aliquando mutantur ratione finis ob quem conditæ sunt; sic leges ceremoniales veteris Testamenti abrogatæ fuerunt per legem novam, quia institutæ erant ad figurandam legem novam; & dum præsens est veritas, figura cessare debet; aliquando etiam mutatur

ratione subjecti cui feruntur leges , ut patet de legibus judicialibus legis antiquæ , quæ datæ erant populo in servitutem redacto ; cessante autem illa servitute , tales leges rigorosæ cessante debuerunt. Dicitur tertio , *indita, vel præscripta* ; ut includantur in hac definitione , tum lex naturalis , quæ à natura est ; tum positiva , quæ à legislatore præferibitur. Dicitur quarto , *ab eo qui potestatem habet obligandi communitatem* ; nullus enim potest alium obligare , nisi legitimam in illum habeat auctoritatem ; cum ergo lex vim habeat obligandi communitatem , ferri debet ab eo qui potestatem obligandi habeat. Additur quinto , *in cuius utilitatem cedit* ; leges enim in bonum commune cedunt , sive mediatè , sive immediatè , v. g. cum leges feruntur in favorem pupillorum & minorum , hoc mediatè vergit in bonum communitatis ; nam bonum partis conducit ad bonum totius : lex etiam tributorum , quæ solum utilitatem Regis concernit , vertitur in bonum commune ; si enim debite Princeps non sustentaretur , non posset onera reipublicæ sustinere. Adjungitur sexto , *actiones humanas conducent* ; licet enim ad aliquid faciendum vel omittendum astringi possint Angeli lege & præcepto , de actionibus tamen Angelicis hic loqui non intendimus , sed tantum de humanis. Adjicitur septimo , *Conducent ad bonum , & removens à malo* , excitare enim ad bonum & à malo remove , sunt præcipui fines legum. Additur ultimo , *sufficienter promulgata* ; quia nullum superioris iudicium inferiorem obligare potest , nisi in subditorum notitiam dedu-

catur : sed hæc est differentia inter leges ; quod lex naturalis sufficienter singulis promulgetur per judicium naturale quod possident , quo judicant naturaliter Deum esse colendum , parentes honorandos , &c. positivæ verò exteriorem requirant promulgationem.

Q U Æ S T I O II.

Quotuplex sit Lex ?

ALITER respondent Juristæ , aliter Theologi. Illi jus cum lege confundentes, ipsum dividunt in jus naturale , jus gentium , & jus civile. Jus naturale est illud quod est commune & brutis & hominibus , ut procreatio proliis , conjunctio maris & foeminæ. Jus gentium est illud quod est proprium solis hominibus , & illis ferè omnibus commune est , ut cultus erga Deum , honor erga parentes , vim vi repellendi licentia , &c. Jus civile est illud quod est proprium alicui regno , seu reipublicæ ; ut v. g. jus Atheniensium , jus Lacedemonum , jus Gallorum ; sed præsertim jus Romanorum nomine juris civilis simpliciter gaudet. Quoad Theologos , alio modo leges dividunt , quod explicabit

CONCLUSIO.

LEX primò dividitur in legem naturalem & positivam. Lex naturalis subdividitur in legem naturalem sacram , moralem , & politicam. Lex positiva in legem æternam , divinam , & humanam.

Lex naturalis est iudicium naturale, quo ratio nobis dicitur bonum esse faciendum, & malum fugiendum. Ex illo principio practico multa alia deducuntur, quorum alia sunt faciliora, alia difficiliora. Quod si illa principia practica quæ distantur à iudicio naturali, Deum respiciant, ad legem naturalem sacram pertinent; ut v. g. quando lex naturalis dicitur Deum esse colendum & cum summâ humilitate adorandum. Si illa principia præscribant homini modum quo debeat mores componere in ordine ad finem ultimum, spectant ad legem naturalem moralem: Si denique illa principia lumine naturali cognita dirigant hominem in ordine ad societatem communem, legem naturalem politicam concernunt, per quam v. g. vir & uxor sibi mutuam fidem servare debent, ad proles educationem & instructionem tenentur parentes, filii ad parentum reverentiam, Reges ad conservationem legatorum alterius principis, cives permanere debent in factâ agrorum divisione, &c.

Lex positiva est ea quæ præscribitur à legiflatore; & hæc, ut diximus, duplex est, divina & humana; Lex enim æterna, quæ nihil aliud est, quàm decretum Dei æternum, quo statuit homines & Angelos, sic esse in tempore regulandos, non est propriè Lex; ab æterno enim non sunt subditi, & Lex dicitur per respectum ad subditos; unde si vocetur Lex, hoc est, quia est regula practica, non actu, sed aptitudine. Lex positiva divina, est ea quam Deus præscripsit ratione utentibus, illis tradens modum quo possint pervenire ad cor-

lestem beatitudinem, quæ est finis hominibus; Deus illam dedit vel per se, ut in novo Testamento, in quo Deus homo factus multa præcepit quæ legem gratiæ integrant: vel illam contulit Angelorum ope, ut Lex verus, quam Deus dedit Moyfi in summitate montis Sinai per Angelos tradentes eam nomine Dei. Lex positiva humana est regula quædam præscripta ab homine habente publicam auctoritatem, præscribens subditis aliquid faciendum, vel prohibens aliud. Alia est lex Ecclesiastica, quæ ad bonum supernaturale dirigit; alia est civilis, quæ tendit in bonum naturale. De his omnibus dicere conabimur.

QUESTIO III.

*De materia, proprietatibus, fine, & affectibus
Legis?*

QUANTUM ad materiam legis; quæstio potest intelligi, vel de materia *in qua*, id est, de subiecto in quo lex residet; vel de materia *circa quam* leges versantur.

CONCLUSIO PRIMA.

MATERIA *in qua*, seu subiectum in quo primariò leges resident, est intellectus antecedenter, & formaliter voluntas; quando enim superior aliquis legem condere intendit, cognoscit primò id quod statuere vult, an scilicet sit bonum & utile, & illud iudicium est in intellectu; deinde præscribit suis inferioribus id quod sibi congruum & illis

utile videtur, in quo stat formalis ratio legis; & hoc decretum in voluntate, tanquam in suo subiecto, remanet: & sic materia *in qua* legis, saltem primaria est intellectus & voluntas legislatoris. Legis materia secundaria *in qua*, est vox, tabula, liber, scriptura, & alia id genus, postquam enim leges stabilitæ sunt in mente legislatoris, ut habeant suam essentiam, non physicam, sed moralem, quæ consistit in vi obligativa, debent inferioribus manifestari per talia instrumenta. Materia denique *circa quam* versantur leges, sunt actiones humanæ, quæ sub legem cadunt, ut bonæ fiant, & declinent à malo.

CONCLUSIO SECUNDA.

TRES assignantur communiter proprietates legis, nimirum authoritas, veritas & bonitas; lex enim habet principium, formam & finem. Ratione principii condentis legem, debetur legi authoritas; quia nullus potest legem edere, nisi authoritate polleat. Ratione formæ, debetur legi veritas, seu rectitudo; nam lex injusta non est lex, sed tyrannis. Ratione finis, legi debetur bonitas, quia lex non ordinatur nisi in bonum commune hominum, & in bonum particulare Dei; si enim quærat, quare punitur Petrus; aptè respondetur, ut observetur lex, si secundò quærat, quare talem punitionem lex præscribit? meritò dicitur, propter bonum communis, quæ detrimentum pateretur, si non punirentur malefactores; si perquiratur ulterius, propter quid est bonum communis? hoc est, propter bonum Dei, qui est omnium creatorum finis ultimus. Per hoc patet responsio ad

tertiam partem tituli quæstionis, nimirum de fine legis, qui alius non est, quam reipubl. utilitas.

CONCLUSIO TERTIA.

EFFECTUS legis duplex est. Primò obligat, & secundò nata est subditos reddere bonos. Quod leges naturæ sint reddere subditos bonos; hoc intelligitur de lege morali, quæ instituitur ad mores componendos: si aliquando subditi boni non efficiantur per legem, imò fiant prævaricatores; hoc est per accidens, contra naturam legis & legislatoris intentionem. Quod etiam leges obligent subditos; constat, quia essentia moralis legis est, quod obliget, & illa obligatio duplex est, una sub peccato, seu in foro interno; alia sub pœna temporali, seu in foro externo. Obligatio legis supponit promulgationem, ut diximus; nullus enim tenetur ad id quod ignorat, nec scire potest; non est autem necesse, ut lex obliget, maximè in foro externo, quod singulis intimetur; sed sufficit, quod illius publ. catio fiat in singulis Provinciis regni; non obligat tamen in conscientia, nisi eos ad quorum aures pervenerit, sed pro tunc ignorantia excusat, modo non fuerit crassa & vincibilis; ita quod subditus talem legem audire potuerit & debuerit, assistendo, v. g. missis parochialibus in quibus proclamantur præcepta Ecclesiæ, maximè circa festa & jejunia. Quoad legis receptionem à subditis, hoc non requiritur; legislator enim vim obligandi habet independentè à populo, & populus majori auctoritate polleret, si legem principis posset im-

pedire : si tamen non fuit in usu per decennium , censetur abrogata per desuetudinem , modo casus observandi legem aliquoties advenerit intra illud tempus.

Q U A S T I O I V.

Quis Leges condere valeat ?

C O N S T A T quidem , patrem posse imponere praecepta suis liberis , maritum suae uxori , dominum suis servis aut famulis , sicut & iudices inferiores intra terminos suae jurisdictionis ; quia omnes illi habent potestatem oeconomicam : cum tamen non habeant potestatem publicam , ne jurisdictionem universalem super omnia membra reipublicae , leges propriè dictas instituere nequeunt ; nam legislatio est praecipuus actus , quo gubernatur respublica : ergo fieri tantum potest ab eo qui auctoritate pollet publica super rempublicam ; idè erit

C O N C L U S I O.

I L L E tantum habet auctoritatem condendi leges , qui jurisdictionem publicam habet , qualem habet Deus super Angelos & homines , summus Pontifex in omnes Christianos. Respublica in suos cives , & Reges in suos subditos. Deus habet à seipso suam auctoritatem , Pontifex immediatè à Deo , & Reges jure successivo , vel electionis ; cum enim communitas seu respublica sit corpus quoddam liberum ,

habet naturaliter jus regendi seipsam, unde vel tale jus sibi reservare potest, vel in alium transfere sine limitatione, vel cum limitatione. Ex hoc multa sequuntur.

Primò, Summus Pontifex potest leges Ecclesiasticas instituere in toto orbe Christiano, Christus enim absolutè dixit Petro, *Quodcumque ligaveris super terram, erit ligatum & in calis*, &c. Quantum ad leges civiles & politicas, nullas potest ferre, nisi in suo territorio, in quo potestatem politicam & Ecclesiasticam in eadem persona conjungit. Sic dicendum est de Archiepiscopis & Episcopis in suis Diocesis, & de Cardinalibus in subditos dependentes ab Ecclesiâ sui tituli. Concilia generalia si fiant autoritate Summi Pontificis, leges universales totam Ecclesiam obligantes instituere possunt; & hoc juxta potestatem illis traditam, & non amplius. Quod si celebrentur independenter ab illo, talem potestatem non habent; Christus enim non dedit illam potestatem cœtui Ecclesiæ sine capite, sed Petro; *Quacumque ligaveris*, &c. Concilia Nationalia, quæ fiunt autoritate Primatis vel Archiepiscopi, præsentibus Episcopis nationis, non possunt condere leges, quæ obligent extra nationem, sicut nec Provincialia extra provinciam; nisi hæc Concilia generaliter approbet Summus Pontifex, & satis declaret se velle ut tales leges ad totam Ecclesiam se extendant. Quoad Generales Ordinum, leges condere possunt in Capitulo Generali, sicut & Provinciales in Provinciali, in his scilicet quæ observantiam regulæ spectant.

Secundò , Imperator legitimè electus potestatem obtinet condendi leges , in regnis & provinciis sibi subditis tantùm. Dixi , *Legitimè electus* , quia si per viam injustam & illegitimam imperium invaserit , deest illi justa auctoritas , quæ ad condendas leges requiritur , nisi paulatim populi consentiant ; & ablata fuerit potestas legitimi Superioris , v. g. per mortem ejus & hæredum legitimorum carentiam , in quorum præjudicium nihil prodest subditorum consensus in favorem usurpatoris. Adjunxi , *In suis provinciis tantùm* ; obligare enim potest tantùm subditos ; unde si vocetur , v. g. Imperator Occidentis , non est quod jus habeat in omnia Occidentis regna ; sed ideò taliter vocatur , quia est Imperator in Occidente , & aliquam præcedentiam habet in Conciliis ante alios reges & præfides.

Tertiò , Reges in suis regnis leges civiles & politicas ferre possunt ; habent enim auctoritatem publicam in suos subditos , sicque jus habent dirigendi illos & legibus coercendi. Sic & dicendum est de aliis supremis principibus , qui in jurisdictione temporali superiorem non agnoscunt. Reginæ etiam regni dominæ leges possunt ferre ; quia potestatem regiam habent ; unde si in lege habeatur , quòd foeminae remotæ sint ab omnibus officiis publicis & civilibus ; hoc verum est de foeminis ordinariis , quæ publicam jurisdictionem non habent. An contracto Matrimonio reginæ cum aliquo , stet potestas condendi leges apud reginam vel regem , quando jure hæreditario dominium pertinet ad reginam ; controvvertuntur Do-

Stores, quorum major pars sustinet remanere apud reginam; nec Matrimonium transferre dominium regni in maritum, nec tale jus possederi in dotem, nec alienari posse. Quod si vir sit caput mulieris, & mulier sit sub illius potestate; hoc est, quantum ad usum matrimonii, seu quantum ad œconomicum regimen familiaris; non verò quantum ad jus regium, & politicam administrationem regni.

Quartò, communitates perfectæ, quæ republicæ vocantur, leges statuere possunt; ipsis enim competit suprema autoritas, quam vel apud se conservant, aut magnatibus, aut duci transferunt, aut denique mediam faciunt inter ducem & cives; ita ut nec dux sine communitate, nec communitas sine duce leges statuere possint, sed caput cum membris. Est autem magna differentia inter duces illos qui regulariter præsumt istis rebus publicis, & reges qui suis subditis dominantur; quod tales duces in suâ potestate limitati sint, tum quoad terminum, tum quoad qualitatem autoritatis; reges verò plenariam, ut plurimum, habeant autoritatem, & præsertim Rex noster Christianissimus, qui in omnibus, quæ justa sunt, plenissimum habet imperium, & de omnibus quæ agit nullam aliam affert rationem, nisi solummodò hæc verba, *talis est voluntas nostra*. Porro, licet subditi autoritatem dederint suis principibus, illam tamen pro libito revocare nequeunt; quia illam subditi concesserunt in perpetuum, & hoc repugnaret paci & tranquillitati regnorum, frequenterque motus & seditiones excitaret.

QUESTIO V.

Qui Legibus subjici possint?

QUANTUM ad legem naturalem & divinam, omnes omninò homines, sive etiam sint justissimi, illis subjiciuntur, quicquid dicant Lutherus & Calvinus, putantes justos & probos viros nullâ lege, divinâ aut humanâ constringi, quantum ad reatum & imputationem, modo habeant singularem fiduciam in Deum, & credant se esse justos licet multa peccata commiserint; quia, inquit, *justo non est lex posita*. Sed hoc est directè contra D. Paulum Rom. 13. *Omnis anima potestatibus sublimioribus subdita sit*; & Hebr. ult. *Obedite praposis vestris*. Si ergo idem Apostolus 1. Timoth. 1. dicat, *Iusto non est lex posita*; id est, justus non indiget coactione legis, sed obedire paratus est ex solo Dei amore. Non est ergo nobis quæstio de subjectione hominum, respectu legis divinæ aut naturalis; sed respectu legis humanæ, sive sit civilis, sive Ecclesiastica; ubi difficultas esse potest respectu regum, infidelium, amentium, puerorum, indigenarum & peregrinorum.

CONCLUSIO PRIMA.

PRINCIPES sæculares aut Ecclesiastici non tenentur ex vi coactivâ ad servandas leges quas ipsi, aut prædecessores condiderunt; sed tenentur ex vi directivâ ad illarum observantiam. Non tenentur primò ad illas ex vi

coactiva ; quia lex obligat tantum subditos , & nullus est sibi subditus ; deinde , actus legislatorius involvit jurisdictionem , & nullus in se habet jurisdictionem , aliàs esset simul dominus & subditus ; tandem , hoc habetur in lege *princeps, de legibus*, ubi dicitur, *Princeps legibus solutus est* : tenentur tamen legibus contractuum , quia in contrahendo agunt potius personam privatam , quàm publicam. Tenentur secundò ad observationem legis ex vi directiva , & æquitate fundata in jure naturæ ; quia debent alios suo exemplo movere , & magis excitant facta , quàm dicta : Deinde , caput debet se conformare membris. Tertiò , non videtur leges observari posse , quando publicè à legislatore videntur violari. Quartò , quia absurdum est , ut princeps aliter agat , & aliter jubeat actiones fieri. Quintò denique , quia Christus Matth. 23. arguit illos *qui dicunt, & non faciunt*. Dum ergo dicit lex , solutum esse Principem à legibus : hoc verum est directe & formaliter ex vi illarum legum , quatenus ab illo latæ sunt ; falsum est verò indirectè & mediatè , nimirum ex vi juris naturalis , quatenus ex ipso , si non teneantur ad leges ex vi coactiva , in quantum non subjacent pœnis latis contra transgressores legum , tenentur tamen ex vi directiva ad illarum observationem , propter rationes allatas. Si quærat , an leges non observant : Ad hoc respondent primò omnes , ipsos peccare reverà , non servando leges taxantes pretia rerum ; quia de jure naturæ est , ne res pluris vendatur , aut minoris ematur , quàm valet communiter ;

tantum

tantum autem præsumitur valere, quantum per legem determinatur. Idem dicendum de contractibus, in quibus debet esse æqualitas ex utraque parte contrahentium, & sic leges de contractibus observare debent sub peccato. Respondetur secundò, principes legem ferentes non teneri ad eas leges quæ non habent materiam universalem, nec principi accommodatam; sic quando prohibent, ne quis arma deferat, aut palatium ingrediatur cum ense, vel cervos venetur in sylvâ, ad talia non tenentur; hoc est enim contra majestatem & auctoritatem principis. Respondent aliqui, legislatores non peccare, dum legem infringit quæ materiam habet universalem & legislatori accommodatam, ut quando Papa non jejunat, non recitat horas, aut committit simoniam juris tantum humani; sed longè melius tenent alii, ipsum peccare, non quidem directè ex efficaciam propriam legis, quia non potest se directè obligare, cum non habeat in se directam jurisdictionem; sed indirectè, in quantum lex à seipso lata, est conditio, quâ posita, lex naturæ obligat principem ad præstandum id quod aliis præscripsit.

CONCLUSIO SECUNDA.

PUERI usu rationis carentes nullis legibus tenentur; ligantur tamen legibus ebrii, amentes, dormientes, & legem invincibiliter ignorantes: Infideles verò & Catechumeni illis nullo modo subjiciuntur. Probatur prima pars de pueris, quia leges imponuntur illis tantum qui possunt eas intelligere; ipsisque

præbere obedientiam ; hæc autem falsum est de pueris usu rationis carentibus ; ergo legibus non subjiciuntur : unde tempore jejunii possunt uti carnibus ; & adulti possunt illis carnes porrigere , modò non sit specialis prohibitio Ecclesiæ , quæ viget in Gallia ; possunt etiam sacris interesse tempore interdicti : quod si priventur sepultura Ecclesiasticâ , illo durante ; hoc est in poenam aliorum , vel ob incapacitatem loci : possunt etiam introduci in Monasteria Monialium ; seclusa speciali prohibitione ; unde si Consilium Tridentinum excommunicationem pronuntiet in introducentes personas alterius sexûs ; intelligitur de personis ratione pollentibus. Probatur secunda pars ; quia licet ebrii , amentes , dormientes , & legem ignorantes nequeant per accidens intelligere legem , nec illam observare ex accidenti : per se tamen afficiuntur legibus , legesque ad illos , velut ad subditos diriguntur per se , quia de se sunt usu rationis capaces ; non peccant tamen actu , defectu advertentiæ ; sed si quis illis porrigeret carnes tempore jejunii , peccaret mortaliter ; quia concurreret ad actionem materialiter malam ; sicque illas administrans peccaret formaliter ; non verò ebrii aut amentes illis utendo , ob defectum advertentiæ. Tertia pars evidens est pro Infidelibus & Cathecumenis ; non sunt enim subditi Ecclesiæ ; ergo nec ligari possunt legibus Ecclesiasticis , unde non peccant manducando carnes in jejunio Ecclesiæ , nec illi qui eas administrarent ipsis , quia non concurrunt ad actionem malam formaliter aut materialiter ; peccarent tamen qui alimenta vetita por-

rigerent hæreticis, quia ratione Baptismi subditi sunt Ecclesiæ.

CONCLUSIO TERTIA.

CLERICI primò non subjiciuntur Principum sæcularium authoritati in causis Ecclesiasticis; idest, in illis causis quæ non pendent ex legibus civilibus, sed ex Evangelio, aut Conciliis, aut Pontificum Constitutionibus. Hoc asserit Justinianus. Novellâ 83. & Concilium Milevitanum Can. 3. & Matisconense Can. 8. quæ pronuntiant, puniendos esse graviter Clericos, qui causam Ecclesiasticam ad judicium Imperatoris deferunt. Secundò; clerici nullo modo sunt exempti à legibus civilibus quæ non sunt contra libertatem Ecclesiasticam, sed ordinantur ad bonum regimen Reipublicæ; ut cum princeps pretia rebus venalibus constituit, prohibet nè quis noctu cum armis incedat, aut frumentum transferat ad inimicos; nam clerici, præterquam quòd clerici sint, sunt adhuc partes & cives reipublicæ politicæ; sicque politicas leges observare tenentur. Tertiò, Clerici leges civiles violando, non possunt regulariter à judice seculari puniri, ex Tit. *de foro competenti*, & Tit. *de immunitate Ecclesiarum*. Sic etiam Justinianus in Novellis Constitutionibus 79. 83. & 123. unde Concilium Agathense Can. 32. habet, *Clericum nullus præsumat apud sæcularem judicem, Episcopo non permittente, pulsare.* sic & Concilia Carthag. 3. Can. 9. & Tolet. 3. Can. 13. Dixi, *regulariter*; nam aliquando contrarium usitatur per privilegia, ut in isto regno, ubi vigent immunitates Ecclesiæ Gal-

licanz. Quatò, bona clericorum non subjiciuntur regulariter legibus tributariis ; sic in Conc. Dateran. part. 1. c. 19. sic in cap. *Quamquam*, de censibus in 6. & in Tit. de immunitate Ecclesiarum ; item ex L. *sancimus*, cap. de Sacrosanctis Ecclesiis. Unde Genes. 47. Joseph voluit omnes Ægyptios certum tributum solvere Pharaoni, exceptis Sacerdotibus, quos immunes ab illis debere esse judicavit. Hoc intelligitur adhuc, secluso privilegio ; per conventionem enim factam inter summos Pontifices & Reges Galliz, isti exigunt jus regale super quædam Ecclesiæ sui regni bona.

CONCLUSIO QUARTA.

QUANDO aliquis extra territorium suum versatur, non amplius tenetur legibus sui territorii ; modò sint particulares pro illo ; Sic habetur cap. *Vt animarum* 2. Constit. in 6. Unde Augustinus Epist. 118. ad Joân. cap. 2. refert hæc verba Ambrosii, *Cùm Romam venio, Sabbato jejuno ; cùm Mediolani sum, non jejunio : sic & tu, ad quamcumque Ecclesiam fortè veneris ; morem illius serva, si cuiquam non vis esse scandalo, nec quemquam tibi.* Ratio est, quia lex est quædam regula pro bonâ gubernatione territorii instituta, quæ proinde non involvit subditos in alieno territorio existentes. Ex quo sequitur, delinquentes extra Diocesim non incurrere censuram annexam delicto in Diocesi : sic qui transit è loco in quo festum est, ad alium ubi non festivatur ; potest ibi operari, non jejunare, & manducare carnes. Quantum verò ad auditionem sacri, aliqui putant, quòd debeat illam prævenire, si exeat eodem mane.

quo festum agitur ; quia , inquiunt , præceptum audiendi missam non est determinatum ad certam aliquam horam , & sic obligat ut quamprimum impleatur , si postea implendum non est : alii sentiunt nullum ad hoc teneri , quia hoc præceptum non limitatur ad certam horam , sed se extendit usque ad meridiem ; unde ut obliget , debet quis manere intra illud spatium in loco , ubi festum agitur : primum tutius est , & consulerem in praxi. An ille qui ex territorio suo ubi jejunium est , transmeat ad illud ubi non est jejunium , peccet manducando carnes in isto , quando venit in illud cum animo eximendi se à lege jejunii ; controvertuntur Doctores ; Suares , Sanches , Basilius , Pontius , Bonacina , Lessius , hoc licitum esse tenent ; quia eundo ex territorio suo , suo jure utitur , & dum est extra territorium , licite utitur privilegio : alii tamen contrarium sentiunt , in quantum talis exitus sit in fraudem legis , & scandalum generare potest ; quod peccatum est saltem veniale , & necessario vitandum.

Quantum ad peregrinos & advenas ; tenentur primò legibus generalibus Ecclesiæ , quæ obligant fideles ubicumque sint. Tenentur secundò legibus particularibus loci in quo sunt pro contractibus faciendis ; unde contractus facti in tali loco sine formalitatibus quas talis locus exigit , nulli sunt ; sicque vir & mulier manentes in territorio ubi non recipitur Concil. Tridentinum , valide contrahunt in eo sine præsentia Parochi ; si contrahant verò ubi receptum est , invalidè contrahunt , licet sint in terri-

QUÆSTIO PRIMA.

De Lege naturali.

LEX naturalis dupliciter sumitur, vel prout est in Deo, estque actus divini intellectus & divinæ voluntatis, quo Deus judicat & vult homines vivere & regulari secundum rationem: vel prout est in nobis, estque actus humanæ mentis, quo judicamus nos debere vivere conformiter rationi. Ex quo patet, quod si primo modo sumatur; idem sit lex naturalis, ac pars quædam legis æternæ, quæ se extendit ad omnes creaturas; at lex naturalis tantum creaturas rationales respicit, prout à nobis hinc spectatur, ut regulativa actuum humanorum: secundo modo debemus illam considerare in præsentî quæstione.

CONCLUSIO.

LEX naturalis est dictamen rationis præcæticæ, quo per lumen naturale evidenter cognoscimus facienda esse illa quæ cum ratione conveniunt, & vitanda esse illa quæ rationi adversantur; & sic ex convenientia vel disconvenientia rei cum recta ratione oritur essentia legis naturalis, sicut ex conformitate vel difformitate actionis cum lege divina oritur ratio legis divinæ. Unde distinguitur jus naturale à jure gentium, in quantum jus naturale, ut hinc à nobis sumitur, convenit creaturæ rationali, ut sic consideratæ; jus gentium verò competit creaturæ rationali, quatenus

in societate civili versatur. Quia diximus legem naturalem consistere in convenientia vel disconvenientia cum ratione; ideò licet multa præcipiantur & prohibeantur à Deo quæ sunt de jure naturali, citra illam jussionem essent semper bona vel mala: unde pertinent ad legem naturalem, quatenus sunt convenientia aut disconvenientia rationi; & ad legem divinam spectant, prout à Deo expresse præcipiuntur, aut prohibentur.

Primum & generalius principium legis naturalis est, bonum esse prosequendum & malum fugiendum; sicut enim intellectus non potest assentiri nisi vero, sic nec voluntas potest aliquid prosequi, nisi bonum sit. Ex hoc principio tanquam ex fonte derivantur ista; *Quod tibi fieri non vis, alteri nè feceris; Deus est colendus, parentes honorandi, vita conservanda, sublevandi miseri, adulterium vitandum, furtum non est committendum*; & in genere omnia Decalogi præcepta. Licet lex naturalis habeat plura ista principia practica, manet tamen in se una, unitate saltem genericâ; in quantum omnia illius præcepta ad generale istud reducuntur, *Bonum est prosequendum, & malum fugiendum*; unde aliæ dicuntur conclusiones deductæ ex illo principio, quarum aliæ sunt faciliores, aliæ difficiliore. Quia autem à principiis communioribus legis naturalis certæ quædam conclusiones sunt remotæ, quæ non possunt elici nisi cum difficultate; ideò dicitur quòd lex naturalis sit una apud omnes, quantum ad principia communiora & conclusiones faciliores; non tamen

fit una apud omnes , quantum ad singulares conclusiones.

Quod est de jure naturali tantum permissive , mutari potest , introducendo scilicet contrarium illius quod natura non præcipit aut prohibet : unde quia natura permittebat tantum omnia esse communia , & non præcipiebat , idè potuit fieri agrorum divisio ; potest etiam quis propriam libertatem vendere. Quod autem est de jure naturali positive præceptum aut prohibitum , mutari non potest manentibus iisdem circumstantiis ; quia lex naturalis consistit in rebus ipsius quæ habent convenientiam vel disconvenientiam cum recta ratione : si autem circumstantiæ rerum non mutantur , semper habent convenientiam vel disconvenientiam cum ratione : ergo non mutatis circumstantiis , lex naturalis mutari non potest. Si autem circumstantiæ mutantur , mutari potest id quod aliunde erat de jure naturali : sic licet de jure naturæ honorandi sint parentes , potest hoc mutari , si sint jurati patriæ hostes : licet homicidium prohibeatur , licitum fit dum patratum auctoritate Dei habentis jus in mortem & vitam ; vel auctoritate publica , cui tale jus per commissionem competit in subditos ; vel denique ad conservationem suæ propriæ vitæ , quæ aliter conservari non potest : Licet res aliena restituenda sit domino , non tamen gladius furioso reddendus est : licet furtum prohibeatur , in extrema tamen necessitate constituto permittitur.

Deus non potest dispensare in ullâ lege

naturali, sive sit in Decalogo, sive extra; dispensare enim est concedere alicui, ut agat contra legem, etiam quatenus obligat: bene autem facere potest Deus, ut muratis aliquibus circumstantiis, lex naturalis non obliget; sicque quando Deus dispensare videtur in aliquibus præceptis naturalibus; hoc est, quatenus declarat in talibus circumstantiis illa præcepta non obligare. Quando, v. g. lex naturalis prohibet homicidium; hoc est, quando fit privata autoritate, non publica, aut divina, aut in conservationem suæ propriæ vitæ; sic Deus cum Abrahamo non dispensavit super præceptum, *non occides*; non obligat enim in eo casu ubi homicidium fit autoritate divina. Quando etiam iussit Osæ, ut adiret mulierem fornicationis, non dispensavit super præceptum, *non moechaberis*; non iussit enim, ut illam cognosceret ante contractum, sed ut cum illâ contraheret. Quando iussit Israëlitis, ut auferrent bona Ægyptiorum, non dispensavit super præceptum, *non furtum facies*; non concessit enim ut acciperent bona illorum, tanquam aliena; sed tanquam sibi propria per donationem Dei, qui omnium bonorum Dominus erat, & qui poterat tale dominium transferre ad Israëlitas: qui pro toto labore Ægyptiis reddito verbera solum reportaverant. Quando Deus concessit Polygamiam, non dispensavit super legem naturalem; sed abstulit circumstantiam, quâ ablatâ cessat obligatio legis naturalis, nempe inhabilitatem viri; inhabilis est enim, ut tradat dominium sui corporis secundæ uxori, postquam tradidit primæ: Deus

autem ut supremus Dominus facit illum de inhabili habilem , permittendo , ut dominium corporis viri sit commune duabus uxoribus ; & in hoc casu lex naturalis non obligat , quoniam obligat tantum personas inhabiles. Quando similiter aliàs vir repudiabat uxorem , Deo permittente , non contradicebat legi naturali ; quia lex naturalis prohibebat tantum ejectionem uxoris , & conjunctionem cum alia , stante priori vinculo ; illud autem vinculum dissolvebatur autoritate divina , mediante libello repudiij , sicut nunc per mortem dissolvitur. Ex his patet quod Deus non dispenses propriè in lege naturali , sed advenientibus certis circumstantiis , lex naturalis non obliget.

Idem dicendum est à fortiori de summo Pontifice , quod non dispenses in illis quæ sunt de lege naturæ , sed aliquando tollit certas circumstantias , quibus ablatis , cessat obligatio legis naturalis , quod vocatur dispensare , sed largè , ob rationem antea allatam. Redditio voti , v. g. & impletio juramenti , sunt de jure naturali , quia supponunt promissionem Deo factam & non relaxatam , & manente illa promissione non relaxata , nec Deus , nec summus Pontifex dispensare possunt , quin impleatur : Deus autem , vel Pontifex ejus vices gerens talem promissionem relaxat , & sic cessat obligatio voti reddendi ; idem fit apud homines , ubi promissio est de jure naturali adimplenda , quamdiu non relaxatur. Eodem modo dispensare dicitur summus Pontifex supra residentiam pastorum , quæ est de jure divino naturali , ex Conc. Trid. Sess. 13, cap. 1. de *Reform.*

non quòd dispenseret propriè, sed remittit Pastori obligationem residendi nomine Ecclesiæ, cui per pactum ad residendum se addixit, saltem tacitè, suscipiendo curam animarum; sed hoc non debet fieri nisi ob magnam utilitatem Ecclesiæ, aut gravem necessitatem Pastorum. Pariter agit Ecclesia, quando Matrimonium raturum dissolvit occasione ingressus religionis approbatæ; tollit enim nomine Dei vinculum Matrimonii; & tali vinculo ablato, ille qui antea conjugatus erat, religionem approbatam suscipere potest.

Porro sciendum est quod licet aliqua legis naturæ præcepta non obligent in certis quibusdam circumstantiis, ut vidimus; sunt tamen aliqua quæ immutabiliter obligant, quibus contradicere nunquam licet, & illa sunt, mendacium, perjurium, odium Dei & idololatria.

Q U Æ S T I O II.

De Lege divinâ.

PRÆTER legem naturalem, quam Deus impressit ita fortiter menti hominum, ut nullâ virtute expungi valeat; superaddidit multa præcepta positiva, quæ diversa fuerunt pro diversitate statuum in quibus versati fuerunt homines. In statu innocentie præceptum fuit Adæ, Evæ, & utriusque posteris, ne manducarent de fructu vetito. In statu legis naturæ viguit præceptum de usu remedii contra peccatum originale, & de non comedenda carne

cum sanguine, Genes. 9. Postea præcepit Circumcisionem familiæ Abrahami. Deinde seligens filios Iacob, seu Israëlitas in populum suum tulit illis certam præceptorum congregationem, quæ vocata fuit Lex vetus. Tandem per Filium suum, Legem novam, seu gratiæ condidit. Divina meritò dicitur utraque, quia nomine Dei data est; prima Ministerio Angelorum, & per ipsum Deum hominem factum innotuit secunda. De quâlibet dicemus.

CONCLUSIO PRIMA.

Lex vetus fuit bona, sancta, & iusta; contra Manichæos, volentes ipsam esse malam, non à bono Deo, sed à malo conditam. Nostæ conclusio habetur ad Rom. 7. *Lex quidem sancta, & mandatum sanctum, iustum & bonum.* Ubi dicitur *sancta*, propter præcepta ceremonialia; *iusta*, propter judicialia; & *bona*, propter moralia. Triplex ergo fuit lex vetus; nempe moralis, cuius præcepta generatim continentur in Decalogo: ceremonialis, quæ determinabat ritus & ceremonias, quibus Deus esset colendus: & judicialis, quæ dictabat quomodo iustitia esset reddenda proximo. Si contra conclusionem habeatur Ezechiel. 20. *Dedit illis legem non bonam*: hoc est comparatè ad legem Evangelii. Si 1. Corinth. 3. vocatur lex vetus, *Ministratio mortis & damnationis*; hoc est per accidens in quantum præbebat occasionem peccati, non per se, sed ex perversâ hominum inclinatione, qui concupiscentiam legi præferebant; & ob hoc dicit Paulus Rom. 4. *Lex iram operatur*; quod ipsemet explicat, ad Rom. 1. ubi habet, *Occasione accepta,*

Si ad Hebr. 3. in Græco idiomate habeatur. *Vetus Testamentum non vacasse culpa* : hoc est, non vacasse defectu ; licet enim illa lex fuerit bona & sancta & utilis , quia nos , tanquam Pædagogus , conducebat ad cognitionem faciendorum , non fuit tamen perfecta , quia non conferebat gratiam ex opere operato ; unde Paulus ad Galat. 4. vocat ceremonias legis , *infirmam & vacua elementa*. Si dicant Manichæi , Deum permisisse usuram ; saltem cum Gentilibus , Deuter. 23. *Non fœneraberis fratri tuo, sed alieno* : D. Thomas respondet 1. 2. quæst. 78. permissam fuisse usuram , non quoad forum internum , quasi caruisset peccato ; sed quoad forum externum , in quantum non puniebatur : Alii respondent , posita illa permissione D. Judæos potuisse accipere aliquid supra sortem , non ratione mutui , in quo consistit usura ; sed ratione donationis divinæ , quatenus Deus dabat illis tale auctuarium , cum sit supremus omnium Dominus : & hoc ita fecit Deus , nè Judæi fratres suos per usuram exhaurirent. Sic permisit libellum repudii , nè suas uxores , quas repudiare non possent , occiderent : fuit tamen talis libellus licitus , quia Deus supremâ authoritate potuit solvere vinculum Matrimonii , ut habetur in quæst. præcedenti. Si addant Manichæi , talem legem fuisse tyrannicam , ob hoc quod habetur Exod. 31. *Oculum pro oculo, dentem pro dente, manum pro manu* : ex hoc concludi tantum potest , quod fuerit servilis & accommodata statui Judæorum , qui cum essent servi , debebant deterreretur à peccatis metu poenarum. Si denique Matth. 19. declaret

Deus se odio habere sacrificia illorum ; hoc non erat ratione sacrificii , talia enim præcipiebat ; sed ratione offerentium , qui nolebant à peccato abstinere.

Lex vetus sicut & nova Deum agnoscit authorem : Sic Concil. Trident. Sess. 4. unde Matth. 4. lex Mosaïca vocatur mandatum Dei , *Irritum fecistis mandatum Dei propter traditiones vestras*. Ratio est , quia lex Evangelica est finis legis Mosaïcæ ; & lex Mosaïca est medium ad legem Evangelicam disponens , tanquam minus perfectum ad perfectius , & tanquam figura ad veritatem ; ejusdem autem est proponere media & finem : ergo idem Deus qui dedit legem Evangelicam , dedit & veterem. Neutram tamen Deus promulgavit per se , sed primam per Angelos ad Galat. 3. *Lex ordinata est per Angelos in manu mediatoris* ; id est, Moïsis : & secundam per Christum suum , ad Hebr. 1. *Multifariam, multisque modis olim Deus loquens patribus in Prophetis, novissimè diebus istis locutus est nobis in Filio*. Lex vetus data fuit in monte Sinaï die 50. ab egressu filiorum Israël ex Ægypto. Et hoc latè describitur Levitici 26. Sed notandum est , quod in illo die data fuerit lex vetus quantum ad præcepta moralia contenta in Decalogo , & hoc in summitate montis Synai ; præcepta verò judicialia & ceremonialia data fuerunt in radice montis , successivè per varios dies.

Lex vetus quantum ad obligationem diversimodè considerari potest ; in quantum enim continebat præcepta moralia , ceremonialia , & judicialia , obligabat solos Judæos , Deuter. 4.

*Qua est alia gens sic incluta, ut habeat ceremonias, iustaque iudicia & universam legem? Psal. etiam 147. Non fecit taliter omni nationi & iudicia sua non manifestavit eis. Poterat tamen quilibet gentilis se adungere populo Dei per Circumcisionem, quæ erat janua veteris legis, sicut Baptismus janua novæ; & pro tunc obligabatur legi veteri. Exod. 12. Si quis peregrinorum in vestram voluerit transire coloniam, circumcidetur prius omne masculinum; & tunc erit sicut indigena terra. Si autem lex vetus sumatur præcise quantum ad præcepta moralia, obligat etiam Gentiles, quia talia præcepta erant legis naturæ, & quilibet ad legem naturæ tenetur, Lex vetus obligabat Judæos ex genere suo sub peccato mortali, non tantum quoad præcepta moralia, sed & quoad ceremonialia & judicialia; quia horum materia erat satis gravis, ut de se obligationem induceret; addunt tamen Doctores communiter, illam non obligasse cum periculo mortis regulariter nisi quoad præcepta moralia negativa, quæ continentur in Decalogo, & quæ prohibent aliquid intrinsece malum. Dixi, *regulariter*, ut significetur quod si observatio legis ceremonialis aut judicialis esset necessaria ad vitandum contemptum Dei, vel religionis, periculum mortis non excusaret; unde 2. Machab. cap. 9. & 7. Elezarus & septem fratres cum matre sua mori potius elegerunt, quam porcinas carnes manducare.*

Lex vetus abrogata est de facto, non quidem quantum ad præcepta moralia, quæ adhuc perseverant; sed quantum ad ceremonialia &

judicialia, quidquid dicant Cerinthiani, Ebionitæ & Nazaræi. Hoc probatur pluribus ex locis, sed præsertim ad Galatas 3. *Lex Pædagogus noster fuit in Christo; at ubi venit fides, jam non sumus sub Pædagogo.* Fuit autem abrogata, non per Joannem, sed per Christum; fuit enim umbra, & umbra cessare non debet, nisi adveniente lumine, quod est Christus: unde si habeatur Luc. 16. *Lex & Prophetia usque ad Joannem*; non est quod pro tunc cessaverit, sed quasi mori inceperit; inchoatio enim Prædicationis Evangelii, fuit initium mortis legis veteris. Non est abrogata ante mortem Christi, ipse enim illam observavit; sed cessavit ejus obligatio in ipsius morte, ubi dixit Christus, *Consummatum est*, & ubi scissum est velum templi; ad denotandum nullam postea deberi templo reverentiam, & omnia esse communia inter Judæos & Gentiles. Quod si dicant aliqui, non cessasse illam legem, nisi in promulgatione Evangelii, factâ die Pentecostes: Resp. quod sicut rex satis promulgare censetur legem, quando illam in palatio suis proceribus exponit; sic Christus in nocte cœnæ satis visus est promulgare Evangelium, dum illud proposuit Apostolis; unde in tali tempore obligabat Evangelium eos qui illud audierant; & promulgatio quæ facta fuit in die Pentecostes, non erat de essentiâ legis, sed tantum conditio sine quâ Evangelium non obligabat illos, qui de eo nihil audierant: sic Augustinus, Hieronymus, & multi alii, contra nonnullos. Aliqui putant, veterem legem non cessasse à morte Christi quoad utilitatem, licet cessaverit quoad

obligationem ; sed verisimilius est veterem legem cessasse quoad utrumque ; extinctum enim fuit Sacerdotium Aaronicum ad præsentiam sacrificii Christi , quod evacuavit omnem efficaciam sacrificiorum antiquorum : quod intelligendum est respectu eorum quibus Evangelium promulgatum erat, quales erant Apostoli.

Lex vetus à Hieronymo creditur ab eo tempore mortifera & prohibita sub peccato , ac fuit mortua ; ita quòd sicut à morte Christi , vel ut dicunt alii , à die Pentecostes , fuit mortua , seu cessavit ; ita ab illo tempore fuit mortifera , & prohibita sub peccato mortali. Augustinus contrarium docet , affirmans quòd licitus adhuc esset usus legalium paulo post publicationem Evangelii , non animo ostendendi talem usum esse necessarium aut utilem ; sed ut ostenderetur tales ceremonias fuisse bonas & à Deo institutas , non verò à dæmonibus , ut erant Gentilium ceremoniæ : & hoc est quod dicitur communiter , Synagoram cum honore debuisse sepeliri ; & hoc ad differentiam Gentilium , quorum ceremoniæ nunquam toleratæ fuerunt post eorum conversionem , ubi ceremoniæ Judæorum fuerunt aliquamdiu permixtæ , ut Synagoga sepeliretur cum honore. Augustinum sequuntur passim Scolastici , & jure merito , quia Paulus circumcidit Timotheum Act. 16. & cum Judæis purificatus est Act. 21. Nec respondeat Hieronymus , Paulum hoc fecisse animo simulandi ; simulatio enim est species mendacii , & mendacium est intrinsecè malum , unde nunquam licitum est. Quòd si Paulus reprehenderit Petrum , quia tales cere-

monias observabat, unde dixit ad Galat. 2. *Cum autem venisset Cephas Antiochiam, in faciem restiti ei, quia reprehensibilis erat*: hoc est, quia Petrus volebatur Gentiles, antequam Evangelium susciperent, observarent ceremonias Judæorum; addit enim, *Dixi Cepha coram omnibus, Quomodo gentes cogis iudaizare?* & in hoc potuit Petrus inconsiderate agere, & peccare venialiter; licet non potuerit peccare mortaliter, quia erat confirmatus in gratia. Inconsideratè, inquam, egit, quia licet essent adhuc licita Legalia pro Judæis, ut Synagoga cum honore sepeliretur eo modo quo diximus, non tamen ipsis legalibus uti debebant Gentiles, qui immediatè transibant de lege naturali ad Evangelium; unde Paulus Timotheum conversum circumcidit, quia erat ex matre Judæa; non Titum qui ex Gentilibus erat ortus. Hoc habetur in Conc. Jerosolymitano, ubi super quæstionem factam, an Gentiles conversi deberent circumcidi, & observare legalia; Patres responderunt, *Visum est Spiritui sancto & nobis, non ultra vobis imponere oneris, quàm hac necessaria, ut abstineatis vos ab immolatis simulachrorum, & sanguine, & suffocato, & fornicatione.* Hæc prima autem non prohibebantur absolute, quasi retenta essent de lege Mosàica; sed ut facilius Gentiles coalescerent cum Judæis, qui propter antiquam suam legem abominabantur sanguinem & suffocata; ne etiam manducando carnes immolatas idolis, darent occasionem judicandi quòd vellent ad sua idola redire. Porro, si Gentilibus conversis prohibeatur specialiter fornicatio; hoc

est, quia non credebant illam esse peccatum.

Lex vetus Synagogam continebat, quæ licet aliquando sumatur in Scripturâ pro conventu malignantium, aliquando pro ædificiis in quibus Iudæi solebant legere & explicare Scripturas: sumitur tamen communiter pro totâ congregatione seu Ecclesiâ Iudæorum. Moïses ædificavit Synagogam, sicut Christus Ecclesiam; illa tamen erat ancilla, & ista libera, ad Galalat. 4. *Non sumus filii ancilla, sed libera.* Synagoga continebat ministros ordinarios, nempe Levitas, Sacerdotes, & summum Pontificem: continebat ministros extraordinarios, nempe Prophetas; continebat certos quosdam religiosos: continebat denique sectarios, scilicet Phariseos, Saduceos, & Essenos; de his omnibus dicendum est aliquid. Primò, Levitæ Sacerdotibus ministrabant; Sacerdotes offerebant victimas super altare holocausti, nutriebant ignem perpetuum, subministrando ligna, adolebant incensum super altare Thimiamatis, concinnabant lucernas juxta illud existentes, singulis sabbatis ponebant panes duodecim calidos super mensam propositionis, & auferebant veteres quos comedebant; adjuvabant mulieres in casu Zelotypiæ, discernebant inter lepram & lepram, mundabant leprosos & seminisfluos & puerperas & menstruatatas, denique legem Dei interpretabantur. Quoad Pontificem, qui erat ex sola familia Aaronis, consecrabat Levitas & Sacerdotes, in controversiis legalibus agebat supremum judicem, & illius sententiæ tenebantur omnes acquiescere sub poena mortis;

in solemnī die Expiationis Sanctuarium introibat & publicam expiationem instituebat super omnia peccata legalia populi & immunditias toto anno contractas; denique in rebus magni momenti Deum consulebat, & ab eo accipiebat responsum: Aliqui dicunt per Angelum quasi voce humanā loquentem, alii per occultam Spiritus sancti revelationem, & Iosephus cum aliis, per gemmarum splendorem in rationali existentium supra pectus Pontificis; ita quod si gemmæ plus solito splenderent, signum erat foelicis successus; si minus solito, signum erat mali; si more naturali, nec magis, nec minus, signum erat Deum non velle respondere. Secundò, erant in Synagoga Ministri extraordinarii, nempe Prophetæ, qui erant certi quidam homines, vel ex sacerdotibus, vel aliunde assumpti à Deo, quorum officium erat docere populum & reformare in cultu veri Dei, illosque arguere qui à tali cultu & religione recedebant: ipsorum etiam erat prædicere futura, siue ad consolationem, siue ad terrorem populi; denique occulta revelabant ordinariè, probabantque se esse à Deo missos ad reformandum populum; & hoc per miracula & veras prædictiones. Tertiò, duæ species erant religiosorum, qui à communi populo distinguebantur, nimirum Nazaræi & Rechabitæ; quorum illi ex utroque sexu erant qui se Deo consecrabant voto, siue in perpetuum, siue ad tempus, ut erant Samson, & Samuel, & similes, Dicebantur Nazaræi, quia erant separati, & novacula non ascendebat super capita eorum, nisi quando cessabat illorum votum; abstine-

bant se ab omni potu inebriante, ab aceto, & à quibuscumque uvis; illorum institutum descriptum est Numer 6. Rechabitzæ sic dicti sunt à Rechab patre Jonadab, qui præcepit filiis & filiabus & cunctis posteris suis, ut non biberent vinum, ut manerent in tabernaculis, nec domos ædificarent; ut denique nec seminarent, nec meterent; quod exactè observarunt. Quartò denique, erant in Synagogâ Sectarii, nimirum Pharisei, Saducæi, & Esseni. Pharisei sic dicti sunt à verbo Hebraïco *Pharase*, quod significat dividere; veste enim & modo vivendi ab aliis dividebatur illorum secta. Sic orti sunt Pharisei. Moïses in monte Sinai nedum accepit legem quam scripsit, sed & intelligentiam legis quam non scripsit; illam autem tradidit Josué successori suo vivâ voce; Josué senioribus populi qui eum sequuti sunt, hi prophetis, isti viris magnis Synagogæ, ex quibus orti sunt Pharisei. Dogmata Phariseorum quæ acceperant à lege & Prophetis, alia erant vera; & de illis dixit Christus, *Quaecumque dixerint vobis, facite*: alia verò erant falsa & erronea, unde etiam dixit, *Cavete à fermento Phariseorum*. Docebant omnia fato evenire, traditiones antiquiorum præferbant præceptis legis, animas justorum volebant transmigrare de corpore in corpus, unde dicebant Christum esse Heliam, Ieremiam, aut unum ex Prophetis, putantes animam alicujus istorum migrasse in corpus Christi. In hoc distinguebantur à Scribis quod Scribæ non constituerent sectam particularem, licet utique essent legis periti. Saducæi erant hære-

tici quidam, sic dicti à Sadoch eorum authore; solum Pentateuchum pro vera Scriptura admittebant, & nullam volebant traditionem, nec interpretationem factam à Moïse, vel Prophetis, aut Doctoribus. In omnibus erant contrarii Christo & adversabantur Pharisæis in hoc, quod nec immortalitatem animarum, nec mortuorum resurrectionem, nec spiritum, aut Angelos crederent. Esseni denique componebant sectam omninò similem cœtui religiosorum; manebant enim cœlibes, bona habebant communia, albis utebantur vestibus, sine viatico incedebant, accuratè servabant silentium, novitios probabant quadriennio, & similia faciebant pietati consona.

CONCLUSIO SECUNDA.

LEx nova, quæ lex Evangelii vocatur, à Christo Domino est instituta, juxta id quod habetur Can. 21. *Si quis dixerit, Christum Iesum à Deo hominibus datum fuisse ut redemptorem, cui fidant, non etiam ut legislatorem, cui obediant, Anathema sit.* Illam instituit non tantum pro Iudæis, sed pro toto mundo, Marc. ult. *Euntes in mundum universum, predicate Evangelium omni creatura:* Et ratio est, ut qui erat omnium redemptor, legem institueret pro omnibus, per quam ad salutem pervenire possent. Quòd si Ioan. 1. habeatur, *Lex per Moysen data est, & gratia per Christum:* per hoc non est intelligendum quòd Christus sit tantum collator gratiæ, & non institutor legis; sed quòd Moïses dederit solum legem & non gratiam, Christus verò & legem dederit & gratiam, per quam lex observari possit; per Sa-

tici quidam, sic dicti à Sadoch eorum authore; solum Pentateuchum pro vera Scriptura admittebant, & nullam volebant traditionem, nec interpretationem factam à Moïse, vel Prophetis, aut Doctoribus. In omnibus erant contrarii Christo & adversabantur Pharisæis in hoc, quod nec immortalitatem animarum, nec mortuorum resurrectionem, nec spiritum, aut Angelos crederent. Esseni denique componebant sectam cranimò similem cœtui religiosorum; manebant enim cœlibes, bona habebant communia, albis utebantur vestibus, sine viatico incedebant, accuratè servabant silentium, novitios probabant quadriennio, & similia faciebant pietati cõsona.

CONCLUSIO SECUNDA.

LEX nova, quæ lex Evangelii vocatur, à Christo Domino est instituta, juxta id quod habetur Can. 21. *Si quis dixerit, Christum Iesum à Deo hominibus datum fuisse ut redemptorem, cui fidant, non etiam ut legislatorem, cui obediant, Anathema sit.* Illam instituit non tantum pro Iudæis, sed pro toto mundo, Marc. ult. *Euntes in mundum universum, predicate Evangelium omni creatura:* Et ratio est, ut qui erat omnium redemptor, legem institueret pro omnibus, per quam ad salutem pervenire possent. Quòd si Ioan. 1. habeatur, *Lex per Moysen data est, & gratia per Christum:* per hoc non est intelligendum quòd Christus sit tantum collator gratiæ, & non institutor legis; sed quòd Moïses dederit solum legem & non gratiam, Christus verò & legem dederit & gratiam, per quam lex observari possit; per Sa-

cramenta scilicet, quæ illam conferunt ex opere operato.

Lex nova triplicia continet præcepta; nempe Moralia, Sacramentalia & Theologalia. Dedit, inquam, moralia, ut patet ex Matth. 5. 6. & 7. ubi præcepta Decalogi renovat & perficit; prohibetque divortium, quæ omnia spectant ad mores. Dedit secundò præcepta Sacramentalia, de Sacramentis scilicet administrandis & recipiendis; v. g. de Baptismo, Joan. 3. *Nisi quis renatus fuerit*; de Pœnitentiâ, Joan. 20. *Quorum remisistis peccata*, &c. de Eucharistia Joan. 6. *Nisi manducaveritis*, &c. Tertiò, dedit præcepta Theologalia, quæ respiciunt actus virtutum Theologicarum, Marci 16. *Qui crediderit & baptisatus fuerit, salvus erit; qui vero non crediderit, condemnabitur*; & Luc. 10. *Diliges Dominum Deum tuum*. Præcepta Sacramentalia absolutè fuerunt à Christo instituta; de nostris enim Sacramentis nihil fuit præceptum in lege naturæ, aut veteri. Præcepta moralia, quæ sunt præcepta Decalogi, vel ad illum reducuntur, non sunt tam instituta à Christo, quàm explicata; quoniam erant de lege naturæ. Præceptum Theologale de fide fuit auctum; nam Christi Nativitas, Mors, Passio & ejus mysteria obscurè & implicite tantùm credebantur à Judæis; nunc autem distinctè & explicitè credi debent à Christianis.

Licet ad hæc tria præceptorum genera teneantur Christiani, non minus tamen libertatem Christianam, quam introduxit Christus, conservant; non consistit enim in hoc, quòd
liberè

liberi sumus ab observatione mandatorum Dei , sed in duobus principaliter posita est ; nimirum in libertate à servitute peccati , Joan. 8. *Omnis qui facit peccatum , servus est peccati : si ergo vos filius liberaverit , verè liberi eritis ;* & ad Rom. 6. *Liberati à peccato , servi facti estis justitiæ.* Posita est etiam in libertate à iugo legis veteris , quantum ad ceremonialia & judicialia , ad Galat. 4. *Quomodo iterum convertimini ad infirma & egenæ elementa , quibus denuò servire vultis ?* Licet ergo Paulus ad Rom 6 dicat , *Non estis sub lege ,* non minus tamen sumus in lege ; imò ipsemet 1. Corinth. 9. dicit , *Se non esse sub lege , sed in lege :* unde est differentia , inquit Augustinus in Psal. 1. *interesse sub lege , & in lege.* Judæi erant sub lege , quia tanquam servi subditi erant pœnis legalibus ; nos verò sumus in lege , quia tanquam filii observamus legem ex amore , per gratiam scilicet , quam confert ipsa lex Christi , & quam non conferebat lex Mosàica ; sic Augustinus lib. de Continentiâ cap. 3.

Sicut diximus ex mente Patrum , legem veterem cessasse in morte Christi , sic lex Evangelica pro tunc incepit obligare universum orbem , quoad auctoritatem & vim obligandi ; non tamen obligavit quoad reatum , seu sub peccato , nisi post sufficientem Evangelii promulgationem , quæ in communi facta est in die Pentecostes , & particulariter dum Apostoli illud publicaverunt per totum mundum , juxta id , *In omnem terram exivit sonus eorum.* Quòd vim habuerit obligandi in ipsâ morte Christi , constat per hoc , quòd desinente lege veteri , lex nova debuerit incipere , & aliàs sine lege positivâ re-

mansissent homines. Inccepit, inquam, illa lex Evangelica obligare illos quibus innotuit, non alios, quibus non fuit promulgata; sed in die Pentecostes sufficienter publicata fuit, maximè respectu Judæorum, quorum aliqui ex qualibet tribu & natione convenerant Jerusalem; respectu verò Gentilium, expectari debuit prædicatio Evangelii, ut posset obligare eos sub reatu peccati. Licet lex nova sit duratura in æternum, ut patet ad Hebr. 13. & ex consecratione calicis, ubi regnum Christi & testamentum ejus dicitur æternum; tamen abrogari potest autoritate Dei, quia sicut illam non dare potuit, ita & illam abrogare valet, demptis præceptis quæ sunt de jure naturæ: Abrogari tamen non potest autoritate humanâ; in illis enim quæ sunt à Dei, inferiores non possunt dispensare, nisi specialem habeant concessionem, quod non apparet de dispensatione Evangelii; unde dictum Matth. 16. *Quodcumque ligaveris super terram*, intelligi debet de jurisdictione accommodata suo statui, non de potestate universali. Porro, licet lex nova explanationem patiatur, non patitur tamen Epiikiam. Ratio primi est, quia lex positiva non est menti hominum inscripta quoad omnes ejus circumstantias; unde potest sensus legis verbis explicari. Ratio secundi petitur ex hoc, quod Epiikia est emendatio legis generalis in aliquo casu, quem legislator judicatur non fuisse comprehensurus, si illum prævidisset; Deus autem omnes casus prævidit: ergo in lege Dei non debet admitti Epiikia.

¶ Il multis lex vetus & nova differunt: primò,

ratione causæ, quia illa fuit data ministerio Angelorum, ista ex ore filii prodivit. Secundò, differunt in materiâ, quia mysteria quorum fides præcipiebatur in veteri, erant imperfectè tantùm cognita; in novâ autem sunt apertè revelata, & sacrificiis veteribus successit admirabile sacrificium crucis & altaris. Tertiò, differunt in forma; illa enim gratiam non includebat ad observationem mandatorum, benè ista: Quarta, differunt in fine; quia nova erat finis veteris, & consummatio ejus. Quintò, lex vetus erat lex servorum, unde Deus agit cum illis, quasi cum mercenariis quibus promittit bona temporalia, *Esaï. 1. Si audieritis me, bona terra comedetis*; lex verò nova est lex filiorum quibus promittitur hæreditas, *Matth. 5. Beati pauperes spiritu, quoniam ipsorum est regnum cælorum*. Sextò denique, lex vetus maximè rigorosa est, unde ad *Galat. 5.* vocatur jugum importabile; nova autem vocatur *Matth. 11. Jugum suave, & onus leve*; denique differunt in subjecto; vetus enim data est in tabulis lapideis, *Exod. 24. & Deuter. 4. & 5.* & nova ab Apostolo ad *Hebr. 8.* dicitur, scripta in cordibus nostris, *Dabo leges meas in mentem ipsorum, & in corda eorum superscribam*: non quòd lex Mosàica non fuerit scripta in cordibus Judæorum, qui illius habebant notitiam; non etiam quòd lex nova non sit scripta in libris; sed nova dicitur scripta in cordibus, à gratiâ Spiritûs sancti, quam confert ex operato, & quæ dicitur esse in nostris cordibus, *Rom. 5. Charitas Dei diffusa est in cordibus nostris per Spiritum sanctum qui datus est nobis*; lex autem vetus non sic continebat gratiam.

QUESTIO III.

De Lege humanâ.

DE lege humanâ nobis superest loquendum, quæ dividitur in temporalem seu civilem, & in spiritualem sive Ecclesiasticam. Illa procedit à temporali potestate, & ordinatur ad ad bonum politicum & temporale reipublicæ; ista emanat à jurisdictione spirituali, tenditque ad bonum spirituale. De utrâque erit differendum.

CONCLUSIO PRIMA.

AD legum humanarum cognitionem, præsupponendum est quid sit jus in se, quod à Jurisperitis definitur, *Ars justæ & boni*; id est, ars præscribens quod justum & bonum est. Præcepta juris in universum sunt tria; nempe, *honestè vivere, alterum non ludere, denique suum cuique tribuere*. Divisio juris fit in jus naturale, quod natura omnibus animantibus indidit, de quo antea diximus; in jus gentium, quo omnes gentes utuntur; & in jus civile, quod legibus alicujus regni vel provincie constat, de quo differere intendimus. Nationes diversæ sibi diversas leges constituerunt; unde aliud est jus Lacedæmonum, aliud Atheniensium, aliud Hispanorum, aliud Gallorum, & aliud jus Romanorum, quod per Antonomasiâ jus commune vocatur, illud tamen non admittitur in Galliâ, nisi in iis quæ videntur rationi conformia.

Aliud est jus non scriptum quod in Consuetudinibus localibus consistit, quæ multis in locis in scriptis redactæ sunt; & aliud scriptum, quod apud Romanos in *legibus*, *Senatus-consultis*, *rebus judicatis*, *authoritate jurisperitorum*, *plebiscitis*, *principum placitis*, *prætorum edictis* & *responsis prudentum* consistebat. *Lex* est id quod populus Romanus constituebat, interrogante senatorio magistratu seu consule, penes enim populum stabat authoritas; unde interrogabatur, an vellet hoc vel hoc fieri, & quando illud habebat ratum, vim legis habebat. *Plebiscitum* est id quod plebs, quæ erat tertia pars populi, constituebat, interrogante magistratu plebeio seu Tribuno, sine patritiis & senatoribus. *Senatus-consultum* est id quod senatus constituebat vice populi, qui suam authoritatem ad Senatores dimiserat. *Placita principum* erant principum constitutiones, seu edicta & rescripta imperatorum quod enim placet principi vim habet legis, ut patet in nostris regibus, decretis suis addentibus, *Quia ita nobis placet*. Prætorum edicta emanabant; non à populo, sed ab ipsis Prætoribus vi authoritatis propriæ, quâ poterant uti in utilitatem populorum. *Responsa* denique *prudentum* erant sententiæ aliquorum jurisperitorum, quibus authoritate principis licebat de jure respondere, itaut judices non possent à tali sententiâ recedere. His omnibus leges duodecim tabularum addiderunt Romani, quas per deputatos exquisierunt ab Atheniensibus, quibus tot successivè addiderunt alias & diversas leges quòd tempore

Iustiniani infinita propè volumina legibus re-
ferta extiterant.

Iustinianus tali legum multiplicitati reme-
dium adhibere percipiens, tribus jurisperitis
jussit, nimirum Triboniano, Dorotheo, &
Theophilo, ut justas & necessarias leges colli-
gerent, supprimerentque superfluas; unde vo-
lumen unum composuerunt quatuor libris di-
gestum, ubi compendiosè juris elementa ha-
bentur, & illud vocatum *Instituta* vel *Institutio-
nes Iustiniani*; sic verò citari solent illæ institu-
tiones, *Instit. de justitia & jure*, hoc est, in li-
bris Institutionum sub titulo *de justitia & jure*:
& si titulus constet pluribus paragraphis, ad-
di potest Paragraphus, citando prima illius
verba. Aliud volumen composuerunt, vocatum
Pandectæ, quia omni scientiarum genere refer-
rum est; vocatur etiam *Digesta*, quia in illo
digesta sunt præcipua capita veteris Iurispru-
dentix. Quinquaginta libri in eo continentur,
in quibus sunt plures tituli, qui vocantur à ve-
teribus *rubrica juris*, propterea quòd minio no-
tantur; vel croco. His additus fuit *Codex Iusti-
niani* duodecim libros continens, in quibus
agitur de Constitutionibus imperialibus. Ad-
cesserunt *Novellæ* Constitutiones Iustiniani, quæ
vocantur alio nomine *Authentica collationes*, li-
bros novem continentes; *edicta Iustiniani* sub
titulis tridecim: *Novellæ Iustini* sub quinque ti-
tulis; *Constitutiones Tiberii* sub totidem titu-
lis; *Volumen aliud* quatuor titulis digestum,
in quo sunt Constitutiones Iustiniani, Iustini &
Tiberii; *Novellæ Leonis septimi Imp.* ubi repe-
tiuntur 11, tituli vocati Constitutiones, *Consti-*

tutiones imperiales 37. numero ; *Traſſatus denique de feudis* antea incognitis. Porro ultra præcedentia , quæ apud Romanos vim legis habebant, juris adhuc duplex ſpecies admittebatur ; nempe, *ius Quiritum*, ſeu civium, quo cives Romani regebantur & diſtinguebantur ab alienigenis ; & *ius Prætorium* ; quod prætores introducebant in quâlibet provinciâ , ut ſuppleretur jus civile , vel adjuvaretur illius obſervatio.

Cùm Gallia ſit regnum , cujus princeps & imperator ſupremam poſſidet authoritatem , jura Romanorum nullomodo agnoſcit , niſi in quantum ſunt conformia rationi , quæ pro legum fundamento agnoſcitur ; plura tamen jus Gallicum continet juribus Romanorum non diſſona. Hujusce ergo regni jura , quæ apud omnes regnicolas obſervantur, Regum edictis & Senatus-consultis coaleſcunt ſicut & cujuſcumque provinciæ conſuetudinibus de trium ordinum conſenſu introductis , & per principem approbatis. Regis ſolius eſt juſtitiæ adminiſtrare , & hoc in ſignum ſupremæ ſuæ authoritatis ; aliquando per ſe jus teddebat ſingulis, ſed pro rerum multiplicitate , quæ augebatur in dies , Prominiſtros in quâlibet provinciâ & ſingulis oppidis regulariter inſtituit. Quod ut clarius pateat , ſciendum eſt univerſum regnum dividi in tres ordines ; primus Eccleſiaſticorum eſt, ſecundus Nobilium, & tertius Plebeiorum , qui tertii ordinis nomen retinet. Dum Franci in Galliam copias traduxerunt, de omnium militum conſenſu Pharamundum inſtituerunt in regem ; Poſtquam verò ex Francis & Gallis una gens reſultavit , in duos

ordines distincta est, quorum primus ex præcipuis belli ducibus componebatur, qui nunc vocantur Nobiles & apud Romanos Patritii; alius verò de Primatibus populi factus est, qui est secundus ordo, apud Romanos Plebeiorum ordo vocatus: dum denique fidem Christianam susceperunt reges nostri, pro ordine primario sui imperii Ecclesiasticos instituerunt.

Omnia totius regni bona & possessiones à Rege dependent immediatè vel mediatè, singula enim vel sunt in manu regis, & sic regium patrimonium constituunt; vel possidentur à Proceribus regni, & tunc jure clientelæ Regi obstringuntur, vel denique pertinent ad tertii ordinis viros; tanquam plebeia prædia, quæ sub clientelâ Procerum existunt. Unde duplex est dominium in prædia; unum utile, ad illos pertinens qui prædiis fruuntur; aliud directum; quod ad Regem spectat, vel Proceres. Quoad bona Ecclesiastica, quæ Ecclesiasticis donata sunt, eandem naturam, sub quâ erant in manu donatorum, retinent. Prædia nobilia, regni Procerum, vel sunt Ducatus, aut Marchionatus, vel Comitatus, vel Baronatus, aut certa quædam feuda, quæ in Normaniâ præsertim feuda loricata nuncupantur, Gallicè, *Fiefs de Haubert*. His prædiis ordinariè conjuncta est dicendi juris potestas; unde apud nos reperitur jurisdictio duplex, quarum prima est regia, & si fari ita liceat, dominialis altera: hæc verò in superiorem, mediam & infimam subdividitur. Jurisdictio dominialis superior de omnibus civilibus & capitalibus judicat inter subditos, demptis quibusdam casibus,

qui regii nuncupantur. Media agit tantum de rebus mobilibus inter clientes. Infima jus dicit super clientelarias functiones & obsequia solum.

Quantum ad jurisdictionem regiam, longe nobiliorem dominiali; Reges nostri causarum multitudinem vidente, sibi sanctius Consilium reservarunt, & pro capitalibus & civilibus judicandis certum quemdam Senatorum numerum præfecerunt, qui ultimæ cognitionis proferrent judicia & horum judicium congregatio, quibus Pares Franciæ annumerantur, supremus Senatus, seu Parlamentum dicta est. A Pipino an. Dom. 377. institutum est istud Parlamentum, sed deambulatorium, quia ubique sequebatur principem; fixum autem stetit Parisiis autoritate Philippi, dicti *le Bel*, qui palatium in sedem justitiæ construï jussit. Ille autem perillustis Senatus tantum sibi nomen vendicavit, tum apud exteros, tum apud indigenas; ut Papæ, Imperatores, & alii Reges & Principes, augustissimi hujusce cœtus sententiis se libenter subjecerint; teste Imperatore Federico cum Innocentio VII. summo Pontifice; teste etiam rege Castellæ cum rege Lusitanæ, & similibus. Prædictus Philippus duos tantum confessus quolibet anno instituit; quorum primus celebrabatur in diebus festivis Nativitatis Domini, alter verò die Purificatæ B. V. M. Senatum distribuit etiam in duo tantum conclavia; in conclave scilicet primum, seu *Grand' Chambre*, aliàs *Grand' Couste*; & in conclave inquisitionum, seu *des Enquestes*; & in ho-

rum conclavi primo res majoris momenti agebantur.

Senatus ille Parisiensis, qui Parium Franciæ Curia vocatur, hisce temporibus decem conclavia obtinet. Hæc sunt: Conclave primum, Capitalium causarum conclave, seu ex circuitu; edictale conclave, sic nominatum, quia per edictum pacificationis erectum est in favorem hæreticorum; duo supplicum conclavia, & quinque inquisitionum. In supremo conclavi sunt octo insulati præfides, & senatores quamplurimi. In capitalium causarum conclavi sunt duo præfides insulati, & sex vel octo Senatores ex primo conclavi assumpti, & duo ex quolibet conclavi inquisitionum, qui cum ad hanc curiam vicissim accedant, ob hoc dicitur classis ex circuitu, Edictale conclave duos habet insulatos præfides cum sexdecim senatoribus, assumptis ex conclavi primo & inquisitionum; & hi quolibet biennio à Cancellario regni & generali deputato præsumptæ reformationis eliguntur. In quolibet requisitionum conclavi duo sunt præfides & circiter decem senatores, à quorum judicio ad superius conclave provocatio seu appellatio fieri potest; unde non sunt ultimæ cognitionis iudices. Quodlibet denique conclave inquisitionum duobus præfidibus & senatoribus triginta componitur. Prima classis appellationes judicat, quæ procedunt ex sententiis super lites sine scriptis instructas ortis, & de abolitionibus criminum viris nobilibus concessis. Classis ex circuitu reos judicat, demptis nobilibus. Classis edictalis lites in quibus vocantur hæretici,

quæ tolerat Gallia, componit. Classis inquisitionum appellationes sententiarum quæ ex rationibus tutorum oriuntur; vel litium quæ scriptis instruuntur, dirimit. Curia verò sup-
plicium, privilegiatorum causas judicat.

Præter Senatum Parisiensem, sunt & alii novem in Galliâ. Secundus omnium est Tolosanus, quem crexit Philippus IV. dictus Pulcher, an. 1302. & stabilem esse jussit Carolus VII. anno 1463. Tertius est Rothomagensis, quem crexit Carolus VII. anno 1443. & fixum reddidit Ludovicus XII. anno 1503. Quartus est Gratianopolitanus per Carolum VII. erectus anno 1453. Quintus est Burdegalensis, quem creavit Ludovicus XI. Sextus an. 1476. à Ludovico XI. Divione institutus est. Septimus Aquisextanus, sub Ludovico XII. an. 1501. Octavus Rhedonensis sub Henrico II. anno 1533. Nonus Palensis à Ludovico XIII. dum regionem adivit Bearniam; antea tamen Henricus primus Navaræorum Rex, Henrici IV. tritavus sedem jurisdictionis supremæ in hac urbe Palo instituerat. Tandem decimus fuit Metensis, Tulli olim sedens, ab ipsomet Ludovico XIII. creatus. In qualibet urbe reperiuntur ut plurimum diversæ jurisdictiones inferiores; nempe Prætorialis, Tribunalis, Tributarii Judicii Præfectura, Aquis regiis Præfectura, & Præfectura Capitalium. Prætores de rebus civilibus & capitalibus agunt inter Nobiles & Ecclesiasticos, & de iis quæ spectant ad Beneficia, Decimas, Patronatus, regia Privilegia, & de aliis rebus quæ ipsis attribuuntur per regum Edicta & Provinciarum con-

suetudines scriptas. Tribuni de litibus in tertio ordine subortis judicant. A Tribuno fiunt Appellationes ad Prætorem, & ab isto, ad Præsidiales judices in civilibus tantum: quando enim de criminibus agitur, ad supremum Senatum debet fieri appellatio, etiam à jurisdictione Tribuni, qui ex incidenti de crimine aliquando judicat. Si res civilis, de quâ agitur apud Prætorem, sit provisorie judicata de mobilibus, quæ non excedant quingentas libras, ad Præsidialem curiam debet fieri appellatio; sicut quando res definitive est judicata in mobilibus & non excedit libras ducentas & quinquaginta: Aliàs si agatur de prædio, vel si prædictus pecuniæ numerus excedatur, ad supremam Parlamenti curiam debent appellationes deferri. Tributarii judices agunt de Tributis, Subsidiis, Impositionibus, & Saliis vectigalibus; & hujus curiæ appellationes ad rei tributariæ summum tribunal devolvuntur. Aquis regiis Præfecti, nemorum & aquarum in quibus fiunt navigationes, curam habent; & dum appellationes ab illorum judicio fiunt, hæc ad sedem marmoream spectant. Quantum ad capitales Tribunos, ipsis regiones latronibus & grassatoribus expurgare incumbit, de certis quibusdam criminibus judicant, modò judices præveniant ordinarios; illa crimina sunt furta quæ fiunt in viis regiis, virginum stupratio, domorum infractiones, & ipsarum incendia.

Sunt & alia tribunalia de quibus pauca tantum referemus; nimirum, Magni consilii Curia, Rationum Principis Curia, Tributarii

Senatûs conclave , Monetâlis Curia , Galliæ Mareſcallorum præfectura , præfectura rei maritimæ. Curia magni conſilii præſertim agit de rebus quæ ad beneficia ſpectant , de ſubſidiis ſupra merces impoſitis , de Ediſtorum contrarietatibus , de controverſiis inter ſupremos ſenatus obortis , & litigiis quæ inter Caſtrenſium præſectorum capitales Tribunos , *Prevôts des Mireſchaux* , naſcuntur. Rationum Principis Curia clientelæ profeſſiones accipit à Prælatiſ , Principibus , Ducibus , & aliis regni proceribus , qui ratione prædiorum regi obſtinguntur per clientelæ jura ; de regio patrimonio , ipſius alienatione & conſeſſione faciâ aliquando judicat ; Archiepiſcoporum , Episcoporum , regionum Abbatum ſacramentum , juſjurandum , & clientelæ profeſſionem in commentarios refert , modo juri regio ſubjiciantur ; & pro tunc horum vacantia cenſetur à morte Prælati , uſque ad talem inſcriptionem juſis jurandi alterius , quo intervallo beneficiorum fructus ad Regem pertinent. Hujus Curiæ judices inſuper verificant officiorum & magistratuum creationes , privilegia civitatum & provinciarum , nobilium titulos , Ducum , Marchionum , Comitum & Baronum dignitates creatas. Ad conclave ſenatus Tributarii ſpectat judicium de Veſtigalibus ordinariis & Tributis. Monetâlis curia ſuper legitimam nummorum compoſitionem , valorem . & pondus pronuntiat , de fabricatoribusque improbæ monetæ ſine appellatione decernit. Mareſcallorum juriſdictio exercetur per Prætorem , Proprætorem , & Præpoſitos generales , quorum ſen-

rentiæ feruntur sub nomine Comitum-stabuli & Marescallorum Horum primarius Comes-stabuli vices gerit; de dissentionibus inter Nobiles excitatis judicant, de litigiis inter milites obortis ratione stipendiorum, de militari disciplina decernunt; & super crimina eorum qui castra sequuntur, sententias ferunt. Jurisdictio denique rei maritimæ præfecti similiter per Prætores; Proprætores, Tabularium; & Apparitorem administratur, ad quos spectat judicium de rebus omnibus quæ navigationem concernunt.

His omnibus adjiciendum est utrumque Regis Consilium; quorum aliud vocatur publici statûs & regis pecuniæ consilium, *Conseil d'Etat & des Finances*, aliud verò consilium sanctius, *Conseil Privé, ou des Parties*. In primo agitur de regis pecuniâ, & in eo assident Rex pro libito suo, regni Cancellarius, postea Principes, deinde Duces regni, Pares, ærarii Tribuni, regis pecuniæ Directores, publici statûs Senatores, *Conseillers d'Etat*, supplicum libellorum magistrorum Decanus actualis & anterior, duo summi Censores, regis pecuniæ Tribuni ordinarii, sanctioris ærarii Tribunus, *Tresorier de l'Espargne*, & supplicum libellorum Magistri; cum hac distinctione, quod præcedentes sedeant, isti verò stent à posteriori parte senatorum publici statûs, cooperto capite. Eorum officium est causas referre, & dum ipsas referunt, stant à tergo Regis, capite detecto: hujusce consilii secretarii eundem locum habent ac supplicum libellorum Magistri, Sanctius consilium eodem modo

componitur ac præcedens, demptis summo ærarii Tribuno, Tribunis ordinariis, Directoribus & Cenforibus, adesse tamen possunt in illo pecuniæ Directores, tanquam Senatores publici statûs. Eundem locum observant supplicum libellorum Magistri, qui sunt numero duo & septuaginta, octodecim in quolibet trimestri; per tres menses in palatii supplicibus libellis exercent, & tribus sequentibus mensibus in utroque præfato consilio: in prima classe Parlamenti locum obrinent post præsides infultos, sed tantum quatuor in qualibet vice: omnium Prætorum & Seneschallorum sedes occupare, & jus dicere possunt. In hoc sanctioris consilii tribunali præsertim agitur de evocationibus quæ fiunt ab aliquo senatu supremo, & ad alium accessus datur litigantibus.

CONCLUSO SECUNDA.

IUS Canonicum est istud quo utimur in rebus Ecclesiasticis; & vocatur Canonicum à nomine græco, Κανών, quod est regula, in quantum per tale jus, seu per talem legem viri Ecclesiastici regulari debeant. Aliud est non scriptum, quod in consuetudine Ecclesiasticâ consistit; aliud est scriptum, quod vel ab Episcopis, vel à Summo Pontifice emanavit, sive in Conciliis, sive extra Concilia. Communiter jus Canonicum scriptum sumitur pro illo, quod continetur in *Decreto Gratiani*, in *Epistolis Decretalibus Gregorii noni*, in *sexto Decretalium Bonifacii octavi*, in *Clementinis* & *extravagantibus Ioannis vigesimi secundi*, & *aliorum Pontificum*.

Decretum, quod Gratianus monachus, ex

ordine Benedictinorum compilavit anno 1150;
 & quod approbavit Eugenius III. & confirma-
 vit postea Gregorius XII. tres partes habet.
 Prima continet distinctiones centum & unam,
 quæ subdividuntur in capita, seu canones; lo-
 ca autem ex illâ parte desumpta sic citantur.
Can. vel, c. humanum, dist. 1. Secunda pars
 causas triginta sex complectitur, quæ dividun-
 tur in quæstiones, & quæstiones in capita,
 sic de illâ parte fiunt citationes, *Can. vel c.*
Quicumque studet, 1. q. 1. id est, capite vel ca-
 none qui incipit per illa verba, causâ primâ,
 quæstione primâ. Tertia pars habet tracta-
 tum de Consecratione; qui dividitur in quin-
 que distinctiones, & quælibet distinctio in
 capita; & sic citari debent ista capita, *Can.*
vel c. vasa, de Consecrat. dist. 1. In primâ parte
 agitur de jure in genere, in viginti scilicet
 primis capitibus, & de personis seu ministris
 Ecclesiasticis, in omnibus reliquis. In secunda
 parte; de iis quæ concernunt formam judi-
 ciorum Ecclesiasticorum agitur; in causa ta-
 men trigesima tertia, quæstione tertia, con-
 tinetur tractatus *de Pœnitentia*, divisus in se-
 ptem distinctiones, quæ subdividuntur in ca-
 pita; & iste tractatus sic debet citari, *Can.*
vel, c. reperiuntur, de pœnit. dist. 3. Tertia
 pars agit de Consecratione Ecclesiarum, de
 Missarum celebratione, de Eucharistia, Festis,
 Ecclesiasticis ceremonis, Baptismo, Confirma-
 tione, & Jejniis.

Decretales compilatæ fuerunt de mandato
 Gregorii noni, per Remundum de Pennafort-
 ti Ordinis Prædicatorum, hujusce Pontificis

Capellanium & Poenitentiarium sanctæ Ecclesiæ Romanæ; exhaustæ autem fuerunt ex Gregorij IX. & aliorum Pontificum Epistolis & Constitutionibus; unde vocatæ fuerunt Decretales Epistolæ, quæ distinguuntur in hoc à Decreto Gratiani quòd multò magis compilatæ sint ex Epistolis Pontificum, quàm ex Conciliis; contra verò Decretum Gratiani plus nititur Conciliorum decretis, quàm Epistolis, aut Constitutionibus Pontificum. Quinque libros complectuntur Decretales, in quibus juris Canonici materia exponitur. Primus liber agit de Personis quibus competit jurisdictio aliqua, & de judiciorum præparatoriis. Secundus explicat judiciorum Ordinem. Tertius agit de rebus Ecclesiasticis quæ in iudicium venire solent. Quartus de Sponsalibus & Matrimonio. Quintus de Criminibus & Poenis. Decretales aliàs vocabantur, *extra*, quia erant extra Decretum Gratiani quod antea digestum erat; unde apud antiquiores sic citabantur, *extra de Iudais*, cap. *etsi Iudæos*: nunc autem, ubi ingrediuntur corpus juris Pontificii citantur sine adjecto, sic scilicet v. g. c. *Tua nos*, de *jurejurando*, & pro tunc intelliguntur libri Decretalium per excellentiam, & non citantur distinctiones, nec causæ, ut in decreto.

His quinque Decretalium libris *sextum* addidit Bonifacius VIII. ex Concilio Lugdunensi, Decretalibus Epistolis Pontificum successorum Gregorii, nonnullis ipsiusmet Gregorii novellis Constitutionibus, & multis etiam suis propriis compilatum, & hic liber vocatur *sextus Decretalium*, constans etiam libris quin-

que, cujus citatio fit eodem modo quo citantur Decretales, excepto quòd capita & tituli hujus libri citentur cum addito; dicendo scilicet, in sexto; sic v. g. c. *Volentes; de privilegiis*, in 6. Clemens V. paulò post Constitutiones edidit, partim suas, partim ex Concilio Viennensi, cui præsuit, desumptas; quas ipso mortuo, absolvit & publicare fecit Ioan. XXII. Ab ipsarum authore *Clementina* dictæ sunt, sicque citantur, *Clem. dudum, de sepulchris*; idest, *Clementinâ*, quæ incipit per hanc vocem; *dudum*, titulo, *de sepulchris*. Postea denique Ioannes XXI. Constitutiones edidit viginti; & post ipsius obitum diversæ à diversis Pontificibus exierunt, quæ *extravagantes* dictæ sunt; quia licet nunc sint de corpore juris, tamen aliquandiu extra illud, quasi sede incertâ, vagantes extiterunt: illæ autem sic solent citari, *extravag. unigenitus*, idest constitutione extravaganti, sub titulo, *unigenitus*.

Q U Æ S T I O IV.

Utrum Lex humana obliget in conscientia?

INTELLIGITUR hæc quæstio tam de lege civili, quàm de Ecclesiasticâ, proponi etiam potest de lege pœnali, ac de præceptivâ; ubi lex præceptiva est illa, quæ sancit aliquid esse faciendum, vel omittendum, nullâ constitutâ pœna; & lex pœnalis est illa, quâ aliquid præcipitur vel prohibetur sub tali pœnâ, quam iudex constituit, ut illi qui ad observationem

legis non trahuntur amore, timore poenæ ad illam pertrahantur. Denique, quandoquidem lex, ex dicendis, modò obligat sub peccato mortali, modò sub veniali; dicemus unde cognosci queat legem obligare sub mortali, vel veniali tantùm.

CONCLUSIO PRIMA.

LEGES civiles & Ecclesiasticæ habent vim obligandi subditos in conscientiâ, ita quòd eorum transgressio sit vel peccatum mortale aut veniale, etiam secluso scandalo & contemptu. Hoc habetur Rom. 13. *Subditi estote, non solum propter iram, sed etiam propter conscientiam: & antea eodem capite, qui potestati resistunt, ipsi sibi damnationem acquirunt: damnatio autem non acquiritur, nisi propter peccatum mortale. Quòd autem hoc debeat intelligi, nedum de legibus Ecclesiasticis, sed etiam de civilibus, patet ex 1. Petri 2. Subiecti estote omni humana creatura propter Deum, sive regi quasi præcellenti, sive ducibus tanquam à Deo missis, quia sic est voluntas Dei.* Ratio quam affert D. Thomas, est hæc validissima; quia leges humanæ, si justæ fuerint, habent suam authoritatem à lege æternâ, à quâ derivantur, ad Rom. 13. *Omnis potestas à Deo est, & qui potestati resistit, Dei ordinationi resistit;* atqui lex æterna habet vim obligandi in conscientiâ & sub peccato mortali: ergo & lex humana, sive sit Ecclesiastica, sive civilis. Nec dicant, omnia esse præcepta aut prohibita per legem æternam: ergo nil posse præcipi per humanam, Resp. licet nihil præcipiatur aut prohibeatur, quod non sit consentaneum legi æternæ & di-

vinæ; tamen plura humanitùs præcipiuntur; ut jejunia, auditio sacri, observatio festorum; & plura prohibentur, ut cessatio ab opere manuali in die festo, & usus carnum in Quadragesimâ; quæ tamen non præcipiuntur formaliter, nec prohibentur per legem æternam. Dixi in conclusione quòd leges humanæ obligent sub peccato, etiam secluso scandalo, contemptu, aut transgrediendi consuetudine, quamvis contrarium attribuitur Caietano; certum enim est, Catholicum peccare mortaliter, qui semel tantum, sine contemptu & scandalo, voluntariè omittit communionem Paschalem; sicut & Sacerdotem, qui horarum canonicarum lectionem prætermittit.

Objicit Calvinus lib. 4. Instit. Cap. 10. non posse condi ab hominibus leges civiles, quæ obligent in conscientiâ; primò quia potestas principum sæcularium est merè temporalis; ergo nullam habent potestatem super conscientias. Sed ad hoc respondetur quòd licet illorum potestas sit temporalis ratione objecti, est tamen per accidens spiritualis, ratione obligationis; in quantum pro eodem instanti quo aliquid præcipiunt quod pacem temporalem sui regni concernit, illicò Deus vult ut illis obediatur, sicut probat conclusio.

Objicit secundò, principes sæculares non judicare nisi de externis, & non de conscientiâ. Resp. quòd non judicent propriè de internis, sed solus Deus; attamen leges externas statuunt, quæ obligant conscientiam.

Objicit tertio, Regem non posse infligere poenam spirituales, nec ligare conscientiam.

Respondeo ut prius, posse utrumque facere consequenter; quia potest condere leges, quæ, si non observentur, ligant infractorum conscientiam; utitur enim potestate quam indidit illi Deus, quid dicit, *Per me reges regnant, per me principes imperant, &c.* Proverb. 8.

Objicit quartò, principem non intendere, quòd subditi ad peccatum obligentur. Resp. quòd intendat obligare simpliciter ad legem; & non potest hoc intendere, nisi intendat consequenter obligare ad peccatum.

CONCLUSIO SECUNDA.

NEDUM leges præceptivæ obligant in conscientia; sed etiam leges pœnales, quibus aliquid præcipitur, adjunctâ pœnâ transgressoribus: sunt tamen aliquæ leges mere pœnales, quæ nihil præscribunt, nec imperant, nisi solam pœnam, si quis hoc vel illud egerit; idest, non prohibent aliquid fieri, sed si factum sit, illud puniunt; pro tunc enit, inquit Gammachæus, non censentur legislatores obligare in conscientia, quandoquidem actum non prohibent, sed tantùm actui pœnam præparant: sic quando in jure habetur, *Si per negligentiam custodem evaserint Rei, leviter puniantur*; ibi est lex mere pœnalis, quæ non obligat in conscientia, quoniam tales evasores nullo modo peccant: sic etiam, inquit D. Thomas, sunt statuta quorundam Religiosorum, quæ ex intentione expressâ Fundatorum ad nullam obligant culpam, dempto contemptu, ut habetur in nostrâ Religione; obligant tamen ad pœnam. Nec dicatur esse ridiculum, quòd ubi nulla est culpa, infligatur aliqua pœna: nam licet in alla-

tis exemplis & similibus nulla sit culpa inoralis, quæ coincidit cum peccato; est tamen civilis, seu indecentia; decet enim & honestum est in vitâ civili, ut Superiori obediamus, qui præcipit aliquid sub poenâ tantum, & non sub culpâ.

Probatur utraque pars conclusionis, quòd scilicet & lex præceptiva, & lex poenalis obligent in conscientiâ; quia ubi est justum Superioris præceptum, ibi debetur obedientia, 1. Petri 2. *Subditi estote omni creatura propter Deum;* & alibi, *Obedite Præpositis vestris, etiam Discipulis:* & hæc obedientiâ in conscientiâ debetur, ad Rom. 13. *Subditi estote, non solum propter iram; sed etiam propter conscientiam;* sed tum in lege præceptivâ, tum in poenali intervenit præceptum Superioris: ergo, ubi justum & legitimum est, intervenit obligatio in conscientiâ, sub poenâ peccati mortalis vel venialis, juxta qualitatem materiæ. Hinc sequitur præceptum recitandi horas canonicas, datum initiato tantum tonsurâ clericali sub poenâ amissionis fructuum beneficii, obligare in conscientiâ; sicut & præceptum regis de justis vestigalibus solvendis. Sed quia antea diximus, aliquas leges esse merè poenales, quæ non obligant in conscientiâ, & hîc dicimus, leges poenales obligare regulariter in conscientiâ, licet præcipiant tantum sub poenâ, & non sub culpâ; dignoscendum est, quandonam leges poenales obligent tantum sub poenâ, & quandonam obligent sub culpâ & poenâ simul: ad quam difficultatem solvendam, affert Gamachæus has regulas; *Omnes leges obligant sub culpâ, quæ præcipiunt*

justè aliquid fieri, vel fieri vetant; quia ibi præcipitur actus, & tali præcepto debetur obedientia sub peccato. *Leges quæ nil prohibent aut jubent fieri, sed solum decernunt poenam, si hoc vel illud fiat, non ad culpam, sed ad poenam obligant*; quia ibi non est mandatum Superioris cadens super actum, sed tantum poena irrogatur, si actus fiat; & sic debet tantum subditus subire poenam, & non tenetur ad actum sub culpâ, modò non adsit scandalum aut contemptus.

Contrarium sentit Navarrus, præsertim de lege poenali civili, quam cum multis aliis quos citat Bonacina, putat non obligare sub mortali, quando decernitur in eâ tantum poena temporalis aut corporalis, etiamsi gravis sit, ut poena capitis & amissionis bonorum; quia, inquiunt, lex poenalis est odiosa, ergo restringenda est ad solam poenam; quia deinde legislator apponens poenam temporalem, censetur excludere æternam; ex regulâ juris, *qui unum exprimit & aliud tacet, censetur excludere quod tacet*, quia insuper subditi credere possunt, legislatorem contentum esse poenâ quam expressit, & non exigere culpam de quâ tacet. Bonacina autem, Suares, Toletus, & alii, tenent nobiscum, legem poenalem, etiam civilem, obligare in conscientiâ, nisi aliter constet de mente legislatoris, propter rationem allatam; vel nisi cognoscatur, illam esse merè poenalem per regulam præallegatam. Ad rationes aliorum respondet Bonacina; primò, legem rigorosam esse restringendam, nisi aliunde constet de mente legislatoris; constat autem, saltem implicite, quòd mens legisla-

toris præcipiens actum sub poenâ , sit obligare sub culpâ ; quia , ut diximus , præceptum est , & præcepto debent subditi obedire sub culpâ . Ad secundum dico , qui unum exprimit & aliud tacet ; istud excludit , si istud non sit implicitum sub alio , concedo : cum autem quis præcipit actum sub poenâ , censetur illum implicite præcipere sub culpâ , ratione præcepti , cui subditus in conscientia obedire debet . Ad tertium ; si parum instructi sint subditi , non debent credere quod illud non obliget in conscientia , quod præcipitur simpliciter sub poena ; imò culpa infertur ex præcepto sub poena , quia actus præcipitur , & præcepto debetur obedientia sub poena peccati .

CONCLUSIO TERTIA.

VT cognosceatur qualitas peccati sub quo lex obligat , recurrendum est ad voluntatem legislatoris ; qui si intendat obligare sub peccato mortali , aut veniali , taliter obligat ; modò voluntas illius iusta sit ; non potest enim in materia quæ est levis in se & in effectibus , obligare sub peccato mortali : licet in materia gravi possit obligare tantum sub veniali . Ratio hujus est , quia actiones agentium moralium non operantur ultra intentionem illorum . Et ratio primi petitur ex hoc , quod lex esset injusta , quæ levi materiæ poenam æternam imponeret . Si dicatur quod in Religionibus res leves (v. g. observatio silentii) præcipiantur sub peccato mortali ; & esum pomi sub reatu poenæ æternæ Deum prohibuisse Adamo : Respondendum est , res illas in se leves esse , & graves ratione finis intenti à legislatore ; superiores

Superiores enim Religionum intendunt conducere Religiosos ad perfectionem, & hoc per diversa media; quorum alia, licet sint in se levia, gravia tamen sunt ratione finis, quia ad illam perfectionem sunt maximè utilia. Sic dicendum est de prohibitione pomi, quæ gravis erat ratione finis; nam præcepit Deus illam abstinentiam in tributum & testificationem humanæ subjectionis ad Deum, quam potuit Deus exigere ab Adamo sub poenâ æternâ.

Si autem non possit consuli voluntas legislatoris, ut sciatur sub quo peccato aliquid præceperit; hoc habebitur ex sequentibus. Primò, quando legislator, qui prudens esse debet, aliquid præcipit aut prohibet in materiâ absolutè levisignum est, quòd obliget tantùm ad veniale; quando verò materia est gravis, signum est quòd obligare intendat sub mortali; licet enim materiam gravem possit prohibere, vel præcipere venialiter tantùm; hoc tamen inusitatum est legislatoribus. Secundò, quando legislator prudens imponit gravem poenam, sive æternam, sive temporalem, aut corporalem transgressoribus, ut cum v. g. illos capite plecti jubet, aut spoliari bonis, aut privari beneficiis, hoc redolet mortalem esse offensam; pro levi enim culpa injustum esset gravem irrogare poenam; nisi hoc fiat in terrorem aliorum; v. g. quando princeps venationem leporum prohibet sub poenâ capitis; tunc non committitur peccatum mortale, nisi aliquando ex adjunctis circumstantiis. In materiâ gravi obligatio censetur esse sub peccato, quando lex fertur sub verbis præceptivis, qualis

sunt ista; *Iubemus, obligamus, precipimus, mandamus, prohibemus, interdiciamus, debeant, teneantur non potest, non licet, faciant, caveant, audiant: dicant, abstineant, &c.* A fortiori cum dicitur, *precipio in virtute sancta obedientia; sub interminatione divini iudicii, sub indignatione Dei, aut sanctorum Apostolorum, sub pena aeterna, sub pena excommunicationis maioris.* Quando lex fertur sub verbis istis, *monso, hortor, rogo,* non contrahitur obligatio ad peccatum mortale; non enim sunt verba praecepti, sed potius consilii. Quoad verbum *oportet*; multi sentiunt illud non importare gravem obligationem, etiam in materia gravi; nisi illa appareat ex antecedentibus & consequentibus: alii volunt rectius illud importare regulariter obligationem ad peccatum mortale, nisi aliud constet de mente legislatoris per antecedentia & subsequenta: est enim illud verbum nota praecepti; unde in materia gravi probabilius est, quod obliget sub peccato mortali. Quando, attentis his omnibus, aliquis dubitat, an lex obliget sub mortali, vel sub veniali; probabile tenent Navartus, obligare tantum sub veniali; sed probabilius tenent Toletus, Medina, Valentina & alii, taliter dubitantes obligari ad illam legem, ac si illa lex obligaret sub mortali.

QUESTIO V.

An Leges humanae obligent cum vita periculo?

ALIIQUI putant omnem legem humanam obligare cum periculo vitae: Sic Cajetanus, cujus ratio est quod lex humana

obliget sub pœnâ peccati mortalis, & potius moriendum est, quam peccatum admittere. Alii volunt, legem humanam non posse obligare cum periculo vitæ; quia conservare vitam, est de lege naturæ; & lex naturæ præferenda est legi humanæ. Media est

CONCLUSIO.

ALICUANDO Leges humanæ obligant cum dispendio propriæ vitæ, aliquando non. Utrumque patet exemplo; primum scilicet in exemplo Ducis, qui in bello imperare potest militi, ut agat excubias in tali loco, nec stationem deserat, quocumque occurrente casu; etiamsi immincat periculum vitæ; lex autem illa est verè humana formaliter, licet radicaliter emanet à lege naturali, ratione fidelitatis in observando pacto, quo se obligavit miles ad defendendam rempublicam, etiam cum dispendio vitæ. Est, inquam, naturalis radicaliter, quia oritur immediatè à Ducis præcepto, sine quo non plus teneretur ille miles agere excubias, quàm alter; nec manere potius in hoc loco, quàm in alio: Exemplificatur de secundo; in lege jejunii & præcepto audiendi Sacrum, dispensamur ob necessitatem, infirmitatem & plurimas rationes. Nec dicat Cajetanus, nunquam licitum esse peccatum; quia in his casibus transgressio legis non est peccaminosa: nam in his occasionibus cessat ipsius obligatio, nec censetur legislator istos casus comprehendisse sub præcepto. Hoc patet ex lege divina; Christus enim v. g. præcepit integritatem Confessionis, à quâ tamen dispensamur ob timorem legiti-

munum revelationis, & alias rationes de quibus egimus, loquentes de Confessione: à fortiori lex humana non censetur obligare semper cum periculo vitæ, vel alterius gravis damni, quod judicari debet tale per prudentem virum ut sunt v. g. amissio membri, jactura fanæ, detrimentum notabile boni temporalis, perturbatio pacis etiam inter privatos; hæc omnia tollunt obligationem legis humanæ.

Si quærat autem, ex quo conjici possit, legem humanam obligare cum periculo vitæ? Afferunt Doctores duas responsiones. Primò, leges humanæ obligant cum periculo vitæ, quando observatio legis est moraliter necessaria ad conservandum bonum commune reipublicæ; naturalis enim ratio postulat ut quælibet pars exponi possit periculo ad conservationem totius, ut patet de quolibet homine, qui exponit manus, brachia, & pedes, ut totum conservet; unde graviter miles peccaret, nedum contra pactum, sed etiam contra præceptum Ducis, si stationem deferret in periculis subversionis exercitus per hostes. Respondent secundò, legem esse servandam cum dispendio vitæ, quando ipsius violatio cedit in contemptum fidei, aut legis & potestatis Ecclesiasticæ; ita ut, si quis Catholicus manducaret carnes in Quadragesimâ, ut mortem vitaret, quam ipsi minatur hæreticus, peccaret mortaliter; quia censetur contemnere religionem, quod est intrinsecè malum, & nunquam licitum; unde Machabæi mortem prætulērunt manducationi carnis porcine.

Cajetanus probare intendens legem hu-

manam obligare cum periculo vitæ, affert plures leges, quæ taliter obligare videntur. Prohibetur, inquit, primò Sacerdoti, nè sine veste faciâ & calice consecrato celebret; sed hoc non sic prohiberi respondeo, nisi hæreticus ad hoc cogeret in contemptum Religionis. Dicit secundò, absolutè prohiberi Matrimonium cum consanguinea, ubi dico licitum esse contrahere cum illâ externo ritu; sed non licet consummare illud Matrimonium: primum inquam licet, quia tale Matrimonium in gradu prohibito ab Ecclesiâ prohibetur tantùm jure humano, quod non obligat cum periculo vitæ: consummare verò illud non licet; quia, cùm Matrimonium illud nullum sit, ob metum gravem, non potest consummari sine fornicatione. Vult tertio, quòd miles teneatur manere in suâ statione, ubi imminet mortis periculum; & Pastor in suâ parochiâ tempore pestis, sed hoc verum est ob bonum commune, quod postulat, ut potius consulatur aliorum vitæ spirituali, quam suæ corporali, si alio modo ipsorum saluti succurri non potest; unde Joan. 10. habetur, *Bonus pastor animam suam ponit pro ovibus suis*; de milite respondimus antea. Ad jicit quartò Innocentium I I I. declarare, ex metu non licere communicare cum excommunicato; sed Pontifex loquitur de metu levi: quòd si hoc intelligat de metu gravi, hoc est de communicatione in crimine, quæ nunquam licet; non loquitur autem de aliâ communicatione, quoniam in multis hoc licet casibus, qui enumerabuntur, loquendo de censuris. Quintò tandem proponit, Carthusianos non

posse carnes manducare ad suæ vitæ conservationem ; ad quod respondent multi , ad vitandam mortem Carthusianos non tantum posse , sed debere carnibus uti , modò non esset periculum scandali ; quòd scilicet hoc fieret in contemptum religionis : sic Covarruvias , Azorius , Salas , & alii ; quia inquit Nicolaus I I I. cap. *exiit* , ab omni lege exempta est extrema necessitas ; & ut ait Azorius , in voto abstinendi à carnibus , subintelligitur naturaliter ista conditio , nisi esus carnum vitæ sit necessarius. Alii dicunt , & rectius , nō fallor , quòd licet ad talem carnum manducationem non teneantur ; tamen possunt illis uti in tali occasione , licet sanctius faciant , si abstinendo moriantur ; quia non tenentur vitam quovis modo conservare , sed illam postponere possunt sanctitati suæ professionis , ad conservandam vitæ disciplinam , & dandum virtutis exemplum.

Quæres , an aliquando liceat legem interpretari ? Antea notandum est , duplicem esse interpretationem legis : Prima est simplex , quâ in aliquo casu particulari explicatur mens quam habuit Legislatores in lege condendâ : secunda vocatur ad æquitatem , seu per *Epikeiam* , quâ explicatur mens quam legislator habuisset in aliquo casu , si illum prævidisset ; & est ex Arist. 5. Ethic. 1. cap. 10. quædam emendatio legis universalis , in aliquo casu particulari , in quo deficere videtur , & quem casum non prævidit legislator. Verbi gratia si lex prohibeat ne cives noctu arma deferant per urbem ; potest aliquis audiens hostes conscendere muros

civitatis ipsam devastaturos, domo exire armatus ut hostes depellat; & in hoc legem non violat; sed illam exponit per *Epiikiam*, seu emendat in hoc casu, ne summum jus sit summa injuria.

Respondeo primò, in lege naturali, divinâ & humanâ potest fieri simplex interpretatio. In lege Naturali constat, ubi Doctores interpretantur de homicidio prohibito jure naturali quòd possit fieri auctoritate divinâ, & publicâ, sicut & ob conservationem vitæ propriæ. De Lege divinâ constat; per illam enim præcipitur integritas Confessionis, à quâ quis censetur excusari, dùm adest periculum revelationis peccati quod fit per interpretationem. De Lege humanâ clarum est; quia si possit fieri interpretatio in lege divinâ & naturali, à fortiori in lege humanâ.

Respondeo secundò, quòd interpretatio, quæ dicitur ad æquitatem, seu per *Epiikiam*, locum non habeat in lege naturali, nec divinâ, sed in humanâ. Non habet locum primò in lege naturali, quia interpretatio ex æquitate est emendatio legis in aliquo casu particulari in quo deficit, ut patet in exemplo præallato; sed lex naturalis non deficit, quia non præcipit aliquid absolute, sed cum debitis circumstantiis, aliàs non obligat: ergo interpretatio per *Epiikiam* non cadit in legem naturalem. Neque etiam in legem divinam; quia talis interpretatio, seu correctio supponit defectum in aliquo casu particulari, quem non prævidit legislator; nullus autem est casus particularis quem Deus non præviderit. Quòd verò cadat *Epiikia*

in legem humanam, patet; quia legislator humanus condens legem generalem pro totâ communitate, non potest prævidere omnes casus particulares eventuros, nec proinde legem omnibus accommodare; unde aliquando corrigenda est per *Epiikiam*.

Respondeo tertio, ut pateat ad quem spectet legem interpretari quòd si evidens sit legem aliquam in aliquo casu non obligare, non est opus ad Superiorem recurrere, sed subditus potest illam exponere, & agere in isto casu contra verba legis: Si non sit evidens, an lex obliget, & subditus maneat dubius, Superiorem consulere debet, si potest; si non potest, debet agere juxta verba legis, nè agat contra conscientiam dubiam. Si subditus magis inclinet probabiliter in unam partem, debet adhuc recurrere ad superiorem, si adiri possit; si non possit adiri, probabiliorē sequatur. Si quæ-
ratur, an liceat interpretati Concilium Tridentinum, cum hoc prohibeat Pius IV. in Bullâ confirmationis Concilii; Resp. affirmativè, unde Pontifex intelligendus est de commentariis authoritativè factis super Concilium; non de illis quæ reverenter in re dubiâ fiunt communiter. Si quæ-
ratur ulterius, an declarationes Cardinalium Concili interpretum habeant vim legis; Resp. negativè, nisi publicentur in formâ; unde Urbanus VIII. decrevit die 11. Aug. an. 1632. nullam fidem illis esse adhibendam, neque in judicio, neque extra judicium, nisi solito sigillo, & subscriptione Cardinalis Præfecti, ac Secretarii ejusdem Congregationis munitæ fuerint.

Quæres, in quibus cesset obligatio legis? Respondeo, legem cessare vel ab intrinseco, id est cessante fine quæ est anima legis; vel ab extrinseco; & hoc fit pluribus modis; nimirum per revocationem, per contrariam consuetudinem, per dispensationem, & per privilegium, quibus addi potest non usus; si lex enim per decennium non fuerit ad usum reducta, cessasse videtur; modò intrà illud tempus casus aliqui intervenerint in quibus lex potuisset usitari. De his omnibus dicendum est.

Primò, cessante causâ finali legis, cessat ipsa lex; cessante enim causâ, cessat effectus. Sed notandum est, quòd si causa & finis legis esset tantum pro tempore aliquo, lex sopitur tantum, & non desinit; sed elapso tempore, novæ resumit vires, & non indiget novâ promulgatione. Si etiam sint plures causæ & fines legis, cessante unâ, non cessat lex; sed ratione causarum remanentium suum robur semper retinet. Quòd si causa legis cesset pro uno particulari, & maneat pro aliis, lex non minùs obligat illam particularem personam: Lex, v. g. prohibet certam vestium pompam, ne depauperentur familiæ; ille qui tali periculo non subest, non minùs legem observare debet. Sic ob periculum incontinentiæ prohibetur egressus monialium, & ingressus ad illas; & ob periculum perversionis prohibetur universaliter lectio librorum hæreticorum; hæ leges afficiunt ilas personas & illos casus, ubi non subest specialiter periculum, quod generaliter natum est subesse; finis enim legis est tollere & vitare periculum generale quod ma-

net, & non tantum speciale quod cessat: Unde ridiculi planè videntur illi qui dicunt cessare legem jejunii respectu eorum, qui non tot experiuntur motus concupiscentiæ manducando carnes, quot sentiunt piscibus utendo: Ridiculi sunt, inquam; quia licet in tali lege absit finis extrinsecus jejunii, nempe carnis mortificatio; non tamen deest finis intrinsecus, nempe honestas Temperantiæ. Ad id quod allegant, usum piscium augere concupiscentiam; respondendum est, illum in jejunio non præcipi.

Secundò, per revocationem, seu per abrogationem leges desinere solent. Abrogatio autem fieri potest per illum qui tulit legem, per successorem, aut illius superiorem; successor enim & superior legislatori æquivalent. Quòd Legislator legem abrogare possit, patet; quia lex, & vis obligandi legis pendet à legislatore, qui antea voluit condere legem, & postea illam revocare peroptat. Revocatio fieri solet ob ingenii humani inbecillitatem, subditorum mutationem, & legum multitudinem. Ob ingenii nostri tenuitatem; quia cum omnia considerata non perspicue attendamus, temporis successu videmus aliqua esse inutilia, quæ antea videbantur utilia. Ob subditorum mutationes; illorum enim ingenia, inclinationes, occupationes, & negotia tot mutationibus sunt obnoxia, ut leges modò illis profint, modò obsint. Ob multitudinem denique legum, certas quasdam revocant legislatores, nè populi onus nimium sit & importabile. Licet Legislator revocare possit legem suam vel prædecessoris, etiam si sit confirmata

per superiorem, v. g. per Papam (quia talis confirmatio est tantum regulariter accidental-
lis, ad legis maiorem auctoritatem) non fa-
tis derogare censetur legi speciali, nec privi-
legio concessio, per clausulas generales, ut pa-
tet ex hac regulâ juris, *generi per speciem dero-
gatur*, id est ex glossâ & doctoribus, lex specia-
lis præcedens derogat legi generali subsequen-
ti. Hoc determinavit Bonifacius VIII. c. 1. *de
constit. in 6.* ubi expressè pronuntiat, statuta &
constitutiones speciales non revocari per le-
gem generalem, nisi de illis fiat specialis men-
tio. Hoc notandum est contra privilegiorum
impugnatores.

Tertiò, per consuetudinem contrariam irri-
tantur leges; consuetudo enim habet vim le-
gis, *ff. de legibus lib. 1. tit. 1. lege 33. diuturnâ
consuetudo pro iure & lege observari solet*: sicut
ergo lex posterior priorem abrogat, sic con-
suetudo legem. Hoc tamen intellige de legibus
humanis; si enim fuerit consuetudo contraria
legi naturali aut divinæ, est potius corrupte-
la, quàm consuetudo; & tanto peior, quanto
antiquior. Vocatur autem consuetudo jus
quoddam moribus institutum, quod pro lege
suscipitur, cum deficit lex, inquit Isidorus
apud Gratianum. Vel secundum alios, est jus
non scriptum, quod ex longo & continuo usu
receptum est. Tria facere potest consuetudo;
nimirum veterem legem abrogare, novam in-
stituire, dubiam interpretari. Ut hæc omnia
faciat, debet esse rationalis, antiqua, & ali-
quo modo obtinere consensum principis. De-
bet primò esse iusta, c. *finali, de consuetudine*;

quia habet vim legis & lex justa esse debet: sed quomodo justa esse potest, cum abroget legem principis, quæ justa est? Respondeo, utramque posse censeri justam, propter diversas rationes probabiles; deinde lex potuit esse justa ab initio, & postea propter varias mutationes potuit desinere esse justa & utilis; unde justior aliquando sequitur consuetudo, quæ etiam si inceperit cum peccato, excusat tamen à peccato, quando legitime & juste introducta est: justa autem censetur & rationalis, quando ex una parte est utilis Communitati, & ex alia non est contra legem naturalem aut divinam. Quantum ad tempus quo consuetudo vim acquirit, distinguendum est; si introducatur à populo cum consensu expresso principis, nullum tempus requiritur, quia sufficientem vim dat illi voluntas principis. Si introducatur de consensu tantum tacito vel præsumpto principis, jura exigunt regulariter decem annos contra legem civilem & quadraginta contra Ecclesiasticam. Non tamen hoc sic intellige, quod subditi peccent toto illo tempore quod antecedit illos decem vel quadraginta annos, si admittant actus contra legem, & consuetudo non sit perfectè introducta: Sed hoc explicari debet de foro externo, quod scilicet subditi subjicerentur poenis, si ante decem vel quadraginta annos violarent legem; licet in foro interno non peccarent, quando consuetudo ita invaluit, ut plerique viri justi, docti, & prudentes illam sequantur. Porro, lex prohibens consuetudinem, abrogari potest per consuetudinem; nisi illa consuetudo quæ prohibetur per

legem, sit reprobata à lege, tanquam iniqua & irrationabilis, inquiunt Doctores; alias illa clausula quam addit legislator, *non obstante ullâ consuetudine*, intelligenda est de præexistente consuetudine: quòd si loquatur de subsequenti, in hoc casu lex non prohibet consuetudinem, nisi quamdiu principi placet, & non amplius illi placet quando consuetudo contraria introducta est; quia censetur illam approbare tacite, vel expresse.

Quartò, per dispensationem legis obligatio cessat; dispensatio enim est actus jurisdictionis, quo aliquis eximitur ab obligatione legis, perseverante adhuc obligatione respectu aliorum; in quo dispensatio differt à legis revocatione, in quâ obligatio definit quantum ad omnes. Dispensatio aliquando fit ad tempus & tunc habet rationem suspensionis legis; aliquando in perpetuum, & tunc est exceptio legis. Aliquando fit in totum, ut quando alicui relaxatur culpa & poena; aliquando tantum in partem, ut cum unum solum remittitur, & retinetur aliud. Quòd rationabilis possit fieri legis dispensatio, patet ex praxi continuâ Ecclesiæ, quæ regulariter dispensat; & ex vulgari usu principum, qui respectu multarum suarum legum obligationem suspendunt. Patet denique ex Concil. Trid. *sess. 25. cap. 18. de Reformat.* ubi docet expedire, quòd legis vinculum aliquando relaxetur. Soli Superiores habentes jurisdictionem in foro externo dispensare possunt; uti sunt Papa, Episcopi saltem confirmati, Prælati regularium, imò & ipsorum Confessarii, ex speciali privilegio, &

Principes sæculares; non autem Parochi regulariter, nisi ex commissione: quia non sunt Prælati, nec habent jurisdictionem in foro externo: possunt tamen aliquando declarare suas oves esse legitimè dispensatas propter necessitatem à lege jejunii, auditionis sacri, & vacationis à servili opere in die festo. Ad dispensationem requiritur voluntas interior dispensantis, quia actus agentium moralium non operantur ultra intentionem eorum; unde cum aliquis cognoscit se facto animo esse dispensatum, non potest uti dispensatione, antequam renovetur sermō. Requiritur postea, quod voluntas interior dispensantis manifestetur exteriùs; non posset enim quis exercere actum prohibitum, nisi sibi constaret se dispensatum esse à lege prohibente. Dispensatio tacita superioris aliquando sufficit; ut si pontifex præcipiat irregulari ut Missam celebret, cognoscendo illum esse irregularem; censetur enim ipsum tacitè dispensare, jubendo actionem quæ non potest fieri sine dispensatione & ablatione impedimenti. Ut superior licitè dispense, justa causa requiritur, ex Conc. Trid. sess. 24. cap. 5. de Reformat. Matrim. ubi ordinat, dispensationes Matrimonii non nisi ex causâ concedi debere; & cap. 18. sess. 25. docet, dispensationes concedere sine justâ causâ, nîl aliud esse, quàm unicuique ad leges transgrediendas præbere aditum: unde non sunt omittenda præclara D. Bernardi verba; lib. 3. de Considerat. cap. 4. in fine, *ubi necessitas urget, rationabilis dispensatio est; ubi utilitas provocat, dispensatio laudabilis est: utilitas dico, communis, non pro-*

pria; nam cum nihil horum est, non planè fidelis dispensatio est, sed crudelis dissipatio. Ratio hujus est, quia dispensatio talis sine causâ vergit in contemptum legis, in disciplinæ Ecclesiasticæ ruinam, & in justitiæ distributivæ detrimentum, distrituendo onera imparia; unde hoc est nocere bono communi. Causæ quæ justæ censentur ad concedendam dispensationem, sunt gloria Dei, bonum commune vel proximi, reparatio honoris, utilitas privata animæ & corporis illius qui dispensatur, ejusdem fragilitas, & similes, quæ justæ censentur prudentum arbitrio; ubi attendendum est ad commune axioma, *Quod sit melius de nimia pietate, quàm de severitate redargui.* Addunt Doctores pro causâ extrinsecâ, impositionem alicujus majoris pecuniæ pro bono communi Ecclesiæ distribuendæ; & hæc causa vulgò locum habet in dispensationibus circa Matrimonium. Quamvis illicita sit dispensatio quæ datur sine causâ, & sine cognitione causæ, tamen valida est, quando fit in lege humana, à se lata, vel ab habente jurisdictionem æqualem; sicut enim lex à legislatore pendet in fieri, sic & in conservari; & sicut illam non condere potuit, sic & de illa dispensare valet. Quia tamen hoc licitè facere non potest, non debet quis ab illo talem dispensationem exigere, ne ad peccatum proximum suum inducat. Quantum ad potestatem dispensandi; diximus antea quòd ipsa competat omnibus jurisdictionem externam habentibus; & apud illos etiam delegandi potestas residet, & non apud alios, *L. More. ff. de jurisdictione*, ubi habetur, *more majorem ita compa-*

ratum est, ut is demum jurisdictionem mandare possit, qui eam suo jure, non alieno beneficio habet. Potest ergo quilibet Superior ordinario jure dispensare super legem à se latam, idemque potest in jurisdictione successor, aut Superior. Dixi, Superior in jurisdictione; & ob hoc, quia Archiepiscopi non sunt suis suffraganeis superiores in jurisdictione, nisi in casu appellationis, sed tantum in dignitate quâdam; ideo super leges istorum non possunt illi dispensare. Utrum Papa dispensare possit super ea omnia quæ continentur in jure canonico, & quæ sunt Conciliis generalibus confirmata; hoc pendet ex illâ quæstione, an Papa sit supra Concilium. An verò inferiores Prælati possint dispensare super leges Superiorum; hoc nequeunt regulariter, dispensatio enim est actus jurisdictionis, & nullam Episcopi, v. g. habent in Papam; unde, si Episcopi dispensent regulariter in votis communibus; hoc illis conceditur ex usu Ecclesiæ, quæ rectum judicavit, ut Episcopi nomine Dei talia vota relaxent, ob frequentes casus qui eveniunt. Aliquando tamen in legibus Papæ possunt dispensare Episcopi: Primo, quando in jure conceditur in definitè potestas dispensandi; hoc potest intelligi de Episcopis, quia favores sunt ampliandi. Secundo, quando materia est levis; non est enim verisimile quòd pro levibus astringat S. Pontifex, ut Romam quis adeat. Tertio, quando dispensandi occurrit frequens necessitas, ut in legibus jejunii, festorum, & similibus; tunc enim ob bonum commune Papa censetur illam potestatem concessisse. Quarto, quando occurrit

gravis necessitas, ut pauperies, periculum honestum, honoris periclitatio in mulieribus, &c. Nec in his casibus tenentur Episcopi procurare suis sumptibus dispensationem; unde pro impedimentis occultis ante & post Matrimonium dispensare possunt in foro conscientiae. Porro, licet superiores suos subditos extra territorium dispensare possint; an possint alienigenas dispensare in suo territorio existentes, distinguere debet; hoc posse quidem facere in legibus communibus & municipalibus; id est, quae spectant ad talem locum, ut sunt jejunia, festa, & similes; non posse verò in particularibus istis, scilicet juramenti, voti, irregularitatis, ista enim omnia quasi personalia videntur, & super exterorum personas Episcopi non habent jurisdictionem.

Per privilegium denique cessare videntur leges, ut patet per etymologiam nominis; privilegium enim ita dicitur, quia privat lege, vel quia est lex privata, à lege communi dispensans. Privilegium differt à lege in his; quòd lex ex sua natura sit perpetua, concedatur Communitati perfectae, solemniter promulgari debeat, vergat in bonum commune, & subditum obliget; Privilegium verò ad tempus concedi valeat, concedatur Communitati imperfectae, v. g. religionibus, non sit promulgandum, vergat in bonum privatum, & privilegiatum non obliget (quia est gratia, non onus) nisi hoc praecipitur in privilegio, aut nisi per illud privilegiatus habilis fiat ad actum lege praescriptum; & sic Regulares per privilegium exempti à communi interdicto, tenentur uti

illo, ut missam audiant die festo. Aliud est privilegium contra jus quod scilicet dispensat à lege impositâ, ut quando quis dispensatur à lege jejunandi; aliud verò est non contra, sed præter jus quod permittit aliquid quod non erat ex jure concessum; ut facultas prædicandi, absolvendi, dispensandi, &c. Privilegium ergo latius patet dispensatione; quia Dispensatio est contra jus, seu contra legem: dispensatio enim fit à lege obligante; & Privilegium se extendit tum ad ea quæ sunt præter jus; tum ad ea quæ sunt contra jus. Forma interna privilegii est intentio concedentis, externa verò regulariter est scriptura; unde vocatur aliquando Rescriptum, vel Indultum, aut Breve, aut Bulla: hoc tamen non impedit quin concedi possint privilegia verbo tenus, quibus uti possint privilegiati in foro conscientie Privilegium est vel personale quod immediate conceditur Personæ ratione sui, v.g. Petro, Paulo, &c. vel reale quod confertur directe alicui domo, templo, dignitati Episcopali, officio particulari, personæ fictæ, qualis est religio & religiosi, aut pupilli; pro tunc enim privilegia conceduntur non tam personis ratione sui, quàm ratione qualitatis & conditionis in quâ sunt. Si in formâ privilegii apponatur dignitas, & non fiat mentio personæ, ut quando dicit Sedes Apostolica, *concedo Episcopo Bajocensi talem gratiam*, illud privilegium censetur reale, & transit ad successores: si verò dirigatur expressè ad personam, vel si innotescat, ad illam dirigi, per aliquas circumstantias præcedentes vel subsequentes, ut si habea-

tur, *tuam diligentiam agnoscetes, tibi Episcopo Bajocensi concedimus*; privilegium est personale, & ipso mortuo, moritur. Quòd si hoc dignosci nequeat, Doctores respondent, privilegium debere censerì reale, si non sit in præjudicium tertii, nec sit contra jus commune; quia tunc est beneficium ampliandum: si verò sit contra jus commune, aut tertio noceat, censerì debet personale & expirans in morte privilegiati: quia est privilegium odiosum, quod restringi debet. Privilegium ille solus concedere valet, qui auctoritatem obtinet publicam; & ille solus potest illud accipere, qui est superiori subditus: pro tunc autem potest uti privilegio extra territorium concedentis, ut patet de illo qui licentiam habet audiendi Confessiones in Dioecesi Bajocensi, & potest audire quoscunque hujus Dioecesis extra illam; intellige hoc, modò non limitetur privilegium ad talem locum. Dupliciter conceditur privilegium; nimirum ad instantiam, & ex motu proprio. Primum innotescit ex narratione supplicationis, quæ solet præcedere; secundum patet ex his verbis, *motu proprio, ex mera nostrâ liberalitate, non ad instantiam*: quæ si non exprimuntur, privilegium censetur datum ad instantiam. Quando datur motu proprio, subreptitium nunquam censendum est; sed ut tale potest haberi, si detur ad instantiam; quia potest sub falsâ enuntiatione postulari. Privilegia non cessant per mortem concedentis, quia sunt gratia, & gratia semel accepta non dependet in conservari ab influxu donantis, nisi hoc exprimatur in concessione. Non

cessant etiam per cessationem causæ, sicut nec aliz donationes; unde donatio Decimarum alicui monasterio ob paupertatem, non cessat, cessante pauperie illius. Sed cessant privilegia primò per renuntiationem exterius factam & acceptatam; unde si quis renuntiaverit tantùm animo, vel non acceptetur renuntiatio externa, potest adhuc privilegio frui, si velit: quòd si privilegium sit in commodum alicujus statûs, non potest privata persona renuntiare suo privilegio; unde qui percuteret Clericum consentientem, non minus excommunicationem incurreret. Privilegium non cessat per non usum privativum, quia habens privilegium non teneatur eo uti, nec ulli conceditur, sub hac restrictione; quòd si eo non utatur, illud amittat; si sit tamen in gravamen alterius, potest cessare per non usum, sufficienti elapso tempore, per quod præscriptio currere potest, sicut in qualibet aliâ servitute. Ad præscriptionem contra Laicos, decem anni requiruntur inter præsentem, & viginti inter absentes; contra Ecclesiam requiruntur quadraginta anni, & centum contra Ecclesiam Romanam; contra Regulares jure communi requiruntur quadraginta anni, & ex privilegio Eugenii IV. sexaginta; imò, in concessione factâ Benedictinorum monasterio sancti Pauli extra muros Romæ, centum requiruntur; illi autem privilegio participant per communicationem alii Regulares. Amittitur privilegium postea per abusum; nam *ex cap. ubi, dist. 74 privilegium meretur amittere, qui permissa sibi abutitur potestate*: sed ille abusus debet declarari per sententiam judicis, qui respectu

Regularium est supremus Pontifex. Tandem privilegia cessare dicuntur per revocationem succedentis, & ipsius successoris aut superioris, maximè, si sint gratuitò concessa; si enim sunt remuneratoria, absolutè quidem revocari possunt, requiritur tamen gravis & urgens causa, ut rationabiliter revocentur; privilegia autem Regularium remuneratoria sunt; ut patet ex Bullâ Pii V. *Quia si mendicantium Ordines*, ubi habet, *pro suis sanctis studiis, honestisque laboribus, proque salute animarum ab Apostolica sede (cujus continuè pacem & dignitatem Ordines ipsi fortiter tutati sunt) tam spiritualia, quàm temporalia subsidia acceperint*; sic etiam loquuntur alii Pontifices.

Quantùm ad privilegia Regularium, dicam tantùm, illa non esse revocata, quidquid dicant Antiregulares, hoc factum fuisse primò in Concilio Lateranensi, & deinde in Tridentino. Si enim in Lateranensi aliqua privilegia modificata fuerint, præcipua tamen in eo confirmata fuerunt, v. g. quòd possint audire Confessiones sæcularium, etiamsi injustè neget illis Episcopus approbationem, & hoc in omni tempore, etiam ut satisfiat præcepto annuæ Confessionis; imò & in infirmorum domo, dum ab illis postulantur, absque eo quòd Pastores hoc impedire valeant, nec alia Sacramenta ægrotantibus negare. Hoc habetur in Bulla, *dum intra*, in Conc. 1. Lateran. Sess. 11. Quoad Concilium Tridentinum; verè quidem aliqua revocavit, præsertim illa quibus ab Episcoporum examine regulares erant liberi, sicut à præsentatione sui coram illis, ut acciperent absolvendi potesta-

tem, dum ipsi Episcopi erant ultrà duas diœtas; postea tamen Sess. 25. de Regular. addit Concilium, *in ceteris omnibus, prefatorum Ordinum privilegia & facultates, quæ ipsorum personas, loca, & jura concernunt, fixa sint & illaesa*. Videant ergo adversarii, quòd in prædictis Conciliis abrogata non fuerint, sed confirmata Regularium privilegia. Quòd si Gregorius XIII. in Bullâ quæ incipit *in tanta rerum*, certas quasdam gratias à Pio V. regularibus concessas revocaverit; ipsemet paulò post in Bullâ *quanto fructuosius*, quæ est 26. apud Rodericum; generaliter confirmavit ex certâ scientiâ omnia privilegia antea regularibus concessa, non obstantibus quibuscumque contrariis Constitutionibus. Si etiam Gregorius XV. privilegia regularium restringat in Bullâ *inscrutabili*; illicò agnoscit, hoc non debere fieri; unde Cardinalibus Concilii Tridentini interpretibus præcipit ut Regulares conservent in suis pristinis libertatibus & privilegiis: hæc autem declarationes in Bullario Romano existunt post præcedentem constitutionem. Adde quòd Urbanus VIII. in Bullâ *alias felicitis* sub datâ 7. Febr. an. 1625. omnes & singulos articulos prædictæ constitutionis Gregorii XV. revocaverit, in his quæ contraria sunt exemptorum privilegiis: in Bullâ etiam *in plenitudinem*, ex certâ scientiâ confirmavit Mendicantium privilegia, & præ ceteris *Mare magnum*. Porro, si alicubi per regulas generales, omnia ad jus commune revocantes, videantur talia privilegia abrogari: Notandum est, privilegia particularia non censi revocata, nisi eorum revocationis fiat expressa men-

tio, sub his aut similibus verbis; *non obstantibus quibuscumque privilegiis, etsi in illis expresse caveatur, quòd non censeantur revocata, nisi de verbo ad verbum fiat illorum mentio.* Hoc habetur *cap. veniens, de præscript.* ubi habetur, *privilegiis non existit derogatum, cùm de ipsis nulla sit mentio.* Quod etiam confirmat regula juris Canonici, *generi per speciem derogatur, non è contra;* hoc est, lex particularis derogat quidem legi universali; sed lex generalis particulari non derogat, nisi fiat de istà mentio expressa; cujus ratio esse potest, quòd legislator possit præsumi legem particularem ignorasse, & proinde non revocasse, quando legem universalem condidit. Si quærant aliqui, an Regularium privilegia à Rege nostro recepta fuerint; respondetur illico, D. Ludovicum Religiosos Mendicantes Parisiis acceptasse cum omnibus suis privilegiis; Ludovicum XIII. inter alios permisisse per sui Consilii edictum an. 1634. ut Regulares Rothomagxi uterentur omnibus privilegiis à summo Pontifice concessis; & nuper Ludovicum XIV. per Edictum, datum an. 1641. die 11. Martii excusationi mandari jussisse Breve Innocentii X. quo Regularibus Burdegalensibus licet absolvere intra quindenam Paschalem; quod quidem Breve incipit: *exponi nobis nuper fecerunt*, 7. Febr. 1645.



::***:***:***:***:***:***

DISPUTATIO TERTIA.

De Censuris.

QUONIAM diximus alias, triplicem esse legem; præceptivam scilicet, quâ aliquid jubetur sub culpâ tantum, & non sub poenâ; poenalem aliam, quæ non præcipit actum, sed tantum poenam pronuntiat, si elicitus fuerit actus, ut cum dicitur, si quis hoc fecerit, tali poenæ subjaceat; tertiam denique, quæ mixta dicitur, quia præcipit actum sub aliqua poena, vel illum prohibet; & tunc qui talem violant, & culpam contrahunt, & poenæ subjiciuntur; Ex his sequitur, transgressores legum aliquibus poenis subjacere; civilibus nimirum, si leges, quæ infringuntur, civiles sint; & canonicis, si leges sint Ecclesiasticæ. Postquam ergo de legibus loquuti fuimus in utraque disputatione præcedenti, in prima siquidem de legibus in genere, in secunda verò de qualibet lege in particulari; nunc de poenis contra infractores legum dicere superest, maximè de Canonicis, quæ Censuræ Ecclesiasticæ nominantur; aliæ enim ad nostrum institutum non spectant. Dicemus autem de illis, & in genere & in specie, per multas inquisitiones, quas quæstionibus generalibus subjiciemus brevitatî causâ & claritatis.

QUESTIO

QUÆSTIO PRIMA.

De Censuris in genere.

SIcut duplex est forum in Ecclesiâ, interius scilicet & exterius; sic duplex est potestas, quæ nomine clavium Ecclesiæ designatur; prima est potestas interna, quæ extenditur ad remittendum & retinendum peccatum in foro Pœnitentiæ; secunda est exterior, quæ extenditur ad ligandum vel solvendum per censuras Ecclesiasticas. Ut potestas utraque ritè exerceatur, duplex requiritur actus, quorum unus consistit in discussione causæ, & dicitur clavis scientiæ; alius verò consistit in validâ, & licitâ pronuntiatione sententiæ, & vocatur clavis potestatis. Hoc posito,

Quæres primò, quid sit Censura secundum nomen? Resp. nomen censuræ deduci à censorum munere: Censores autem apud Romanos erant morum magistri, à censendo & arbitrando sic dicti; ad illorum quippe officium pertinebat civium mores perquirere, malos emendare, & indignos ab honoribus deponere. Ab illo ergo munere vox censuræ derivatur, quæ idem est ac severa correctio, seu multa aliqua, quæ loco pœnæ imponitur ab Ecclesiâ, ad Ecclesiasticæ disciplinæ manutentionem.

Quæres secundò, an sit in Ecclesiâ potestas ferendi Censuram. Resp. affirmativè; Matthæi enim 16. collata est potestas Apostolis

ligandi, his verbis scilicet; *quodcumque ligaveritis super terram, erit ligatum & in calis*: verba autem ista sunt generalia, inquit Bellarminus lib. 1. de Summo Pontif. cap. 15. & alii: ergo possunt extendi ad forum externum in quo feruntur Censuræ, quando hoc exigit bonum Ecclesiæ regimen. Hoc confirmatur ex Concilio Constantiensi, in quo vicleffus hoc negans condemnatus fuit; sicut ex communi usu Pontificum; imò, Urbanus primus in Epistolâ Decretali ad universos Episcopos, mentionem facit Excommunicationis; & ante ipsum Pontificem, Canon Apostolorum quartusdecimus, ubi habetur, *si quis clericus in cauponâ cibum capere deprehensus fuerit, à communione excludatur*. Hoc & habetur in pluribus aliis Apostolorum Canonibus. Sic Patres tradunt, Paulum 1. Cor. 5. incestuosum excommunicasse, dum ibi dixit; *judicavi, congregatis vobis in nomine Domini, & meo spiritu cum virtute Iesu Christi, tradere hujusmodi hominem Sathana in interitum, ut spiritus salvus sit in die Domini nostri Iesu Christi*. Primæ etiam ad Timoth. 1. excommunicavit Alexandrum & Himenæum, dicens; *ex quibus (qui circa fidem naufragaverunt) est Himeneus & Alexander, quos tradidi Sathana, ut discant non blasphemare*.

Quæres tertio, quid sit Censura? Resp. quod sit *pœna spiritualis, privans hominem baptisatum usu aliquorum bonorum spiritualium; non quidem perpetua, sed qua posita emendatione, tolli debeat; & hoc in ordine ad salutem*. Pœna tenet locum generis, quia omnis Censura

est poena, non tamen omnis poena est Censura, ut patet de irregularitate, suspensione, degradatione, & cessatione à divinis, quæ sunt poenæ spirituales, non tamen sunt censuræ, ut diximus. Dicitur secundò, *spiritualis*; quia est poena animæ, quæ nunquam imponitur, nisi ratione criminis. Dicitur tertio, *privans hominem baptismatum*; subjectum enim censuræ est fidelis, qui per Baptismum fit subditus Ecclesiæ; non infidelis, qui cum non sit intra Ecclesiam, ipsius jurisdictioni non subijtitur. Dicitur quartò, *privans usu aliquorum bonorum spiritualium*; non tendit enim ad temporalia per se, ut leges civiles, quæ poenas temporales imponunt, pecuniarias scilicet vel corporeas; ubi leges Ecclesiasticæ privant aliquibus bonis spiritualibus, ut usu Sacramentorum, suffragiorum participatione, Ecclesiasticorum munerum exercitio, &c. non tamen omnibus bonis privant, sed tantum externis: non internis, qualia sunt character, gratia, virtutes, actiones meritoria; hæc enim omnia non possunt auferri ab homine invito; unde excommunicatus aliquis potest actum contritionis elicere circa omnia sua peccata, & circa illud propter quod excommunicationem contraxit; & pro tunc censebitur absolutus in foro interiori, eritque in gratia, & poterit mereri; licet non sit absolutus in foro exteriori ab excommunicatione, quæ cum remaneat aliquando post recuperatam gratiam, privat adhuc hominem etiam iustificatum bonis spiritualibus externis. Quòd si illum privet bonis temporalibus, nimirum usu beneficii, salutatione, honore, aliorum

communicatione, hoc est semper in ordine ad spiritualia. Dicitur quintò, *non perpetua, sed qua possis tolli, posita emendatione*; Censuræ enim sunt pœnæ medicinales, quæ relaxari debent positâ sanitate; unde depositio & degradatio, quæ de se perpetuæ sunt, non sunt Censuræ; quia privant hominem, non tantum usu, sed potestate utendi bonis spiritualibus. Subjungitur denique, *in ordine ad salutem*; ut ostendatur mens Ecclesiæ, quæ non intendit per Censuras animæ damnationem, sed resipiscentiam à contumaciâ, & abstinentioniam à peccatis, in quorum pœnam injungitur Censura.

Quæres quartò; quotuplex sit Censura? Multi sentiunt sex esse Censuras; nempe Excommunicationem, suspensionem, interdictum, depositionem, degradationem, & irregularitatem, maximè illam; quæ contrahitur ex delicto. Melius tamen est, si dicamus, tres tantum esse; nimirum Excommunicationem, suspensionem, & interdictum; Innocentius enim III. *cap. querenti, de verborum significatione*, interrogatus, quid nomine Censuræ in Pontificum rescriptis esset intelligendum, respondit, non solum interdictum, sed & Excommunicationem & suspensionem intelligi debere; si autem præter has essent aliæ, non sufficienter Pontifex quæstioni propositæ respondisset. Dicendum ergo est quod irregularitas non sit propriè Censura; quia non tamen est pœna, quàm inhabilitas & indecentia quædam ad Ordines suscipiendos, & exercendos, & ad Ecclesiastica munera obeunda. Depositio & degradatio non sunt etiam censuræ; nam censura ex suâ

institutione aufertur, positâ resipiscentiâ : Degradatio verò & depositio carent spe remissionis, & si daretur cum spe illas revocandi ad tempus, essent aliquod genus suspensionis; sed cõmuniter degradati & depositi non reabilitantur, unde istæ pœnæ vocantur vinculum indissolubile, & censuræ vinculum dissolubile. Distinguuntur depositio & degradatio secundum magis & minus; si enim aliquis amoveatur à particulari & determinato gradu Clericali, alio remanente, illa pœna vocatur degradatio; sic quando quis privatur celebratione Missæ, potest adhuc officium Diaconi exercere: si ab omnibus gradibus amoveatur, est depositio. Quoad cessationem à divinis; non est Censura; quia non imponitur per modum pœnæ, sed per modum luctûs ob injuriam Deo vel Ecclesiæ illatam. Porro, licet Excommunicatio, Suspendio & Interdictum privent iisdem bonis spiritualibus; diversæ tamen sunt censuræ, quia diversa subjecta respiciunt. Interdictum enim respicit loca sacra in ordine ad personas, quæ dum morantur in loco interdicto, arcentur ab auditione sacri v.g. vel celebratione; Suspendio respicit Clericos; & Excommunicatio tum Clericos tum Laicos.

Quæres quintò, quis possit ferre Censuras? Resp. primò, quòd potestas ordinaria ferendi Censuras resideat penès illos qui habent jurisdictionem ordinariam in foro externo, quales sunt Summus Pontifex, respectu omnium fidelium; Episcopi, respectu Dioecesanorum; Legati Pontificis, in provinciâ suæ legatio-

nis ; Vicarius Episcopi ; quia habet idem tribunal cum Episcopo ; Capitulum sede vacante , quia Episcopo succedit in jurisdictione ; Vicarius Capituli , eandem cum Capitulo habens jurisdictionem ; Abbates & Archipresbyteri , quibus ex jure speciali communicata est in certis locis jurisdictio Episcopalis ; Concilia Generalia & Provincialia ; Capitula Generalia & Provincialia ; Regularium Generales , Provinciales , & Prælati locales , quales sunt Guardiani , ut habetur in Statutis Generalibus nostri Franciscani Ordinis , cap. 6. ff. 20. Parochi autem , qui non sunt prælati , nec habent jurisdictionem externam , ferre Censuras non possunt. Resp. secundò , commissionem ferendi Censuras non posse delegari nisi viatori ; quia Censura est gladius jurisdictionis Ecclesiæ militantis , quo non potest percutere nisi ille qui existit in Ecclesiâ militante. Non potest etiam delegari illi qui caret usur rationis , cum non possit habere actum jurisdictionis , ad quem requiritur cognitio causæ. Non potest deinde ad Censuram ferendam deputari infidelis ; cum enim non habeat Baptismum , qui est ingressus Ecclesiæ , jurisdictione Ecclesiastica uti non potest. Nec Laicus , ut patet ex cap. *decernimus* , de *judiciis* , sicut & ex cap. *Ecclesia* , de *constitutionibus* Nec scemina , cap. *demonialibus* , de *sentent. excommun.* ubi habetur , illas non posse à Censuris absolvere subditas : ergo nec ferre Excommunicationem. Unde si legatur , Abbatissas suspendisse , respondet Bonacina cum aliis , non fuisse veram Censuram , quâ violatâ , incurreretur irregularitas ; sed fuit

tantum quædam prohibitio emanans, non à jurisdictione; sed à quadam simplici commissione, quam habent ab Ecclesiâ in ordine ad correctionem & disciplinam domesticam subditarum. Ob hoc Doctores apud Bonacinam citati, sentiunt Prælatas Monialium non posse sub peccato mortali præcipere id quod non esset aliàs peccatum, nisi ex potestate domestica, & œconomica gubernatione. An autem Summus Pontifex possit absolute jurisdictionem illam conferre foeminae; affirmat Bonacina cum multis; aliqui negant. Resp. terriò, quemcumque Clericum posse ex commissione ferre Censuras; habens enim tantum primam tonsuram, est capax Ecclesiasticæ jurisdictionis; modò non sit conjugatus, quia conjugati non possunt admitti ad negotia Ecclesiastica. Idem dicendum est de Religiosis professis non clericis, ac de laicis sæculi, quòd non possint ferre censuras, nisi ex dispensatione Summi Pontificis, qui potest injure humano dispensare, non verò Episcopi, qui non potest dispensare supra legem Superioris.

Quæres sextò, quis possit Censuris ligari? Respondeo primò, quòd debeat esse viator; unde mortuus ligari non potest Censurâ; nam Matth. 18. habetur, *Quicumque ligaveritis super terram, &c* mortui autem non sunt super terram. Dùm ergo Ecclesia privat peccatorem publicum sepulturâ & suffragiis, & eum absolvit post mortem ab Excommunicatione contractâ ante mortem; non est quòd Ecclesia illum liget Excommunicatione directè; sed tantum indirectè; non habet enim in mortuos, nisi

jurisdictionem indirectam, unde mortuos non excommunicat; sed prohibet, nè vivi pro illis orent, aut donent illis sepulturam; nec etiam absolvit; sed concedit viventibus, ut pro illis orent & ipsum sepeliant. Resp. secundò quòd debeat esse baptisatus; non baptisati enim non subjiciuntur legibus, nec poenis Ecclesiasticis, etiam si Catechumeni sint, quia nondum sunt in Ecclesiâ: secus dicendum est de Hæreticis, quia manent sub Ecclesiæ jurisdictione, ratione characteris, qui indelebilis est. Resp. tertio, debere esse adultum; pro tunc enim peccare potest mortaliter: ergo & ligari Censurâ in poenam peccati latâ, sive sit lata à jure, sive ab homine; cum hac tamen distinctione quòd adulti impuberes, idest ante duodecimum annum pro foeminis, & quartum decimum pro masculis, non possint licitè ligari Excommunicatione ab homine, licet possint validè, sicut licitè & validè possunt subjici interdicto quod non est tam gravis poena, ac Excommunicatio. Resp. quartò, Censuram Excommunicationis non posse ferri, nisi in determinatam personam, non verò in Capitulum aut Communitatem. c. *Romana de sentent. Excommunicationis in 6.* Suspendio autem & interdictum in communitatem ferri possunt. Ratio hujus est; quia Excommunicatio est gravis poena, quæ privat suffragiis & auxiliis Ecclesiæ, animæ multum necessariis; ergo non debet ferri indifferenter in reos & innocentes: Suspendio autem privat tantùm ab officio & beneficio, & interdictum à celebratione & auditione divinarum officiorum; unde non est

contra justitiam , si per accidens ferantur in innocentes.

Quòd si aliquando feratur Excommunicatio in Collegium , semper exprimitur peccatum ob quod fertur Excommunicatio , & sic ligat tantum reos, non alios ; ut si v. g. ferretur Excommunicatio in Parisienses non obediētes Pontifici ; hoc est excommunicare personas privatas quæ parere recusant. Resp. quintò , quòd debeat esse subditus illi qui fert censuram ; unde habentes privilegium à summo Pontifice , quo dispensantur ab Episcoporum jurisdictione , ab illis non possunt ligari censura , sed tantum à superioribus suis , qui ligare possunt suos subditos per præceptum , ubicumque peccent , quia illorum potestas nullo loco arctatur ; Episcopi verò subditum extra suum territorium peccantem innodare non possunt ullâ censurâ , *c. 2. de Constitutionibus in 6.* Si tamen post reditum , ab Episcopo citatus non obediat , ligari potest. Resp. sextò , quod eadem persona pluribus censuris ligari queat sive sint ejusdem rationis ; v. g. pluribus Excommunicationibus , sive sint diversæ , ut Excommunicatione & suspensione ; quamvis enim una censura privet aliquando bonis omnibus spiritualibus , alia privat virtualiter & novo titulo , sicut peccator per nova peccata actualia novo titulo gratiâ privat.

Quæres septimò , quænam sit materia ob quam censura possit ferri. Resp. primò , debere esse peccatum mortale , ut feratur gravis censura , v. g. Excommunicatio major , suspensio & interdictum ad longum tempus : pro pec-

cato tamen veniali ferri potest Excommunicationis minor, quæ contrahitur ob levem in civilibus communicationem cum nominatim excommunicatō; sic dicendum de suspensione & interdicto ad breve tempus. Ratio utriusque est, quia iustitia distributiva vetat, ut levi delicto gravis pœna infligatur. Resp. secundò, quod quando superior actionem ex se indifferenter prohibet sub Excommunicatione, censetur illam prohibere sub peccato mortali, cui pro pœnâ annectit Excommunicationem; non potest tamen illa actio prohiberi sub Excommunicatione, nec sub peccato mortali, si sit levis in se, & levis maneat in ordine ad finem; ius enim naturale aut divinum non obligant ad peccatum ob levem materiam: ergo nec ius humanum. Resp. tertio, quod peccatum deat esse proprium, ut contrahatur Excommunicatio, quæ est gravissima pœna; licet pro peccato alieno suspensio & interdictum ferri possint, & consequenter suspendi & interdici communitas, non verò excommunicari: in casu autem interdicti & suspensionis, quæ pro peccato alieno feruntur, non puniuntur propriè innocentes, sed delinquentes puniuntur in personâ infontium. Resp. quartò, censuram non posse ferri ob peccatum merè internum, de occultis enim non iudicat Ecclesia in foro externo; potest tamen pro actu externo, qui debet informari essentialiter actu interno: sic possunt censurâ ligari qui officium non recitant cum attentione, qui non confitentur cum dolore, qui ex odio aut spe lucri puniunt innocentem; & tunc non ligatur censurâ actus

internus per se, sed quatenus dicit ordinem ad actum externum quem informat. Quando ergo actus internus est de substantiâ actus externi, tunc ille qui omittit actum internum, & elicit externum, censura innodari potest; v. g. si esset lata Excommunicatio contra eos qui non audiunt Missam, aut non recitant officium; illi qui non audirent aut recitarent cum attentione, essent excommunicati, quia attentio est de substantia utriusque. Quando verò actus internus non est de substantia actus externi, qui elicit actum externum sine interno, non incurrit censuram. Unde si ferretur Excommunicatio contra non communicantes & non consistentes in Paschate, indigne communicantes non incurrerent illam; nam substantiam præcepti adimplet indigne communicans; non sic autem de confessione, quia essentialiter requirit quod sit valida; & ideo qui confessionem non integram, aut aliâ circumstantiâ essentiali earentem ederet, incurreret Excommunicationem. Respondeo quintò, peccatum debere esse completum, & effectum suum habere? leges enim poenales benignius explicandæ sunt; unde qui scienter indignum eligit, non excommunicatur, nisi ad suum votum sequatur indigni electio: sic habetur *c. perpetuo de elect. in 6.* nisi aliud in lege feratur; unde accuratè attendendus est legis tenor, ita quòd si excommunicetur in lege homicida, percutiens & vulnerans non continentur sub lege: si excommunicatur vulnerans, non ligatur ille qui sine vulnere percutit; si excommunicatur faciens, non innodatur mandans; si autem mandantes ex-

communicantur, & non sequatur effectus, distinguendum est; si enim effectus est principaliter prohibitus in lege, mandatum verò est tantum accessorie prohibitus, ut in Excommunicatione lata contra percussores clericorum, mandantes talem percussione non excommunicantur, nisi sequuto effectus, ubi verò mandatum & consilium principaliter prohibentur sub Excommunicatione, ut in illà quæ fertur contra mandantes homicidium per assassinos, tales mandantes excommunicantur, etiamsi effectus non sequatur: si autem dubitetur, an mandatum vel actus æqualiter prohibeantur; credendum est, mandatum esse tantum accessorium, & sic non incurri Excommunicationem, nisi effectus sequatur; quia rigores benignius sunt explicandi.

Quæres octavò, quænam forma observari debeat, dum censura fertur. Resp. primò, censuram ferri debere à iudice, non per solum actum voluntatis, sed per signa externa; quia quoadiu censura non exprimitur, ignoratur; ignorantia autem à censurà excusat. Resp. secundò, censuram debere ferri, per verba quæ determinatam personam afficiant, si sit Excommunicatio; vel determinatam communitatem, si sit interdictum; unde Excommunicatio lata sub his verbis, *excommunico, vel excommunicabo ex decem unum, aut unum ex illis qui arma deferunt noctu*, est invalida; cum enim non constet de intentione Superioris, nullus censetur excommunicatus. Resp. tertio, censuram latam sine scripturà aut sine expressione causæ, esse quidem validam; quia omittitur forma tan-

tum accidentalis; est tamen illicita, & peccat mortaliter qui taliter agit; imò incurrit suspensionem ab ingressu Ecclesiæ per mensem, *ex cap. 1. cum medicinalis. De sententia Excommunicationis in 6.* ubi etiam suspenditur pro tali tempore illi qui reo petenti exemplar scripturæ, non tradit intra mensem. Debet autem in scriptis ferri censura, quia per eam ligatus potest ad superiorem recurrere, qui non potest judicare de censurâ, nisi illi nota sit. Resp. quartò quod admonitio debeat præcedere Excommunicationem, *ex cap. sacro, de sententia excommunicationis;* debet etiam præcedere suspensionem, *ex cap. reprehensibilis, de appellationibus;* debet denique præcedere interdictum, *ex cap. statutum, de sententia excommunicationis.* Sed notandum est quòd pro futuris culpis admonitio non sit distincta à lege; quia lex ipsa non ignorata admonet, aliàs nunquam incurreretur censura *ipso facto*, si admonitio à lege distincta requireretur. In censuris autem quæ feruntur pro culpis præteritis, requiritur admonitio distincta à lege; quæ debet fieri ipso reo; aut saltem tali modo, ut reus ad notitiam censuræ pervenire possit: hoc patet *ex cap. Romana, de sententia excommunicationis in 6. & ex cap. sacro, de sententia excommunicationis in 6.* Resp. quintò quod triplex admonitio requireretur ad ferendam censuram, *ex cap. constitutionem, de sententia excommunicationis in 6.* cujus ratio desumitur ex Matth. 18. ubi Christus jubet peccatorem prius corrigi debere secretò, deinde adhiberi testes, & denique denuntiari Ecclesiæ. Plura tamen no-

tanda sunt in hoc. Primò, quod aliquando interdium & suspensio sumantur, non ut censuræ, sed ut poenæ vindicativæ delicti; & ut sic latæ fuerunt sine admonitione. Secundò, quod quandoque trina monitio virtualis sufficiat; & sic sufficit una monitio ex sententiâ judicis, modo inter illam monitionem & fulminationem censuræ tantum spatium temporis detur, quantum daretur, si esset trina monitio; modò etiam hoc exprimat iudex in sua admonitione, aliàs reus posset credere quod essent futuræ alix admonitiones, ante quas non esset verè contumax; *cap. constitutionem de sententia excommunicationis in 6.* Tertio quod urgente necessitate, una monitio sufficiat *e. constitutionem de sententia excommunicationis in 6.* Quartò, quod spatium intermedians duas monitiones, sit duorum dierum saltem; loco enim citato habetur quod observanda sint aliquorum dierum intervalla; quæ tamen potest ampliare iudex.

Quæres nonò, quænam rationes impendant validitatem censuræ. Resp. primò quod licet feratur à iudice ex prava intentione, v. g. ex odio & invidia, non verò ex amore justitiæ, valida sit; quia illa mala iudicis intentio nulli nocet, sed tantum sibi. Resp. secundò, esse invalidam, quando non servatur ordo juris necessarius substantiànter, ut iusta causa, iurisdic-tio, admonitio præcedens: non irritatur tamen ob defectum juris tantum accidentalis, ut quando non fertur in scriptis, nec exprimitur causa, vel quando præcessit tantum una admonitio; licet enim in hoc graviter peccet iudex, eum extra necessitatem præmittit tantum unam

monitionem, quia facit contra prohibitionem juris in re gravi; non propterea tamen invalida est. Resp. tertio, censuram materialiter injustam esse invalidam, licet sit formaliter justa: v. g. probatur per falsos testes aliquod crimen, propter quod iudex Excommunicationem tulit; illa sententia est invalida, quia est injusta materialiter, cum feratur in materiam injustè imputatam; est tamen formaliter justa, quia iudex sufficientia habet testimonia pro sua censura, licet sint falsa. Resp. quarto, in hoc casu innocentem servare debere censuram in foro externo, si sit periculum scandali, & aliàs videretur contemptor censuræ: ubi autem non daretur scandalum, potest illam non servare, & omnia facere in conscientia, quæ ante illam sententiam fecisset. Resp. quinto, quod si iudex non omnino voluntariè, sed per metum censuram ferat, non minus valida sit; modo habeat cum illo metu intentionem illam ferendi, sine qua non esset valida; & in hoc casu metus non tollit simpliciter voluntarium, sed tantum minuit.

Quæres decimò, an ignorantia excuset, nè aliquis censuram contrahat? Notandum est, ignorantiam esse triplicem; nimirum juris, facti, & poenæ. Quando nescitur lex, est ignorantia juris; quando nescitur factum, est ignorantia facti; quando nescitur poena alligata facto per legem, est ignorantia poenæ: Petrus nescit, perussionem clerici esse prohibitam, adest ignorantia juris; Petrus hoc sciens, percutit clericum, quem nesciebat clericum, adest cum cognitione juris ignorantia facti; utrumque

sciens, ignorat, an illa percussio sit prohibita sub censurâ, adest ignorantia poenæ. Ignorantia juris est duplex; vel juris communis, vel juris particularis, Petrus ignorat percussionem clerici esse prohibitam sub excommunicatione, est ignorantia juris communis, quia illa lex est universalis; Petrus ignorat sacerdotes esse suspensos in Diœcesi Bajocensi, qui cauponas ingrediuntur, est ignorantia juris particularis. Ignorantia tum juris, tum facti, ulterius duplex est; nimirum vincibilis, & invincibilis; prima est ea quæ vinci potest per adhibitam diligentiam; sic quando quis dubitat, an tali peccato annectatur censura, debet de illâ diligenter exquirere: secunda est quæ vinci non potuit, quia nihil aliquis unquam audivit de censurâ, nec ullo modo de illa dubitavit. Tandem alia est ignorantia antecedens, quæ si abesset, non fieret actus: v. g. Petrus percutit Paulum, quem ignorat esse clericum, & quem non percuteret, si ipsum clericum sciret: alia est concomitans, quæ si abesset, tamen actus fieret; v. g. Petrus percutit Petrum, quem putat laicum, & clericus est, attamen illum percuteret, etsi sciret ipsum esse Clericum. His positis, Resp. quod ignorantia invincibilis juris, siue sit commune, siue sit particulare, excuset à censurâ; sic habetur *cap. 2. de Constitutionibus in 6.* talis enim ignorantia excusat à peccato: ergo & à poenâ peccato annexâ. Ignorantia etiam facti excusat à censurâ, *cap. si verò, de sententia excommunicationis*; non est enim contumacia, dum factum ignoratur; hinc Petrus percutiens Paulum, quem nesciebat esse cle-

licum , non est excommunicatus. Ignorantia juris aut facti quæ est crassa , affectata , & vincibilis , non excusat à censurâ ; nam habetur *cap. 2. ut animarum, de Constitutionibus in 6.* quòd ignorantia , quæ non est crassa , excuset ab omnibus Ordinariorum sententiis : ergo ignorantia crassa non excusat : Hinc Petrus dubitans probabiliter , an jus decernat Excommunicationem contra percussores clericorum , & an Paulus sit clericus ; si illum percutiat cum tali dubio , cujus per suam diligentiam cognitionem habere potuit , non excusatur à censurâ. Ignorantia invincibilis poenæ , seu censuræ annexæ facto , ab illâ excusat , ut patet ex dictis ; quod etiam ad irregularitatem extenditur ; si proveniat ex delicto , quia talis ignorantia excusat à delicto , & sic ab irregularitate sequente delictum ; aliæ autem irregularitates non impediuntur per ignorantiam ; & judex qui reum ad mortem condemnavit , non minus fit irregularis , licet ignoret talem condemnationem involvere irregularitatem. Ignorantia antecedens excusat à censura , quia excusat à peccato ; ignorantia concomitans etiam excusat , & Petrus percutiens Paulum clericum , quem credebat laicum , sic tamen dispositus est , ut si illum sciret clericum , non minus illum percuteret , non incurrit censuram. Ratio est , quia censura non incurritur , nisi per opus externum ; externa autem illa percussio , non tendit nisi in laicum , vel saltem in clericum existimatum laicum : ergo non incurritur censura , ex omnibus Doctoribus. Non sic dicendum est in hoc casu , ubi Petrus dicit,

loquens de Paulo qui clericus est: Volo occidere Paulum qui est laicus, & etiamsi sit clericus, volo adhuc ipsum occidere; in hoc enim casu contrahitur Excommunicatio, quia actus externus qui tendit in clericum, influitur ab actu interno actuali & voluntario actualiter, qui tendit etiam in clericum, ubi in suppositione casus præcedentis, actus internus actualis, & actualis intentio tendit in laicum, licet tenderet in clericum, si ut clericus cognosceretur. Quod si Petrus lapidem projiciat ut percutiat Paulum clericum, & post adhibitam diligentiam Jacobum clericum percutiat, non incurrit excommunicationem; quia ad incurrendam censuram duo requiruntur, nempe voluntas & actus externus, ubi ad peccatum sola voluntas sufficit; sed respectu Pauli, fuit quidem intentio percutiendi ipsum, sed non fuit actus, quia non percussus fuit; & respectu Jacobi, fuit quidem actus, quia percussus fuit, sed non fuit intentio: ergo nullibi est excommunicatio: Petrus verò percutiens Jacobum clericum, quem credit esse Paulum etiam clericum, excommunicatur, quia & actus externus & actus internus tendunt semper in clericum.

Quæres ultimò, utrùm impotentia, metus, & consensus partis impediant censuras? Resp. ad primum, impotentiam faciendi id quod præcipitur sub censurâ, excusare ab illâ; excusat enim à peccato & à contumaciâ; quoniam ille qui non potest solvere debita, non peccat, nec est contumax, nec excommunicationem incurrit latam contra detentores boni alieni. Idem di-

cendum est, quando præceptum non potest impleri sine gravi incommodo. Si tamen teneatur quis intra mensem solvere debitum sub poena Excommunicationis, & initio mensis solvere valeat, prævideatque fieri impotens ut solvat postea, incurrit excommunicationem, non quidem eo tempore quo consumit pecuniam quam poterat reddere creditori, sed in fine termini. Resp. ad secundum, Metum gravem dispensat à censurâ incurrendâ; excusat enim à peccato; quoniam Ecclesia non obligat cum tanto rigore: modo metus ille non incutiatur in contemptum fidei & religionis, tunc enim non est dispensatio à peccato aut censura, sed bonum commune religionis præferendum est bono privato & propriæ vitæ; secus est, si actiones non fiant in contemptum religionis: Hinc Christiani apud Turcas detenti possunt naves remis ducere contra Fideles; & Clerici arma deferre metu mortis, in locis ubi hoc prohibetur sub poenâ Excommunicationis: imò, si adulterium esset prohibitum sub censurâ, posset quis metu mortis illud committere & non ligari illâ, licet peccaret contra castitatem & iustitiam; sic Bonacina & alii, contra Suarem negantem adulterum pro tunc à censurâ excusari. Resp. ad tertium, illum in cujus favorem concessa est censura, posse per suum consensum suspendere ipsius effectum; hæc tamen suspensio & prorogatio temporis non est actus jurisdictionis directè, sed tantum indirectè, per subtractionem materiæ ad certum tempus; & hæc est mens interpretativa iudicis, qui censuram fert in favorem partis, & sic non intendit li-

gare, nisi ad mentem ejus pro quo censura fertur.

Quantum ad censurarum effectus & absolutionem, dicemus loquendo de illis in particulari.

Q U A E S T I O I I.

De Excommunicatione.

PO S T Q U A M in quaestione praecedenti per multas quaestiunculas loquuti fuimus de censuris in se; nunc eodem stilo dicendum est de quâlibet, & primò de Excommunicatione.

Quæres primò, quid sit Excommunicatio? Resp. quòd sit censura Ecclesiastica quâ homo Christianus autoritate Ecclesiæ separatur ab Ecclesiasticâ communione Fidelium. Hoc patet ex nominis significatione; exc̄municatus enim idem est, ac extra communionem factus. Interdictum privat tantum divinis rebus & officiis, ut dicitur; Suspendio privat solum Ecclesiastico ministerio; sed his omnibus privat Excommunicatio, & insuper privat communione fidelium; id est, privat communibus illis bonis quorum participatio pendet ex speciali intentione Ecclesiæ. Quædam enim sunt bona quorum participatio non pendet à peculiari intentione Ecclesiæ, sed immediatè pendet à gratiâ; ita quòd eo instanti quo quis per gratiam est Christo conjunctus, tanquam capiti, & aliis justis, tanquam membris, illico fit talium bo-

norum particeps, juxta illud Ps. 118. *Particeps ego sum omnium timentium te.* Et patet etiam ex articulo fidei, qui admittit Communionem Sanctorum; illa autem bona opera sunt orationes particulares, jejunia, satisfactiones, &c. & illis bonis communibus Ecclesiæ non privat Excommunicatio, nisi ratione peccati mortalis quod involvit, & si quis post contractam Excommunicationem contereretur, gratiam recuperaret, & sic licet esset adhuc excommunicatus, talium bonorum esset semper particeps. Sunt verò alia bona communia quorum participatio pendet ex speciali intentione Ecclesiæ, ut externa conversatio, mutuum colloquium, conventus in orationibus publicis, Sacramentorum passiva & activa participatio, fructus orationum & suffragiorum quæ à ministris Ecclesiæ fiunt nomine ejus; his omnibus privat Excommunicatio, præsertim major.

Quotuplex sit Excommunicatio. Resp. duplicem esse, majorem & minorem. Excommunicatio major est ea, quæ privat participatione activa & passiva Sacramentorum, & communicatione hominum; ita quòd ille qui sic excommunicatus est, non possit recipere, nec administrare Sacramenta, nec cum hominibus conversari. Excommunicatio minor est censura privans tantum participatione passiva Sacramentorum, & vocatur minor, quia illa privat minoribus bonis; excommunicatus enim minori Excommunicatione, potest administrare Sacramenta & conversari cum aliis; licet etiam non possit ea recipere & recipiens graviter peccet, non tamen recipiendo sit irregularis. Qui

contraxit. Excommunicationem minorem, non potest eligi ad gradus, dignitates, & officia Ecclesiastica; si tamen ad illa est electus, electio non est irrita, sed irritanda à iudice, ut patet *ex cap. si celebrat. fin. cit. de Clerico excommunicato ministrante*: unde, si diximus antea, & si habeatur *c. à nobis*, quod tantum à participatione Sacramentorum sit remotus, hoc intelligitur de effectu principali, quod non excludit ea quæ concomitantur. Excommunicatio minor potest ferri ab homine, hoc tamen non est in usu; imò non incurritur, nisi ob communicationem cum excommunicatis majori excommunicatione, *cap. nuper, de sentent. excommunicationis*. Quoad ipsius absolutionem, dari potest per quemcumque, qui à mortalibus absolvere potest; nam *c. nuper de sentent. excommunic.* taliter excommunicatus absolvi potest à proprio Sacerdote; & in hac materia proprius Sacerdos est ille qui à mortalibus absolvere potest. Porro, quando in iure, vel alicubi, fit mentio de Excommunicatione, hoc sonat de majori, non de minori.

Quærestertiò, an sit in Ecclesiâ excommunicandi potestas, quis possit excommunicationem ferre, quis excommunicari queat, & quid in Conciliis & iure intelligatur nomine Anathematis? Ad tria prima respondimus in questione præcedenti de Censuris in genere. Resp. ad quartum, quod nomen, Anathema, sit æquivocum: Aliquando enim sumitur pro re aliquâ ab usu prophano separata, quæ Deo reservatur & dicatur; sic Josue 6. *Sit civitas hac anathema, & omnia quæ in ea sunt, Domino*: Aliquando su-

mitur pro re aliquâ execrabili, ut ad Galat. 1. *Licet nos, aut Angelus de cælo evangeliset vobis præter quod evangelisavimus, Anathema sit*: sic etiam 1. Corinth. 12. *Nemo dicit Anathema Iesu*. In usu tandem Ecclesiæ, significat hominem, non minori, sed majori excommunicatione ligatum; ubi enim in Conciliis habetur, *si quis dixerit, &c. Anathema sit*; hoc est sit majoris excommunicationis vinculo ligatus: interdum etiam nomen Anathematis sumitur pro ipsa excommunicatione majori, ut quando habetur, *talem hæreticum esse Anathema percussum*; hoc est, Excommunicatione majori ligatum. Non differunt ergo Excommunicatio major & Anathema quoad substantiam, nec quoad vinculum, licet differant accidentario, penes gravitatem & solemnitates aliquas extrinsecas. Quoad solemnitates, inquam, differunt, quia Excommunicatio contrahitur, quoties fit peccatum cui annectitur censura, & cum quis Anathematizatur, hoc fit ab homine cum publicis denunciationibus ac ceremoniis exterioribus, quæ terrorem ac execrationem majorem incutiunt; differunt etiam quoad gravitatem delicti, quia cum jura & Concilia pronuntiant Anathema; hoc est semper contra graviora delicta, & præsertim contra Hæreticos.

Quæres quartò, quotuplex sit Excommunicatio major. Resp. primò, aliam esse generalem, quæ fertur generaliter quoad personas, ut quando dicitur, quicumque incendiarius sit excommunicatus, illa fertur contra incendiarios omnes; & aliam particularem, quæ fertur in sin-

gularem personam, v. g. in Petrum, qui tale delictum admisit. Resp. secundò, aliam esse à jure, aliam ab homine; prima est illa quæ fertur mediante Canone, vel lege aliqua permanenti, quæ habet rationem juris; secunda est illa quæ fertur ab homine, vel per statutum aliquod transitorium: prima non desinit per mortem legislatoris, secunda cessat ipso mortuo, vel amoto ab officio, modo non sit contracta ante ipsius mortem. Resp. tertio, dividi adhuc in justam & injustam; justa illa dicitur quæ nullâ circumstantiâ caret essentiali aut accidentali; injusta illa est, quæ habet aliquem defectum. Ista adhuc duplex est; nempe injusta valida, quæ caret aliquâ circumstantiâ tantum extrinsecâ & accidentali; & injusta invalida, cujus defectus est essentialis. Si v. g. Excommunicatio feratur ex odio judicis, vel sine trinâ monitione, vel ob peccatum mortale sine contumaciâ, tunc Excommunicatio est quidem injusta, & peccarent mortaliter judices sic excommunicantes, quia regulas juris violarent in re gravi; non est tamen invalida, quia illæ circumstantiæ sunt tantum accidentales. Si vero feratur Excommunicatio sine intentione judicis, sine peccato mortali, & sine unâ saltem monitione, est injusta & invalida, quia hæ circumstantiæ sunt essentielles. Resp. quintò, quod alia sit excommunicatio latæ sententiæ, & alia ferendæ sententiæ, quæ aliter vocatur comminatoria. Prima exprimitur sub his verbis, *Præcipio sub pœna excommunicationis ipso facto, ipso jure, sub pœna excommunicationis latæ sententiæ, sub pœna excommunicationis statim incurrenda;* vel

vel sub his verbis, *Excommunicationi subjaceat, excommunicationem incurrat, sit excommunicatus*; quia talia verba redolent imperativum, inquit Baldus contra Navarrum. Secunda significatur istis vocibus, *præcipio sub pœna excommunicationis* (ferendæ scilicet à judice) *qui hoc fecerit, sic excommunicatus, excommunicabitur, communione privabitur, sub pœna anathematis.*

Quæres quintò, quosnam effectus producat Excommunicatio? Multos certè, gravissimos, & multum timendos. Primò, privat communione civili Fidelium. Secundò, privat suffragiis Ecclesiæ. Tertiò, privat receptione Sacramentorum. Quartò privat administratione illorum & celebratione Missæ. Quintò, privat communione Ecclesiasticâ in divinis officiis. Sextò, privat Ecclesiasticâ sepulturâ. Septimò, privat usu jurisdictionis. Octavò, arcet à beneficiis & fructibus illorum. Nouò, ab actionibus forensibus removet. Pauca tantùm de his omnibus dicere cogit affectata brevitatis.

Quæres sextò, an Excommunicatio major communione civili Fidelium privet? Resp. quod excommunicatus duplex sit; alius est vitandus, alius toleratus. Vitandus est ille qui nedum est nominatim excommunicatus per sententiam judicis, dicendo, Excommunico Petrum vel talem Dominum, aut Pastorem talem, sed est insuper denunciatus; hoc enim requirit Concil. Constant. in Constitutione *ad evitanda scandala*, & Lateran. constitutione *statuimus insuper*; unde post fulminationem Excommunicationis, ubi aliquis nominatim excommunica-

tur, requiritur sententia altera iudicis denuntiatiua, quæ publicari debet, & ante talem publicationem censetur toleratus ab Ecclesiâ & non vitandus; nisi sit notorius clericus percussor, inquit utrumque Concilium; pro tunc enim notorietas facti æquivalet denuntiationi, licet notorietas juris non sufficiat; unde ut percussor clericus sit vitandus, non requiritur quod sit nominatim excommunicatus, nec sufficit quod cognoscatur clericum percussisse; sed requiritur ut talis percussio nullo titulo celeri possit, in quo consistit notorietas facti; ita quod si possit se excusare, dicens se percussisse joco, vel titulo defensionis, vel nescivisse illum esse clericum, non est notorius percussor clericus, notorietate facti; modò illæ excusationes sint probabiles. Cum autem regulariter nulla clericus percussio reperitur, in quâ aliqua harum excusationum nequeat inveniri, mos inolevit, ut nullus percussor clericus vitari debeat, nisi post sententiam iudicis. Excommunicatus non vitandus, sed toleratus ille censetur, qui non est nominatim excommunicatus & denuntiatus. Resp. secundò, nominatim excommunicatos & denuntiatis esse arcendos à communione civili; si verò non sint nominatim excommunicati & insuper denuntiati, tali communione privari non debent. Secundum habetur ex supradictis, & primum *c. præcipue q. 3. & cap. excommunicatus*, ubi Callistus Papa præcipit nè aliquis cum illis communicet in oratione, cibo, potu, aut osculo, aut salutatione; *quia inquit, quicumque in his: vel aliis prohibitis sciens excommunicatis communicaverit;*

juxta Apostolorum institutionem & ipse simili excommunicationi subjacebit. Isti autem casus, in quibus communicatio civilis cum excommunicatis prohibetur, habentur hoc versu. *Os, Orare, Vale, Communio, Mensa negatur.* Qui in his communicat cum excommunicato excommunicatione majori, incurrit minorem, & majorem, si communicet in crimine pro quo lata est excommunicatio; vel si communicet in officiis Ecclesiasticis cum excommunicato nominatim à Papâ, vel si prolata est sententia in aliquem & in omnes cum illo communicantes. Præcedens prohibitio excusationem habet in casibus sequenti carmine expressis. *Utile, lex, humile, res ignorata, necesse: hoc Anathema faciunt, ne possit obesse.* Quia ponitur, *utile*, idè potest commercium iniri cum Excommunicato, si sit utilitas corporalis aut spiritualis alterutrius; unde potest peti consilium ab excommunicato, si alteri desit; potest ab illo peti debitum, & ipse petere privatim, non juridice, quia non admitti debet in judicio, licet contrarium fiat; licet petere medicinam à medico excommunicato; licet prosequi societatem antea initam cum excommunicato; licet persuadere excommunicato, ut resipiscat, Idè ponitur, *lex*; ut denotetur uxorem quæ est sub lege viri, cum illo posse communicare in debito reddendo, in cohabitatione, in mensâ, in colloquiis familiaribus, non in divinis; hoc vicissim licitum est marito; licet non sit sub lege uxoris; quia *cap. si verò; de sentent. excomm.* licet communicare cum excommunicato in societatis contractu antea

inito : ergo à fortiori licet communicari in his quæ sequuntur Matrimonium. Per *utile* : servi, subditi, villici, filii, religiosi, milites possunt communicare cum dominis, heris, patribus, superioribus, eucibus excommunicatis. Quod dicitur de filiis, intelligitur etiam de nepotibus & pronepotibus, & de filiis adoptivis, & illegitimis, imò & affines qui sunt filiorum loco, ut gener, nurus, privignus, privigna, pupillusque cum tutore, conversari possunt ; non verò filii spirituales cum patre, nec fratres cum fratribus, nec servus cum alio servo, nisi quatenus sunt in eadem domo : hi omnes non possunt communicare simul in divinis, nisi in his quæ concernunt famulatum. Additur, *res ignorata* ; ut pateat ignorantiam dispensare, nè aliquis Excommunicationem minorem incurrat ignorando, aut non advertendo aliquem esse excommunicatum ; quando verò aliquis dubitat, an alter sit excommunicatus, non debet illum à consortio arce-re ; nefas enim est illum privare jure suo. Adjungitur, *Necesse* quia metus gravis & necessitas excusant à peccato, & proinde, à præcepto cavendi ab excommunicatis : prohibetur enim tantum communicatio peccaminosa, & stante necessitate aut gravi metu in tali communicatione non esset peccatum, nec excommunicatio minor. Si queratur, an vitari debeant Hæretici qui sunt excommunicati à jure, propter hæresim ? Resp. negativè, præsertim in Galliâ, Germaniâ, & aliis locis, ubi simul morantur Catholici cum Hæreticis. Ratio est, quia licet contraxerint excommuni-

cationem à jure, non tamen sunt nominatim excommunicati, nec denuntiati; quod utrumque requiritur: Unde Hieronymus à Sorbo, super compendium privilegiorum Mendicantium Verbo. *excommunicatio*, scribens, ait: *Sed num Catholicis Gallia, aut Germania, aliorumque regnorum qui cum Hæreticis manifestis participant in externo convictu, peccent, excommunicationem minorem incurrant, cum tales Lutherani & Calvinista sint notorie excommunicati propter hæresim notoriam, & propter bullam Cœna Domini? Respondetur, illos non peccare, & excusari propter consuetudinem, quæ dicitur optima legum interpret. Quæ consuetudo cum sciat, & toleretur à summis Pontificibus, excusat Catholicos illa utentes. Sic & Dominicus Soto, Petrus Soto, Suares, Estius, Laimannus, & alii.*

Quæres septimò, an excommunicatus privetur suffragiis Ecclesiæ? Resp. non privari suffragiis Ecclesiæ, quatenus fiunt ex intentione privatâ & à privatâ personâ; sed privari suffragiis communibus, *ex cap. sacris, & exc. A nobis, de sententia excommunicationis.* Quod intelligitur etiam de excommunicato contrito, nondum absoluto; quia pro tunc manet excommunicatus & excommunicationis poenæ subditus. An autem hoc verum sit pro excommunicato tolerato, controvertuntur Doctores. Bonacina tenet excommunicatum toleratum non arceri quidem à communicatione civili, sed privari communibus Ecclesiæ suffragiis: Alii autem sentiunt, non privari etiam suffragiis Ecclesiæ, maxime à tempore Constantiensis Concili; sed,

salvâ pace istorum, constitutio Concilii Constantiensis nullo modo loquitur de participatione suffragiorum. Hæc tamen pœna suspenditur in die Veneris sanctâ, ubi publicæ orationes fiunt pro Hæreticis & Schismaticis, qui sunt excommunicati; non tamen loquitur de illis sub nomine excommunicatorum, ostendere cupiens, illos sic esse detestandos, ut ab Ecclesiæ ministris nominari noluerit, ex Bernardo tract. de gradibus humilitatis circa finem; *Viderint, inquit, in quanto periculo sint, pro quibus Ecclesia orare palam non audeat, quæ fidenter etiam pro Iudæis & Hæreticis & pro Gentilibus orat: cum enim in Parasceve nominatim oratur pro quibuslibet malis, nulla tamen mentio fit de Excommunicatis.* Dicendum ergo est, quod aliquis, ut privata persona, privatas preces fundere possit pro Excommunicatis; quia Ecclesia hoc non prohibuit, & nimis durum esset prohibere, prorsusque derogans charitati fraternæ. Idem dicendum est de sacrificio Missæ; quod si primò spectetur, ut oblatum est in persona Christi à Sacerdote, ut ministro ipsiusmet Christi pro sit excommunicato; quia hoc non impedit Ecclesia; si sumatur autem quantum ad valorem proveniente ex parte Ecclesiæ & sacerdotis, ut est minister Ecclesiæ, non prodest excommunicato; quia ipsum Ecclesia privat communibus suffragiis: si denique consideretur sacrificium, ut à persona privata oblatum, excommunicato prodest, ut diximus.

Quæres octavò, an excommunicatus privetur receptione Sacramentorum? Resp. ita privati, ut si durante Excommunicatione, Sacramen-

tum recipiat, peccet mortaliter; quia *ex cap. cum illorum, & cap. si quem, de sent. excommunic.* excommunicatus prohibetur recipere Sacramenta; dum ergo illa recipit, peccat mortaliter, quia facit contra prohibitionem Ecclesiæ in materia gravi; potest tamen ab illo peccato excusari, quando illa recipit ad vitandam infamiam, vel scandalum, vel periculum mortis; quia Ecclesia non præcepit cum tanto incommodo, & præceptum naturale præponderat Ecclesiastico. Licet Excommunicatus peccet recipiendo Sacramentum, nulla tamen afficitur poenâ in jure, nisi recipiendo Ordinem, tunc enim fit irregularis. Licet etiam Sacramentum non conferatur Excommunicato licite, confertur tamen valide, quoad rem sacramenti, estd non conferatur quoad effectum sacramenti, nempe quoad gratiam; quoniam illud recipiens peccat mortaliter. Quod valida sint Sacramenta ab excommunicato ministrata, patet; quia adsunt materia, forma, & intentio ministri, quæ sufficiunt ad Sacramentum conficiendum secundum substantiam. Quod Sacramentum in hac occasione non habeat suum effectum, constat, quia ex parte recipientis ponitur obex, nempe peccatum, ut diximus, nisi bonâ fide illud recipiat, ignorans inculpabiliter, se esse excommunicatum. Quantum ad illos qui Sacramenta Excommunicatis administrant; dicendum est quod illi qui ministrant Excommunicato tolerato, peccent quidem mortaliter, quia Sacramentum ministrant indigno; qui verò ea ministrant Excommunicato vitando, nedum peccant,

quia ministrant indigno; sed insuper incurrunt excommunicationem minorem, quia communicant in divinis cum Excommunicato.

Quæres nonò, utrùm excommunicato prohibeatur administratio Sacramentorum? Resp. primò, hoc illi prohiberi per se, *cap. illud, de clerico excommunicato*; per accidens tamen aliquando excusatur, v. g. dum in articulo mortis, deficiente alio, ministrat Baptismum & Pœnitentiam, quæ necessaria sunt ad salutem; sed, supposito quòd illa ministret extra illum casum, quæri potest, an illa Sacramenta sint valida; ad quod Resp. secundò quod si ministrarentur ab Excommunicato tolerato, valida sunt; quia pro tunc constant materiâ, formâ & intentione ministri. Hinc verum est quod aliàs diximus, validum esse Matrimonium, cui assistit Parochus toleratus & vitandus. Pœnitentia etiam ab Excommunicato tolerato collata, valida est; quia ex parte ministri remanet jurisdictio, & ex parte pœnitentis licitum est communicare cum Excommunicato tolerato, etiam in divinis. An peccet illè qui ab Excommunicato tolerato petit Sacramenta; respondent aliqui, non peccare; sive ille à quo petuntur sit Parochus aut non, sive sit extra necessitatem; sive in necessitate. Et ratio eorum est quod Conc. Constant. in Constit. *ad evitanda scandala*, permittat communicationem in Sacramentis Excommunicato tolerato; ergo permittit ut ab illis peti possint Sacramenta: aliàs, si Fideles peccarent postulando, & excommunicatus toleratus peccaret administrando, tenerentur fideles abstinere à par-

icipatione Sacramentorum cum illo, ut vitaretur illud peccatum: unde dicendum est cum Bonacinâ, illam constitutionem esse directè in favorem fidelium, & indirectè in favorem excommunicati tolerati; sicque nec iste, nec illi peccare debent in illâ communicatione; modò excommunicatus non se ingerat suâ sponte ad illa ministranda. Hæc opinio mihi videtur probabilissima, licet multi contrarium sentiant. Resp. tertio, Sacramenta ab Excommunicato vitando collata, valida esse, ut diximus in præcedenti quæst. excommunicatus tamen vitandus qui illa confert, fit irregularis, ut habetur *cap. si Episcopus, & cap. 1. de sentent. & re judicata in 6.* est enim suspensus ab actibus sui ministerii; & exercens actum sui ministerii, durante suspensione, fit irregularis. Excipiendum est Sacramentum Pœnitentiæ quod ad sui validitatem jurisdictionem exigit in ministrante; omnis autem jurisdictio auferitur ab Excommunicato vitando: ergo absolutio ab illo collata invalida est, excepto articulo mortis, in quo validatur, modò non adsit alius Sacerdos non excommunicatus, licet approbatus non sit. Confessio ergo facta Excommunicato vitando iteranda est; & exprimendum peccatum quod peccator commisit, scienter communicando in divinis cum excommunicato vitando, & explicanda est excommunicatio minor quam contraxit. Resp. quarto, petentem Sacramenta ab Excommunicato vitando peccare, & incurrere minorem excommunicationem, ut diximus, quæ incurritur per communicationem cum illo: excusatur ta-

men casus extremæ necessitatis, in quo Baptismus v. g. qui necessarius est, conferri potest ab excommunicato tolerato, sicut & Poenitentia: imò, aliqui sentiunt, posse conferri Eucharistiam ab illo, dicentes Ecclesiam nil prohibere cum tanto animæ detrimento; & addunt alii, Extremam-Uctionem posse ministrari, quando moribundus potest tantum atteri, nec aliud Sacramentum recipere potest; quo de attrito fiat contritus.

Quæres decimò, utrum Excommunicatus privetur divinis officiis? Resp. primò, ipsi prohiberi celebrationem missæ, *6. latores, c. illud, c. fraternitati, de clerico excommunicato*, etiam si sit toleratus; licet excuseturgens necessitas, ut metus gravis, periculum infamiae, communio moribundi, cui non potest succurri per absolutionem Sacramentalem, nec alio modo, quippe qui est tantum attritus & non potest recipere aliud Sacramentum, quo fiat contritus. Resp. secundò, privari etiam auditione Missæ, *cult. de senten. excomm. in 6.* excusaretur tamen ab illâ prohibitione per necessitatem, & sic non peccaret, inquit Bonacina, inserviando Missæ, ubi alius inservire non potest, & necessario celebranda est Missa. Non peccat ergo mortaliter, dum Missam non audit: si tamen absolutio de facili posset obtineri, & per ipsum stare, quominus absolveretur, non vellem ipsum excusare à peccato; non quidem ratione omissionis præcepti, sed negligentiae notabilis & contemptus censuræ. Licet excommunicatus, etiam surdus, cæcus & mutus peccet mortaliter, dum assistit Missæ, quia est moraliter

præfens; Sacerdos tamen excommunicatus qui sua autoritate est causa, ut in sui præfentiâ Missa celebretur, aut aliud divinum officium, irregularis est. Excommunicatus etiam admonitus à celebrante, ut exeat, incurrit novam excommunicationem reservatam Papæ, si non exeat. Resp. tertio, quod audientes Missam cum excommunicato vitando, peccent mortaliter, & minorem excommunicationem incurrant, quia participant in divinis cum excommunicato: & Sacerdos scienter celebrans coram illo, peccat, excommunicationem incurrit minorem, & ulterius interdicitur ab ingressu Ecclesiæ, *ex cap. Episcopum, de privilegiis in 6.* Si adsit excommunicatus vitandus, dum Sacerdos celebrat, admonendus est ut exeat; si nolit, per vim expellendus est, quamvis sit clericus; & in hoc non erit excommunicatio: si autem sine periculo non possit expelli, deferenda sunt divina officia, & Missa ante canonem: si post canonem, astantes exire debent, excepto inserviente, & Sacerdos debet prosecui sacrificium, cujus integritas est de jure divino; sumpto tamen Sacramento, in Sacristiam se recipere debet, ut ibi, quasi ab excommunicato sequestratus, orationes perficiat. Hæc omnia non intelliguntur de excommunicato ingrediente Ecclesiam, ut per illam transeat, nec de excommunicato tolerato, post Constantiense Concilium; nec quando excommunicatus vitandus in unâ capellâ audit sacrum, & alii in alio aliam Missam audiunt. Resp. quarto, quod etiam excommunicatus vitandus à divinis aliis officiis arceri debeat; &

per divina officia, intelliguntur horæ canonicæ quæ publicè in choro persolvuntur, oratio publica, benedictiones solemnes, & cantus solemnis Epistolæ, vel Evangelii: non tamen prohibetur auditio concionis, *ex cap. responso, de sententiis excommunicationis*; idem sentiunt aliqui de lectione Theologiæ aut Scripturæ. Propter prædicta, non minus tenetur excommunicatus persolvere horas canonicas, quia poena non datur in commodum rei: non debet tamen dicere *Dominus vobiscum*, quia sunt verba personæ publicæ, nempe Diaconi aut Sacerdotis; non fieret tamen in hoc irregularis; quidquid dicant Suares & Navarrus, quia levitas materiæ excusat à peccato & ab irregularitate. Potest insuper quis preces privatas fundere in templo, ubi orat privatim excommunicatus vitandus; & tunc non diceretur communicare moraliter cum excommunicato: nam præsentia materialis excommunicati non conjungit moraliter orationes per modum unius. Resp. quintò, licet participatione in divinis privetur excommunicatus, non tamen privatur omni usu rerum sacrarum; potest enim templum ingredi, dum divina officia non persolvuntur publicè; unde ejectio excommunicati ab Ecclesiâ, non est ab Ecclesiâ materiali, sed à formali, idest à participatione fidelium. Potest insuper benedicere mensæ, morbe Laïcorum; Eucharistiam adorare & uti imaginibus; an verò possit uti aquâ benedictâ, hoc negant aliqui, dicentes esse quoddam Sacramentale.

Quæres undecimò, an excommunicatio

privet Ecclesiasticâ sepulturâ. Resp. affirmativè, c. *sacris, de sepult. & Clement 1. eodem tit.* quod tamen intelligitur de vitandis excommunicatis, qui sepulturâ Ecclesiasticâ privari debent: unde sepelientes excommunicatum vitandum, peccant mortaliter, & incurrunt majorem excommunicationem, ex Clementinâ primâ *de sepulturis*. Sacerdos tamen qui inchoavit missam, non tenetur ipsam deferere, dum affertur cadaver excommunicati in Ecclesiam; nec assistentes discedere tenentur, modo nec ille nec isti ullam actionem exercent circa illud, v. g. ipsum aspergendo aquâ benedictâ, aut benedicendo, aut orando pro illo. Sepelientes excommunicatum toleratum non graviter peccant; quia in Concil. Constant. tantum prohibetur communicatio cum excommunicatis nominatim denunciatis. Si excommunicatus vitandus sit in loco sacro sepultus, exhumari debet, si ab aliis discerni possit, cap. *consulvisi, de consecrat. Eccles.* & si discerni nequeat, nec consequenter exhumari, locus reconciliari non minus debet. Si excommunicatus ante mortem sufficientia signa doloris dederit, & ante absolutionem excommunicationis sepultus fuerit in loco sacro, potest sine exhumatione absolvi, verberato sepulchro; si verò nondum inhumatum sit cadaver, ipsum verberandum est. Quamvis Hæretici non denunciati possint citra violationem sacri loci in illo sepeliri, propter Constitutionem Concilii Constant. privantur tamen aliundè Ecclesiasticâ sepulturâ; quatenus scilicet notoriè mortui sunt in statu impio, nempe crimine Hæresis.

Quæres duodecimò, an excommunicati jurisdictione priventur? Resp. primò, excommunicatum vitandum carere omni actu jurisdictionis propriæ, *c. audivimus dist. 24. q. 1. & cap. 1. de officio vicarii in 6.* Ex quo sequitur excommunicatum vitandum non posse censuram ferre, nec ab ea absolvere, nec ferre sententiam in judicio Ecclesiastico, sive interno sive externo, neque delegare; imò cessat ipsius delegatio: nisi delegatus rem jam antea inchoaverit. Quantum verò ad usum jurisdictionis improprie, illo non privatur; unde, potest assistere Matrimonio; & si sit Parochus, potest alteri talem facultatem delegare; potest etiam contractus facere. Matrimonium contrahere, licet cum peccato mortali, professionem emittere; & condere testamentum, nisi excommunicatus sit propter hæresim aut percussionem Cardinalium, *cap. felix in 6.* Resp. secundò quòd excommunicati tolerati actus jurisdictionis sunt validi; graviter tamen peccat, cum sponte se ingerit illos exercere. Resignatio beneficii facta ab excommunicato tolerato est valida, & etiam talis putatur esse, si fiat ab excommunicato vitando. Electio etiam, præsentatio, & collatio beneficii, facta ab excommunicato tolerato, valida est; & invalida, si fiat ab excommunicato vitando.

Quæres tertiodecimò, an excommunicatio privet beneficiis & eorum usu. Resp. primò, invalidam esse collationem & præsentationem beneficii factam excommunicato; *cap. postulasti de clerico excommunicato.* Quod intelligitur etiam de tolerato, ex doctoribus; neque

etiam ab illâ invaliditate excusat ignorantia invincibilis ; licet enim à culpa dispense , non tamen supplet defectum conditionis requisitæ ad valorem actus , etiam si Papa motu proprio illud conferret ; nisi in illâ collatione ad cautelam dispense ad hunc effectum , quod nequeunt facere Episcopi ad effectum particularem. Resp. secundò , collationem beneficii factam ab excommunicato , esse invalidam , *cap. unico. nè se de vacante. in 6.* Idem dic de electione & præsentatione. Quòd si plures eligant , è quorum numero unus excommunicatus sit , electio est valida , modò absque suffragio excommunicati adsit suffragiorum numerus sufficiens ; aliàs esset invalida. Resp. tertio , invalidam esse collationem officii , tum Ecclesiastici , tum sæcularis , habentis annexam jurisdictionem , factam excommunicato ; cum enim prohibitum sit excommunicato actus jurisdictionis sæcularis exercere , quoniam jurisdictione privatur , ut colligitur *ex cap. presidentes. de hæreticis in 6.* sic etiam debet impediri , nè ad dignitatem perveniat , ubi est jurisdictio. Cum duplici restrictione , inquit Bonacina ; primo , quod si Papa conferat illi quem scit excommunicatum , dignitatem cui annectitur jurisdictio , talis collatio est valida , quia censetur Pontifex cum eo dispensare : secundo , quando quis succedit alicui dominio temporali , cui annexa est jurisdictio , illam valide recipit , non potest tamen illâ uti jurisdictione. Resp. quarto , validam esse collationem beneficii factam excommunicato , qui excommunicationem contraxit , antequam illud acceptaret ,

quia jura irritant tantum collationem & electionem, non vero acceptationem. qui autem excommunicatus erat, dum facta est collatio, & antequam illud acceptet, absolvitur ab excommunicatione, illud retinere non potest; quia non habet titulum validum, & sine titulo beneficiū relineri nequit. Si tamen in ipsā acceptatione collatores in suā voluntate manēant: tunc retineri potest beneficium. Resp. quintò, invalidā cenferi à majori parte doctorum pensionem factam excommunicato; sicut enim est incapax aliorum privilegiorum, sic & pensionis unde obtinenti pensionem à summo Pontifice solet absolutio censurarum concedi ad hunc effectum. Invalida etiam est permutatio beneficii facta ab excommunicato; nullum enim jus in beneficium habet. Qui beneficium vel pensionem obrinuit, dum est excommunicatus debet petere absolutionem excommunicationis, & postea procurare ut beneficium vel pensio sibi de novo conferatur. Resp. sexto licet non possit percipere fructus beneficii ille qui illud obtinuit dum esset excommunicatus; si tamen in excommunicationem inciderit post acquisitum beneficium, non amittit fructus ejus ratione censuræ, nisi interveniat sententia judicis: nam hoc ex nullo jure habetur; imò, *incap. pastoralis, ff. verum*, habetur, quod fructus subtrahuntur excommunicato; quod denotat, non privari illis ipso facto, nec excommunicatum teneri se sponte abdicare à preceptione illorum; sed posse expectare judicis sententiam. Dixi, *ratione censura*; quia si non exequatur munera sui officii, aut si Canonicus absit à choro,

etiam propter excommunicationem, tales fructus percipere non debet; si tamen cogatur abesse à choro propter excommunicationem injustam, illis non privatur; non est enim poena, ubi non est culpa.

Quæres quartodecimò, quid sit excommunicatio minor, & quos effectus producat? Resp. primò, esse censuram Ecclesiasticam quæ privat Fidelem excommunicatum participatione passivâ Sacramentorum tantùm; unde illi qui administrant sacramenta in tali excommunicatione, non peccant mortaliter aut venialiter; sed illa recipiens peccat mortaliter, sicut & ille qui ea ipsi ministrat. Resp. secundò, licet excommunicatio minor possit infligi ab homine, hoc tamen non fit; sed tantùm contrahitur per communicationem cum excommunicato vitando, excommunicatione majori irretito: non incurritur ergo ab illo qui communicat eum excommunicato excommunicatione minori. Licet illa communicatio sit tantùm venialis, non minùs incurritur excommunicatio minor, inquiunt Doctores, *ex cap. nuper de sentent. excommunicationis*. Resp. tertiò, quod duos effectus habeat ista excommunicatio; primus est, privare excommunicatum participatione passivâ Sacramentorum; unde, ut diximus, peccat illa recipiendo, nisi excusetur per ignorantiam, aut scandalum, aut aliud malum imminens; & si recipiat absolutionem, invalida est, nisi antea ab excommunicatione absolva- tur, ut sit communiter à quolibet qui ab hac excommunicatione absolvere potest. Secundus est, quod privet elezione, præsentatione,

& collatione passivâ beneficii aut dignitatis Ecclesiasticæ, quæ irritari debet à iudice; licet præsentare, eligere, & conferre possit illa. Cùm excommunicatio minor habeat tantùm hos duos effectus, potest taliter excommunicatus communicare cum aliis Fidelibus, divinis interesse, & absolvere à peccatis & censuris, quia jurisdictione non privatur.

Quæres quintodecimò quid dicendum sit de præcipuis excommunicationibus majoribus, & primò de illâ quæ contrahitur ob percussione[m] clerici. Resp. primò quod in clericum manus violentas injicientes majorem incurrant excommunicationem Summo Pontifici reservatam, *ex can. si quis suadente*, 13, q. 4. Per violentam manuum injectionem, intelligitur omnis injuriôsa violentia illata personæ clerici, aut monachi, vel rebus illi adhærentibus, quæ tanta sit, ut ablatâ excommunicatione, censeretur peccatum mortale. Unde, qui clericum occidit, mutilat, vulnerat, percutit, sputum aut pulverem injicit in faciem, vestimenta adhærentia dilacerat, violenter detinet, cingulum ephippij incidit, incurrit excommunicationem majorem; licet his actionibus consentiant clerici, quia semper sunt injuriôsæ statui clericali, *ex cap. contingit*, 36. *de sentent. excommunicationis*; & ob hanc rationem excommunicatur clericus se ipsum percutiens ex irâ, modò illa percutio attingat gravitatem peccati mortalis. Resp. secundò, nomine clerici & monachi, qui ponuntur in capite præfato, *si qui: suadente*, multa intelligi; primò, nomine *clerici* omnes saltem qui primâ tonsurâ insigniti sunt,

etiam si sint conjugati: conjugati enim non bigami, modò deferant tonsuram & habitum clericalem, gaudent privilegio Canonis. Qui percutit clericum degradatum realiter, excommunicatus non censetur; benè autem si sit degradatus tantùm verbaliter. Licet clericus sit suspensus, excommunicatur, & irregularis, ipsum percutiens excommunicatus, tunc enim non amittit nomen clerici, aut privilegium Canonis. Nomine *monachi*, intelliguntur omnes religiosi & religiosæ, etiam conversi & conversæ, *c. Monachi, c. de Monialibus, de sentent. excomm.* immò & Novitii; *cap. religioso, eodem tit. in 6.* Sicut etiam Tertarii, qui, etsi non sint religiosi, tamen assumpto habitu monachali, se mancipant obsequiis religiosorum, inquit Bonacina, noster Guillelmus Herinck, & alii. Hoc tamen non est verum de Tertiariis sancti Francisci, qui vivunt extra congregationem, Resp. tertio, multos excusari ab illâ excommunicatione; primò, illi qui percutiunt leviter, joco, irâ ita subitanè, ut peccatum mortale impediatur. Secundò, qui percutit clericum causâ correctionis, modò hoc non faciat ex irâ, nec odio, nec excedat ita modum correctionis, ut peccet mortaliter; *cap. 1. ex tenore, cap. cum voluntate, de sentent. excommunicationis.* Tertiò, quando clericus turpiter agit cum suâ matre, filiâ, uxore, sorore; modò illum percutiat in flagranti delicto; *cap. si verò de sentent. excomm.* & ad hoc sufficit quilibet actus turpis. Ratio quare hoc permittit Ecclesia, est, quia hoc non censetur fieri suadente diabolo, sed ex justo dolore: extra autem illos

gradus non excusatur ; imò , in istis non excusatur à peccato mortali , quia hoc facit auctoritate privatâ ; excusatur tamen ab excommunicatione. Quartò , excusatur qui clericum percutit , quem invincibiliter ignorabat esse clericum. Quintò , ille adhuc excusatur , qui cum moderamine inculpatae tutelæ percutit clericum in vasorem , ut defendat vitam , honorem , famam , pudicitiam , & alia bona sua , vel proximi. Denique excusantur illi qui percutiunt clericum non gestantem habitum & tonsuram clericalem , postquam ter ab Episcopo monitus est , ut illam deferat ; vel clericum qui ter monitus non desistit à sæcularibus negotiis & procurationibus personarum sæcularium ; vel clericum bigamum , quia bigamia privat privilegio canonis. Resp. ultimò , quantum ad absolutionem hujus excommunicationis , quòd triplex sit percussio ; levis scilicet , mediocris , & gravis. Levis non est ea quæ fit sine peccato mortali , sed quæ fit pugno , palmâ , pede , baculo , vel lapide ; & fit sine vulnere , effractione dentis , suggillatione carnis , effusione multi sanguinis , & evulsione multorum capillorum ; aliquando tamen ratione personæ læsæ , de levi fieret mediocris aut gravis , v. g. si in faciem Episcopi aut Capitis monasterii impingeretur alapa. Mediocris illa est , quæ fit cum his omnibus. Gravis denique illa est , quæ fit cum mutilatione , maximâ effusione sanguinis ex membris vulneratis ; vel cum notabili injuriâ personæ notabilis. De excommunicatione ob levem percussione contractâ potest absolvere Episcopus , *cap. pervenit. de sentent. excomm.*

de aliis regulariter solus Summus Pontifex; *cap. si quis suadente diabolo*, aut Legatus à latere; Episcopi verò, quando recursus ad Summum Pontificem est impossibilis, physicè, vel moraliter; vel quando delictum est occultum; Concilium enim Tridentinum sess. 24. cap. 6. concedit Episcopis facultatem dispensandi in censuris occultis.

Quæres sextodecimò, quid dicendum sit de Excommunicatione, quæ contrahitur ex omisâ revelatione in monitoriis. Sunt multæ notatu dignæ excommunicationes, præter antecedentem. Prima est ea, quæ incurritur ob hæresim externùs manifestatam; si quis enim in mente tantùm de Fide malè sentiat, non est excommunicatus, quia Ecclesia non judicat de internis. Illa jure antiquo reservabatur Summo Pontifici, & Episcopi de istâ tantùm absolvebant, tamquam deputati à Summo Pontifice: de jure autem novo, hoc ad ipsos competit, & ad illam absolutionem deputare valent, & hæc centura extenditur ad fautores & defensores eorum, effectu sequuto. Secunda est illa, quæ incurritur à legentibus libros damnatos ob suspicionem hæresis, aut falsi dogmatis; & de istâ potest quilibet Confessarius absolvere, quia non est reservata in jure; modò non sint libri Hæresiarchæ, vel de religione agant, aut contineant hæresim, aut falsum dogma contra mores; si enim unum horum in illis reperitur, excommunicatio regulariter Papæ reservatur. Hoc etiam extenditur ad detinentes & legentes curiositatis gratiâ, & ad legentes libros qui continent divinationes & sortile-

gia. Tertia incurritur propter duellum, quod qui committunt, excommunicantur illicò, ut habetur ex Concil. Trid. sess. 25. cap. 19. & ex variis Summorum Pontificum Constitutionibus. Hæc excommunicatio, à quâ absolvere possunt Episcopi, extenditur ad reges & dominos locorum, qui illud non prohibent; ad illos qui proponunt duellum, & illud acceptant, statim atque utrumque fit; ad socios, patrilios, & spectatores ex industriâ. Quarta est contra cogentes fœminam, viduam, aut virginem, ut monasterium ingrediatur (supple, ad religionem amplectendam) vel habitum suscipiat, vel emittat professionem. Hæc excommunicatio habetur in Conc. Trident sess. 25. cap. 13. & illa non extenditur ad illos qui ad hoc viros cogunt, de hoc enim nullam mentionem facit Concilium, & odia sunt restringenda; nec ad illos qui incutiunt tantum metum levem, aut gravem, ad quem non sequitur effectus. Ab hac excommunicatione nemini reservatâ absolvere potest quilibet Confessarius; sicut & ab illâ quæ habetur loco Concilii citato contra illos qui impediunt fœminas, nè monasteria ingrediantur, ut Moniales fiant. Quintam incurrunt *domini temporales & magistratus*, inquit Concilium Tridentinum sess. 24. cap. 9. *quorum oculi mentis terrenis cupiditatibus ita affecti sunt, ut viros & mulieres sub eorum jurisdictione degentes, qui divites sunt, minis & pœnis adigant cum illis Matrimonium invito contrahere, quos ipsi domini vel magistratus illis prescripserunt. Quare, cum maxime nefarium sit Matrimonii libertatem violare, & ab eâ injurias*

nasci, à quibus iura expectantur; præcipit sancta Synodus omnibus, cuiuscumque gradus, dignitatis, & conditionis existant, sub Anathematis poenâ, quam ipso facto incurrunt, nè quovis modò, directè, vel indirectè, subditos suos, vel quoscunque alios cogant, quominus liberè Matrimonia contrahant. Hæc sunt verba Concilii notatu dignissima.

Aliud est solemne genus Excommunicationis, quam Concilium Tridentinum vocat *ad finem revelationis*, sess. 25. cap. 3. de reformatione, ubi notandum est, quòd sicut ille qui aliena detinet, ea restituere tenetur, sic & ille ad quod bonum injustè usurpatum pertinet, jure merito per quævis licita media contra detentores procedere valet, ut sibi fiat restitutio; cùm autem in foro civili testificationes illi desint, tanquam Christianus qui rem habet cum Christiano, ad Ecclesiasticam jurisdictionem recurrit; Ecclesia autem jus unicuique suum reddere percipiens, Excommunicationem decernit contra injustos detentores, & in eadem censurâ præcipit sub poenâ excommunicationis ipso facto incurrendæ post tres monitiones; omnibus & singulis rei detentæ & detentorum notitiam habentibus, ut factum revelent; quod si exequi noluerint, excommunicationis vinculo ligantur; sicut & ipse injustus detentor, qui non tenetur quidem se prodere, ne detrimentum famæ patiatur; sed partis læsæ damnum resarcire debet, aliàs excommunicationi subjacebit. Hoc ultimum habetur ex Navarro, in manuali, cap. 7. num. 100. *Author verò incendi, aut alterius delicti manifesti occultus, non*

potest poena excommunicationis compelli ad se manifestandum, sed ad restitutionem debitam faciendam. Sic dicendum est de socio delicti.

Quæres ergo decimoseptimò, qui sunt casus in quibus aliquis dispensari potest à revelatione? Resp. primò, ante revelationem delicti alterius, præmittenda est regulariter correctio fraterna, modò speretur emendatio; præcipit enim Evangelium, ut antequam fratrem delinquentem Ecclesiæ deferamus, ipsum corripiamus secretò; & tunc si emendatus fuerit, & satisfecerit parti læsæ, vel ipsi satisfactionem obtulerit, non tenetur amplius revelare; quia satisfecit intentioni Ecclesiæ, quæ tantum requirebat partis læsæ satisfactionem & emendationem delinquentis. Aliqui dicunt, quando iudex Ecclesiasticus insuper intendit punitionem delinquentis, exigì ulteriùs revelationem; sed faciliùs dicerem cum Bonacinâ, iudices Ecclesiasticos, per excommunicationem, quæ est medicina spiritualis, magis intendere emendationem, quàm punitionem delinquentis emendati; & sic, positâ emendatione & satisfactione darris læsæ, non requiri revelationem; sed tepetur quis reparare injuriam cum proportionem ad partem læsam.

Respondeo secundò, neminem teneri ad revelandum factum aliquod, quod scit sub secreto; sive hoc declaretur de amico ad amicum, sive declaretur sub ratione confidentiæ, qualiter fit Procuratoribus, Advocatis, Sacerdotibus extra confessionem, Medicis, & similibus, quibus fit consultatio ad remedium adhibendum pro salute animæ, aut corporis, aut defensione

sione bonorum, imò in hoc peccaret. Ratio est, quia non potest aliquid præcipi nec fieri contra jus divinum, vel naturale; jus autem naturale dicitur ut servetur secretum, nisi justa & rationalis causa contrarium exigat; quæ duplex est, inquit Bonacina, & Canonicus Andegavensis in Tractatu quem recenter edidit de excommunicationibus: Prima quando secretum est de crimine, non perpetrato, sed perpetrando, quod vergit in grave damnum reipublicæ vel personæ privatæ, ut si quis v. g. confidentiam faciat amico, de intentione quam habet tradendi civitatem hostibus, regem occidendi, vel privam personam: amicus ille debet denuntiare, etiam extra monitorium, inquit D. Thomas, etiamsi mors denuntiati inde sequi debeat, & denuntiator sit clericus, modò potestetur se non intendere mortem rei. Sic *Navarrus*, super caput inter verba, num. 222. *Valentia* tom. 3. in summam sancti Thoma, disp. quæst. 10. puncto 3. *Bonacina* disp. 2. quæst. 6. puncto 1. num. 7. Sic etiam præfactus *Canonicus*, fol. 249. In his tamen inquirunt, servanda est prudentia Christiana, ita ut talis revelatio non fiat, si aliter delictum queat impediri; & reveletur crimen, non persona, si hoc sufficiat; & semper correctio fraterna præcedat, excepto primò crimine læsæ majestatis ait *Lopes*, ubi est periculum in morâ. Secunda causa est, si quis sciret impedimentum occultum Matrimonii, tunc ad revelationem teneretur, non obstante secreto, etiamsi solus hoc cognosceret; quia in hac materiâ unus testis sufficit, ut habet glossa in Cap. præterea 2.

de sponsal. sic omnes Doctores. Ratio fundans has exceptiones, petitur ex jure naturali, ex quo habemus quòd obligatio minor de jure naturali, majori cedere debeat; fortior autem est obligatio conservandi bonum commune, aut impediendi grave damnum privatum, quam observare secretum, cujus observatio cedit tantum in vitam civilem & aliud in vitam realem & physicam. Hi duo casus non intelliguntur de secreto Confessionis.

Resp tertiò, excusatur quis ab excommunicatione, & alii à revelatione, quando in detentione boni alieni fit justa compensatio; v. g. Petrus detinet decem nummos, qui sunt Joannis; & Joannes vi aut dolo detinet prædium Petri, vel aliam rem; Joannes tamen obtinet excommunicationem in Petrum (quem dicit esse detentorem boni alieni) & in non revelantes: in tali casu Petrus excommunicationem non incurrit, nec etiam illi qui non revelant; modo certo sciant, hoc fieri per justam compensationem. Ratio omnium doctorum est, quia sententia fertur tantum in injustum detentorem, & in non revelantes illum, imò, inquirunt, nulla esset excommunicatio: etiamsi Episcopus excommunicaret illos qui ad sui compensationem alienum detinerent; illa enim censura errorem intolerabilem contineret, ferendo poenam gravem in illos qui non deliquerunt; & Episcopus in hoc peccaret, abutendo autoritate Ecclesiæ, quæ intendit præcipere, ut quisquis habeat quod suum est. Caveri tamen debet, ne illa compensatio cum scandalo fiat, ne etiam fiat de bonis quæ depo-

nuntur apud Joannem, sed non sunt ipsius; nè eandem Petrus prævideat, quòd sine periculo, & sine poenâ possit sibi revendicare prædium à Joanne usurpatum.

Resp. quartò, quando aliquis parti læsæ satisfacere non potest, pars lædens non subjicitur excommunicationi, nec illi qui factum aut debitum non revelant, hanc impotentiam agnoscetes; quia *agnoscetes, de constit, rem quæ culpa caret, in damnum vocari non convenit*. Debitor tamen cautionem afferre debet, si possit; vel se obligare tenetur creditori, cum hac suppositione, quòd si solutionis capax efficiatur in posterum, soluturus sit reverà: ad hoc etiam procurandum tenentur illi qui debiti scientiam habent, aliàs & ille & isti excommunicatione ligantur.

Resp. quintò, illos à revelatione dispensari, qui revelare nequeunt sine gravi damno, actuali vel imminente; quod advenire sæpissimè potest, quando excommunicationes feruntur in dominos, iudices, & talis authoritatis viros, qui revelantibus mortem, percussionem gravem, aut bonorum vastationem minantur: si tamen hæc non immineant, subditi non excusantur à revelatione contra dominos; contra illos enim recipiuntur in testes. Ratio hujus exceptionis est, quia unusquisque ad sui & suorum bonorum conservationem tenetur, tum jure naturali, tum ex motivo charitatis cujus ordo exigit, ut Deum primò, nos postea, & proximum denique diligamus & sic non intendit quòd nos exponamus periculo, ut utilitatem temporalem aliorum

procuremus. Si tamen per illam revelationem grave damnum reipublicæ impediretur ; aut notabilis illi afferretur utilitas , tunc bonum publicum privato præponderare debet , in-
quiunt Doctores.

Resp. sextò , à revelatione excusari parentes intra quartum gradum inclusivè , sive illi gradus sint consanguinitatis , sive affinitatis : sic Doctores , qui cùm loquantur indefinitè , intelligendi sunt de excusatione revelationis , tum in civili , tum in crimine , si excipiatur crimen hæreseâs & læsæ majestatis in fieri. Ratio hujus veritatis duplex offertur ; primò , quia si parentes in se invicem deponerent , ad familiæ suæ concurrerent detrimentum , quod est contra jus naturæ. Secundò , conservanda est unio inter parentes , & vitanda est inter illos discordia , ex præscripto naturæ ; contrarium autem fieret , si in sese invicem deponerent aut revelarent. Hoc tamen intelligi vellem , si agatur de gravi damno ; secùs si de levi. Excusantur etiam domestici , ubi imminet grave damnum horum , nè pax domestica turbetur ; non tamen filii spirituales ; quia possunt esse testes in patres.

Resp. septimò , non tenentur revelare illi qui non sunt subditi Episcoporum , à quibus emanant excommunicationes. Nec illi qui audierunt delictum ab illo qui jam denunciavit ; ad inutile enim nemo tenetur. Nec illi , qui sciunt probabiliter nullum remedium esse adhibendum à judice , factâ revelatione ; secùs , si de hoc tantùm sit dubitatio. Nec illi , qui certò sciunt delinquentem se emendasse , aut parti-læ-

sæ satisfecisse. Nec ille, qui solus vidit delictum, cujus probatio haberi non potest, quia *testis unus, testis nullus*; sed pro tunc tantum correctionem fraternam admittere debet, quia si revelaret delictum occultum, sine spe ullius utilitatis, infamiâ notaret proximum. Nec illi qui excommunicationem ignorant bonâ fide: non dicuntur tamen illi ignorare bonâ fide excommunicationem, qui absunt ex contemptu à Missa Parochiali, in quâ monitiones excommunicationum publicantur; nec illi, qui dicunt monitoria non fuisse publicata in suâ Parochiâ; eo enim ipso, quo aliquis scit excommunicationem ferri, ut habeatur revelatio delicti, tenetur revelare, modo feratur intra Diocesim; Episcopus enim hoc præcipit omnibus sibi subditis, siue sint ex illâ, vel illâ Parochiâ. Nec illi qui non verè sciunt delictum; illi autem non verè dicuntur delictum cognoscere, qui illud audierunt à viris levibus & fide non dignis; sed ut aliquis dicatur verè delictum cognoscere, illud vidisse debet, vel saltem audivisse ab iis qui ipsum viderunt.

Quæres ultimò, quis possit ab Excommunicatione absolvere. Duæ sunt Censurarum species; aliæ enim sunt à jure, aliæ ab homine; illarum quæ sunt à jure, aliæ sunt reservatæ in ipso jure, aliæ non. Hoc posito.

Resp. primò, à censuris latis à jure, si reservatæ sunt, nullus potest absolvere, nisi qui eas tulit, aut ejus superior, aut successor, aut ille qui de hoc per commissionem, aut privilegium, specialem habet facultatem. Si sententiar, quæ sunt à jure, nemini per ipsum jus re-

servantur , ab illis absolvere possunt omnes , qui absolvere possunt à mortalibus ; non quidem auctoritate propriâ , cùm nullam habeant jurisdictionem externam , sed ex commissione juris latâ , *cap. nuper*. Excommunicationes denique quæ sunt ab homine , sive per generalem sententiam , quales sunt illæ quæ per monitiones in illos feruntur , qui tale delictum perpetrarunt , sive per particularem ; possunt tantùm ab illo absolvi , vel à successore , vel à superiore in dignitate.

Resp. secundò , in aliquibus casibus , illum qui excommunicavit , non posse absolvere ; delegatus enim qui excommunicavit in obediens , post annum non potest eum absolvere , sed ad illum est recurrendum qui delegavit. Incendiarius etiam excommunicatus ab Episcopo , post denuntiationem , à Papâ absolvi debet , *cap. tua nos. de sentent. excommunicationis*. Quando Papa sententiam ab Episcopo latam certâ scientiâ confirmavit , Episcopus non potest absolvere. Pontifex alicui præcipiens , ut alium excommunicet sine cognitione causæ , illa censura reservatur Pontifici , quia Episcopus in hoc casu est purus executor. Quando denique Episcopus denuntiat spoliatores Ecclesiæ cum effractione illius esse excommunicatum , talis excommunicatus à solo Pontifice absolvi potest.

Resp. tertio , alias esse censuras reservatas Papæ , alias Episcopo. Illæ continentur in Bullâ Cœnæ , quæ sunt contra Hæreticos , Apostatas à fide , fautores eorum , Legentes libros ipsorum qui agunt de religione , vel Retinen-

tes, contra Schismaticos, Appellantes ad futurum Concilium à sententiis Summi Pontificis, Judices sæculares trahentes Ecclesiasticos ad sua tribunalia, contra Falsarios litterarum Apostolicarum, contra Impedientes prælatos, nè Ecclesiasticâ jurisdictione utantur, contra surripientes Christianorum naufragantium bona, imponentes onera Ecclesiasticis, occupantes bona Ecclesiæ Romanæ, & similes. Aliæ excommunicationes, quæ Papæ reservantur, continentur in Decretalibus (nam in toto corpore decreti quod à Gratiano congestum est, invenitur tantum una excommunicatio reservata Pontifici, quæ est contra clericorum percussores) in Clementinis & in extravagantibus. Quoad excommunicationes quæ reservantur Episcopis, sunt illæ quæ feruntur in constitutionibus synodalibus, & quæ fulminantur ab ipsis Episcopis.

Resp. quartò, ex Concilio Trid. sess. 24. cap. 6. de Reformat. posse Episcopos absolvere à censuris Papæ reservatis, quando ortæ sunt ex delicto occulto & non deducto ad forum contentiosum. In variis etiam casibus possunt absolvere ab excommunicatione contractâ ob percussione clericis: v. g. si quis sine periculo hostium non possit adire Summum Pontificem, si sint Pueri, si sint Monachi, si sint Mulieres, si sint Moniales, aut alii qui aliquâ impotentia notabili Romam adire impediuntur: si tamen impedimentum est temporaneum, Episcopus absolvens debet injungere reo, ut cessante impedimento, se præsentet summo Pontifici, ejusque pareat mandatis; aliàs in

excommunicationem reincident, *cap. eos qui, de sententia excommunicationis, in 6.* Quando in jure reperitur excommunicatio reservata, & non exprimitur cui reservata sit; intelligi debet tantum reservata Episcopo; odia enim sunt restringenda. Quando etiam in Constitutionibus Synodalibus Episcopi aliquid præcipiunt sub poenâ excommunicationis; & non sibi reservant talem excommunicationem, quilibet sacerdos approbatus in Diœcesi absolvere potest; quia est censura juris non reservata.

Resp. quintò quòd licet in foro conscientie ab Excommunicatione juris occultâ, non reservatâ, possit absolvere omnis sacerdos approbatus; hoc tamen non impedit quin possit sic absolutus deduci in forum contentiosum, & poenis à jure latis contra excommunicatos subiacere. Superior etiam qui jurisdictionem externam habet, potest quidem, etiamsi non sit sacerdos, absolvere à sententiâ Excommunicationis, in foro externo; non potest tamen absolvere à delicto, nec à contumaciâ, ob quam contracta est Excommunicatio. Ut ergo in foro conscientie & litigioso absolvere queat, debet habere utramque jurisdictionem; internam scilicet, ut absolvat à peccato & à contumaciâ; & externam, ut absolvat ab Excommunicatione contractâ per peccatum; sed debet actus istius jurisdictionis præcedere, & absolvi excommunicatus à censurâ, priusquam à peccato; nam ille qui non est liber à censurâ, incapax est absolutionis sacramentalis, & cujuscumque alterius Sacra-

menti ; unde in forma absolutionis , absolutio censurarum præcedit absolutionem peccatorum.

Resp. sextò , Archiepiscopus non potest, nisi in duobus casibus , absolvere à censuris suffraganeorum, quia licet sit illis superior in dignitate , non est tamen in jurisdictione. Sic habetur *can. nullus*, 9. q. 3. *nullus primas, vel metropolitani Diocæsani Ecclesiæ, vel Parochiam, aut aliquem de ejus Parochia præsumat excommunicare, vel judicare, vel aliquid agere absque ejus consilio*. Si autem non possit excommunicare, neque absolvere potest ; *cujus enim est ligare, ejus est solvere*. Primus casus in quo absolvere possunt Metropolitani , est in casu suæ visitationis, in quo casu Ordinarii vices gerunt, & absolvere possunt à censuris, & peccatis, *c. perpetuo, de censibus*, in 6. Indulgentiasque impendere, *c. nostro, de pœnit. & remiss.* Secundus reperitur in causa appellationis ; tunc enim si sententia Ordinarii sit injusta, ipsum absolvere potest Metropolitanus, *cap. venerabilibus, de sentent. excomm. in 6. ff. sanè*, si verò justa sit, non per seipsum absolvere debet, sed remittere ad Diocesanum, à quo concedatur absolutio, *cap. per tuas, de sentent. excomm.* si denique dubitetur, an sententia Ordinarii justa sit, vel injusta, potest absolvere Archiepiscopus, ex eodem *cap. venerabilibus*, honestius tamen est, si excommunicatori deferat in hoc casu Si in aliqua Diocesi esset aliquis Archidiaconus, aut Archipresbyter, qui ex jure vel privilegio excommunicare posset, *non minus tamen absolvere potest Episcopus*, inquit

Glossa super can. *nullus 9. q. 3. quia Archidiaconus est Vicarius Episcopi.*

Resp. septimò quòd non obstante appellatione ab Ordinario ad Metropolitanum, Ordinarius appellantem adhuc absolvere queat; sic Innocentius IV. super caput, *qua fronte*, ubi habetur, *licet iudex detulerit absolutioni, tamen adhuc se intromittit de jurisdictione, scilicet quia absolvit.* Ratio est, quia appellatio tantum impedit ea quæ sunt in præjudicium appellantis, non verò illa quæ illius utilitati cedunt. Quando aliquis ab Episcopo excommunicatus est ad instantiam partis, consensus ipsius partis facultatem non confert, ut ab alio quàm à iudice, absolutio conferri valeat. Licet Vicarius Generalis commissionem generalem habeat gerendi vices Episcopi in omnibus, non tamen excommunicationem ferre potest, neque absolvere ab illâ, nisi specialem habeat de his commissionem. Hoc habetur in Clementinis, *c. non potest. de procurat.*

Resp. octavò, ut aliquis possit absolvi, debet prius læsæ parti satisfecisse actualiter. Sic habetur *c. ex parte, de verb. signific. si offensa est manifesta, non credimus satisfieri congruè, ut relaxetur sententia: nisi prius sufficiens præstetur emendatio.* Si facultates satisfaciendi defint, intentio exigitur, & cautio satisfaciendi, antequam detur absolutio; & si qui absolvant absque his conditionibus, peccant mortaliter, ad restitutionem tenentur, & per annum suspenduntur ab officio, *ex can. pessimam. 23. q. 8. Si quis Archiepiscopus vel Episcopus hoc relaxaverit, damnum restituat, & per annum ab officio*

Episcopali abstineat. Ibi fit quidem mentio de Incendiariis, sed hoc etiam intelligi debet pro illis delinquentibus excommunicatis, quorum delictum vergit in damnum alterius. In extremâ necessitate, non exigitur satisfactio præcedens, nec cautio, quæ reperiri sæpius non potest; sed exigendum est saltem iuramentum quod si aliquando satisfaciendi facultas suppetat, satisfactio fit reverà. In mortis articulo, si periculum sit in morâ, sine præviâ satisfactione, à quocumque sacerdote potest absolvi moribundus, modò intentionem satisfaciendi & quantum fieri potest cautionem præbeat. Licet autem, morte imminente, quilibet sacerdos possit de omnibus censuris absolvere, injungere tamen debet pœnitenti, ut accedente convalescentiâ, se, quamprimùm commodè fieri poterit, iudici offerat; non quidem, ut de novo absolvatur, quia censetur absolutus; sed ut mandatum ipsius recipiat, & satisfaciat, pro ut justitia suadebit; aliàs in eandem censuram eo ipso reincidet, ut hæc omnia habentur *c. eos qui de sentent. excomm. in 6.* Porro per articulum mortis intelligendi sunt alii casus, ubi mors probabiliter evenire potest, ut in civitate obsessis, mare conscendentibus, iter aggredientibus periculosum, se pugnæ committentibus, parturientibus foeminis in partu periclitari solitis, &c.

Resp. nonò, requiri voluntatem pœnitentis, ut absolvi queat. Hoc primò requiritur in foro interiori Pœnitentiæ, ubi peccator absolvi nequit, nisi dolorem eliciat de peccato & absolutionem recipere velit. Hoc etiam in foro

exteriori exigitur; debet enim Ecclesiæ suam obedientiam & conversionem manifestare, quod fit communiter per genuflexionem & prostrationem; sic habetur, *cap. cum aliquis, 11. quæst. 3. terra prostratus veniam postulat, & de futuris cautelam spondet.* An autem aliquis possit invitus absolvi; hoc insinuare videtur Divus Thomas dist. 18. quæst. 2. art. 5. sed hoc debet intelligi, modò cessaverit peccatum & contumacia, & præcesserit satisfactio patris, aliàs absolvi non potest, quia censuræ causa manet; nisi per talem censuram magis indurescat peccator, & pro tunc illam relaxare potest iudex, sed discretè, inquit D. Thomas, loco præcitato.

Resp. decimò quòd si aliquis multiplici excommunicatione innodetur, ab unâ absolvi potest, & non ab aliis; quia ex Divo Thomâ hoc sentiente in 4. dist. 18. art. 5. nullam inter se excommunicationes habent connexionem; hoc ergo pendet ab intentione iudicis, & à formâ pronuntiandi absolutionem. Unde si poenitens pluribus excommunicationibus per eundem iudicem ligetur, si talis iudex ab unâ absolvat, ab omnibus censetur absolvere; modò contrarium non constet, vel modò poenitens non celaverit aliquam ex causis pro quibus aliquam excommunicationem contraxit, vel modò omnes excommunicationes exposuerit; secus enim faciens ab illis non censetur absolutus, nisi absolvens illas omnes agnoscat, aut etiam non cognoscendo eas, absolutionem ferat sub his terminis generalibus, aut illis æquivalentibus, *Absolvo te ab*

Hac excommunicatione, & ab omnibus aliis quarum non habes memoriam. Dum aliquis ab unâ censurâ absolvitur, & non ab aliâ, non propterea ad receptionem aut administrationem Sacramentorum rehabilitatur, sed adhuc prorsus remanet extra Ecclesiam. Porro absolutio sub falso prætextu collata, nulla est; quia iudex absolvere non intendit, nisi cum iustâ causâ.

Resp. undecimò quod duplex sit absolutio excommunicationis; una est simplex, quæ sine ullâ conditione irahitur; alia est conditionata, quæ confertur ex conditione. Quod absolutio excommunicationis sub conditione præteritâ & præsentî valida sit, consentiunt omnes, sicut & absolutio peccatorum, & collatio Baptismi: an autem valida sit sub conditione de futuro, aliqui negant, alii probabilius affirmant; sic aliquando iudex in monitoriis dicit, *Excommunicamus eos, qui de tali facto notitiam habent, nisi intra tale tempus revelationem emittant*: sicut ergo excommunicatio fertur aliquando sub conditione futurâ, sic & absolutio ejus sub eâdem conditione dari potest. Quod si absolutio sacramentalis non possit dari sub conditione de futuro; hoc est quia absolutio illa est sacramentalis instituta à Christo, quæ, positâ formâ, suspendi non potest; absolutio verò excommunicationis est sententia introducta à jure, sicut & ipsa excommunicatio, & ideo effectus ejus à voluntate judicis pendet, qui potest ita effectum absolutionis suspendere, ut positâ conditione, sequatur & ipsa absolutio.

Resp. duodecimò, ad excommunicationem conditionatam reduci illas excommunicationes, quarum una vocatur *ad cautelam*, & alia *ad reincidentiam*. Excommunicatio *ad cautelam* datur aliquando in casu appellationis; ubi verbi gratiâ appellatio fit de excommunicatione latâ ab Episcopo ad Archiepiscopum, vel Papam; tunc excommunicatus, prætendens censuram in se latam esse invalidam, ab Archiepiscopo postulat, ut absolvatur saltem ad cautelam, donec ultima pronuntietur sententia; & pro tunc Archiepiscopus *ad cautelam* absolvere potest, si velit; talis enim absolutio est pura gratia. Aliquando datur etiam absolutio *ad cautelam* in foro conscientiæ, in formâ scilicet absolutionis, ubi dicitur *absolve te à vinculo excommunicationis, si quam incurristi*; & hoc fit ut pœnitens sit capax absolutionis Sacramentalis. Aliquando denique datur in electionibus, illis scilicet qui electuri sunt, nè electio illorum sit invalida, si aliquâ excommunicatione innodarentur; & in hoc casu absolvuntur *ad cautelam*, & ad hunc tantum effectum, unde postea absolvi debent simpliciter. Absolutio *cum reincidentiâ* est ea quâ aliquis absolvitur sub aliquâ conditione apponendâ, quæ si non apponatur, in illam statim reincident; ut quando in mortis articulo Sacerdos absolvit sub conditione, quòd postea pœnitens, si convalescat, accedat superiorem & legitimum judicem, ut illi pareat.

Ex his omnibus quæ excommunicationis absolutionem concernunt, cognosci possunt

quæ de aliarum censurarum absolutione sentienda sunt; unde pauca tantum de illis dicere supersunt.

QUESTIO III.

De Suspensione.

SU SPENSIO est censura Ecclesiastica, quæ prohibetur personæ Ecclesiasticæ exercitium sui Ordinis, Officii, aut Beneficii, in totum vel in partem, in tempus certum, aut perpetuum, vel à iudice, vel à jure. Ex quo patet esse triplicem Suspensionem; Officii tantum, v. g. prædicationis, Beneficii tantum, & Officii & Beneficii simul; quæ omnia possunt cognosci, videndo tenorem censuræ. Quia Suspendio est censura Ecclesiastica, ferri debet ab habente jurisdictionem Ecclesiasticam externam; unde, Parochus suspendens Sacerdotem, nè Missam celebret in suâ Ecclesiâ, talis Suspendio non est propriè censura, & qui illam violaret, non fieret irregularis; sed est simplex prohibitio, quæ limitatur ad locum; idest, ne talis Sacerdos Missam celebret in Ecclesiâ Parochi. Suspendio una non includit aliam, quia suspensus ab Ordine seu ab Officio, non suspenditur à Beneficio, nec è contra: suspensus etiam ab uno actu, non suspenditur ab alio; & sic suspensus ab officio prædicationis, non suspenditur à celebratione Missæ: suspensus etiam à majoribus, non suspenditur à minoribus, bene è contra. Violando suspensionem, committitur.

peccatum mortale, & incurritur irregularitas. Quoad casus in quibus incurritur Suspendio, videndi sunt Casuistæ. Quoad absolutionem ejus; dico quòd si sit lata ab homine, qui eam tulit, potest absolvere, vel superior, aut ejus successor. Quòd iudex tulerit censuram, donec peccator satisfecerit, vel poenitentiam, egerit, vel debitam ætatem attigerit, his impletis conditionibus, cessat. Quando etiam fulminatur Suspendio pro aliquo tempore, illo expleto, cessat. Quoad Suspensiones latas à jure, à quibusdam potest absolvere Episcopus, v. g. si crimina sunt occulta; ab aliis solus Summus Pontifex potest, v. g. ubi crimina sunt notoria. Videantur ea quæ diximus de absolutione excommunicationis.

Q U Æ S T I O I V .

De Interdicto.

INTERDICTUM est poena Ecclesiastica, quâ in aliquâ terrâ, vel Ecclesiâ, vel personis interdicatur administratio Sacramentorum, celebratio divinorum Officiorum, aut executio aliquorum spiritualium, v. g. prædicationis. Interdictum vel est locale tantum, vel personale tantum; vel locale & personale simul. Primum est, quando prohibetur celebratio divinorum in tali, vel tali loco. Secundum est, quando celebratio divinorum prohibetur Ecclesiasticis talis urbis, vel talis Ecclesiæ. Tertium est, quando celebratio divinorum prohibetur

personis hujus loci, vel in hoc loco. Quicumque violant interdictum, peccant mortaliter; & si sint clerici in sacris Ordinibus, incurrunt irregularitatem; si verò sint in minoribus Ordinibus, non incurrunt, quia lex fertur tantum in clericos majores. Interdictum loci non includit interdictum populi; unde solo loco interdicto populus potest audire sacrum alibi. Interdictum populi non includit etiam interdictum loci; unde licet sacerdos & populus talis urbis interdican- tur, externi possunt audire sacrum in eodem loco, etiam januis patentibus. Interdicto clero, non interdicitur locus, nec laici; nec interdicto populo, interdicitur clerus. Quando interdictum fertur pro urbe, fertur etiam pro suburbis. Quando fertur pro Ecclesiâ, fertur etiam pro sacellis & cæmeteriis contigu- is, non tamen pro clero. Per interdictum prohibentur omnia divina officia, sacramenta & sepultura Ecclesiastica. Plura non dicam de Interdicto, quia conditiones ejus communiter feruntur in literis in quibus fertur interdictum; deinde, non est sæpe in usu.

Q U Æ S T I O V:

Quid sit Irregularitas?

IRREGULARITAS non est censura Ecclesiastica, nec pœna canonica, sed est impedimentum, seu inhabilitas inducta à jure canonico, impediens receptionem Ordinum, vel usum

eorum , quia Irregularitas non est censura ; ideò falluntur illi, qui in Jubilæo putant Confessarios posse absolvere ab irregularitate , quia in Bullâ Jubilæi licentia datur absolvendi ab omnibus censuris. Falluntur , inquam , quia irregularitas non comprehenditur sub nomine censuræ ; unde nemo in Jubilæo potest absolvere ab irregularitate , nisi de eâ fiat expressa mentio. Quoad divisionem ejus , quintuplex statuitur. Prima provenit ex defectu Sacramenti. Secunda ex defectu corporis. Tertia ex defectu animæ. Quarta ex homicidio. Quinta ex ea quæ annectitur certo alicui crimini expresso in jure canonico. De illis sigillatim agemus.

Quæres, quid sit irregularitas procedens ex defectu Sacramenti ? Resp. esse eam quæ oritur ex bigamia : bigamia est autem status conjugati cum duabus conjugibus , sive simul , sive successivè. Qui ergo duas uxores duxit , fit irregularis , & non potest Ordines Ecclesiasticos , aut officia , aut beneficia recipere. Triplex est bigamia. Prima est vera , quando quis cognovit duas uxores successivè. Secunda interpretativa , quando quis contraxit cum viduâ , vel cum aliâ cum quâ ipse commisit adulterium , vel alius. Tertia est similitudinaria , quando scilicet quis Ordine sacro insignitus , vel astrictus voto solemnî , contrahit cum aliquâ & consummat , licet sit Virgo. In his tribus speciebus bigamiæ contrahitur irregularitas de quâ solus Papâ potest dispensare ; imò in verâ bigamiâ , non solet dari dispensatio , nisi magna ex causa.

Quæres , quando contrahitur Irregularitas ex defectu corporis? Resp. in his casibus oriri. Primò , quando quis privatur aliquo membro ob culpam suam; v. g. si sit in poenam alicujus delicti , vel si ipse absciderit sibi membrum ob indignationem , ut habetur *can. si quis absciderit* , dummodò hoc ultimum sit notorium. Si autem privatio membri advenit sine culpa ; si ille defectus impediatur usum Ordinis, aut importet notabilem deformitatem in usu , irregularitas incurritur ; si neutrum facit , non incurritur. Sic qui habet tantum unum oculum , propter deformitatem est irregularis ; qui autem caret , non oculo , sed visu unius oculi , non sit irregularis , nisi fuerit oculus sinister , ut dicunt canones , quia eum dextro non posset legere canonem sine indecorâ conversione faciei ad populum. Notat tamen Navarrus , quod si hæc deformitas posset vitari , impeditur irregularitas. Secundò , quando quis habet membrum superfluum , aut nimis grande ; sic Canones. Quod tamen intelligitur , si impediatur Ordinum , aut afferat nimiam deformitatem . de qua solus Episcopus judicare potest. Tertiò , quando quis est illegitimus , etiam occultissimus ; si credat matri , debet occultè petere dispensationem ; si non credit , non tenetur. In hac irregularitate ad minores & ad simplex beneficium potest dispensare Episcopus : ad majores & curatum beneficium solus Pontifex. Dubium est , utrùm infans , de cujus legitimatione non constat , possit promoveri ad Ordines. Duo Casuistæ citati à Biusfeldio affirmant , alii negant , præsertim Convarru-

vias, dicens quod nullus in dubio præsumitur legitimus, sed in talicasu potest dispensare Episcopus. Quartò, qui ante debitam ætatem Ordinem suscipiunt, suspensi sunt, & dum exercent, fiunt irregulares: Si quis tamen ex simplicitate & sine dolo hoc faceret, neutrum incurreret ex Navarro. Qui infectantur leprâ, vel habent alias infirmitates scandalosas, ut epileptici, obsessi à dæmone, phrænetici, & abstemii qui talem vini habent horrorem, quod nequidem guttulam deglutire possint sine vomitu. Sextò, tandem hermaphroditi, infames & servi fiunt irregulares; isti tamen possunt Ordinari cum facultate domini sui, & tunc fiunt liberi.

Quæres, in quibus casibus contrahatur Irregularitas ex defectu animæ? Resp. primò, quòd sit irregularis qui caret scientiâ necessariâ ad usum sui Ordinis; & hic defectus, quamdiu durat, tamdiu facit irregularitatem. Ad primam tonsuram requirit legere & scribere Concilium Tridentinum, & ad minores Ordines linguam Latinam. Secundò, hæc Irregularitas incurritur defectu judicii; unde idiotæ non potest Ordinari. Tertiò, non baptisati fiunt irregulares, quantumvis aliundè fidem haberent. Catechumeni, Hæretici, & fautores hæreticorum, idem filii hæreticorum, usque ad secundam generationem per lineam masculinam, & usque ad primam per lineam foemininam, similiter, Judæi, Saraceni, & Pagani; & in his solus Papa dispensat.

Quæres, quid sit Irregularitas ex defectu homicidii? Resp. duplicem esse; una oritur

ex homicidio justo, & vocatur Irregularitas ex defectu personæ, lenitatis, seu mansuetudinis; quia ille qui occidit & mutilat, etiam ex justa causa, non censetur habere perfectam mansuetudinem, nec in hoc Christum imitari. Alia oritur ex homicidio injusto, quæ vocatur Irregularitas ex delicto. Irregularitas utraque non tantum contrahitur ex homicidio, sed etiam ex mutilatione alicujus membri; per membrum autem intelligitur ea pars quæ habet officium per se distinctum in corpore, ut sunt manus, pes, auris; unde qui alteri amputaret digitum, non esset irregularis.

Homicidium duplex est, nempe voluntarium quod fit cum intentione occidendi; & involuntarium quod fit præter intentionem agentis. Voluntarium duplex est; nempe justum, quale committere dicuntur judex, testis, tortor, & similes qui sunt justa causa, cur morti reus tradatur: & injustum quod committunt illi, qui sine justâ causâ aliquem trucidant, ex odio & perversâ intentione.

Quicumque Christianus, usu rationis pol-
lens, committit homicidium voluntarium in-
justum, fit irregularis; argentes ergo, furiosi,
& infantes non fiunt irregulares, concurrendo
ad mortem, quia ratione uti nequeunt; nec
etiam infideles, qui non sunt subditi Ecclesiæ
à quâ fertur & declaratur Irregularitas; nec
etiam illi qui embrionem destruunt, quia em-
brio non est homo, nec destructio embrionis
hominis cædes. Illi qui dant causam propriam
injustæ occasionis aut mutilationi, illam com-
mittendo, vel consulendo, aut juvando, aut

imperando, sunt irregulares; nisi mandatum vel concilium revocaverint, & illam declaraverint revocationem mandatario. Faber qui arma cudit quibus mors illata est, non fit irregularis, quia est tantum causa remota homicidii. Permittens homicidium non fit irregularis, nisi teneatur illud impedire ex officio vel stipendio; si autem ad hoc tantum teneatur ex charitate, non fit irregularis, nec peccat contra præceptum, homicidium prohibens, sed solum contra charitatem.

Quoad homicidium justum; modò contrahitur irregularitas, illud committendo, modò non. Non contrahunt illi qui alios occidunt à quibus invaduntur, modò hoc fiat cum moderamine inculpatæ tutelæ, etiam si occasionem dederint invasori, v. g. adulterando cum ipsius uxore. Quòd si fugere valens, non fugiat invasorem, sed ipsum occidat, fit irregularis, quia non servat moderamen inculpatæ tutelæ, nisi talis fuga ipsi cedat in notabilem infamiam. Idem dicendum est de illo, qui alium occideret ad devitandam bonorum suorum depradationem, vel proximi sui, maximè si sit ex amicis intimis; tunc enim deprædatorem occidere licere creditur sine irregularitate, si aliter furtum impediri non possit. Irregulares verò sunt illi qui extra casum conservandi vitam aut temporalia bona, siue sint propria, siue amicorum, aliquem, etiam justè, occidunt; unde iudices, accusatores, testes, proferentes sententiam, consilium præbentes, Notarii, Advocati & Procuratores accusatorum, sequuta morte, irregularitatem eo ipso contrahunt. Non tamēn

Advocati loquentes in favorem accusati, nisi per eorum patrocinium injustum sint causa cur accusator injustè tradatur morti, aut mutilationi; aut nisi imperitia Advocati sit causa, cur accusatus quem defendere suscepit, ad mortem damnetur: quod idem dicendum est de imperito medico, cujus ignorantia mortem ægroti causat. Prælati Ecclesiastici jurisdictionem habens temporalem, potest quidem judicem laicum instituere, & mandare illi, ut suo fungatur officio: nequit tamen præcipere in particulari, ut aliquem condemnet ad mortem; nec assistere debet judicio aut executioni, ne videatur approbare talem condemnationem, aliàs fieret irregularis. Clerici sine irregularitate conqueri possunt de suis malefactoribus; modò protestentur, se mortem illorum non intendere, si ve illa sequatur, si ve non. Clerici non habentes jurisdictionem, adesse possunt judicio sanguinis, & executioni; hoc tamen indecens est, & eos non vellem à peccato veniali excusare. Qui sunt causa propria, cur mors acceleretur, sunt irregulares, sicut Confessor, qui obtineret à judice, ut strangularetur ille qui comburendus erat, aut qui diceret patienti: ascende scalam citius, admove caput stipiti, vel qui diceret tortori: fungere tuo officio; sicut etiam illi qui ligna ad comburendum hæreticos portarent, si illa ligna cooperata sint ad mortem. Non sunt tamen irregulares, qui ex accidenti mortem aliquando accelerant sine intentione, ut sunt illi qui infirmos movent, aut vinum præbent ægrotis, bona fide, licet ex utroque mors sequatur; nisi evidenter probabile

fit, mortem ob hoc esse accelerandam. Si Laicus Medicinam aut Chirurgiam exercent secundum regulas artis, non fit irregularis, etiam si propter sanitatem amputet membrum; quia non deest lenitas, quando præscinditur pars, ut totum servetur. Si culpâ Medici aut Chirurghi pereat ægrotus, contrahitur irregularitas, censetur enim causa injusta mortis. Clericus in minoribus existens, licet sit beneficiarius, exercere potest Medicinam & Chirurgiam sine irregularitate, etiam abscindendo & adurendo: hoc enim talibus non prohibetur. Majoribus ordinibus initiati non possunt exercendo Medicinam aut Chirurgiam, amputare aut adurere, imò hoc faciendo, fiunt irregulares, nisi hoc faciant in extrema necessitate, v. g. tempore pestis, ubi alii desunt. Si tamen mors sequuta non fuerit, nulla est irregularitas, nam illa non consurgit ex quacumque mutilatione, sed tantum ex illa in qua est defectus perfectæ lenitatis, ut quando amputatio præcipitur à iudice. Medicus porrigens ægrotò Medicinam dubiam, relicto certo remedio, fit irregularis, si mors sequuta fuerit. Si desit certum remedium, & salus infirmî desperata est, non fit irregularis qui porrigit dubium, etiam sequuta morte; quia prudentius agit qui tentat viam dubiam sanitatem restaurandi, quam qui infirmum deserit in statu insperatæ salutis. Si salus infirmî non est desperata, pharmacum dubium qui applicat, fit irregularis; nam fieri potest, ut ægrotus propter illud decedat. Sacerdos, qui per regulas artis applicat emplastrum mollicativum ex quo mors sequitur, absque illius

illius culpâ, non fit irregularis; quia non dicitur mederi per abscissionem. Clericus consensens, aut præcipiens abscissionem; aut adjuvans Chirurgum abscindentem, non fit irregularis, modò hoc faciat ex peritiâ artis, etiam sequutâ morte; quia jus prohibet tantum abscissionem, & pœna lata contra facientes aliquid, non ligat mandantes, nisi exprimatur. Clericus sacris initiatus aperiens venam ad emittendû sanguinem, fit irregularis, sequutâ morte, quia hoc est propriè incidere; aliqui tamen contrarium sentiunt, dicentes venæ apertionem pertinere ad officium tonsorum, quod clericis non prohibetur à jure, & non Chirurgorum; sed hoc immeritò dicitur.

Quantum ad homicidium casuale; duplex est. Unum simpliciter casuale, quod non est voluntarium in se, nec in causâ, quale committitur ab ebrio, qui antequam se vino daret, nullo modo homicidium prævidit; tale homicidium nec directè, nec indirectè est voluntarium, nec in se, nec in causâ. Non in se, quia quando ebrius occidit, hoc est sine advertentiâ rationis; nec in causâ, quia cum se dedit vino, de homicidio non cogitabat: cum ergo illud homicidium sit purè casuale & nullo modo voluntarium, non est peccaminosum, nec irregularitatem inducit; unde amentes, furiosi, ebrii, infantes, dum occidunt, non fiunt irregulares. Aliud homicidium est non purè casuale, quod scilicet est voluntarium in causâ, licet sit involuntarium in se; quando v. g. aliquis ante ebrietatem statuit inimicum occidere, deinde, cum ebrius est, ipsum trucidat, tale homicidium est quidem directè & in se casuale,

quia est involuntarium, indirectè tamen & in causâ voluntarium est, & sic qui illud committit, fit irregularis: modò ante ebrietatem diligentiam non præmiserit, ut impediretur homicidium, curando v. g. aliquos sibi assistere tempore ebrietatis, qui homicidium impediant; tunc enim homicidium redditur involuntarium. Qui dando operam rei licitæ, occidit, non fit irregularis; modò diligentiam adhibuerit. Dans operam rei illicitæ, censetur irregularis (licet diligentia adhibita fuerit) ex Sylvest. Toletò, & aliis, contra communio rem Doctorum sententiam. Quod si res illa illicita sit periculosa de se, una pars Doctorum sentit contrahi irregularitatem; qui dat enim operam rei illicitæ periculosa, censetur homicidium velle ex ea sequens; altera contrarium tenet, quia periculum purgatur per diligentiam adhibitam: sed dicere cum Bonacina irregularitatem contrahi reverà, si ex tali actione mors communiter sequi solet; secùs si tantùm rarò. Conficiens arma, aut chartas lusorias, ex quibus mors sequitur, non fit irregularis, quia est tantùm causa remota mortis. Tradens aliquid infirmo, vel tradi consulens contra præceptum medici, fit irregularis, si mors acceleretur; secùs, si quis hoc faciat bona fide, & non contra præscriptum medici. Pharmaci componentes medicinas ex rebus corruptis, incurrunt irregularitatem, si mors sequatur; quia dant operam rei periculosa illicitæ, nec diligentiam adhibent. Qui alium casu occidit secans lignum in die festo, licet det operam rei illicitæ, non fit irregularis; quia illa actio non est periculosa in ratione homici-

¶ *Si. Magister occidens vel mutilans discipulum, excedendo modum correctionis, & non adhibendo diligentiam, fit irregularis; non verò si leviter tantum vulneravit, etiamsi mortuus fuerit ex imperitia Medici, vel ex intemperantiâ discipuli. Ecclesiasticus iudex præcipiens sæculari, ut reum puniat de crimine quod non mereatur mortem aut mutilationem, non fit irregularis; estò sæcularis iudex excedat in punitione, & reus moriatur; quia est tantum causa casualis. Qui præcipit Petro, ut Paulum occidat, fit irregularis, si ipse Petrus à Paulo occidatur, quia præcepit opus illicitum periculosum, & non adhibuit diligentiam; Hostiensis contrarium sentit. Qui consulit alteri actionem periculosam, ex quâ mors sequuta est, dolosè & non bona fide, fit irregularis; sic sunt illi qui duellum suadent, aut periculosum trajectum fluminis periculosi, vel viæ in qua inimici præparaverunt insidias. Qui projicit lapidem in Petrum, & Paulum occidit, Petro declinante lapidem, irregularis censendus est communiter, quia non censetur adhibuisse sufficientiam diligentiam; Petrus verò declinans lapidem non censetur irregularis, licet illa declinatio sit causa mortis Pauli, quia utitur jure suo. Qui choream ducit cum muliere prægnante, si saltatio immoderata sit, fit irregularis, abortu sequuto; quia sufficientem diligentiam non adhibet, ut vitetur abortus; sic & ille qui uxorem prægnantem cognoscit, non addita præcautione. Qui inter dormiendum infantem in lecto susceptum interimit, non adhibens diligentiam, redditur irregularis. Qui lapidibus, aut hastis, aut gladiis certant, aut ni-*

veis pilis, & oculum eruunt, non adhibita sufficienti diligentia, fiunt irregulares; sicut & illi qui rectum reficientes, regulas projiciunt, nec transeuntes monent qui mutilantur. Super irregularitatem ortam ex quocumque homicidio potest dispensare Summus Pontifex: Episcopi autem possunt quidem dispensare super homicidium casuale, non verò super homicidium voluntarium, nec super casuale publicum; quia ex Concil. Trident. sess. 14. cap. 7. facultas conceditur Episcopis dispensandi in irregularitate proveniente ex delicto occulto, excepto homicidio voluntario. Episcopus ergo dispensare potest illum qui incendit leviter percutere, attamen accidit homicidium; potest etiam illum dispensare, qui mandavit servo alterum percutere tantum leviter, attamen occidit; sicut & illum qui alium occidit occultè ad sui defensionem, licet non observaverit moderamen inculpatæ tutelæ, quia tale homicidium non censetur voluntarium; non verò potest dispensare cum illo qui alium joco percutit leviter, sed postea seriò prosequitur, ex quo sequitur homicidium, licet sit occultum; quia voluntarium censetur. Nec potest etiam dispensare irregularem ex occulta occisione in bello justo; sed dispensare potest illum qui fecit mutilationem injustam, modò sit occulta; quia ex Concilio dispensare potest super irregularitatem ex delicto occulto proveniente.

Quæres, quid sit Irregularitas ex delicto. Resp. quòd sit illa quæ oritur ex certis quibusdam delictis, quibus ex jure annectitur irregularitas, & hi casus principales sunt. Primò,

quando aliquis deformat alium, id est, mutilat aut occidit, de quo antea diximus. Secundò quando quis malè suscipit, aut exercet Ordines; ex primo irregulares fiunt ex communiori Doctorum sententia qui ligati majori Excommunicatione scientes recipiunt Ordines majores, *ex cap. cum illorum, de sentent. Excomm. in 6.* non verò suspensi aut interdicti, quia jura loquuntur tantum de Excommunicato. Fiunt etiam irregulares qui eodem die, inscio Episcopo, recipiunt Minores & Subdiaconatum, vel duos Majores, *ex cap. 1. & 2. de eo qui furtivè ordinem recipit*, de quâ irregularitate dispensare potest Episcopus, modò delictum sit occultum; qui verò per saltum Ordines recipit, est quidem suspensus; sed non irregularis, nisi exerceat solemniter: sed ille qui furtivè recipit, irregularis censetur à pluribus, & ab aliis tantum suspensus; & furtivè ille dicitur recipere Ordines, qui ordinatur nesciente Episcopo, vel non examinante, aut qui alium sub suo nomine examinandum sufficit, deinde vocatus proprio nomine suscipit Ordines. Irregularis etiam fit qui conjugatus Ordines suscipit sacros, *ex Extravag. antiqua concertationi*: sicut & ille qui Ordines majores suscipit ab Episcopo, qui suæ jurisdictioni renunciavit, aut qui suspensus, excommunicatus, interdictus, vel hæreticus est notorius; non verò ille qui sine Confirmatione Ordinatur. nulla enim est irregularitas, si non sit in jure expressa. Ex secundo, seu ex Ordinum usu, fiunt irregulares, qui Excommunicari maj. excom. suspensi, vel interdicti, exercent solemniter actus majoris Ordinis, etiam si sint occulti,

ex cap. *Si quis Episcopus in Concilio*; nisi excusentur ex necessitate, vel inadvertentia, aut occasione vitandi scandali. Qui cantat ergo ut Hebdomadarius in choro, (non alii) qui canit Epistolam aut Evangelium solemniter, hoc est cum manipulo vel stolâ, qui baptizat solemniter, qui consecrat aquam benedictam; qui absolvit sacramentaliter, qui benedicit sponsis, vel ministrat Eucharistiam, fiunt irregulares, quia exercent actum sui Ordinis; non verò sacerdos excommunicatus aut suspensus assistens Matrimonio, quia non exercet propriè actum Ordinis, nec jurisdictionis propriæ: si hæc delicta sint occulta, Episcopus dispensare potest. Porro, exercens scienter actum solemnem Ordinis majoris, quem non habet, fit irregularis, cap. enim 1. & 2. *de clerico non ordinato*, habetur quod nunquam Ordinetur, & hoc sonat irregularitatem; & pro tunc, si delictum sit publicum, solus Papa dispensare potest, ut ad ultiores Ordines accedat, si verò sit occultum, dispensat Episcopus, & licet sit publicum, dispensare potest, ut exerceat susceptum Ordinem.

Tertium delictum ex quo incurritur irregularitas, est Baptismi reiteratio culpabilis, quâ possit, rebaptizans & rebaptizatus sunt irregulares, imò & Acolythus ministrans solemniter in reiteratione Baptismi, cap. *ex literatum. de Apostatis*. Non tamen incurritur irregularitas ob reiterationem Confirmationis aut Ordinis; non incurritur enim nisi sit in jure expressa, & in censuris non licet argumentum ducere à simili. Qui differt baptizari usque ad mortem vel ægritudinem, irregularis censetur cap. *si quis diff.* 57.

Irregularitatem etiam incurrit qui baptisatur ab hæretico, modò hoc cognoscat & patiatur.

Quartum delictum est Hæresis, ex quâ irregularitas contrahitur; unde Hæretici, Apostatæ à fide, eorumque fautores, irregulares censentur, etiam si sint occulti; cap. *saluberimum*, *quæst.* 1. ad hoc tamen requiritur, ut hæresim externo signo indicaverint; Ecclesia enim non judicat de internis. Qui exterius profert hæresim, & interiùs benè sentit, irregularis non est, nec Hæreticus; sed Apostata à fide, qui interiùs benè sentit de Deo, & exterius idolum veneratur, irregularitatem contrahit, cap. *Presbyteros*, dist. 50. quia peccat contrâ præceptum negativum Fidei. Pactum cum dæmone ineuntes, irregulares fiunt, quia sunt suspecti hæresis, & ex illâ susceptione oritur infamia, quæ facit irregularem. Schismatici, quorum separatio non est conjuncta cum hæresi, non sunt irregulares, quia ex cap. *is qui, de sent. excom.* non incurritur irregularitas, nisi sit expressa in jure: Apostata à statu clericali, qui habitum non habet, nec tonsuram, non est irregularis; sed benè apostata à religione, quandiu manet in illâ quo tempore ad ordines promoveri non potest. Filii hæreticorum sunt irregulares, cap. *statum 2. de hæreticis*; sed hoc non est in usu in pluribus locis.

Quintum delictum est infamia, siue sit infamia juris, siue sit infamia facti. Infamia juris oritur quando imponitur alicui à iudice pœna infamiæ; vel quando quis per sententiam iudicis damnatus est crimine gravi infamiam involvente, ut sunt Furtum, Usura, Simonia, Hæresis, Sodomia, &c. vel quando aliquis crimen infame

confessus est in judicio. Infamia facti oritur ex delicto commisso, infamiam involvente, modò sit publicum & notorium majori parte viciniae. Ubi attendi debet quod aliquis possit notari infamiâ juris, licet non notetur infamiâ facti; si scilicet per falsos testes damnatur à judice pro crimine non commisso. Stante infamia qualibet, nullus potest ad Ordines promoveri; sed infamia auferri potest per emendationem, scilicet manifestam, si sit infamia facti; vel infamia juris, per declarationem Summi Pontificis, aut Episcopi in minoribus criminibus, si sit infamia juris canonici; vel per abolitionem principis, si sit infamia juris civilis.

Sextum delictum erat olim Pœnitentia solemnîs, seu potius crimen ob quod aliàs pœnitentia injungebatur solemnîs: triplex enim erat Pœnitentia; Sacramentalis secreta, quæ imponebatur à sacerdote; Publica non solemnîs, quæ injungebatur ab Episcopo ob crimen publicum, non tamen enorme aut scandalosum; & Publica solemnîs quæ injungebatur etiam ab Episcopo, initio Quadragesimæ, cum illis cæremoniis quæ continentur in Canone, quibus v. g. pœnitentes tenebantur, cereis accensis præ manibus, & diademate imposito capiti, stare in foribus Ecclesiæ, dum persolvebantur divina officia. Illi, quibus talis injungebatur pœnitentia, erant irregulares: sed non est ampliùs in usu.

Porro, ex bello potest interdum oriri irregularitas; sed hoc distinguendum est. Primò, quicumque occidit aut mutilat in bello justo, vel injusto, sit irregularis, modò non occidat ad conservationem suæ vitæ, quam, nisi

occidendo, conservare non potest. Adverte tamen quòd si bellum sit injustum, illa irregularitas vocatur ex delicto, & si bellum sit justum, vocatur ex defectu lenitatis. Secundò, pugnans in bello justo, ubi fiunt homicidia, non est irregularis, modò ille non occiderit aut mutilaverit; nec à fortiori consulens bellum justum; nec clerici qui in genere hortantur milites ad pugnandum; sicut nec illi qui hortantur aliquem ut moriatur pro fide vel patriâ, quia non est tam cooperari morti alterius, quam cooperari ipsius charitati, aut amor patriæ. Tertiò, qui pugnat in bello injusto aut illud consulit, aut hortatur milites, sit irregularis, si homicidium sequutum fuerit. Sic & illi qui suadent tentare periculum sine necessitate. In bello justo contrahitur irregularitas ab illo qui suadet ut occidatur aliquis in particulari; non verò, si suadeat tantum in communi. Quartò, qui dubitat probabiliter aliquem occidisse etiam in bello justo, irregularis est, secus si non dubitet; *ex cap. petitio tua*. Quintò, præbentes arma etiam offensiva, in bello justo, non fiunt irregulares, *ex cap. petitio tua*; bene autem illi qui ea præbent in bello injusto. Quando clerici se committunt bello ex consensu summi Pontificis, non censentur irregulares etiam si occidant; censetur enim Papa illos dispensasse. Quoad absolutionem irregularitatis contractæ in bello; solus Papa regulariter dispensare potest, quia licet hoc homicidium posset esse occultum, & possint Episcopi dispensare de irregularitate occulta; hoc est semper exceptâ illâ quæ procedit ex homicidio voluntario.

Finis tertiæ Partis.

Extrait du Privilege du Roy.

PAR Grace & Privilege du Roy , donné à Versailles le 14. Octobre 1677. Signé, Par le Roy en son Conseil DESVIREUX : Et scellé : Il est permis à EDMOND COUTEROT Marchand Libraire-Imprimeur à Paris, d'imprimer ou faire imprimer, *P. Ioan. Gabrielis Boyvin Theologia Scoti à prolixitate, & subtilitas ejus ab obscuritate vindicata, &c.* en telle marge, caractère, & en autant de volumes qu'il voudra, pendant le temps de vingt années, à compter du jour que chaque Volume dudit Livre sera achevé d'imprimer pour la premiere fois, en vertu dudit Privilege; avec deffenses à tous Libraires & Imprimeurs de l'imprimer, d'en vendre & debiter d'autre impression que de celles dudit COUTEROT, & de ceux qui auront droit de luy, à peine de confiscation des Exemplaires contrefaits, trois mille livres d'amande, & de tous dépens, dommages & interets, aux charges portées par ledit Privilege, & aux peines y contenuës.

Registré sur le Livre de la Communauté des Libraires & Imprimeurs de Paris le 20. Octobre 1677.

Signé E. COUTEROT Syndic.

Achevé d'imprimer ce troisiéme Tome de *P. Boyvin Theologia* pour la premiere fois en vertu dudit Privilege le 10. Juin 1683.









